



TECA NAZ.  
o Emanuele III

XIX

E

54

NAPOLI







# PETREIDOS

LIBRI XXIV.

ANTONII MIRABELLI

SANCTAE NEAPOLITANAE ECCLESIAE

PRESBYTERI.



---

VOL. I.

---



NEAPOLI  
EX TYPIS AGRELLIANIS  
MDCCCLIX.

Terra omnium terrarum alumna, eadem et parens, numine Deum electa, quae caelum ipsum clarius faceret, sparsa congregaret imperia, ritusque molliret, et tot populorum discordes ferasque linguas, sermonis commercio contraheret; colloquia et humanitatem homini daret; breviterque, una cunctarum gentium in toto orbe patria fieret.

PLIN. Hist. III, 3.

. . . . .  
Ch'ei fu dell'alma Roma e del suo impero  
Nell'empireo ciel per padre eletto;  
La quale e il quale ( a voler dir lo vero )  
Fur stabiliti per lo loco santo,  
U' siede il successor del maggior Piero.

DANTE, Inf. C. 2.

Isti sunt qui te ad hanc gloriam provexerunt, ut gens sancta, populus electus, civitas sacerdotalis et regia, per sacram Petri sedem caput orbis effecta latius praesideres religione divina, quam dominatione terrena. Quamvis enim multis aucta victoriis jus imperii tui terra marique protuleris, minus tamen est, quod tibi bellicus labor subdidit, quam quod pax christiana subjecit.

S. LEO Serm. I, in Nat. Apost.

# PIO IX. PONT. MAX.

---

ANTONIUS MIRABELLI.

*Si quis, BEATISSIME PATER, aequo animo regnorum, atque imperiorum vicissitudines contemplatur, nihil profecto ista, in qua sedes sanctissima Petri Cathedra, perpetua temporum constantia diuturnius, nihil rerum gestarum splendore gloriosius, nihil universae humani generis necessitati accommodatius occurrit. Cum enim mortalium animis ad veri rectique normam conformandis ea divinitus fuerit comparata, singularem quamdam divinae bonitatis atque perennitatis exhibet speciem, quae attingit a fine usque ad finem fortiter, et disponit omnia suaviter <sup>1</sup>. Vicariam Christi in terris*

<sup>1</sup> Sap. VIII, 1.

*nacta potestatem, Religionis arcem et stationem Romae constabiliuit; per universum terrarum orbem missis praeconibus, Dominicæ Redemptionis fructum communicavit; ethnica superstitione deleta, novis constituendis legibus principia induxit; scientias barbarie extorres e postliminio revocavit, easque, caliginosis tenebris depulsis, ad vivissimæ lucis serenitatem traduxit; litteras artesque, ingeniosorum hominum inventa, novis pulchrarum rerum imaginibus objectis, instauravit, uti Graecis et Romanis non inviderent, morum sanctimonia, et rerum tractandarum gloria praeaccelerent. Quippe praemonuerat Deus: Ecce nova facio omnia: et, humanae naturae nobilitate redintegrata, ut reipsa nova omnia fierent, ethnica omnia recederent, Christi ductu, atque auspiciis Illa perfecit in omnibus Europae finibus; utque eadem humanae naturae reparatio universis gentibus ac nationibus communicetur, continenti sollicitudine adlaborat. Singulare profecto ac magnificum contemplanti animo spectaculum! in tanta rerum universitate unum existere Supremum humani generis Patrem, Eumque voce, scripto, sacris expeditionibus totum terrarum orbem lustrare, filios aberrantes quaerere, e diuturna peregrinatione ad Dominicam caulam redeuntes pastoralis sollicitudine excipere, et in amissam veri bonique hereditatem restituere! Ita profecto sese res habet, BEATISSIME PATER, uti de Christi regno propheta Daniel praedixit: Dedit illi potestatem, et honorem, et regnum; et omnes populi, tribus et linguae illi serviunt: potestas ejus potestas aeterna quae non auferetur, et regnum ejus quod non corrumpetur<sup>1</sup>.*

*Verum triumphale istud iter, quo per universas orbis*

<sup>1</sup> Dan. VII, 14.

*regiones catholica procedit Ecclesia, quibus vepribus, et dumetis est circumseptum ! Ex quo caelestis ille humani generis Reparator Chirographum decreti, quod erat contrarium nobis, tulit de medio, affigens illud Cruci, et exponians principatus et polestates traduxit confidenter, palam triumphans illos in semetipso <sup>1</sup> ; magna belli contentione terra marique depugnat, nec nisi continenti praeliorum serie in gloriosissimam sui regni possessionem venit. Duo illa Domini effata animo insident: Si mundus vos odit, scitote quia me priorem odio habuit — Portae inferi non praevalerunt adversus eam. Itaque fortitudinis et spei clypeo obarmata, bellum a Christo inceptum et profligatum proseguitur, ut princeps tenebrarum e toto terrarum orbe omnino ejiciatur.*

*Primum, ideoque gloriosissimum certamen fuit sub Nerone, A. R. S. LXV, cum, promulgato per orbem universum Evangelio, ethnicae impietatis superstitione, judaeae gentis perfidia, romanae urbis corruptela, graecanicæ sapientiae vanitas contra Christianam religionem, uno veluti agmine surrexere. Antehac parvula, quamvis frequentia certamina tentata: tunc demum gliscens jam scintilla belli in apertum incendium erupit, deque rei summa decertatum, non in domesticis parietibus, atque umbratili exercitatione, sed in sole et pulvere, in urbe Roma, in arce ipsa romani imperii, atque omnium populorum domicilio. Hinc stetit Roma vetus, omnium gurgis vitiorum; illinc parvus coetus, romana prior Ecclesia, Christianarum omnium virtutum floribus locupletata: hinc Nero (neque in terris luculentior fuit Satanae effigies); illinc Petrus Christi vicarius, et sum-*

<sup>1</sup> Coloss. 11. 14.

*mus christianae religionis antistes. Cui porro contigit victoria? fumantibus ethnicae Romae ruinis pontificia Roma superstructa emicuit.*

*Ad majorem B. Petri, et Romanae sedis gloriam, primum istum Romanae Ecclesiae triumphum Principis Apostolorum martyrio illustratum poemate nostro tractandum aggredimur: et quo vitiorum coeno oblitum, quanta superstitione contaminatum, qua tyrannide oppressum, quibus malorum omnium procellis pessumdatum romanum imperium ingemisceret, velut in tabula depictum exhibemus. Jure meritoque Lector exclamare poterit: Eo humanum genus devenerat! Quis tantam rerum mutationem intulit? Romanus Pontifex, per octodecim saecula, et amplius, Christo auspice adlaborans.*

*Jucunda sane recordatione recole, cum primas Petreidos adumbrationes Gregorio XVI. P. M. offerrem, quanta me exceperit charitate. Ille acerrimo ut erat ingenio, uno oculorum obtutu, totius operis metitus difficultates, proposito collaudato, ut bono Ecclesiae Romanae verteret, bene ominatus est. Quod idem Romae, cum studiorum causa venissem, ORE TUO licuit excipere, PIE, P. M. qui voce et scriptis currenti stimulos addidisti. Suscepti igitur consilii habeo duos Pontifices auctores atque hortatores, Vobisque opus susceptum perfectumque auctoribus, Vobis jure quodam suo sistitur ac dicatur.*

*Ecce nunc, Deo bene juvante, Petreis nostra in lucem hominum prodit, TUO ornata NOMINE. PONTIFICIA MAJESTAS, qua totum circumfulget argumentum, insuetam operi quam nequit profecto poetae imbecillitas, conferet dignitatem. Latinum eloquium, illud ipsum quo supremus christianae reip. moderator universos terrarum populos adloquitur, an-*

*tiquiore quodam splendore pontificalis imperii majestatem prae se fert. Mihi sat erit ethnicae Romae spoliis ad Christianae Romae triumphum ornandum uti; cumque romana Pontificum vox nullis terrarum finibus circumscribatur, eo ipso supremum romani pontificatus molimen ostendere, quod apud Christum ejusque Vicarium nullae sunt gentium exceptiones, nullaque potior cura, quam ut ex universis gentibus et nationibus coalescat in Christi nomine una familia, cui unus Deus, una fides, unum baptisma.*

*Dolendum enimvero est, BEATISSIME PATER, tantam vim tempestatis Romanam cathedram circum strepere. Sed in dolore Ecclesia parturit filios suos, et majorem divinae hujus matrisfamilias foecunditatem nulla unquam aetas demirata est. Non ergo memorarim, quae ad Romam istam tuam exornandam pontificali magnificentia aggredieris; ipsa tuis coeptis tellus obsecundare videtur, cum christiana templa, longa barbariei intercapedine, consepulta, per TE squalore deterso, sacras amplificant antiquitates; et Romae Veteris urbes et viae erudratae tantam monumentorum segetem suppeditant, ut quotidianas ingeniis faces, novum Pontificiis musaeis ornamentum augeant. Verum in externa re libentius versabor, cum permulta PONTIFICATUM TUUM supra omnem memoriam illustrant, quae non dicam sperare, sed ne cogitare quidem nemo potuisset. Vidimus in Britannia et Hollandia Hierarchiam constitutam, ita ut nobilissimae Ecclesiae, quae temporum iniquitate prostratae huc usque in tenebris ingemiscebant, Te duce, suis pastoribus ornatae in lucem conspectumque hominum prosiluerint. Vidimus in Germania Catholicae religionis libertatem restitutam, ibique non modo Praesules constantissimos sacrosancta Christi praelia apostolica firmitudine praeliari, sed doctissimos*

*viros ad Ecclesiastica jura vindicanda ingenii aciem convertere, ut, unde ad animarum perniciem pestifera errorum seges suboluit, inde lux veritatis totam rem litterariam illustraret. Neque tantummodo Europae finibus inopina isthaec ad Sedem Apostolicam animorum facta est conversio. Vidimus Americas frequentissimo Episcopatu locupletatas, laetasque illas Ecclesias inter effusas omnium sectarum discordias, Evangelicam pacem recentioribus populis ostendere, tantaque, si opus est, constantia collatis armis, cum hoste congregi, ut priora rei christianae tempora praeseferrant. TIBI PONTIFICI (quod Antecessorum tuorum perenne fuit desiderium) videre licuit, Turcas per tot saecula Europae, et Christianis cervicibus continenter insultantes, nunc demum eo imbecillitatis recidisce, ut nulla illis spes, nulla salus effulgeat, nisi in Christi caulas refugiant; TUQUE orientales Ecclesias diuturno servitio pessumdatas, injecto vividiori spiritu, ad Romanam cathedram, quae via, veritas et vita est, studeas revocare. Patuit TIBI campus in Africa per gloriosissimas Francorum victorias (eamdem semper et ubique generosissimam gentem christianae reipublicae antesignanam videre est); et Hipponensis Pontificis cineres justa laetitia exultavere, cum apostolicae suae peregrinationis sedem latrociniis ereptam Evangelicae sanctitati viderint restitutam. Quid memorem, quantis incrementis in Armenia, in Aethiopia, in Indiis, Sinisque res Christiana coaluerit? Neque aliter profecto, BEATISSIME PATER, TIBI poterat contingere, cujus consiliis Ea semper praefuit quae errorum omnium expultrix, et catholicae religionis magistra Sanctorum Patrum praeconiis fuit nuncupata, Beatissima Virgo, Dei Mater. O singularem pontificatus tui gloriam, quam pientissimi Decessores Tui volis ominibusque apprecati sunt,*



quamque pietati tuae potissimum Ipse divinus Spiritus reservavit. Cum enim omnium saeculorum desideriis satis feceris, et divinae Matris Conceptum ab originis labe immaculatum pontificio oraculo definieris, Ipsa mortalium, immortaliumque Regina singularis gloriae ornamento per Te aucta, et omnium populorum linguis celebrata, in suscepto Romanae Ecclesiae patrocinio vehementius perseverat, inexhaustos divinae beneficentiae fontes uberius effundit, cunctasque gentes ac nationes ad sese, atque divinum Filium trahere videtur. Enixis igitur precibus, BEATISSIME PATER, Deum O. M. obtestamur, uti TE quam diutissime ad tantam catholicae Ecclesiae amplitudinem sospitet. Virtutum sane tuarum exemplar luculentum jamdiu totus terrarum orbis admiratur, Teque intuentibus, quorum nomen habes, Pii VI, et VII subit memoria. Eadem in apostolici culminis fastigio mansuetudo: idem in sacris Romanae Ecclesiae juribus tutandis pectoris robur, eadem in adversis ferendis constantia. Si inter innumeras quibus distineris sollicitudines, aliquantisper oculos in nostram Petreida conjicies, quae primi saeculi historiam continet, TIBI omnium saeculorum occurret commemoratio, quibus mysticum istud, cujus gubernaculo assides, navigium jactari quidem potuit, submergi non potuit, eandemque pontificatus tui imaginem expressam habebis. Si quid autem vel solatii, vel oblectamenti inde obvenerit TIBI, amplissimum laborum meorum fructum percipere videbor. Gratissimum Patri a filiis in moerore circumdari; gratum et filio paternam indulgentiam promereri. Habe igitur hoc meae in TE inque PETRI CATHEDRAM observantiae documentum, totumque TIBI obsequentissimum, pontificiis pedibus obvolutum, paterna benedictione prosequere.

DILECTO FILIO

**PRESBYTERO ANTONIO MIRABELLI**

NEAPOLIM

---

**PIUS PP. IX.**

*Dilecte Fili, salutem et Apostolicam Benedictionem. Nos plurimum delectat egregius religionis, pietatis, et observantiae cultus, quo dignitatem prosequeris infirmitati Nostrae divina dispositione delatam, ac Litteras idcirco libentissime accepimus, quibus Nobis Te majorem in modum commendavit Dilectus Filius Noster Xistus Cardinalis Riaro-Sforza Archiepiscopus Neapolitanus. Id enim a multis annis Tibi, Dilecte Fili, proposuisse intelleximus, ut nempe Romani Pontificatus historiam, Maximorum Pontificum praeclara gesta, illatasque ipsis ab persecutoribus aerum-*

*nas, carcerem, exilium, et mortem, eorundem in his omnibus perferendis constantiam et virtutem, ac splendidissimos inde consecutos Catholicae veritatis triumphos, latinis carminibus memoriae hominum traderes et commendares. Quod quidem splendidum omni ex parte argumentum, catholicae cuique genti gratissimum, auspicia et praesidia a Nobis postulat, qui in suprema hac Petri Cathedra constituti egregiis illis domesticisque exemplis ad illustria Decessorum Nostrorum vestigia sectanda continuo incitamus. Tibi idcirco permittimus, ut latinum illud carmen, quod titulo Petreidos exarasti, quodque iudicio mox probatum fuit spectatissimi ejusdem Neapolitani Antistitis nomini Nostro inscribere ac typis edere possis in lucem. Quod superest, caritatem, qua viros prosequimur de christiana religione deque litterarum cultu ad pietatem fovendam benemerentes, Tibi testamur denuo ac confirmamus. Illius hunc pignus habeas Apostolicam Benedictionem, quam omnis auspiciem gratiae caelestis ipsi Tibi, Dilecte Fili, amanter impertimur.*

*Datum Romae apud S. Petrum die 31 Decembris, Anno*  
**1859.** Pontificatus                      Nostri                      Anno                      XIV.

PIUS PP. IX.

---

# PETREIDOS

## LIBER I.

---

### ARGUMENTUM

Propositione totius operis praemissa, et facta invocatione ad Divum Petrum, christianae Romae conditorem, et ad primos Romanae Ecclesiae Martyres sub Nerone passos, narratio incipit ab florentissimo Ecclesiae Romanae statu, anno Christi LXV, Petri XXIV, ex primo adventu ad Urbem — Die sacra Pentecostes appropinquante, festum auspicatissimum, et christiani Orbis principium quantamaxima adparatione Summus Pontifex celebrare statuit, quod extremum suae terrestris peregrinationis foret, et nova laetitiae causa toti Ecclesiae accessisset — Cum Paulo, Lino, Cleto et Clemente (qui primus Romanae Ecclesiae Senatus) orto de rebus urbis, et orbis sermone, de ingruentibus christiano nomini bellis deque gloriosa Christi victoria colloquitur, et Lino et Cleto junioribus mandat, ut omnia apud Pudentem parent, et ad solemniores pompas frequentissimi Romae Christiani convenient — Sacra instruunt adolescentes: Paulus ad consueta caritatis opera per urbem discedit; Petrus christianae Religionis supremus Antistes augustissimi sacerdotii munia prosequitur — Novae laetitiae causa erat, Eunae virginis atheniensis in Ecclesiam per baptismum ingressus. Ipsa Hermum juvenem Dionysii Areopagitae fratris filium deperiens, a Patre Iphito graecanicae superstitionis sectatore, ne cum christiano conjugium ini-

ret, in Italiam vecta, dum Romae ludis Juvenalibus ab Nerone institutis ad tibiam canit, a Nerone rapitur; Calvo, aulico administro, et christiano hortatore ad Petrum refugit, qui sacris mysteriis imbutam ad baptismum, Nerone absente (Bajis enim morabatur) salutaribus aquis ablueri cogitaverat — Die Pentecostes illucescente, Pudentis Domum in Exquiliis, ubi prima Romae Ecclesia, ingens Christianorum numerus confluit, quibus, Pauli absentia rem sacram tardante, templum ingressis, Lucas picturas veteris testamenti de Christo venturo parietibus impressas explanat — Sacris hora nunciata, Romanus Pontifex solemnioribus vestibus ornatus, et sacriferis comitantibus ad delubrum pro templi foribus procedit, ubi attica virgine aliisque, sacrosancto christianorum ritu lustratis, majori comitatu in templum revertitur, aram conscendit, magnificam orationem de sacra Pentecostes festivitate habet, augustissimum Christi corporis mysterium celebrat, et caelestibus prodigiis recreatus, Angelis christianae Romae defensoribus ad aram excubantibus, veluti sacro amoris impetu afflatus Ecclesiae pulchritudinem, animae Christique connubium cum Canticis canticorum vaticinatur — Sacro peracto, itur ad Pudentis coenaculum: Agape celebratur (amoris convivium apparaverat Pudens) — Dumque genialibus fereulis vacant, Petrus Isaiae caput de mira Dei in humanum genus caritate deque ingrato Judaeorum populo enucleat — Secundis mensis, aethara in medium allata, Eune carmen per Philologum concinnatum de Christo, omnis potestatis capite et Pontifice aeterno canit — Quibus omnibus absolutis, concilium dimissurus faustis ad Deum precationibus Petrus urbem atque orbem prosequatur, omnibus in unum intentis: sed ecce inopinus nuncius triclinia ingreditur conclamans Paulum captum — Pontifice jubente, sibi fuga consulunt omnes: cum paucis Petrus manet ad aram primam Christianorum, omnem perieuli procellam opperiens.

**P**ONTIFICEM summum, caeloque ereboque potentem  
 Christiadam patrem, qui primum Orientis ab ora  
 Digrediens magnam Ilesperiam, tiberinaque venit  
 Littora, caelestis referens bona nuncia vocis,  
 Et vaticana tandem superastilit arce,  
 Pacifera extollens Christi vexilla, serensque  
 Semina civilis non deficientia moris,  
 Inelyta facta, cano. Quot Tartara foeda ruinas,  
 Quot gravis ambitio procerum, et Judaea propago  
 Intulerunt! tamen innixus caelestibus heros  
 Auxiliis bellavit ovans, mortemque decoram  
 Praetulit, exultans valida quod fulta columna  
 Surgetet omniparens cunctis Ecclesia terris,  
 Unius et fieret divini pastor ovilis,  
 Unde novae gentes Christi de nomine dictae  
 Christigenae, atque novus regnorum prodiit ordo.

Laurigero quondam in nemore, et regione beata  
 Parthenopae, Augustus vates ' romana canebat  
 Moenia, surgentesque arces, et magna tropaea;  
 Grandiloqua excitique tuba assonuere propinqui  
 Pausilypi colles, et candida Mergelline,  
 Et surrentinae molarunt culmina cedri.  
 Atque utinam nostro par afforet ore potestas!  
 Qua cineres requiere sacri, qua laurus opaca

Ingens reliquias felici protegit umbra,  
Ipse cano alterius surgentia moenia Romae,  
Quae non falsiparens Mavors, non auctor Apollo  
Sustineant; Deus omnipotens, rerumque creator  
Imperturbatam voluit consistere sedem,  
Littore qua venient gentes ab utroque potentem  
Clavigerum aspicere, et veras audire loquelas.

Non ego Grajugenûm ripis spatiatûs amoenis  
Scandere pierii celebrata cacumina Pindi  
Glorier, aut doctas in vota vocare sorores.  
Dum veterem video tremefacto cardine mundum  
Proruere, inque vicem surgit formosior aller,  
Graja mihi quamvis meditata volumina vatum,  
Numina respuerim, calefacto vana cerebro  
Quae Graji genuere, novique oriente nitore  
Solis, matutina velut fluxere pruina.  
O Romae Pater, o romani conditor alter  
Certior imperii, qui opus admirabile terris  
Unus firmasti, duce Christo et auspice Christo,  
Bissenos annos meliori cusa metallo  
Saecula, meque novae monumenta insignia Romae  
Volventem adspexisti. Te nostra quievit in uno  
Mens: age, Petre, mihi sacras in pectora flammâs  
Concilia, auxiliumque affer, tu gloria prima  
Christiadum, atque novi fundator maximus orbis.  
Si longum molitus iter tibi fervida vota  
Marmoreum ad tumulum exolvi; si lumina mille,  
Mille faces ardere tuis super ossibus, atque  
Stellata veluti frontem redimire corona  
Inspexi; vaga flamma sacris emissa latebris  
Frigida divino tepefecit viscera tactu,

Tu longae mala dura viae lenito; laborum  
Fasce sub injusto nutantes erige vires.

Vos quoque, Christiadum heroës, qui tempore primo  
Innocuam pulchro liquistis funere lucem,  
Jam jam Caelicolae, jam victa morte beatam  
Promeriti vitam, et serti immortalis honores,  
Vos mihi principium, finis vos carminis este.  
Quanta fuit vobis sacrae custodia Romae,  
Externae sensere acies, quas horrida saepe  
Barbaries, praedis inhians, emisit apertis  
Alpibus. Heul torrentis aquae, vel turbinis instar  
Vastavere urbes, foeda obsidione latinas  
Obsedere arces. At vos pro moenibus ipsi  
Terribiles agitare minas, visique timorem  
Injicere, et rapidis defendere templa ruinis,  
Quae rubuere diu sacro saturata cruore,  
Et vestro stetit incolumis tutamine Roma.  
Alter adest hostis: trepida caligine nutant  
Huc illuc tractae mentes. Si carmine nostro  
Unica fax veri emicuit, si lumine puro  
Romulidûm documenta patrum tractata nitescent,  
Este boni, et vati, precor, adspirale canenti.

Vix quinque et sexaginta sol aureus orbes  
Complêrat, soboles ex quo divina Parentis  
Funestam claudens seriem illaetabilis aevi  
Intulerat terris donum inviolabile pacis,  
Florebat Romae felix Ecclesia, cultu  
Laeta novo, ingenuoque nitens pulcherrima risu;  
Vere velut primo, cum mitior aura favoni  
Surgentem exhilarat segetem; peramoena vireta



Floribus innumeris et picto gramine lucent:  
Omnis odoriferis vestitur frondibus arbos,  
Ridet ager, rident viridanti palmite colles.  
Nec modo trans Tiberim \*, qua diversoria nota  
Judaeis, magno cognatae stirpis amore  
Cunctatur pietas: populosae compita Romae,  
Celsaque regifico laquearia condita luxu  
Lustrat Religio, vulgatque abscondita rerum.  
Nulla manet regio, qua non divina pererrant  
Lumina doctrinae, tota clarescit in urbe  
Nomen Christiadam resonantque ingentia facta.

Nulla mihi vestri venient oblivia, sancti  
Auctores populi, vos et quicumque labore  
Assiduo excolitis laeti sata pingua campi <sup>3</sup>.  
Nomina vestra sacrae signata volumine vitae  
Vivent perpetuo, neque deleat ulla vetustas.  
Tanti principium motus tenditque foveatque  
Pontificum senior Petrus, qui cuncta gubernat  
Christi concilia, et totum complectitur orbem,  
Ipse sedens primus romana Antistes in urbe.  
Pone subit comes, et graviora negotia tractat  
Tharsensis Paulus, lateri qui proximus adstat  
Pontifici. Pietate pares Ceterumque Linumque <sup>4</sup>  
Ipse Pater voluit majoribus affore sacris,  
Imposuitque manus, et sacris tempora vittis  
Implicuit, quo Pontificem si magna vocarent,  
Aut possent explere vicem, aut sequerentur euntem.  
Nec minus insigni Clemens pietate coruscat  
Caesarea de gente salus, magnaue refertus  
Doctrina, atque comes Pauli. Prior iste senatus  
Nascentis populi, haec sanctae custodia Romae.

Bis duodena fugax Titan peragraverat anni  
Tempora, romanis ex quo vestigia terris  
Firmarat Petrus, sedemque locarat habendam  
Pontificum serie, quae nullo desinet aevo,  
Et jam solemnes sacra lux fulgebat ad aras,  
Cum vaga Jerusalem per compita maximus, ingens  
Increpuit ventus, subito horrendoque fragore;  
Linguarum in morem, summi fastigia lecti  
Occupat ignis edax, quo dudum nocte dieque  
Bisseni stabant proceres, votoque calenti  
Orabant: Deus, ecce Deus, Spirabile Numen  
Venerat e caelo, jamque omnipotentibus auris  
Et flamma propiore argentia pectora nuper  
Incoepere afflata calescere; numine tacti  
Nil mortale sonant, arcanaque mira loquuntur.  
Scilicet ista novae fuerunt cunabula gentis <sup>5</sup>.  
Ex illo celebratus honos, ritusque sacrorum.  
Immo si rediens exactis mensibus annus  
Optandam semper lucem, semperque verendam  
Attulerit, Patres morem tenuere vetustum,  
Informem generis labem mortalibus aegris  
Abluere, et sacro perfundere fonte paratos.  
Tum vero gravior seniolem cura tenebat  
Pontificem, suetos aris indicere honores.  
Ergo his alloquitur comites: Lux sacra propinquat,  
O socii, auspiciis novus unde potentibus orbis  
Et nova saeculorum series pulcherrima coepit.  
Qua maiore licet, sancta haec solemnia pompa  
Concelebrare juvat. Modo quas sacravimus aras  
Trino Unique Deo, penetralia sancta recludet  
Noster Cornelius: magnus communibus aris

Christiadum numerus magna versabimur aula.  
Laetifici suberit justissima causa triumphii;  
Jamque meam ( optarim certe ) non abfore mortem  
Crediderim, caeloque ostendunt plurima signa <sup>6</sup>.  
Tum vero ingenti Linus interfatus amore est:  
Quae, Genitor, nos cumque jubes, faciemus ovantes.  
At quid funesta turbaris imagine rerum?  
Quid sine te gerimus? si caeli tanta cupido  
Terrarumque odium, rape nos super aethera tecum.  
Subrisit laetum pietatis imagine tanta  
Grandaevus Senior: mox Cletus talia subdit:  
Exultare juvet potius: namque omnia Romae  
Procedunt melius: quacumque altaria surgunt,  
Jamque triumphatrix totam regina per urbem  
Religio incedit, gaza praedives opima.  
Quos deinde ignipotens sequitur facundia Pauli:  
Nobiscum Deus est, caelo Deus omnia complet.  
Vidistis nuper, sanctas qui factus ad aras  
Concursus populi, cum maxima sacra redempti  
Principium mundi, Romana Ecclesia sancto  
Excoluit ritu? renovatum Golgotha, clavi,  
Spinaeque et tenebrae et pendens e robore Numen  
Tangunt Romulidas: fluvio descendit opimo  
Respersus cruor, et Romanam perluit Urbem  
Uberius, sacra quamplures in septa reducens.  
Debita quae summo Genitori gratia! Romae  
Quae tamen eveniant, toto admiramur in orbe.  
Christo cuncta patent, urbes, fora, castra, senatus.  
Cerno equidem: Placido Petrus sic reddidit ore:  
Ipse etiam cerno; cultu instaurata recenti  
Omnia mutantur; novus excitus incipit orbis <sup>7</sup>.

At stygius praedo umbrarum sua regna relinquet  
Impune, et veteres usus, et credita vulgo  
Et placitis firmata patrum documenta recedent  
Antiquo dejecta loco? Victoria nostra est;  
Horrida bella manent tamen, atque miserrima caedes:  
Permulto sacrum firmandum sanguine verum.  
Judaeos cerno studiis ardere malignis  
Sollicitos veterum pro religione parentum,  
Et ritus odisse novos, nova sacra per urbes.  
Omnibus objectum jam casibus, omnium egenum  
Messiam sprevere: alium virtute superba  
Praevalidum, solio insignem, sceptroque potentem  
Venturum expectant regem, qui reddat honores  
Antiquos, regnumque evicto terminet orbe.  
Infelix Judae soboles! spe fervida rerum  
Sperat adhuc, foedaque oculos ab nocte gravatos  
Nescia terrenis curis extollere, votum  
Regni immortale, et caeli stellantis honores  
Despicit. Adde Sophos, verique arcana sequentes.  
Graecia languescit turpi moritura veterno.  
Pars dubitat: vana certatim indagine fessa  
Naturam semper fugientem quaerere, mente  
Ambigua irrequieta haeret, arcanaque sensa  
Doctrinasque novas elata mente recusat:  
Pars mala terrigenum novit, sed posse mederi  
Desperans, vanique diu pertaesa laboris  
Diac particulam aurai per sordida perdit  
Otia, divitiis aut luxuriatur opimis.  
Quid vero memorem juris legumque peritos?  
Hic Roma in media celebrati oracula juris  
Assueti lustrare vident nova cuncta: potenti

Aequalem domino famulum, uxoremque marito  
Haud servam, at sociam; natos in jura vocatos  
Aequa patrum; veterum magno pro jure quirilum  
Humanum cernunt jus passim exsurgere; cunctas  
Terrigenâs gentes communi foedere jungi;  
Romam orbis dominam pomoeria frangere prisca,  
Legem unam, atque unum legis caput omnis amorem <sup>8</sup>.  
Quid demum recolo, tota quae regnat in urbe  
Caeca superstilio? et falsis famulantia divis  
Agmina? deses erit Mysterum exercitus ingens?  
Praelerea phlegethontaeus si tartarus iras  
Evomet heu! male compressas, socia agmina jungent  
Tot tantique hostes, conjuratoque tumultu  
Concurrent: unus clamor, meta omnibus una  
Principiis obstarè, novam pessumdare gentem,  
Exturbare novos ausus, vetera omnia in orbe  
Tulari, antiquo vaga saecula sistere cursu.  
At vos, o Juvenes, ne quae fallacia pacis  
Decipiat, certum impavidi praevertite bellum.  
Unde ferum erumpet certamen? totius orbis  
Irruit cluvies populosa in compita Romae,  
Pugnantque adverso civilia semina motu.  
Hic, male qua sarta imperii compage moratur  
Exitiosa lues, urbemque perurit, agendum  
De summa rerum. Si tantum robur, ut ingens  
Roma queat tandem veteres evertere rilus,  
Si capitolina sanctum supereminet arce  
Vexillum, victus parebit maximus orbis:  
Romanae cursus aquilae, Crux incluta Christi,  
Anteibis, volucrique gradu trans moenia mundi  
Romulei volitans, populis tua jura vocalis

Dictabis, totumque potens moderaberis orbem,  
Imperii domina et rerum. Sic ille: tacetque  
Attonitus, rerum venientia fata volutans.  
Immoti circum juvenes lacuere; stupentes  
Terrificum horrescunt carmen casusque futuros.  
Tum vero Paulus taciturna silentia rumpit:  
At Pater Omnipotens bene digerit omnia caelo.  
Errantes Israëlites oves tu pascere missus <sup>9</sup>,  
Atque ego caecigenas ex umbra educere gentes <sup>10</sup>,  
Qua mandata vocant, urbem convenimus unam,  
Sacra Palaestinae, quaque Ethnica sacra supersunt  
Extinguenda: triumphatos qua cogit in unum  
Urbs populos, medio quae condita surgit in orbe <sup>11</sup>,  
Et fidei custos lecta est, morumque magistra,  
Debellare decet, magnumque referre triumphum.  
At neque carnificum rabies <sup>12</sup>, neque tela, neque enses,  
Nec quicumque furor nos dio evellet amore,  
Quem docuit Christus, sancto meruitque cruore.  
Inus, et insignem, lactanti pectore, Jesu  
Perferimus famam: nil cetera cuncta moramur.  
Talia, quae Paulus facundo fuderat ore,  
Maximus audierat Pastor, visoque periculo  
Jam propiore, hilari testatur gaudia vultu,  
Atque ait: ah! memini, et nimium meminisse juvabit,  
Quae quondam cecinit galilaeo in littore Jesus:  
» Dum validae superant <sup>13</sup> juvenili in corpore vires,  
» Ipsemet indueris: quo te fert cunque voluntas,  
» Incedis, motans alacri vestigia gressu.  
» At, senio adveniente, rigescent membra, manusque  
» Extendes, notoque alius te cinget amictu,  
» Invitusque trahere ». Deus neque plura locutus.

Asl ego quid terris moror amplius? omnia, Jesu,  
Omnia moesta mihi sine te, mea sola voluptas.  
Annua festivo redeunt solemnia cultu  
Fors extrema mihi. Christus mandata relinquens  
Admonuit magna in summo fore gaudia caelo,  
Devia si quondam patrio succedit ovili  
Infelix agna <sup>14</sup>. Observent mandata minores.  
Magnificas ornate aras, sacra liba parate.  
Ite, boni: vincet pietas obstantia cuncta.  
Dixerat, et quamvis mentem per plurima versant  
Magnanimi juvenes, praecepta facessere gaudent.  
Inde dolent, carique senis praesagia terrent;  
Laelitia hinc secura movet, minuitque dolorem  
Gloria Christigenum, et Patris exultantis imago.

Ocyor hic Paulus opera ad caelestia pergil,  
Quae pia Religio per totam digerit urbem.  
Pontificum Senior solus, Clemente ministro,  
Fungitur officiis, quae poscit maxima Roma,  
Seu res Christiadam totum dispersa per orbem.  
Notam namque domum cunctis e partibus aegri  
Quaerebant inopesque, et tristi corpore saepe  
Illius imperio visi discedere morbi.  
Pastores ovium ausoniis regionibus adsunt,  
Si quidquam grex indigeat: mox littore eoo  
Legati seu laeta ferunt, seu tristia Patri,  
Seu consulta petunt: patrio commotus amore  
Excipit ipse omnes, dumque aethere dius ab alto  
Spiritus inspirat, Christique in imagine tota  
Mens manet, insomnisque docet prudentia veri  
Inviolata sequi, et populis ostendere jura.

At vos, aetherei decus immortale senatus,

Aligeri coetus, qui prima sub ordia magni  
Pontificis servastis iter, qui grandia facta  
Temporis antiqui obscoenis erepta tenebris  
Donatis semper viridi florescere honore,  
Dicile, Caelicolae, nec vos memorare pigebit,  
Quae tacitam Petri pertentant gaudia mentem?  
Laetiliae quae causa novae? quae pompa triumphi?

Doctrinis imbuta sacris, vitamque peractam  
Exosa adspergi properat lustralibus undis  
Virgo, romanis ipsis praelata puellis  
Egregia forma, et thalamo dignata Neronis.  
Eune nomen erat praeclarae virginis: Hellas  
Patria; maiores claro de sanguine nati.  
Illam supremi monumentum et pignus amoris  
Sollicitus genitor caris eduxerat ulnis.  
Postquam Cymothöe sobolem connixa cupitam  
Partu ipso occubuit, carae Iphitus ipse puellae  
Adsedit custos, graecaque exercuit arte  
Ingenium, edocuitque humiles contemnere curas.  
Non illa quidquam formosius Attica vidit;  
Et dum purpureo rideret flore juvena,  
Aemula daedalcae cultrix operata minervae,  
Seu picturatas densaret stamine telas,  
Seu phrygium in morem intertexto incenderet auro  
Purpuream chlamydem, ingenti florebat honore.  
Tum vero magis, atque magis stipatur ovari  
Agmine nobilium, simul aurea tecta, domusque  
Otia deseruit. Laetam videre disertos  
Pieridum celebrare choros, phoeboque favente,  
Dulcia nunc molli meditari carmina voce,  
Nunc lecta fretam cithara fidibusque canoris



Anxia sollicitis exolvere pectora curis.

Hos inter plausus, caro dilecta parenti  
Eune crescebat: blandae decora inclyta formae  
Attoniti aequales spectant, gaudentque lueri,  
Et multi optatam cupiunt sibi jungere sponsam.  
Praecipue cupit ante alios bene cognitus olli  
Hermus, magnanimus juvenis, quo clarior alter  
Non erat, argolica neque fortunatior ora  
Divitiis, proavisque, et pulchro corpore pollens.  
At Genitor tali conjungi foedere natam  
Abnegat, et juvenem saepe aspernatus amantem est.  
Namque Hermus Christum studioso ardebat amore;  
Iphitus at falsos cultus sectatus avorum  
Maeoniaeque colens animo simulamina musae,  
Graecia quot genuit, tercentum numina adorat,  
Christi indignatus late crebrescere nomen.  
Quo tamen increpitat Genitor magis, atque roganti  
Nequicquam natae nulla et metuenda minatur,  
Crescit amor: Virgo infelix te deperit, Herme,  
Te, veniente die, te, decedente, requirit;  
Nec comitum celebrare choros juvat; omnia muta,  
Omnia sola placent: animam lenire dolentem  
Non citharae murmur, non dulcia carmina possunt.  
Deserit interea juvenes vigor integer artus;  
Disperiit vis illa animo, color ille venusto  
Fugit ab ore; aegris pallescit saucia curis,  
Et tantos letho properat finire labores.

Ast amens rabies extrema per omnia patrem  
Impellit: nullis precibus volisque movetur;  
Et patrio migrare solo, in terrasque latentes  
Eunen ferre libet potius, si corde calentem

Excussisse queat flammam, si dulcis imago  
Paullatim evaleat dilectae abscedere formae.  
Cuncta parata fugae. Laelas jam linquit Athenas  
Impatiens; sicalae radit jam littora terrae.  
Adsumus: an portus delati intramus amicos?  
Visere, nata, libet nostro qui sanguine creti  
Jamdudum cupiere tuos cognoscere vultus.  
Quam volupe ingenti ferventem murmure portum,  
Turresque adspicere, unde potens Sophus <sup>15</sup> aequore in alto  
Instructam contra classem tormenta movebat!  
Ut ver purpureum ridet florente corona!  
Aura syracosii repetens modulamina vatis <sup>16</sup>  
Leniter adspirat, laetisque e collibus Hyblae  
Daedala certat apis dulces geminare susurros.  
Tum vero horrificis immugiit Aetna cavernis,  
Et vaga pinifero subtexens sidera fumo  
Flammarumque globos liquefactaque saxa sub auras  
Evomit; resonis torrenti flumine saxis  
Diluvium ruit: heu quantos spes alma colonos  
Deficit! heu quantas acies vulcania sylvas  
Diruit, urget, agit: trepidat vicinia, at hospes  
Ignea prospectat naturae arcana furentis.  
Cum patre deerrantem natam laetissima cernit  
Insula dives opum, qua flavis tempora spicis  
Ornat pulchra Ceres <sup>17</sup>, qua lata per arva puellam  
Texentem laetos inserta nitentia flores  
Abripuit secum, et stygias deduxit ad umbras  
Insidians Pluto. (Sic veris falsa remiscens  
Graecia monstrabat glebis requiescere semen  
Triticeum effossis, caecaque in nocte latere).  
Omnibus intentos ludis Trinacria tellus

Bisquinas tenuit luces: mox lenior aura  
Per mare velivolum euboicas obvertit ad undas,  
Et laeto excepit gremio pulcherrima Siren,  
Siren insidiosa viris, lectisque puellis  
Insidiosa, jubar qua purius æera vestit  
Purpureum, ridet tellus, mare, sidera, caelum.  
Qua laetam frontem pomis ornatus opimis  
Tollit Pausilypus, qua candida Mergelline  
Littoribus myrteta sacris viridantia jactat,  
Ibant laetati comites, et candida virgo  
Incedens veterem obliviscebatur amorem.  
Praeteritas Genitor studet ipse avertere curas,  
Plurima promittens natae, insolitisque moratam  
Illecebris tandem romanam educit ad urbem.

Forte Nero Romae genialia festa parabat,  
Nomine dicta novo Juvenalia <sup>18</sup>; namque Juventus  
Exlex, atque sui compos, sine more, per urbem  
Luxuriabat ovans, caecisque undantia laxans  
Lora cupidinibus per turpia cuncta ruebat.  
Non aetas quemquem prohibet, non splendor honorum,  
Priscave nobilitas: nullo discrimine, turpi  
Omnes conveniunt ludo, nomenque professi  
Ludicra exercent, seu graeco sive latino  
More, incomposite mimorum obscoena jocantes.  
Quin etiam illectae praeclara e gente puellae <sup>19</sup>  
Principis ante oculos meditari informia. Stabant  
Umbrifero in nemore, et circum cava stagna frequentes  
Cauponae, et luxus irritamenta nefandi.  
Gliscere flagitia inde magis, penitusque labare  
Jamjam corrupti mores; infamia crescit.  
Vix hominis pudor <sup>20</sup> intactus retinetur honestis

Artibus: indomita stimulante libidine, nam quae  
Tuta pudicitia aut fama immaculata manebit?  
Dum laxis equitat bacchata licentia habenis,  
Incedit Nero per medios, citharamque retentat  
Artis opus rarae: regem comitantur ovanlem  
Ingens turba patrum atque equitum lectique tribuni,  
Robore praestantes cuncti, viridique juvena,  
Augustanorum \*\* claro cognomine dicti.  
Pars levis ingenio, atque procax; pars altera sperans  
Principis obsequio ad magnos ascendere honores,  
Plaudere praestanti formae, vocemque Neronis  
Caestem laudare, deumque in vota vocare.

Infelix genitor, quae te dementia cepit?  
Unica nata tibi, tibi quod pulcherrima nata  
Contigerat, grajae te terque quaterque beatum  
Clamabant matres! nunc rerum vertitur ordo,  
Et tua turbatur tristi domus obsita luctu!  
Ecquidnam pergis tanto insanire furore  
Contra Christiadas? pietas nataeque tuique  
Te moveat: natam spernis sociare marito  
Christicolae? heu! nescis quae jam lapsura ruina  
Imminet? heu! nescis Romae regnare Neronem?  
Tuque lupo, Pater, horrendo sponte objicis agnam?

Iphitus ingrediens populosae moenia Romae  
Ut, strepitu in magno, solemnia festa parari  
Audiit, et natam spectacula ad foeda trahebat.  
Postquam divina modulatus carmina voce  
Paullisper Princeps requievit, plausibus aula  
Personat innumeris, sequitur tamen ordine longo  
Dulce melos, cantuque novo certamina magnae  
Matronae incipiunt. Musis certantibus ipse

Ludorum rector Nero praesidet, ipse canentes  
Ore regit gestuque. Ecquid non aemula virtus  
Audaci flamma juvenilia pectora cogit?  
Artis amor vincit, laudisque immensa cupido:  
Et cunctis ignota hilari pulcherrima vultu  
Prosilit in medium Cantatrix attica. Qualis  
Aestate in media, plenis ubi nubibus imber  
Arentes irrorat agros, caelumque frequenti  
Igne micat, mox primae inter confinia lucis,  
Nubila si cedunt, et tempestate remissa  
Rursum tranquilli redit indulgentia caeli,  
Surgens siderio scintillat Lucifer igne,  
Atque serenato ridet pulcherrimus ore,  
Ore tamen signata legis vestigia flentis  
Naturae, illatam arboribusque salisque ruinam;  
Conspectu in medio talis se graeca Virago  
Obtulit: egregio licet ore videre dolores  
Antiquos curasque, novo quas flore juventae  
Lumen purpureum, et species pulcherrima vincit.  
Ut tetigit citharam, ut vario modulamine vocem  
Inflexit dulcem, tenere silentia cuncti;  
An Phoebi soror et magna de stirpe Dearum?  
Sic secum attoniti: neque jam celebrata faventum  
Exultare virum plausu cessaverat aula,  
Reginamque chori dicunt, primamque sororum  
Calliopem docti liquisse cacumina Pindi.  
Sic admirantes vario sermone loquuntur,  
Multaque scitantur peregrina e virgine, nomen  
Et patriam et genus: ante alios deterrimus unus  
Applaudit Princeps, crimenque paratus ad omne  
Virgineo in vultu flammantia lumina fixit,

Ignescitque tuens, rapiturque cupidine caeca.

Ergo pro dulci sponso thalamoque fideli  
Sacrilegus dabitur Nero? pro sanctis hymenaeis  
Foedi concubitus? Christi non sanctus ad aras  
Annulus optatam juveni permittet habendam?  
Vi rapiet praedo? servabas talia natae  
Gaudia non prudens Genitor? tua crimina seris  
Mutabis lacrymis: querulis plangoribus aulam  
Circumiens frustra caelum terramque lacesces!  
Noctes atque dies augustas pervigil acdes  
Custodit miles: penetrali in sede latebit  
Eune: quì liceat funestum insistere limen?  
At tibi, quod minime reris, Pater, afferet Hermus  
Speratum auxilium, natamque tuebitur Hermus.

Infelix juvenis, voto deceptus inani,  
Ex quo cecropios iam deseruisse penates  
Speratam vidit, mediasque obeuntia terras  
Ingressam maria externis considerare regnis,  
Quod superest unum, sacrae advolvitur arae,  
Multaque semianimi suspendit vota labello,  
Christe, tibi amissa pro virgine, proque parente.  
Caelesti rata vota facis tu numine, Christe,  
Atque insperatae via fulsit prima salutis.  
Interiora domus servabat limina Calvus,  
Calvus, qui domino famulus fidissimus odit  
Attamen infandis pollutam sordibus aulam.  
Olli Grajugenae fuerat concredita cura.  
Ut miseram vidit lacrymas, ut facta vicesque  
Audiit, ipse diu imperii pertaesus herilis,  
(Et Christi innocuo dederat jam nomen ovili)  
Dulcibus alloquiis certat lenire dolentem,

Conjurantque (ollis mentem Deus ipse ministrat)  
Frangere servitii juga dura, fugamque parare.  
Ergo discedunt taciti, jam nocte silenti,  
Foedaque non observati penetralia linquunt,  
Patriciumque petunt Vicum <sup>22</sup>. Quae gaudia pectus  
Tentare tuum, divini maxime ruris  
Villicae, <sup>23</sup> cum pariter trepido contendere gressu  
Spectasti geminos, errantia pignora, natos,  
Illum romanum, si vestem respicis, illum  
Argolicam? Ut Christi narrantis dicta subibant!  
Caelestis dominus quacumque vocabit in hora  
Agricolas, seu mane novo, seu vespere sero <sup>24</sup>.  
Ut steterunt coram, curvato corpore terrae  
Procubuerunt ultro, et pedibus volvuntur amatis,  
Pontifici nihil effati: nam verba frequentes  
Impediunt lacrymae et miseri suspiria cordis.  
Turbatos errore viae, et graviora timentes  
Excepit Petrus, et veniendi discere causas  
Exultans: Fratres, inquit, timor omnis abesto;  
Vobis tuta domus: sedes intrastis amicas,  
Urbis qua obscoenae vitant contagia foeda  
Christicolae, et vitam orando traducere gaudent.  
Hoc placet, affatur Calvus; Pater optime, nobis  
Hoc concede: diu fidus sequor assecla Paulum,  
Qui me Christiadam docuit praecepta, piisque  
Addidit ordinibus. Turpi diffugimus aula  
Ipse, et quam cernis, graeco sata sanguine virgo.  
Atque hic suspirans, imoque a pectore vocem  
Virgo trahens multa ingemuit: mox lumina tergit,  
Lumina funesto dudum saturata dolore,  
Et saevas narrare vices exorsa, laboresque

Antiquos, infelices memoravit amores,  
Et patrem obstantem; ut romanam advenerit urbem,  
Ut, laeto plaudente choro, tristi arserit igne  
Infandus Princeps, caro ereptamque parenti  
Servitio addictam in foedam transduxerit aulam.  
Inde huc advenio: miserans, Pater optime, nostrum  
Si qua tibi miserae pietas, defende pudorem.  
Hoc unum precor. Haec medio interfata dolore est,  
Demisitque oculos. Paucis ita reddidit olli  
Magnanimus Senior dictis solatus amicis:  
Quod metuas, nihil est: miseris succurrere nostra  
Suadet Relligio, et curas medicarier aegras.  
Fide, Puella, Deo: salvos sponsumque patremque  
Ipse Deus reddet, certum mens augurat: at tu  
Disce orare Deum, nostrisque assuescilo votis.

Eune jamdudum arcanis contacta latebris  
Caverat insidias omnes suspectaque furla:  
Nec longum tempus Caesar submota petebat  
Littora Bajarum: profugam tota urbe puellam  
Quaerere desierat lictorum turbida cura,  
Cum sacrata dies festo fulgebat ad aras.  
Jamque piis edocta adytis mysteria virgo  
Argolica ad sanctos poterat procedere fontes:  
Cuncta parare jubet sacris Petrus; annua cultu  
Exhilarare novo praestat solemnia: praestat  
Laetos Christiadas sanctos celebrare triumphos,  
Adventumque Aurae, et diae miracula dextrae. —

Qua manet Exquiliis spatiata salubribus ora,  
Aggere in aprico, et purissimus enitet aether,  
Ex quo Mecaenas <sup>25</sup> removens obscoena sepulcra  
Consevit croceis halantes floribus hortos,



Inter odoratum nemus, aedificare domorum  
Conspicuas moles opulentum cura Quiritum  
Sueverat. Hic propius dictum de vimine collem <sup>16</sup>,  
Inclita surgebant augusti moenia tecti,  
Quo pia Religio praecelsa palatia regum  
Ingrediens sacri posuit primordia cultus.  
Namque Pudens, magnus clara de gente senator,  
Jampridem coetu Hebraeum versatus amico,  
Audierat magnum caelo terraque potentem  
Portendi regem <sup>17</sup>, Solymae qui extolleret arces,  
Excidio Romae. Simul haec, simul ore deserto  
Pontificem magnum retegente abscondita rerum  
Audiit, et natum judaea e virgine regem  
Christum ostendentem. Tum forte veterrima ficus <sup>18</sup>,  
Quae texit quondam gemina incunabula fratrum,  
Ramosque ingentes, annosaeque brachia pandens  
Per Comitum campum, magnae primordia Romae  
Imperiumque datum antiquis memorarat ab annis,  
De caelo ceu tacta repente exaruit: ingens  
Stat truncus primo spoliatus honore, comaeque  
Luxuries Romam spatiosa destitit umbra  
Protegere, augurium saeculis insigne futuris.  
Terrificum monitum commotam perculit urbem,  
Tristiaque horribiles cecinerunt omina vates.  
Continuo Petrus: Romani, cernite, vosque  
Cernite, Judaei, quod formidabile caelo  
Monstratur signum. Solymae ficulnea, Christi  
Imperio arescens judaeae oracula legis  
Deleta ostendit: neque enim sine numine ficus  
Romulea arescit, figmentaue diruta Romae  
Nunciat antiquae. Capitolino altera clivo

Arbos consurgit, ramis felicibus arbos  
Complexura omnem frondenti vertice mundum.  
Arbos est Christi Crux inclyta, magna recentum  
Tessera Christiadam. Tali sermone loquentem  
Audierunt gentes: tetigit divina Pudentem  
Gratia. Romano insignis splendore Senator  
Irrita dejecit Romae simulacra vetustae,  
Et natus natosque vovet tibi, Christe, domumque.  
Quod generis fortuna potens, quod splendida honorum  
Nobilitas olli sociato sanguine multas  
Miscuerat gentes, inopino se extulit auctu  
Religio, insueta et coepit lucescere luce.  
Limina pontificum Senior reserata frequentat <sup>29</sup>,  
Unde videt majora novo subolescere regno  
Incrementa. Suum praesenti pignore firmans  
Obsequium tectis statuit penetralibus ingens  
Augustum templum: tibi enim tibi nomine sacrat,  
Sancta aeterna Trias, quae caelo arcana sereno  
Nunc primum miseris dignare invisere terras,  
Hactenus ignota ostendens mysteria rerum <sup>30</sup>.  
Inde sacerdotum sacramento chrysmate inuncta  
Egreditur legio: totum inde incedit in orbem,  
Qua sol exoritur, qua deficit, inclytus ordo  
Pontificum enatam quacumque effundere lucem.  
Clarius haec etiam romana exurgit in urbe  
Orandi statio: hac magno solemnibus cultu  
Christiadam cupidas coepere attollere mentes,  
Debitaque emicuit primo reverentia templo.  
Namque in vestibulo pura circumnitet unda  
Delubrum: <sup>31</sup> puro stat tanta potentia fonti  
Verbisque arcanis! Primae contagia noxae

Linguit terrigena: instaurata renascitur igne  
Vila sacro, patrique libens capit omina caeli.

Aulâi in morem vastae, venerabile templum  
Panditur, augusta quod religione verendum  
Roma recens celebrat, varioque operosa nitore  
Ornavit pietas. Auro laquearia fulgent,  
Aurataeque trabes, variisque intexta figuris  
Ridet parietibus, tangitque immota tuentum  
Lumina sanctarum effigies pulcherrima rerum <sup>32</sup>.  
Qua vero primos ortus primumque salutas  
Solem, ( namque oriens <sup>33</sup> Christi venientis imago  
Extabat patribus, turbaeque e more precantur  
Sic positae ) divina Domus <sup>34</sup> spatiosa recedit;  
Et mensa e ligno sanctam curvatur in arcam,  
Isacidum antiqui monimentum foederis arcam,  
Quam subter bene composita clauduntur in urna  
Reliquiae ingentes, <sup>35</sup> adsuntque insigne trophaeum,  
Quo super augustum mactatur victima sacrum,  
Magnanimi cineres Jacob, Stephanique ministri,  
Qui sanctum Solymis effuso sanguine verbum  
Testati, caelo insignem meruere coronam.

Praemissi comites, laeti persolvere summo  
Sacra Deo, laeti Petro parere iubenti,  
Ocyus incubuere animis, et festa parabant.  
Omnia, pastorum nutu praecunte, nitescunt.  
Pars sanctae interiora domus, et marmora verrunt  
Secta pavimenti. Magni mercantur honorum  
Officium mage quam laetos spatiarier altis  
Porticibus regum, pictisque sedere tapetis.  
Ornatus <sup>36</sup> alii magnos aulaeaeque latis  
Expediunt abacis, sacrae decora incluta pompae:

Postibus affigunt inserta nitentia flores;  
Floribus exornant aras, taedaque frequenti  
Lampadis exhilarant, panthaeaque thura ministrant.  
Ast alii, quorum maior sic postulat ordo,  
Sacriferi libanda parant laticemque lyaeum  
Et puras fruges, sacrisque altaribus aptos  
Argento calices, auroque insignia vasa.

Hos inter motus sol quinquagesimus, ex quo  
E tumultu Christus superas surrexit ad auras,  
Lucem exoptatam, et festum solemne ferebat;  
Praequae diem sanctum veniens aurora serenae  
Vix colles Albae, et nemorosas Tiburis arces,  
Et flavum Tiberim laeto formosius ore  
Irradiare parat, solemnibus excita sacris  
Atque morae impatiens signata cacumina quaerit  
Aurea Christiadam soboles, quoscumque per amplos  
Romae circuitus pietas ad sacra vocabat.  
Supremum Patrem dextra laevaque coronant  
Delecti proceres, neque longo tempore coetu  
Omnia lactanti fervent penetralia. Cunctos  
Ad solemne sacrum juvat ire, et discere magnas  
Christiadam gazas, et vastum cernere templum.  
Laetitia et pietate Pudens supereminet omnes,  
Alloquioque fovet suavi, perque omnia ducit.

Ecce autem magno in numero se Cletus agebat,  
Qui tantam comitum spectans crebrescere turbam,  
Pontifici magno accedens sic fatur ad aurem:  
Sancte Parens, quidnam facimus? vix deficit unus,  
Qui nostri pars prima chori, nec carior aller  
Jure tibi Paulus. Paucis ita reddidit Heros:  
Id video, in curasque animus diducitur anceps:

Hesternæ liquit tantum me luce; vocabant  
Adusæ curæ, et pietas operosa per urbem.  
Quæ tantæ tenuere moræ? nec credere quivi,  
Ni gravis impediât casus, solemnibus horis  
Defore: dira meam turbant præsentia mentem.  
Sed trahere, atque moram sacris licet addere nostris.  
Fortunatum agmen sacra mirabitur aede  
Tot decora, artificumque manus, operumque labores.  
Jamque, jubente Petro, templi reserata patescunt  
Limina. Ceu quondam Virgo, pulcherrima virgo,  
Fratres quam unanimis per mutua munera magno  
Ornarunt cultu; juveni nuptura marito  
Laetato incedit gressu, formosa decoram  
Caesariem, vestesque auro formosa micantes;  
Unam mirantur matres, gaudetque tueri  
Tota phalanx comitata virum, prætermicat una  
Mundo dotati, magnoque in honore voluptas  
Eminet ex oculis; formosa Ecclesia talis  
Circumquaque nitet, sanctisque ardoribus ardens  
Concelebrare parat sponsi cælestis amores.  
Ingreditur pia turba sacro suspensa timore.  
Christigenæ stupuere auri, argenti que metalla,  
Quæ Deus infudit latebrosa in viscera terræ,  
Eruta sic melius, primo sacrata Parenti.  
Præcipue cupidis oculis miracula nitentum  
Contemplatur opum, picturatasque tabellas  
Perlegit, insueta pascens dulcedine mentem.  
Namque potens Lucas, <sup>37</sup> cui magnus cedat Apelles,  
Pingere sive velit casus, seu fingere in auro,  
Gestierat priscis rerum variare figuris  
Juncturas laterum, et summi laquearia lecti.

At non maeoniae pollens facundia musae <sup>38</sup>,  
Ascraei <sup>39</sup> non mella senis benevolentia sanctam  
Spiravere animam: graiae languere camoenae  
Cooperat ingenium, simul ac sanctissima veri  
Lampas nativo exposuit nova cuncta colore.  
Nec novit Maro, nec magni ipse repertor Iliomerus  
Carminis ingentem venam, qua liquitur unda  
Largiflua, atque potens magnos accendere vates  
Plenius et melius, juga quam parnassia Cirrhae <sup>40</sup>,  
Pindusque atque Helicon, fluvio et Permessus amoeno.  
Assuetus Lucas calefacta effingere mente  
Illustres species, celebrata volumina volvit,  
Quae patribus quondam afflavit diviniior aura;  
Et qualem Isacidæ caelesti numine vates  
Exciti, Christum saeculis cecinere futuris,  
Expressit veterem effigiem, catus arte magistra.  
Inventor juvenis, lacto spectabilis ore  
Attonitis populis monumentum insigne, recentes  
Ostentabat opes, veterumque arcana praecipat.  
Ergo tholi fixus sancta ad fastigia pendet  
Agnus <sup>41</sup> candidior, quem multo baltheus auro  
Purpureus cingit, niveaeque micantia lanae  
Vellera vestierant. Te candidus indicat Agnus,  
Jesu servator generis; zona aurea cingens  
Ilia iustitiam flammamque ostendit amoris.  
Proxima deinde boni sequitur pastoris <sup>42</sup> imago.  
Cernite: Pastorem per gramina mollia lactum  
Innumerae comitantur oves, quas conspicit omnes  
Ludere subridens. Unam quae forte resedit  
Segnior, ipse humero attollit, pedibusque prehensam  
Fert utraque manu. Auspiciis felicibus, ille,

Candidae oves; Christus caelo bona pabula monstrat.  
Nonne audire juvat vocem pastoris amati?  
Ecce supercilium clivosi tramitis, atque  
Montanus vertex superas evadit ad auras.  
Desuper ara nil est, humerisque arentia ligna  
Innocuus portat juvenis <sup>43</sup> patremque videtur  
Quaerere (statque pater, vaginaque eripit ensem  
Fulmineum): jam ligna vides: quae victima sacro?  
Ille nihil: tantumque obtutu immobilis uno  
Haeret inexpletum, positasque propinquat ad aras,  
Sacro operaturus. Magno sic, Christe, Parenti  
Victima procumbis funesto in vertice montis:  
Tantus amor nostri tenuit te, tanta cupido.  
Quis vero ille autem juvenis regione patenti  
Camporum graditur? duplex exercitus haeret,  
Compositis armis; <sup>44</sup> gestit judaea propago  
Impatiens: frons laeta parum tibi, foeda Philistim.  
Impavidus juvenis magnum procedit in aequor:  
Horridus aspectu, horrendis circumdatus armis  
Ingenti se mole gigas movet: ille quaterna  
Junior amplexus laeva praegrandia saxa  
Circumagit quintum funda, magnumque lacessit  
Risorem, saxo frontem feriturus iniquam.  
Una manus Christi infernum pessumdedit hostem.  
Nec procul hinc Tobiam <sup>45</sup> miraberis egredientem  
Fluminibus patriis, piscisque avulsa tenentem  
Extia jecur, clausos oculos rescrare parenti  
Laturum auxilium. Quis caligantia nocte  
Lumina concessit magna clarescere luce,  
Ni tu, Christe Pater? Duplex memorabat Ionam <sup>46</sup>  
Effigies; alia truculenti bellua ponti

Immani absorptum revomebat ab ore prophelam:  
Tres illum luces, in concava viscera, vastum  
Per mare, tres retulit noctes: vix quarta rubescit <sup>47</sup>  
Eos, monstratae deponit margine ripae.  
Non aliud spatium funesto marmore Christus  
Delituit: terram sol irrorabat eoam  
Tertius, et superas victor veniebat ad auras.  
Parte alia moestum vatem, saxoque sedentem  
Adspiceres: variis suspensa cucurbila ramis  
Plurima: fatali illabens vix ore momordit  
Exiguus vermis, frondes arescere visae,  
Et steriles aegra moriuntur in arbore fructus.  
Scilicet alludens vates absumpta canebat  
Arcana Hebraeum: delet simulantia verum;  
Extinctaeque umbrae, sole exoriente, recedunt.  
Magnanime o juvenis, nutans defendere verum  
Ne dubita: falsi convictus procidet hostis,  
Justitiam verumque Deus tutabitur ipse.  
Cernite, uti Daniel <sup>48</sup> latebroso carceris antro  
Egreditur? miles posita feritate leones  
Stant laeteri, inque crucis morem juvenilia pandit  
Brachia. Funereo Servator stipite servat  
Terrigenas, stygiumque potens detrudit in orcum  
Horrida monstra feras, verumque in luce reponit.  
Talia, quae Pictor divina effinxerat arte,  
Mirantur comites, oculosque per omnia vertunt.  
Jamque faces radiant ardenti lampade, thuris  
Exundans vapor assyrios exhalat odores;  
Ecce autem patulas, cerealia munera, lances  
Undantemque mero calicem, signisque rigentem  
Altare in medium referebat rite minister.



Continuo auditum majoribus affore sacris  
Tempora: Christigenas vocat in sua septa sacerdos.  
Qua patet in longum venerabilis aula, recedit  
Impatiens populus. Dextra laevaue frequentes  
Replent presbyteri vacua absidis <sup>49</sup>: inde sequentes  
Ordinibus variis, variaque aetate ministri.  
Cetera gens totam templi discriminat aedem:  
Hic matrum chorus, ille virum; caput omne virorum  
Nudum, <sup>50</sup> sed matres albo velamine celant.  
Nec minus electi festis operarier aris  
Sacrificeri ornantur, magnumque e more coronant  
Pontificem, egregiique parant gestamina cultus.  
Ipse autem, crassae submoto tegmine vestis,  
Induitur chlamydis non enarrabile textum,  
Quod tua nata, Pudens, Christo devota virago  
Neverat, et multo telam variaverat auro.  
Qualis Pontificem Isacidam decoraverat olim  
Infula, cum veteris stabant oracula templi,  
Assurgit capiti, praelati nomen honoris,  
Tergemino radians apice <sup>51</sup>: at vestigia firmat  
Pastorale pedum, et munus denuntiat ingens  
Monstrandi populis uberrima pabula Christi.  
Sic templo interiore, novi praesagia regni,  
Ornavere Senem mutandae insignia Romae.  
Stant lateri illustres procures, queis gloria maior  
Pontificem summum comitari, maxima sacra  
Dum facit, et pleno renovat mysteria coetu.  
Ipse habitu incessuque patet, qui scepra vicesque  
Dictus habere Dei, cui caelum et tartara parent.  
Suppliciter flexis dextra benedicit <sup>52</sup> et ore  
Christigenis, cultusque sacri exteriora secula

Vivida vis animae. Deffxi pectore toto  
Obtuluque haerent uno, dum vota precesque  
Nuncupat ante aram te exorans, Christe Redemptor,  
Pro se, pro Roma, et quotquot complectitur orbis,  
Caecigenis populis, et spe crescentis ovilis.  
Ecce alia interea revocant sublimia mentes.  
Procedens Clelus conferta per agmina: Fratres,  
Laetus ait, pia fas aliis aperire futuris  
Ostia Christicolis, sacro succedite fonti.  
Dixit, et antetulit gressum. Vicina tenebat  
Atria vestibuli candenti tegmine amicta  
Turba frequens; neque enim concessum et limina prima  
Indugredi, ante sacro Christi quam flumine mersi  
Exuerint primae contagia foeda ruinae.  
Grandaevus Senior festo cinctulus amictu  
Prodiat, comitante choro sacrisque ministris,  
Divini reserare pium baptismalis amnem.  
Fons erat illimis, niveis argenteus undis.  
Matres atque viri lymphae lustralis honorem  
Expectant, cunctisque pio festa errat in ore  
Laetitia, obscoenae linquunt dum gaudia Romae,  
Nec peritura petunt caelestia praemia, pacti  
Pulchram perpetier Christi pro nomine mortem.  
Quae vero illa autem coetu stipatur honoro  
Christiadum, primaque videtur fulgere palma?  
Virginis argolicae nosco decus oraque: quanta  
Majestas cultus! quantum mutatur ab illa,  
Quae quondam graias ibat lasciva per urbes,  
Nequicquam ardenti fingens nova gaudia mentes  
Ex quo Relligio mendaces dispulit umbras,  
Et docuit caeli trans sidera quaerere sponsum,

Cui queat ingenua tantum pietate placere,  
Divitias miseras, vitae argumenta prioris  
Deservit: cunctos regit una modestia motus.  
Jamque die sacra pietas studiosa sororum  
Ornat, vitaeque dedit monimenta recentis,  
Selectam tunicam pura nive candidiorem:  
Velat caesariem pepli mirabile textum,  
Quod Plautilla <sup>53</sup> pia concesserat hospita sponsae.  
Stat flavo capiti contexta corona, manusque  
Lilia, pubentesque rosas, viridemque amaranthum  
Daedala miscuerat. Radiantem lampade pura  
Ipsa facem tenet in medio, pariterque secutae  
Matronae tenuere facem; nova fronte relucet  
Gratia, quam frustra sperarem aequare canendo,  
Atque immortales oculis Deus afflat honores.  
Talem Rex Salomon commota mente videbat  
Engaddi juga perque Saron florentia culta  
Formosa specie regalem errare puellam,  
Vidit et obstupuit: talem se laeta ferebat  
Argiva: assistunt comites, quarum ignea virtus  
Christicolis dudum spectata, Pudentia, parque  
Praxedes <sup>54</sup> forma: tamen aequa sororibus Eune,  
Qualis gemma recens quae auro intertexta rubenti  
Emicuit, totam vivo splendore coronam  
Ornans, ipsa praestit caelesti luce, charisque  
Ignea dum roseo scintillat suavior ore,  
Largifluum expectat rorem. Jamque hora propinquat,  
Et Petrus in medio palmas utrasque tetendit,  
Orans multa Deum: mox laeto suaviter ore  
Alloquitur: Fratres <sup>55</sup> ( alio nec nomine cunctos  
Appellare licet ), quoniam dare nomina nostris

Quaeritis ordinibus, cuncti juratis amorem  
Aeternamque fidem Christo? Juramus, ad unum  
Respondent. Petrus sequitur: Juratis <sup>56</sup> iniqui  
Desidiem saeculi, et sordes vitare pudendas?  
Juramus: magna resonant plena atria voce.  
Subsequitur Petrus: Metuenda capessere bella,  
Cumque acherontaeo semper pugnare tyranno  
Juratis? neque jam longe superesse pericla  
Innumera intueor: Juramus, cetera turba  
Inclamat clamore novo. Tum Claviger aulae  
Aetherae propius sacrum progressus ad amnem:  
Atque ego primigenae abstergens vestigia fraudis  
Concretasque novas labes, in nomine Patris,  
Perque Patris sobolem aeternam, per Flaminis auram  
Christiadas faciam, in partem caelumque vocabo.  
Talia dicebat Senior, lymphaque salubri  
Gaudebat docilem venientum aspergere frontem.  
Praecipue Argolica stat virgine cura: tuentur  
Christicolae; Petrus paucis comitantibus ingens  
Explicat arcanum, primaque ab origine factum,  
Ut Pater Omnipotens penetrati e sede reduxit  
Innocuam: ut sexu major generosa Virago  
Ausa venenati furias vitare leonis.  
Succedunt alii atque alii, sacroque renasci <sup>57</sup>  
Exultant latice, et sancto adnumerantur ovili.  
Ecce autem mira exhilarat solemnia signum  
Caelestet extemplo summi laquearia tecti  
Subsiliunt, lucis radiis illustris et auro  
Nimbus inardescit, totamque perambulat aedem,  
Christiadasque petens lustrali fonte renatos  
Attonitum supra caput adstat: terque resultat

Flammula, ter lambit roseos innoxia crines,  
Et vox auricomam resonans discriminat aethram:  
Parce metu, mea progenies: tibi traditus orbis  
Totus in imperium, tibi cedit subdita tellus.  
Praetrepidat signo insueto chorus omnis, at omnis  
Excutitur subito timor, et fiducia crescit,  
Longaevus simul eloquitur sic pauca Sacerdos:  
Accipio, agnoscoque Deum, qui numine firmat  
Praesenti comites ad bella gerenda paratos.  
Este bonis animis: vestro mora nulla triumpho.

Talibus exactis, sacrorum maximus Auctor  
Ad templum remeabat ovans, pandique jubebat  
Augustos postes, veniensque examen inire.  
Hoste triumphato, captorum corpora quondam  
Per sacrum clivum Capitolia ad alta trahebat  
Rhamnes ludibrium populo: Galilæius heros  
Non vi, sed verbi devictos munere, fratres  
In Christo gemitos, et libertalis <sup>58</sup> adeptos  
Officium, atque sui dominos in templa reducit,  
Et caelo affectare viam, regnique paterni  
Adscribi heredes <sup>59</sup> promisso pignore donat.  
Postquam Christicolae sua quisque in septa recedunt,  
Ipse, choro comitante, sacras procedit ad aras,  
Maxima laturus summo libamina Patri.  
Selecti interea juvenes modulamina laeta  
Instituunt, sacroque novant praecordia cantu,  
Et vox assensu vario ingeminata potentis  
Talia Psalmicinis referebat carmina ad auras:  
En urbs <sup>60</sup>, en dilecta Deo urbs, quae vertice sancto  
Stat fundata: novae plus ostia magna Sionis  
Diligit Omnipotens, tua quam tentoria, Jacob.

O quae faticino de te decora inclyta cantu  
Spiritus eloquitur! non uni moenia genti  
Constitui: Aegyptus truculenta caede superbus  
Abramidum, Babylon raptis tot clara tropoeis,  
Et Tyros adveniet dives, fuscoque colore  
Aethiopes, sanctaque pedes in sede locabunt.  
Humana majora fide, mirandaque dictu!  
Moenibus his vilam Deus ipse advenit ad aegram,  
Atque urbem statuit? Deus haec manifesta locutus,  
Testatique sacri per magna volumina vates,  
Quo tabulis descripta patent tot nomina gentes  
Et proceres; sancta qui cives urbe morari  
Practulerint, patriamque legent, jam pace recepta,  
Et plaudent choreas, et gaudia lula fruentur.  
At Senior sacra incipiens laeto ore salutat  
Orantem populum: conclamat voce Minister:  
Fratres, amplexi pacis date sancta vicissim  
Oscula: consurgunt omnes, atque oscula libant.  
Quae pietas offert cerealiam dona, sacerdos  
Colligit ante aram: conscendit pulpita Lector,  
Et Petrus explanans divina oracula, coelum  
Laelitia exultans circumspicit, atque ita fatur:  
Lecti Christiades, sanctae prima ordia Romae,  
Quam vos cerno libens concursu accedere magno!  
Triginta magnos volvit sol aureus orbes,  
Cum Solymis supera Spirabile Numen ab aethra  
Emicuit caeli mysteria magna recludens <sup>61</sup>,  
Et nos divinae laturi nuntia vocis  
Egressi Solymis cunctas peragramus <sup>62</sup> in oras.  
Quae Numa aricini per muta silentia luci  
Colloquia Aegeriae <sup>63</sup> finxit, quae sacra Quirini

Imposuit populo, tenues ceu fumus in auras  
Cedunt, exorto divini lumine solis.  
At nova Roma throno stabit fundata potenti,  
Quem nullae excutient furiae; si tartarus ipse  
Ingruit armatus <sup>64</sup>, victo insultabit inermis.  
Ecce dies rediit festo solemnior omni,  
Et venerabilior, sua qua promissa replevit  
Omnipotens: « Ego vos, nati, non desero solos <sup>65</sup>,  
Aut indefensos: patriam regressus ad aulam  
Consolaturam, omnigeno solamine mittam  
Omnipotentem auram caelo, vestrumque morabor  
In medio semper <sup>66</sup> ». Magnis fastigia coeplis  
Imposuit Christus. Veluti post bella peracta,  
Sicubi compositae firmantur foedera pacis,  
Consociata fides per mutua pignora constat,  
Haud aliter secum natura humana, Deusque  
Sponsores rerum communia pignora mutant.  
Corporis exuvias Christus superintulit astris,  
Primitias hominis miseris; mirabile Flamen  
Insuetum pignus terras descendit in imas.  
Ex quo caelesti tantus stetit obses in ora,  
Divinum ad solium succedere quimus, et ipsum  
Fas contemplari numen. Vos, lecta propago  
Christiadum, caelo laetata extollite mentem.  
Anne datam terris aliud firmare salutem  
Munimen poterat, nisi Spiritus afforet almus <sup>67</sup>?  
Dicam equidem in terris Ecclesia nulla maneret <sup>68</sup>.  
Qui praeo Romae, speculaque insomnis ab alta  
Susceplam cunctas lucem diffundo per oras,  
Quid certum immotumque loquar, cui credere fas est?  
Si Romana fides <sup>69</sup> nequeat decerrare, nec unquam

Deficere, omne suo manat de munere: praesens  
Ipsa ades, ipsa mihi dictas, Spirabilis aura.  
Ipsa sacerdotum vario legis ordine, lectas  
Consecrasque tribus: coelum Ipsa educis ovanlem,  
Nostraque per cunctas firmas vestigia terras,  
Antiqui generis molem instaurare ruentem.  
Ast opus insuetum mirabilis Aura patrabat  
Flammea diversas jaculans per acumina linguas.  
Scilicet ut fulvum purgatur in ignibus aurum <sup>70</sup>,  
Ignis inardescens generis miserabile coenum  
Exuit, et virtute nova caelestibus aequat.  
Et vos primitiae magni gregis <sup>71</sup>, altera Roma,  
Quae sensim oculo velut arbor crescit aeo,  
Si fertis Christi nomen, si dicere natos  
Vos Deus ipse suos gaudet, patremque vicissim  
Dicere quisque potest, si vobis certa cupido  
Et spes siderei complere sedilia regni <sup>72</sup>,  
Muneris omne sui est. Spirabilis aura calore  
Intus alit sancto, rerumque ad maxima raptat.  
Ergo diem sanctam merito celebremus honore.  
Non opis est nostrae dignas persolvere grates  
Auctori tantorum operum: ast <sup>73</sup> innoxius Agnus,  
Qui caelum longo aversum certamine terris  
Conciliavit amans <sup>74</sup>, et nostra piacula delens,  
Concessam aeterno firmabit foedere pacem.  
Ergo, dum summo mactabitur hostia Patri,  
Solemnes adhibete preces, dapibusque sacratis  
Instaurate animas, et spe praesumite caelum.  
Sic ait, atque opera extemplo ad solemnia pergil.  
Namque manu excepit cerealia dona, stupensque  
Prodigium, supra omnipotentia verba <sup>75</sup> profatur



Anxius, atque Deum subnixo poplite adorat.  
Et mox plena mero accepit carchesia, vocesque  
Augustas repetit, nisunque acclinis eodem  
Procubuit miri recolens mysteria facti.  
Ipsa figura manet, speciesque colorque saporque,  
Intus adest Christus, non observabile numen,  
Qualis ab aetherea Deus olim lapsus ab ora  
Omnipotens, miserique indutus corporis artus,  
Bissenis sociis donatus nocte suprema.  
Insuetas escas insuetaque pocula vini  
Attonitus Senior populo ostendebat <sup>76</sup> ovanti:  
Per cunctas terras anne altera natio, Fratres <sup>77</sup>,  
Numina habet propiora sibi, ceu proximus adstat  
Christus? numen adest, praesens hac numen in ara.  
Eia agile innocuis animis accedite, puris  
Fas manibus, puris fas Christum tangere labris.  
Dixerat, atque aram se densa examina circum  
Effundunt, cereremque sacram laticemque lyacum <sup>78</sup>  
Denisso accipiunt vultu: sua cuique ministrat  
Dona Pater dium corpus diumque cruorem.  
Tolum credo equidem tanta ad spectacula caelum  
Emicuit: iuvenum legio sortita recentum  
Christiadum curam, variis e partibus urbis,  
Romae surgentis, renovatique <sup>79</sup> omina mundi  
Spectatum veniunt. Fati manifesta futuri  
Pars primos adytus densa cinxere corona,  
Vestigantque vias, ne forsan turbidus hostis  
Impune occurrat: pars versicoloribus alis  
Vultus velantes roseos altaria circum  
Agglomerant, pronique Deum venerantur, et orant,  
Agmina Christiadum comitantes, debita caelo

Quae novere diu, caeloque attollere gaudent.  
Per sacratam aedem tranquilla silentia regnant.  
Intenti recolunt unum, cunctique stupescunt  
Factum insuetum, ingens, domini caelestis amorem.  
Nullum fit murmur: suspiria dulcia tantum  
Et dulces gemitus commoto e pectore surgunt,  
Sponte sua praesens Numen natura salutat.  
Quis tibi tunc animus cernenti talia, Pastor?  
Gaudia quanta tibi, Romae cunabula prima  
Tanto virtutum redolentia flore tuenti?  
Et magno exultat numero, et fervere tanto  
In Christum studio, et miseris valedicere terris  
Conspicit, et magno languens absorptus amore,  
Talia commemorat speratae gaudia laetae:  
Ah! ego quam cerno Sulamitida <sup>8a</sup>? quaeve virago,  
Primo flore micans, a verticibus desertis  
Ascendit, sponsique humeris innititur? illam  
Quacumque incedit, nimbus comitatur odor  
Thuris, et myrrae, et casiae, et benevolentis amomi.  
Sexaginta illam fortissima pectora <sup>8a</sup> cingunt,  
Fulmineosque tenent gladios ad bella paratos  
Nocturnas contra insidias hostesque diurnos.  
O formosa mihi <sup>8a</sup> nimium, o pulcherrima casti  
Exuperant oculi vivaci luce columbas!  
Ut pulchrae rubuere genae, ceu turturis! utque  
Candescit collum, et gemmata monilia vincit!  
Ceu caprae Galaad tondentes vertice frondes,  
Aureoli passim ludunt sine lege capilli,  
Labraque sidonio fulgescunt murice tincta.  
Vallibus Engaddi ceu candida lilia florent  
Inter spineta, exuperas pulcherrima matrum

Natas; et fulgent nativo cuncta colore.  
Quid si regali cinges diademate frontem,  
Dilectique tui ad dextram Regina sedebis <sup>83</sup>  
Aurata in veste, et vario circumdata coetu?  
En jam fugit hyems, <sup>84</sup> hybernus fugit et imber.  
Flores prodierunt culta e tellure; volucres  
Implent ambrosias gratis concentibus auras.  
Surge, <sup>85</sup> veni, propera, secunda foramine petrae  
Dilectum invenies: fragranti melle decora  
Eloquia accipies, undanti flumine amoris  
Impatiens nabis . . . Sic prima Ecclesia Romae  
Pontifici dia apparebat imagine: tali  
Carminum fatidicas laetus depromere dotes  
Substitit: arcanus sensim deferbuit aestus  
Attollitque animos caelo, gaudensque precatur:  
Crescat grex ovium: crescat tibi gloria, Christe,  
Et romana fides toto celebretur in orbe.  
Christiades siluere, intentique ora tenentes  
Despiciunt terram, caeloque assuescere discunt.

Et jam finis erat sacro: saturata voluptas  
Divinis epulis, gratesque e more solutae  
Christiadum; sero properabat Vesper in axe.  
Ibant sacrifici solemnes ponere vestes;  
Turba sacris functa augusti de limine templi  
Egreditur, vastis et circumfunditur aulis.  
Tempore jam primo, cum diu exemplar amoris  
Deservit Christus terris, et origine ab una  
Natos terrigenas docuit, spemque omnibus unam,  
Expectare omnes communia gaudia caeli,  
Assuerant certae per mutua vincula pacis  
Christiades celebrare sacro convivia <sup>86</sup> coetu.

Sponte sua dives cerealia dona ferebat  
Ante aram, fratres consolaturus egenos.  
Intererant mensae nullo discrimine honoris  
Divitiis pollens, et magna e gente creatus,  
Et qui pauperior sub dio vivere adactus.  
Turre fuit summa <sup>87</sup>, romano splendida luxu  
Corneliae aula domus ingens, effulta superbis  
Porticibus, latosque patebat desuper hortos  
Arboribus textos circum et viridantibus umbris.  
Picta novo cultu, atque emblemate vermiculato  
Structa pavimenta <sup>88</sup>; ingentis laquearia <sup>89</sup> tecti  
Candescunt ebore, atque auro, caelataque monstrant,  
Ornamentum ingens, veterum decora alta Quiritum.  
Haerent parietibus specula <sup>90</sup>, inductoque colore  
Marmora, pensilibusque abacis tectoria lucent <sup>91</sup>.  
Talia romano extruxit coenacula more  
Munificus divesque Pudens: hac sueverat aede  
Post decisa urbis graviora negotia festam  
Concelebrare dapem, et strato discumbere in ostro.  
Tecta tamen luxu quondam maculata superbo  
Heros mutavit meliori sorte, sacrisque  
Usibus aptavit, quo Sancti foedere certo  
Dulcia fraternis facerent convivia mensis.  
Ex illo antiquos titulos amisit Apollo <sup>92</sup>:  
Fortunata aedes Agape <sup>93</sup> cognomine dicta.

Ergo, perfectis divinis rebus, in amplam  
Christigenae intröeunt aulam, mensisque locatis  
Sic temere accumbunt nulloque ex ordine fratres.  
Dia procul ratio vani irritamina luxus  
Esse jubet: populator opum, dissuasor honesti  
Incautam luxus Romam matresque virosque

Perdedit: at parvo vivit contenta paratu  
Simplex mundities, fraternum astringere nodum  
Gaudens, atque animos patrio convertere caelo.  
Collecta instituunt mensis oblata per aras  
Munera: magnifici neque porro dextra Pudens  
Deficeret; tamen, ut constans sententia Patrum,  
In commune ferunt communia gaudia, mentes  
Ut sociae sancto copulentur foedere: Christus  
Una quies cunctis, in Christo vivitur uno.  
Christigenae interea genialia fercula carpunt;  
Et rursum Senior veneranda volumina <sup>94</sup> Mosi  
Evolvens recolit veterum miracula rerum.  
Ille legit cunctans capita inter singula; cuncti  
Intenti auditis instant, verasque loquelas  
Desigunt animo, rerumque abscondita: terrae  
Munere vescuntur simul, et caelestia libant.  
Pontificem magnum rapuit vis ignea: volvens  
Quo studio Deus Hebraeos per saecula duxit,  
Qui nunc aversi Christo fera bella minantur,  
Ingratum, o, inquit, genus; inviolabile foedus  
Caelum inter terramque venit componere Christus.  
Judaei fugiunt? at non te, Christe Redemptor,  
Nos fugimus, nos ingentis prima omina regni.  
Hic citharam auratam vicino a pariete raptam  
Philologus <sup>95</sup> tulit in medium. Memorabile carmen  
Dictarat sanctus juvenis; didicere puellae  
Christiadum, didicit graias exosa camoenas  
Psallia . . . Quae assuêrat cantu temerare profano  
Mollia fila lyrae, majoribus excita flammis  
Argolicis numeris modulatur nobile carmen <sup>96</sup>,  
Exhilarans casta commota sedilia voce:

Salve, magna Patris soboles, salve inclyte custos  
Terrigenûm, salve, magni bone pastor ovilis.  
Qua voce aggrediar te dignos promere cantus?  
Angelici salve coetus <sup>97</sup> lux maxima, et omnis  
Omne potestatis caput, aeternique potestas  
Imperii: tibi mille acies, tibi mille ministri  
Aetherei comitantur, ovantique agmina gyro  
Agglomerant cantare tuae praeconia laudis.  
Salve: te lecti Isacidûm cecinere prophetae  
Venturum vatem: *stellata* maior ab aula  
Ipse aderas vates, operumque arcana futura  
Diae inspirabas animae: mox praevia vatum  
Carmina firmasti: mortali indutus amictu  
Doctrinae aetherae totum documenta per orbem  
Vulgasti caelo facta, et dignissima caelo.  
Salve Rex regum <sup>98</sup>. Claro regumque ducumque  
Sanguine deductus modo non regnabis in aede  
Dilecti Jacob, cunctosque ab stirpe nepotes  
Incolumes sistis patriae Chananitidos ora,  
Imperium sine fine datum tibi, maxima mundi  
Moenia: tu patrio terras acquabis olympos.  
At nunc in titulos venit nova gloria: magnis  
Eventis verum tenues quis conferet umbras?  
Salve Pontificum primus, primusque sacerdos.  
Primus pontificum <sup>99</sup> instituis nova sacra, Sacerdos  
Primus sacra voves. Primaevo more parentum  
Patres sacrifici loca vulgo abstrusa subibant,  
Pocula gestantes fluido manantia rore  
Post legale sacrum, et numen caeleste piabant.  
Tu simul ac sanctam scelerato in robore vitam  
Fudisti, caelum ingrederis: qui monte nefasto

Calvariae summo placabilis hostia Patri  
Concideras, nostris altaribus hostia praesens  
Mactaris, nostrae pretia infinita salutis.  
Tu genus humanum indubitata potentia Patris  
Corpore servasti atque animo: tua gratia <sup>100</sup> vitam  
Expertem labis donat traducere terris;  
Atque ubi terrificas clauget tuba magna per auras,  
Surgere donabit tumulis, coetusque micantes  
Praeciungent meritam immortalis e flore coronam.  
Talia cantabat Virgo: modulamina laeta  
Commotae tulerant aurae: loca proxima sacro  
Exultant motu; placido Tiberis exerit alveo  
Laelatam frontem, stupefactaque constitit unda,  
Et septingemino laetantur vertice colles.  
Chrisligenae stupuere novae gravitate camoenae,  
Quae primum impuros desueta cupidinis ignes  
Concinere, hebraea se maiestate revolvens  
Tentarat Christi magnos cantare triumphos.  
Nec minus exultat castae dulcedine votis  
Pontificum Senior: tum facta silentia linguis,  
Et superam inspectans oram, qua patria felix  
Inclita Christicolis, qua meta extrema laborum,  
Talia voce refert: O, qui terrasque polumque  
Aeternis regis imperiis, Rex maxime, rorem,  
Divinum rorem in sanctum diffundito ovile.  
Tu benedic, Pater: ipse tuo qui munere fungor,  
Accepi, agnoscoque tuo sub numine caulam  
Crescentem. Ecquando totum clarescet in orbem  
Nomen ubique tuum? populos unde unde vocalos  
Ecquando videam soli tibi reddere laudes?  
Talibus orabat Senior votisque sequuntur

Pontificem comites: sed sancta silentia turbat  
Insolitum murmur. Cursu festinus anhelò  
Tychicus <sup>101</sup> a Paulo veniens horrenda reportat  
Nuncia, et ingenti conclamat voce per aedes:  
Heul fugite, o socii, fugite: implacabilis hostis  
Perfurit: armatus miles caelestia fantem  
Deprendit Paulum, caecoque in carcere clausit.  
Vix ipse effugi, qui tristia nuncia ferrem.  
Nec longum tempus; magnum circumdabit agmen  
Tecta haec; adspectu, Genitor, te subtrahe nostro,  
Sancte senex, molire fugam. Ceu sole calenti,  
Cum rubicunda ceres <sup>102</sup> avido demessa colono,  
Pars latis aret campis, pars altera duris  
Obteritur tauris, caelo stipata volucrum  
Turba supervolitat, securaeque ordine longo  
Ludentes circum positis pascuntur acervis:  
Tum si forte sonans immani turbine plumbum  
Missile fulmineo venantum eruperit aere,  
Extemplo turbati animi, formidine caeca  
Ilac illac costernatae per inania caeli  
Effugiunt, aliae æria super arbore sidunt;  
Haud aliter fugiunt turbata per atria fracti  
Christicolae, et nota excedunt regione viarum.  
Tum Petrus: O socii, quaqua via prima salutis  
Panditur, accelerate gradum, loca tuta parate.  
Hic ego, laeva mihi eveniant quaecumque, morabor.  
Hic mihi cara domus, ubi primum altaria Sancti  
Christiadum statuere, ubi primum sacra tulere.  
Haec ego servabo custos; licet efferus hostis  
Immineat, sanctas occumbam laetus ad aras.





N O T Æ

<sup>1</sup> *Augustus rates.* — Insigne sane et pervetustum Virgillii monumentum servat Neapolis. Donatus Grammat. in hujusce poetæ vita: Voluit etiam sua ossa Neapolim transferri, ubi diu et suavissime vixerat . . . Translata igitur jussu Augusti ejus ossa, prout statuerat, Neapolim fuere, sepultaque via Puteolana intra lapidem secundum. Et D. Hieronymus lib. III in Chron. Eusebii: Virgilius apud Brundisium moritur, Sentio Saturnino, et Lucretio Cinna Coss. Ossa ejus Neapolim translata, in secundo ab urbe milliaro, sepe-liuntur titulo hujusmodi, quem moriens dictaverat:

Mantua me genuit, Calabri rapuere, tenet nunc

Parthenope: cecini pascua, rura, duces.

Quod diutius Neapoli commoratus sit, constat ex ipsomet qui opus Georgi-corum perfectissimum ibi exarasse profitetur, Georg. IV, 563.

Illo Virgilium me tempore dulcis alebat

Parthenope, studiis florentem ignobilis oti.

Nec alibi, quam Neapoli et propinquis Puteolis scripsisse putandum est me-liorem Aeneidis librum, nempe VI: quod meridiano sole clarius apparet, si quis tantam locorum varietatem affabre depictam contemplantur. Statius Nea-pol. lib. IV. Sylv. c. 4, v. 51 canit ætate sua hoc sepulcrum veluti tem-plum incolas et advenas venerari.

<sup>2</sup> *Trans Tiberim.* — Praestiterit audire Philonem sic apud Cajum Augu-stum loquentem: Ipsum, inquit, Augustum numquam inflatum talibus obse-quiis hinc certo colligitur, quod numquam sustinuit se appellari Deum vel Dominum, aversatus hanc adulationem, nec dissimulans probari sibi judæos qui abominarentur talia. Alioquin non passus fuisset Transtiberim bonam urbis partem teneri a judæis, quorum plerique erant libertini; quippe qui belli jure in potestatem redacti, ab heris suis manumissi, fuerant permissi jure majorum vivere. Hos sciebat habere suas proseuchas, id est, Synagogas, in quibus coetus facerent, praesertim Sabbatis juxta religionem patriam.

<sup>3</sup> *Sata pingua campi.* — Paul. ad Corinth. III, 9: Dei enim sumus adjutores, Dei agricultura estis, Dei aedificatio estis.

<sup>4</sup> *Cletumque Linumque.* — Quae certiora de tribus hisce Petri succes-soribus habemus, hic in medium afferimus: saepe enim de iisdem redibit in-ferius sermo. Linus, natione italicus, provincia thuscus, patria volaterranus, patre Herculano; Cletus patria romanus, patre Aemiliano, ex Vico Patricio. A B. Petro christiana fide edocti et religiosae militiæ tirocinio sanctissime perfuncti, primum presbyteri, mox episcopi facti sunt. Roma discessurus Sum-mus Ecclesiae Pastor, ut numeroso gregi in urbe principe collecto consulere-t, eosdem vicarios reliquit. Quod idem de Clemente habendum est, qui Faustini et Matidia filius, Romae in secunda Coelii montis regione summo loco na-tus, et ad Caesarum gentem suam ortum referens, clarus philosophus fuit,

et theologus. A B. Petro sacrosancto christianorum ritu ablatus illi primum diaconus adfuit, dein ad presbyteratus et episcopatus munia evectus, Paulo perpetuo comes adhaesit. De Lino Paulus meminit in epistola ad Timot. 11, 21: Salutat te Eubulus et Pudens, et Linus, et Claudia et fratres omnes. De Clemente idem Paulus: Cum Clemente, et ceteris cooperantibus meis, quorum nomina scripta sunt in libro vitae. De eorum officio sic Ignatius E. 4 ad Trallianos: Quid vero diaconi, quam imitatores angelicarum virtutum? qui purum et inculpatum ministerium illi exhibent, ut S. Stephanus B. Jacobo, Timotheus et Linus Paulo, Anacletus et Clemens Petro (Cletus et Anacletus idem est)? Joannes Papa III apertissime ait Linum et Cletum non fuisse institutos Romanae Ecclesiae episcopos, sed tantummodo adjutores: quae verba non aliter sunt intelligenda, nisi quod sic sederint, dum Petrus vixit, ut non aequalem Petro amplitudinem nacti sint, sed adjutores tantummodo illius extiterint, quod et nos profiteamur.

<sup>5</sup> *Cunabula gentis.* — Re sane vera die Pentecostes, Spiritus Sancti inauguratione, proprie coepit Ecclesia: tunc primum Apostoli non modo commissam sibi auctoritatem exercuere, sed delectis hominibus eam communicarunt; primum septem diaconis (Act. VI), deinde aliis, presbyterali, seu episcopali dignitate decoratis. Tunc primum potestas solvendi et ligandi, conficiendi Eucharistiam, administrandi baptismum, docendi omnes gentes, solemnibus nam missio illa qua dixerat Jesus: *Sicut misit me Pater, et ego mitto vos*, ad regendam et instruendam Ecclesiam collata patuit.

<sup>6</sup> *Ostendunt plurima signa.* — Petrus. 1, 1, 14: Velox est depositio tabernaculi mei, secundum quod et Dominus Jesus Christus significavit mihi.

<sup>7</sup> *Novus exitus.* — Passim apud Apostolos: Paul. Cor. V, 12: In Christo nova creatura: facta sunt omnia nova. Hebr. X, 20: Initiavit nobis viam novam. Coloss. III, 9: Expoliantes veterem hominem induite novum, qui secundum Deum creatus est. Apoc. XX, 5: Ecce nova facio omnia.

<sup>8</sup> *Amorem.* — Paulus ad Rom. XIII, 10: Plenitudo legis est dilectio.

<sup>9</sup> *Israëlis oves.* — Paulus scribens ad Galatas, ait decreto Concilii Hierosolymitani sibi et Barnabae commissam fuisse praedicationem Gentium; Petro autem, Jacobo et Joanni eorum curam qui e circumcisione ad fidem venissent: Cum vidissent quod creditum est mihi Evangelium praepitui, sicut Petro circumcisionis. Si rationem quaeris, a Baronio accipe, qui Petrum circumcisionis mysterio, velut honestissimo omnium titulo nobilitatum existimat. Ipse Christus, qui omnes homines servatum venerat, majoris amplitudinis ergo vocatus minister Circumcisionis. Paul. ad Rom. XV, 8: *Dico Christum ministrum Circumcisionis.*

<sup>10</sup> *Gentes.* — Saepius id Ap. affirmat, et praecipue II. ad Timotheum, I, 11: In quo positus sum ego praedicator et Apostolus et magister gentium. Ad Rom. XV, 16: Ut sim minister Christi in gentibus. Et XI, 13: Quamdiu quidem ego sum gentium Apostolus.

<sup>11</sup> *Medio in orbe.* — Sic putabant Romani ipsi: Ovid. Fast. 11, 682. Romanae spatium est urbis et orbis idem.

<sup>12</sup> *Neque carnificum rabies.* — Paul. ad Rom. VIII, 35: Quis ergo nos separabit a caritate Christi? Tribulatio? an angustia? an fames? an nuditas? an periculum? an persecutio? an gladius? 37. Sed in his omnibus superavimus propter eum qui dilexit nos. 38. Certus sum enim, quia neque mors, neque vita, neque Angeli, neque principatus, neque virtutes, neque instantia, neque futura, neque fortitudo, neque altitudo, neque profundum, neque creatura alia poterit nos separare a caritate Dei, quae est in Christo Jesu Domino nostro.

<sup>13</sup> *Dum validae superant.* — Joan. Evang. XXI, 18: Amen amen dico tibi: cum esses junior, cingebas te, et ambulaabas ubi volebas: cum autem senueris, extends manus tuas, et alius te cinget, et ducet, quo tu non vis.

<sup>14</sup> *Infelix Agna.* — Matth. XVIII, 12: Si fuerint alicui centum oves, et erraverit una ex eis, nonne relinquit nonaginta novem in montibus, et vadit quaerere eam quae erravit? 13. Amen dico vobis, quia gaudet super eam magis, quam super nonaginta novem, quae non erraverunt.

<sup>15</sup> *Sophus.* — Liv. lib. XXIV, 34: Archimedes is erat, unicus spectator caeli, siderumque; mirabilior tamen inventor et machinator bellicorum tormentorum operumque, quibus ea quae hostes ingenti mole agerent, ipse perlevi momento ludificaretur.

<sup>16</sup> *Syracosii vatis.* — Theocritus, Syracusanus poeta de quo Virg. Ecl. 6.

Prima Syracosio dignata est ludere versu

Nostra, nec erubuit sylvas habitare Thalia.

<sup>17</sup> *Ceres.* — Habita a Gentibus Dea frugum, ab antiquo *cereo* pro *creo*, quasi frugum creatrix. Proserpinam e Jove et Cerere natam, dum Siciliam lustraret, et flores apud Ennam urbem legeret, veteres a Plutone raptam jactarunt. Si Pluto divitiarum pater habitus, quia opes omnes ab inferis, idest ex intimis terrae visceribus effodiuntur, non improbandam arbitror sententiam J. Baptistae Vici, qui ab frumenti semine terrae commisso, ibique delitescente, in insula praecipue, quae dicta fuit horreum Romanorum, confictam fabulam credit. Vide *Vico, Scienza Nuova* in explicatione Saturni et Latii.

<sup>18</sup> *Juvenalia.* — De hujusmodi ludis audi Tac. lib. XIV. Ann. c. 13: Instituit ludos Juvenalium vocabulo, in quos passim nomina data: non nobilitas cuiquam, non aetas, aut acti honores impedimento, quominus graeci latinive histriouis artem exercerent.

<sup>19</sup> *Puella.* — Idem Tacit. loc. cit. Quin et foeminae illustres deformia meditari.

<sup>20</sup> *Pudor.* — Tac. Vix artibus honestis pudor retinetur; nedum inter certamina vitiorum pudicitia aut modestia, aut quidquam probi moris reservaretur.

<sup>21</sup> *Augustanorum.* — Tac. loc. cit. Tunc primum conscripti sunt equi-  
fol. 1.

tes romani, cognomento Augustanorum, aetate et robore conspicui, et pars ingenio procaces, alii in spe potentiae. Hi dies ac noctes plausibus personare, formam principis vocemque laudare, Deum vocabulis appellantes.

<sup>22</sup> *Patriciumque petunt vicum.* — Vicus *Patricius* sic dictus Romae, quod ibi Patricii habitaverint, jubente Servio Tullio, ut si quid adversus ipsum molirentur, ex locis superioribus opprimi possent.

<sup>23</sup> *Villice.* — Villicus apud Romanos praefectus erat villae, cuique tota rei rusticae cura a Domino committebatur: sed Horat. L. I, Ep. 14: Villice sylvarum, et mihi me reddentis agelli, ponit pro ipso rustico cultore agri. Utroque sensu de Petro Pontifice Max. intelligi potest, eoque magis quod in Evang. saepe de villico, et villicatione sermo interseritur.

<sup>24</sup> *Vespere sero.* — Notissima Christi parabola de operariis in vineam conductis. Vide. Matth. XX, 1.

<sup>25</sup> *Mecaeas.* — Partem Exquiliarum in qua antea commune sepulcrum, Mecaenas emit, perpurgavit, et in aprico colle hortos et domum fecit. De his hortis mecaenatianis inferius redibit sermo. In Hor. Sat. VIII, sic Priapus:

Nunc licet Exquiliis habitare salubribus, atque

Aggere in aprico spatium, quo modo tristes

Albis informem spectabant ossibus agrum.

<sup>26</sup> *Vimine collum.* — Audi Livium lib. I, 44. Addit (Servius) duos colles Quirinalem Viminalemque: inde deinceps auget Exquilias, ibique ipse, ut loco dignitas fieret, habitat. *Viminalis* dictus iste collis a viminum sylva in eo enata circa aram Jovis, unde et ipse Jupiter Vimineus cognominabatur, Varro l. 4, de L. 1. Pudens clarissimus fuit senatorii ordinis civis romanus, pater Novati, atque Timothei, Praxedis, et Pudentianae virginum. Ejus mulier fuit Cornelia. Domus ejus ad radices Viminalis prope Exquilium omnibus patuit Christianis, ibique sacrae agebantur synaxes. Hodie Ecclesia est sub titulo Pastoris.

<sup>27</sup> *Portendi regem.* — De Messiae adventu firma persuasio non modo intra Judaeae fines se non continuit, sed per omnes orientales regiones percrebuit. Hic tantum de Tacito et Svetonio testimonia decerpemus. Svet. in Vespas. IV: Percrebuerat Oriente toto vetus, et constans opinio esse in fatis ut eo tempore Judaea profecti rerum potirentur. Tacit. Hist. lib. V, 13: Pluribus persuasio inerat antiquis sacerdotum litteris contineri eo ipso tempore fore, ut valesceret oriens, profectique Judaea rerum potirentur.

<sup>28</sup> *Ficus.* — De romulea Ficu, in trunco et ramis arescente, Nerone tertium, et Messala consulibus, scribit Tacitus, Ann. lib. VIII, in fine: Eodem anno Ruminalem arborem in comitio, quae per octingentos, et quadraginta ante annos Remi Romulique infantiam texerat, mortuis ramalibus et arescente trunco deminutam, prodigii loco habitum est, donec in novos foetus revivisceret. In arefacta, ad Christi imperium, ficulnea apud Hierosolimam, Sy-

nagogae infructuosae interitum Patres omnes recognorunt. Matth. XXI, 19. 21: Mane autem facto, dum reverteretur Hierosolymam, arborem sici in via positam, quod fructus non invenisset in ea, arefecit. Quod idem de romana sicu interpretatur Poeta.

<sup>29</sup> *Frequentat.* — Cum Romam Petrus pervenisset, ad contribules suos Judaeos divertisse credimus. Ceterum brevi Evangelium Gentilibus romanis quoque innotuit, et praecipue Senatori Pudenti, qui in domo sua principem Apostolorum excepit, suus discipulus factus.

<sup>30</sup> *Hactenus ignota.* — Christus Jo. XVI, 14. seqq. ita de Spiritu Sancto loquitur: Ille me clarificabit, quia de meo accipiet, et annuntiabit vobis. Omnia quaecumque habet Pater, mea sunt. Propterea dixi: quia de meo accipiet, et annuntiabit vobis.

<sup>31</sup> *Delubrum.* — De fonte prae foribus Ecclesiae posito, lege praeciptum Domini in Exodo, XXX, 18. Facies et labrum aeneum cum basi sua ad lavandum. Quem fontem ad emundationem corporis positum, templa etiam Gentilia habebant, et quasi naturali quodam instinctu docebat non nisi puros ad Deum accedere debere, mundosque numini supplicare. Quod si Apostolus ante precationem manus abluere monet: *Volo ergo viros orare*, (Tim. I, 11, 8) *omni loco levantes manus puras*, in ipso ingressu Ecclesiae Baptismi lavacrum constitutum fuit, ut salutari aqua lustrati templum ingrederentur.

<sup>32</sup> *Effigies pulcherrima.* — In ortu ipso Christianae religionis, cum in hominum mentibus adhuc haereret idolorum superstitio, non tam frequens fuit sacrarum usus Imaginum, praecipue cum gentilis coepit furor exardescere. Sed in prima illa Pudentiani templi simplicitate, ut quietiora ferebant tempora, velutque in privata domo, ut symbolicam Christianae Redemptionis repraesentationem exhiberemus, et antiquissima exemplaria a quamplurimis antiquis scriptoribus graphice exarata persuadent, et vetus Canon Synodi antiochenae apostolorum nuncupatae: Ne decipiantur salvati ob idola, sed pingant ex opposito divinam humanamque manufactam impermixtam effigiem Dei veri ac Salvatoris Domini Nostri Jesu Christi.

<sup>33</sup> *Oriens.* — Situs Ecclesiarum antiquitus is erat, ut introitus Occidentem, Sanctuarium orientem spectaret. Extra dubium profecto est, ut Christiani ad orientem conversi funderent Deo preces: unde enatum, teste Tertulliano, in Apolog. 16, ut Gentiles dicerent Christianos Solem adorare. Cujus instituti variae asseruntur rationes. Et Tert. 3 et 6, ipsum Christum Orientem appellat; cumque Deus sit dictus lux, lucisque creator, ad eam caeli partem spectabant precantes, qua solis jubar oritur. Porro Joann. Damasc. Orthodox. Fid. lib. IV, 13: Christus cum in caelum reciperetur, ad ortum efferebatur, sicque a discipulis adoratus est; atque ita venturus est, ut eum in caelum intuentem conspexerunt. . . Quocirca adventum ejus oppetentes, ad Orientem oramus.

<sup>34</sup> *Dicina domus.* — Loca diis consecrata variis appellationibus Romani

dixerunt *templa, aedes sacrae, delubra, fana, sacella, lararia, luci*. Fatendum quidem est nullum horum nominum gentilitiae superstitioni convenientiorum tribus prioribus saeculis a sacris scriptoribus usurpatum: sed locos, in quos ad sacros celebrandos conventus Fideles convenire soliti erant, diversis nominibus dixere *Ecclesia, domus Dei, domus orationis, oratoria*.

<sup>25</sup> *Reliquiae ingentes*.—Quod supra sepulcra et memorias Martyrum Sacrificium Missae perageretur, antiquissima et apostolica est institutio. Prae multis sufficit illud Apocalypseos testimonium, VI, 9: Vidi subtus altare Dei animas interfectorum propter verbum Dei, et propter testimonium quod habebant. In eoque tum graeci tum latini interpretes aequae consentiunt, pariterque affirmant sepulcra Martyrum fuisse altaria. Quod vero Stephani memoriam praecipue selegimus, antiqua suadent Martyrologia. Ejus enim corpus, studiosa Gamalielis sollicitudine, in Orientali theca in suo monumento fuit depositum; lapis, super quem positus suscepit lapidum imbrem, in Ecclesiam Apostolorum ad montem Sion positam translatus, magna veneratione est habitus; et unum insuper ex istis lapidibus, quo Protomartyr fuit percussus, translatus in Italiam fuisse, et Anconae positum, constans est opinio. Astipulantur duo S. Augustini sermones de ejusdem Miraculis. Jacobum addidimus, qui primus inter Apostolos, uti inferius dicemus, fortissime pro Religione Christi defendenda Hierosolymis occubuit.

<sup>26</sup> *Ornatus*.—Ne credas haec Ecclesiae Pudentianae ornamenta omnino improbabilia. Quo sumptu, quo ornatu fieri solerent, ethnicus Auctor qui Apostolorum vixit temporibus et Traiani, cum nostra ridet, clarissime testatur. Ipse Critiam quendam introducit, qui in Christianorum conventum deducitur, quem locum his verbis describit: Pertransivimus ferreas portas et aerea limina, multisque jam superatis scalis, in donum aurato fastigio insignem ascendimus, qualem Homerus Menelaï fingit esse: atque ipse quidem omnia illa contemplantur, quae insularis ille adolescens. Video autem non Hele-nam, sed melereule viros inclinos et pallescentes. Apud Lucian. in Philopat.

<sup>27</sup> *Lucas*.—Communi consensione Lucas medicus, et pictor egregius habitus est. Certe Epiph. lib. XIV, 2. testatur eum S. Dei genitricis pinxisse imaginem, et Metaphrastes Act. in Luc. et Salvatoris effigiem coloribus effigiasse tradit.

<sup>28</sup> *Maeoniae musae*.—*Maconius* a Patre Macone dictus fuit Homerus, et ponitur pro *homerico*. Mart. XIV, 183. Perlege Maconio cantatas carmine ranas.

<sup>29</sup> *Ascraci senis*.—*Ascracus* ab Ascra; Ascraeus senex est Hesiodus, et Ascraeum carmen, Virg. II, Georg. 176.

<sup>40</sup> *Cirrhae*.—Parnassus mons in Phocide, regione Boeotiae et finibus Graeciae duplex habuit jugum, quorum alterum *Cirrha* Apollini et Musis sacrum erat. Non procul ab eo erat mons *Helicon*: *Pindus* erat alius mons in Thessalia: ex Helicone oriebatur fluvius *Permessus*.



<sup>44</sup> *Agnus*.—Agnus zona aurea praecinctus est symbolum justitiae, cingulum lumborum ejus, et perfectae caritatis. Hujusmodi symbolum percubuit in musivis, nec modo relatum ad Christum, sed etiam ad Christi fideles.

<sup>45</sup> *Boni pastoris*. — Hanc imaginem et sibi ipse Christus adprime propriam declaravit, et primis fidelibus erat perquamfamiliaris, uti in cubiculis et lucernis coemeterialibus, et marmoreis statuīs, et calicibus ipsis videre licet.

<sup>46</sup> *Innocuus juvenis*. — Haec Christi figura de Sacrificio Isaac e veteri Test. deprompta saepissime ornat coemeteriorum picturas. Vid. praeclearum opus Antonii Bosii: Roma sotterranea, lib. 111, c. 23.

<sup>47</sup> *Compositis armis*. — David cum funda, ad mysterium Crucis ss. Patres retulerunt: laeva manu quatuor lapides David tenet; quinto enim funda armatur Goliae frontem jam feritura.

<sup>48</sup> *Tobiam*. — Pisces passim in lapidibus sculptos Christi figuram esse docet Augustinus, et Opt. Mil.: Hic est Tobias recens e flumine egressus, et piscem exenteratum tenens: ejus enim jecore, inquit Augustinus, per prunas passionis assato fugatus est diabolus, et per amaritudinem fellis afflatus est caecus, et illuminatus est mundus.

<sup>49</sup> *Duplex Jonam*. — Duplex Jonae effigies passim in Catacumbis occurrit: altera Jonae in ceti ventrem dejecti, et inde post triduum ejeti (quae Christi resurgentis imago, prout ipse Christus monuit), altera moerentis sub cucurbita, quae percussa vermis morsu exaruit. Vermis hic matutinus, inquit Augustinus, quo rodente, cucurbita exaruit, Christus occurrit, ex cuius ore, Evangelio diffamato, cuncta illa quae temporaliter apud Israhelitas, velut umbratili prius significatione vigerunt, evacuata marcescunt. Advertendum tamen est, quod loco *cucurbitae* S. Hieronymus legit *hederae*. Legesis epist. ejusdem S. Hieronymi ad S. Augustinum.

<sup>50</sup> *Quarta rubescit*. — Matth. XII, 40: Sicut enim fuit Jonas in ventre ceti, tribus diebus et tribus noctibus, sic erit filius hominis in corde terrae tribus diebus et tribus noctibus.

<sup>51</sup> *Daniel*. — Daniel est in lacu leonum incolumis; brachiis in crucis modum extensis significatur Christus, qui per Crucis virtutem e faucibus leonum et invisibilium potestatum homines liberavit.

<sup>52</sup> *Vacua Absidis*. — Sicut olim in templo Hierosolymitano sacerdotes a populo, viri a mulieribus, atque a nuptis virgines loco distinguebantur, idque Philo Judaeus de Essenis etiam testatur, ita eodem fere ordine in Christianorum Ecclesiis, cum sacri conventus agerentur, fideles varia locorum distinctione erant separati. Idque etiam satis indicant partes, quibus antiquitus constabant Ecclesiae. Certe sacratior Ecclesiae pars, quae septis sive cancellis ab reliquo spatio secernebatur, dicta erat *sanctuarium*, *tribunal*, *sacerarium*, *locus altaris*, et suprema pars *Absis*, Episcopo, diaconis, et Presbyteris dumtaxat pervia, ceteris inaccessa. In ejus medio situm erat altare, di-



etum *Sanctum Sanctorum* ; ad latera sive in fronte , Episcopi Thronus , et presbyterorum subsellia constituta erant.

<sup>80</sup> *Nudum*. — Praeceptum erat Apostoli , et priscae Ecclesiae consuetudo. Pauli ad Cor. XI, 4: Omnis vir orans , aut prophetans non velato capite deturpat caput suum; 5. Omnis autem mulier orans , aut prophetans non velato capite , deturpat caput suum. Idem Apostolus affert rationes , quas hic nos brevitatis ergo praetermittimus.

<sup>81</sup> *Tergemino radians apice*. — Non istud quidem poeticum figmentum. Josephus Antiq. lib. III , 8. ornamenta multa summi sacerdotis describebat , cum monstrat non tantum lamina aurea , uti ceteros sacerdotes , sed et corona aurea triplici ordine ducta ornatum fuisse. Porro pileo utebatur quali ceteri sacerdotes , super quem extabat alius consutilis ex hyacintho variatus: hunc aurea corona triplici ordine circumdabat , in qua spectabantur caliculi aurei. Si quis est , qui prioris aevi simplicitati hunc ornamentorum splendorem repugnare arbitratur , sciat profecto Christianos antiquis moribus sibi parcos , Religione fuisse semper magnificos. Meminerint denique Virgilium lib. VII, 610 Latinum Regem Quirinali trabea , cinctuque gabino ornasae , cum Templum Jani , Troiano bello ingruente , aperiret. Quod templum non nisi Numa , secundo Romanorum rege , index pacis , bellicque factum fuit.

<sup>82</sup> *Benedicit*. — Incorrupta latini sermonis integritate hoc verbo utimur , siquidem et Tullius pro Sext : Cui bene dixit unquam bono ? cum dat. usurpavit , et Tib. Lib. II , El. 1 , 31. verbo per tmesin diviso : Sed bene Messalam sua quisque ad pocula dicat , quarto cum casu adhibet. In utroque exemplo est *laudare* , *bene precari*. Christiana Religio aliam , et peculiarem addidit significationem : namque Deum benedicere est *laudare* , *extollere* , *praedicare* ; benedicere populo est *fausta cum prece dimittere* , *pacem et veniam populo a superis precari* , *faustis ad Deum precationibus populum prosequi* ; benedicere mensam est *christiano ritu* , *solemni precatione dapes* , *mensas lustrare*. Nos qui christiane simul et latine loqui proflitemur , ecclesiastica significatione auctum verbum *benedico* adhibebimus saepissime.

<sup>83</sup> *Plautilla*. — Romana vidua , de qua vide principium lib. IV.

<sup>84</sup> *Praxedes*. — Praxedes et Pudencia Virgines filiae Senatoris Pudentis , de quibus saepius postea mentionem faciemus.

<sup>85</sup> *Fratres*. — Christiani saepissime vocantur *Fratres* : qua nomenclatura primum usus est Christus , idemque perseverat Ecclesia. Sic Christianorum coetus reperitur dictus *Fraternitas*. De qua Tert. in Apol. 39. Quanto dignius fratres et dicuntur et habentur , qui unum Deum patrem agnoverunt , qui unum spiritum biberunt sanctitatis , qui de uno utero ignorantiae ejusdem ad unam lucem expaverint veritatis ?

<sup>86</sup> *Juratis*. — Vide , quam merito Apost. Thess. commonefaciebat : *Fratres , state et tenete traditiones , quas didicistis , sive per sermonem , sive per epistolam nostram*. Nos Christianae legis sanctiones a Christo latas , et

Ecclesiae omnium aetatum testimonio ad nos usque derivatas, et quodammodo per manus traditas, in nostrae religionis primordio ipso reperimus. Sic de Baptismate Tert. de coron. milit. c. 3.: Aquam adituri ibidem, sed et aliquando prius in Ecclesia sub Antistitis manu contestamur nos renuntiare diabolo et pompae et Angelis ejus. Quoad formam vero Baptismatis, Christus ipse luculentissime patefecit, Matt. cap. ult.: Euntes docete omnes gentes baptizantes eos in nomine Patris, et Filii, et Spiritus Sancti.

<sup>57</sup> *Renasci.* — Sic apud Patres omnium Sacramentorum novae legis primum, Baptismus, per quem aditus in Ecclesiam patet, vocatur *Sacramentum aquae, vitae novae, fidei, et lavacrum regenerationis, renovationis, et interdum Sacramentum nativitatis secundae.*

<sup>58</sup> *Et libertatis.* — Paul. ad Rom. VIII, 21: Quia et ipsa creatura liberabitur servitute corruptionis in libertatem gloriae filiorum Dei.

<sup>59</sup> *Heredes.* — Paul. ad Rom. VIII, 17. Si autem filii, et heredes: heredes quidem Dei, coheredes autem Christi. Petr. I, IV, 22. Qui est in dextera Dei, deglutiens mortem, ut vitae aeternae heredes efficeremur, profectus in caelum, subjectis sibi Angelis, et potestatibus et virtutibus.

<sup>60</sup> *En urbs.* — In Ps. 86. *Fundamenta ejus*, Psalmista civitatis Jerusalem, qua Ecclesia designatur, laudes canit, et gentium vocationem praedicit. Nihil ergo accomodatius anniversariae Pentecostes festivitati credidimus, quam sequentes Psalmi hujus versus in ipso augustissimi Sacrificii introitu praemittere: Fundamenta ejus in montibus sanctis; diligit Dominus portas Sion super omnia tabernacula Jacob. Gloriosa dicta sunt de te, civitas Dei. Memor ero Rahab, et Babylonis scientium me. Ecce alienigenae et Tyrus, et populus Aethiopum, hi fuerunt illic. Numquid Sion dicet: Homo et homo natus est in ea, et ipse fundavit eam Altissimus? Dominus narrabit in scripturis populorum et principum: horum qui fuerunt in ea. Sicut laetantium omnium habitatio est in te.

<sup>61</sup> *Mysteria magna recludens.* — Joann. XVI, 13. Cum venerit ille Spiritus veritatis, docebit vos omnem veritatem.

<sup>62</sup> *Peragramus.* — Sap. 1, 7. Spiritus Domini replevit orbem terrarum, et hoc quod continet omnia, scientiam habet vocis. Paul. ad Rom. X, 18. Sed dico: numquid non audierunt? et quidem in omnem terram exivit sonus eorum, et in finem orbis terrae verba eorum.

<sup>63</sup> *Egeriae.* — Ubi nunc oppidum *Nemo* circa Ariciam, nemo ingens quondam fuit dicatum Dianae, sive Egeriae: lacus Dianae Aricinae nunc *lago di Nemi* multis implebatur fontibus, quorum praecipuus dictus fons Egeriae. Hanc Nympham Numa Pompilius Romanorum Rex secundus suam conjugem esse finxit, ab eaque legum instituta se accipere. Ita Livius, lib. I, 19. Deorum metum injiciendum ratus est. Qui cum descendere ad animos sine aliquo commento miraculi non posset, simulat sibi cum dea Egeria congres-

sus nocturnos esse : ejus se monitu , quae acceptissima diis essent , sacra instituere , sacerdotes suos cuique deorum praeficere.

<sup>61</sup> *Ingruit armatus.* — Matth. XVI, 17. Beatus es Simon Bar-Jona . . . Et ego dico tibi , quia tu es Petrus , et super hanc Petram aedificabo Ecclesiam meam , et portae inferi non praevalerunt adversus eam.

<sup>62</sup> *Non desero solos.* — Joan. XIV, 26: De Spiritu Sancto haec habetur Christi promissio : Paraclitus Spiritus sanctus , quem mittet Pater in nomine meo , ille vos docebit omnia , et suggeret vobis omnia quaecumque dixerō vobis.

<sup>63</sup> *In medio semper.* — Joan. XX, 21. Sicut misit me Pater , et ego mitto vos. Matth. XXVIII, 20. Docentes eos servare omnia , quaecumque mandavi vobis , et ecce ego vobiscum sum omnibus diebus usque ad consummationem saeculi.

<sup>64</sup> *Nisi Spiritus.* — Habes hoc exploratissimum ex Sanctis Scripturis : Spiritui enim Sancto adscribitur Inspiratio prophetarum , Petr. 1. 21: Spiritu Sancto inspirati locuti sunt Sancti Dei homines ; Operatio miraculorum , Matth. XII, 28. In Spiritu Dei ejicio daemonia ; Operatio gratiae , Luc. 1, 35 ; Unctio et missio , Is. LXI, 4 ; Peccatorum remissio et regeneratio , 1. Cor. VI, 11 ; Ecclesiae Regimen. Act. XIII, 2 ; Collatio donorum , 1. Cor. XII, 4 ; Sanctificatio , 2 Thess. II, 12 , et Petr. 1, 2 ; Diffusio gratiae , Rom. V, 5 ; Resurrectio mortuorum. ib. VIII, 11. Hinc illud Apost. : Si Spiritu vivimus , Spiritu et ambulamus.

<sup>65</sup> *Ecclesia nulla maneret.* — Joann. XIV, 26: Paraclitus autem Spiritus Sanctus docebit vos omnem veritatem. Et Timoth. III, 15. Ecclesia vocatur columna et firmamentum veritatis.

<sup>66</sup> *Romana fides.* — Luc. XXII, 32. Petro dixit Jesus : Rogavi pro te , ut non deficiat fides tua , et tu aliquando conversus confirma fratres tuos. Paul. ad Rom. 1, 8. Gratias ago Deo per Jesum Christum , pro omnibus vobis , quia fides vestra annuntiatur universo mundo.

<sup>67</sup> *Ignibus aurum.* — Petr. 1, 1, 7. Aurum quod per ignem probatur. Et Apoc. III, 18. Aurum ignitum probatum.

<sup>68</sup> *Primitiae.* — Frequentissima locutio apud Ecclesiasticos Scriptores. Paul. Cor. XVI, 15. Quoniam sunt primitiae Achaiae. Apoc. XIV, 4. Primitiae Deo et Agno.

<sup>69</sup> *Spes.* — Pet. 1, 1, 3. Regeneravit nos in spem vivam. Et ad Tit. 1, 2. In spem vitae aeternae.

<sup>70</sup> *Innoxius agnus.* — Paul. ad Hebr. VII, 26. Talis enim decebat , ut nobis esset Pontifex sanctus , innocens , impollutus , segregatus a peccatoribus , et excelsior caelis factus : qui non habet necessitatem , prius pro suis delictis hostias offerre , deinde pro populi : hoc enim fecit semel , seipsum offerendo , Jesus Christus dominus noster.

<sup>71</sup> *Conciliavit amans.* — Paul. ad Rom. V, 10: Si enim , cum inimici essemus , reconciliati sumus Deo per mortem filii ejus.

<sup>22</sup> *Omnipotentia verba.* — Paul. ad Corinth. I, XI, 23. Ego enim accepi a Domino, quod et tradidi vobis, quoniam Jesus, in qua nocte tradebatur, accepit panem, 24. Et gratias agens fregit et dixit: accipite et manducate: hoc est corpus meum, quod pro vobis tradetur: hoc facite in meam commemorationem. 25. Similiter et calicem, postquam coenavit, dicens: hoc calix novum testamentum est in meo sanguine: hoc facite, quotiescumque bibetis, in meam commemorationem.

<sup>23</sup> *Ostendebat.* — Antiquum ritum in consicienda, offerenda, et in populum distribuenda Sacra Eucharistia servavimus. Populus panem et vinum in Ecclesia offerebat, sed non ad altare; quod munus erat Diaconorum. Per Diaconum ad altare allatis, quae erant Deo offerenda, Sacerdos Christi personam gerens praescriptis verbis sacrificium conficit; prolata consecrationis formula, Sacerdos in altum extollit sacrificium: id quod testatur Anastasius de sacra synaxi: Postquam sacrificium tremendum illud sanctificavit, panem vitae sustollit, eumque omnibus ostendit.

<sup>24</sup> *Altera natio.* — E Deuter. eadem verba habes IV, 7. Nec est alia natio tam grandis, quae habeat Deos appropinquantes sibi, sicut Deus noster adest cunctis obsecrationibus nostris.

<sup>25</sup> *Lyaeum.* — Lyaeus, unum ex Liberi patris cognominibus, a *λυω solvo*, quod mentem curis solvit. Quod Virg. 1, Aen. v. 690 dixit *laticemque lyaeum* de vino, nonne meliori jure nos, translata latinae locutionis significatione, vino ad SS. Eucharistiae Sacrificium parato accomodare possumus, cum Christus ipse dixerit: *Qui manducat meam carnem, et bibit meum sanguinem, habet vitam aeternam?*

<sup>26</sup> *Renovatique.* — Sic Paulus ad Titum III, 6. Salvos nos fecit per lavacrum regenerationis, et renovationis Spiritus sancti, quem effudit in nos abunde.

<sup>27</sup> *Sulamitida.* — Cant. VI, 12. Revertere, revertere Sulamitis. VIII, 5. Quae est ista, quae ascendit de deserto deliciis affluens, innixa super dilectum suum? Et III, 6. Quae est ista quae ascendit per desertum, sicut virgula fumi ex aromatibus myrrhae et thuris et universi pulveris pigmentarii?

<sup>28</sup> *Sexaginta fortes.* — Cant. III, 7. Sexaginta fortes ambiunt ex fortissimis Israël, 8. Omnes tenentes gladios, et ad bella doctissimi; uniuscuiusque ensis super foemur suum propter timores nocturnos.

<sup>29</sup> *O formosa mihi.* — Cant. IV, 1. Quam pulchra es, amica mea, quam pulchra es! oculi tui columbarum absque eo quod intrinsecus latet. Capilli tui sicut greges caprarum, quae ascenderunt de monte Galaad. 2. Sicut vitula coccinea, labia tua, et eloquium tuum dulce.

<sup>30</sup> *Regina.* — Ps. 44. Astitit Regina a dextris tuis in vestitu deaurato, circumdata varietate.

<sup>31</sup> *Fugit hyems.* — Cant. 11. Jam enim hyems transiit, imber abiit et  
Vol. I. 8

recessit: 12. Flores apparuerunt in terra nostra, tempus putationis advenit; vox turturis audita est in terra nostra.

<sup>85</sup> *Surge* — Cant. 11. 10. Surge, propera, amica mea, columba mea, formosa mea et veni. Et 14. Columba mea in foraminibus petrae, in caverna maceriae. Ostende faciem tuam. Sonet vox tua in auribus meis.

<sup>86</sup> *Convivia*. — Quod Christus in ultima coena fecerat, idque ut facerent in sui memoriam, suos monuerat, in antiqua Ecclesia servatum. Christiani ergo in Ecclesiam convenientes una coenabant, unaque Sacratissimam percipiebant Eucharistiam: quod non omni, quo par erat, obsequio observare, Corinthiis iure exprobrat Paulus: Convenientibus etc. cap. 1, Cor. 12. Sed Christus communem praemisit, deinde sacram coenam exhibuit. Ita decebat nempe, teste Baronio, ut primum legalia consumerentur, deinde quae novae legis essent, mensae apponerentur. Verum ipso Apostolorum tempore inductum, ut prius sacra celebraretur Synaxis, deinde communis mensa.

<sup>87</sup> *Turre fuit summa*. — Antehac, uti Cic. pro Mur. 13: Oderat populus Romanus privatam luxuriam, publicam magnificentiam diligebat: quod contra imperatorio aevo evenit. Quae tunc vere Roma, uti diserte Cic. 2. contra Rull. 96. erat coenaculis sublata atque suspensa. Privatarum aedium locus, ubi coenitabant Romani, quique a re ipsa coenaculum, coenatio et triclinium appellatus, fuit superior pars domus, eaque universa coenacula dicta.

<sup>88</sup> *Pavimenta*. — In pavimentis ornandis singulare studium Romani adhibuerunt. *Sectilia* fuere marmoreae crustae, varii plerumque coloris, nec unius figurae. *Tesserae* tesserarum lusoriarum formam referebant: lapilli videlicet ad musivi rationem minutatim strata, unde pavimenta ipsa tessellata, et etiam vermiculata, quod multiplices lapillorum intextu varias vermiculorum species praeferebant.

<sup>89</sup> *Laquearia*. — Lacunar aut laquear erat contignatio pro tecto adhibita: quam nos dicimus *la soffitta*: quem Virgil. 1, Aen. 730 nominat *lacum*: lacunar enim proprie est interstitium inter duas trabes.

<sup>90</sup> *Specula*. — De Abacis, et speculis Vitruv. VII, 3. Ipsaque tectoria abacorum ac speculorum divisionibus inter se prominentes habent expressiones. Abaci quidem quadrati, specula rotunda: verum utraque e vitro aut aliquo pellucido lapide parietes ornabant.

<sup>91</sup> *Tectoria lucent*. — Tectorii nomine tota illa crusta, atque inductio comprehenditur, qua nudi parietes vestiebantur. Arenatum *l'intonaco* ex arena et calce: marmoratum *lo stucco* ex tuso marmore et calce: denique albarium erat mera calx, qua parietes dealbabantur. Tectorio saepe colores inducebantur; at colores inducti udo tectorio apud Vitruvium sunt *i lavori a fresco*.

<sup>92</sup> *Apollo*. — Celebre in primis est Luculli triclinium Apollo nuncupatum. Vid. Plut. in ejus vita.

<sup>98</sup> *Agape*. — Quod communes coenae mutuae charitatis indices atque illices forent, e Tertulliani verbis collige, Apolog. cap. 39: Coena nostra de nomine rationem sui ostendit: vocatur enim *Αγάπη*, id quod est penes Graecos dilectio.

<sup>99</sup> *Volumina*. — Ordo servatus in mensis communibus a Tertulliano memoratur eodem loco: Post aquam manualet et lumina, ut quisque de Scripturis Sanctis, vel de proprio ingenio potest, provocatur in medium Deo canere, atque oratio convivium dirimit.

<sup>100</sup> *Philologus*. — De eo inter praecipuos Romae Christianos mentionem habemus in Epist. Pauli ad Romanos, XVI, 15. Salutate Philologum, et Juliam et Nereum. Scio nonnullos interpretes litteratorem aliquem tali cognomine decoratum intellexisse: quomocumque se res habet, nomen ipsum adhibemus, uti Apost. nunciat.

<sup>101</sup> *Carmen*. — De Christi titulis et muneribus carmen.

<sup>102</sup> *Angelici salve coetus*. — Primum Christus est caput Angelorum, quibus praestat dignitate et potestate. Apost. Coloss. 1, 10: Qui est caput omnis principatus est potestatis: et Heb. 1, 4: Tanto melior Angelis effectus quanto differentius prae illis nomen hereditavit. Et 1, 6: Et adorent eum omnes Angeli Dei.

<sup>103</sup> *Rex Regum*. — Angelus, Luc. 1, 33. Beatae Virgini patefecit dicens de Christo Deo homine: Regnabit in domo Jacob in aeternum, et regni ejus non erit finis.

<sup>104</sup> *Primus Pontificum*. — Apost. Hebr. V, et seqq. explicat illud davidicum oraculum *Tu es Sacerdos in aeternum secundum ordinem Melchisedech*, ubi sacerdotium Christi super Aaronicum Sacerdotium fuisse prosequitur, et de hujusmodi Christi pontificatu plurima tractat. IX autem: Christus assistens Pontifex futurorum bonorum . . . neque per sanguinem hircorum et vitulorum, sed per proprium sanguinem. Et praecipue 24: Non enim in manufacta Sancta Jesus introivit, sed in ipsum caelum . . . neque ut saepe offerat semetipsum, quemadmodum Pontifex intrat in sancta per singulos annos in sanguine alieno.

<sup>105</sup> *Tua gratia*. — En aliud vocabulum ex sanioris latinitatis penu depromptum; sed novam significationem Christiana religio indidit. Profecto *gratia* apud Romanos est *favor, amor, benevolentia, beneficium*, et similia. Sed Evangelio lucente, cum fructus dominicae Incarnationis ac Redemptionis *gratia* est, qua cum Deo reconciliamur, ac divinae naturae consortes efficimur, et vitae aeternae heredes, *gratiae* nomine hic intelligimus, quam communiter Theologi definiunt, *Supernaturale Dei donum permanenter inhaerens animae, quo homo immediate et formaliter sanctus efficitur, justus, Deo gratus, Filius Dei adoptivus, capax eliciendi opera meritoria vitae aeternae, ejusdemque heres*.

<sup>20<sup>e</sup></sup> *Tychicus*. — Pauli tabellarius fuit: qui quam areto caritatis vinculo esset Apostolo obstrictus, ex ipsiusmet Pauli ad Ephes. epistola VI. 21. intelligere potes: Ut autem et vos sciatis, quae circa me sunt, quid agam, omnia vobis nota faciet *Tychicus*, carissimus frater, et fidelis minister in Domino, quem misi ad vos in hoc ipsum, ut cognoscatis, quae circa nos sunt, et consoletur corda vestra.

<sup>20<sup>a</sup></sup> *Cum rubicunda ceras*. — Ab Dante Nostro similitudinem hausimus, qui Purg. C. 2, sub finem.

Come quando, cogliendo biada o loglio  
I colombi adunati alla pastura  
Queti, senza mostrar l'usato orgoglio,  
Se cosa appare, ond'egli abbian paura,  
Subitamente lasciano star l'esca,  
Perchè assiliti son da maggior cura.



# PETREIDOS

## LIBER II.

---

### ARGUMENTUM

Cum servos seniores, et aegrotos ad Aesculapii in insula Tiberina expositos Paulus Christo lucrifaceret, a Neronianis stipatoribus deprehensus in carcerem fuerat coniectus — Nocte superveniente, Pontificis jussu, omnes eunt cubitum — Ipse solus in templo manet, et nunc caelestium rerum contemplatione animum pascit, nunc sese in ardentissimas ad Deum preces effundit — Demum inopino somno correptus placidissime obdormit — Mane primo expergefactus, et supplicibus votis pro urbe et orbe nuncupatis, cum toto Corneliae domus comitatu sacra facit, omnibus pro Pauli liberatione et pro pace Ecclesiae precantibus — Sacris peractis, Pudens Senator, comitum nomine eum obtestatur, ut Ecclesiae historiam jam inde a suis incunabulis enarret; eam scripto excipiat Lucas, saeculum clarissimum ad seram posteritatem transmissurus — Quibus Petrus libentissime satisfacit, primum explicans, Israëliticum foedus exemplar et quasi lineamentum fuisse futuri et longe diviniore foederis, quod aliquando Deus cum universis nationibus per Jesum Christum mediatorem et sequestrum erat sanciturus — Ecclesiae Christianae historia haec est. Christus, devicta morte, antequam triumphali in caelum pompa regrederetur, per quadraginta dies firmatis discipulis, rebusque futuris divina praesagitione praemonstratis, eos in



Olivarum montem duxit — Iisque conspiciantibus in caelum ascendit — Angeli voce commonefacti descendunt Apostoli Hierosolymam; domumque Mariae, Matris Joannis, qui cognominabatur Marcus, omnes conveniunt, Spiritus Sancti adventum, uti Jesus promiserat, expectaturi — Commemoratis duobus Christi Domini testimoniis, quorum uno promittitur, altero exhibetur Petro primatus, pontificalem universae Ecclesiae sollicitudinem Summus Antistes coepit exercere, et Matthias eligitur in locum Judae — Die a Christi resurrectione quinquagesima, adventu Spiritus Sancti, Christianae reipublicae primordia incipiunt, Apostolis evangelium nuntiantibus Hierosolymis, ubi ad paschales epulas de more omnis Judae populus confluerat — Omnibus obstupescens, quod diversis linguis loquentes Apostolos audirent, Petrus primus omnium concionatur, et tribus millibus ad Christum traductis, primam Hierosolymis christianam Ecclesiam constabilivit — Claudum ad portam Speciosam vitae alimenta conquirentem sanitati restituit — Qua prodigiorum novitate, et nova Petri oratione credentium numerus augescit, indignantibus Judaeae Synagoga primoribus — Qui, coacto Synedrio, ante summum rerum sacrarum tribunal Apostolos vocant — Sed, Petro liberrime Christi causam orante, dimittuntur, ea tamen conditione, ut ab incepto desistant — Augescente in dies Christianorum numero, Jacobus Alphaei, qui frater Domini, Hierosolymorum Episcopus renuntiatur. — Prima Ecclesiae Christianae effigies — Barnabae Cyprii hominis, et ditissimi ad Christum conversio — Ananias et Zaphyra conjuges mendacio convicti interitu puniuntur — Aegroti, omne genus e finitimis regionibus Jerusalem lati ad pristinam incolumitatem revocantur — Qua rerum mirabilium fama longe lateque manante, Primores Hebraeorum, ut suae ipsorum gratiae periclitanti consulerent, Apostolos comprehensos in carcerem conjiciunt — Sed, Angelo carceris januas aperiente, liberati, primo mane in templum ad Evangelii promulgationem redeunt — Synedrii procures de nece inferenda conjurant, sed Gamaliel legis peritus dissidentes animos ad pacem et concordiam adducit — Septem Diaconi creantur, ut sacrae mensae et quotidianae inservirent — Stephanus Ecclesiae Hierosolymitanae Archidiaconus, primus omnium Christianorum martyrio coronatur — Qua interneccione conterrita Ecclesia dispergitur per Judaeam et Samariam — Philippus diaconus Samariae Evangelium praedicat, et Petrus et Joannes legati majora nuntiatis inveniunt — Ceteros inter Simon Magus baptismate lustratur, qui per manus impositionem Spiritum sanctum descendantem videus, obtulit pecuniam, ut eandem potestatem reciperet, et a Petro gravissime

objurgatur — Philippus ab Angelo admonitus obviam occurrit Eunucho Candacis, Reginae Aethiopum, cumque primis Christianorum sacris initiat — Paulus Tharsensis antea infensissimus Christianorum insectator, luce divinitus immissa, ab Anania aquis salutaribus abluitur, et ejus facti praedicatione gaudent Christiani, Judaei infremunt — Petrus magna tranquillitate optime usus, regionibus circumpositis, Christianas recognoscit Ecclesias — In hac lustratione provinciae, Antiochenam Ecclesiam Barnabae et Pauli laboribus amplificatam reperit, ibique sedit ipse Episcopus — Lyddae Aenacam, Joppae Thabitam ad vitam revocat — Dumque ceteras obire Ecclesias cogitat, e medio cursu, oblata rerum caelestium specie revocatur — Petri visio, et visionis mysterium — Cornelius Centurio cum suis baptizatur — Iis quae Caesareae evenerunt, audientes Hierosolymis Apostoli communi consensione ostium fidei gentibus reserari decernunt. — Antiochiae primum facta est magna gentium accessio ad Ecclesiam — Romana praefectura Syriae et Palaestinae Antiochia ecclesiastici imperii metropolis declaratur — Antiochenae Ecclesiae, primaeque sedis pontificalis gloriae praedicantur.



**I**nsula quam fluvio cingit Tiberinus amoeno,  
Magnifico emicuit templo, quod Roma sacravit  
Phoebigenae <sup>2</sup> auctori vitae certaeque salutis.  
Tres annos Latium atque ipsam vastaverat urbem  
Exitiosa lues. Trepidus responsa Senatus  
Scrutatus libris, Epidauro <sup>3</sup> arcessit ab ipsa,  
Quem Phoebō natum Nymphaeque Coronide supplex  
Graecia per Pelopis ditissima regna colebat,  
Corpore ab aegroto properantia fata fugantem.  
Dum jussi simulacra Dei, templumque requirunt  
Romani proceres <sup>3</sup>, intentisque omnibus idem  
Est animus, parioque stupent Trasymede <sup>4</sup> politam  
Effigiem, cellae ex adytu et penetralibus imis  
Caeruleus serpens longum caput extulit, atque  
Igne micans oculos, horrendaque sibila vibrans  
Incubuit templo, totamque innoxius aedem  
Per mediam decurrans, sacro se occultat hiatu.  
Estne loci genius? sacrum conversus in anguem  
Delituit Deus? attonitos circumstetit horror  
Legatos, dubiique manent. Vix tertia demum  
Aurora enituit, suspensi templa petebant;  
Per commota iterum strepuere sacraria crebra  
Sibila; quaque adytis mugit cortina reclusis,  
Fatalis coluber foribus prorumpit apertis,

Per mediamque aedem sinuosa volumina versans  
Egreditur templo innocuus, stipataque vulgo  
Compita perlustrat; vicino in littore tandem  
Constitit, et latiam religatam ad saxa triremem  
Conspiciens saltu sese superintulit, atque  
Veliferum ad malum spiris ingentibus haeret.  
En Deus, ecce Deus: lymphata mente sacerdos  
Prolinus exclamat: quid adhuc, Romane, moramur?  
Quam Deus elegit, propria requiescit in aede.  
Exultant signo, quo non praesentius ullum,  
Legati, et lacti ausonias vertuntur ad oras.  
Ingreditur Tiberim navis, romanaque pubes  
Margine gramineo laeto clamore salutat  
Augurium, pecudes electas cespite maclans  
Fortuito, atque arabi effudens suffimen odoris <sup>5</sup>.  
Ecce autem ipse draco cristis praesignis et auro  
Arduus erigitur, ripasque inspectat amoenas.  
Ventum erat ad geminas qua se circumfluus amnis  
Scindebat partes, mediam tenet insula terram,  
Statque in conspectu pulcherrima Roma; repente  
Pectore sublato insurgens epidaurius anguis  
E latia exiluit pinu, ripamque propinquam  
Arripit, et fugiens viridi se condidit herba.  
Patricii valuere doli: vaga fabula totam  
Prolinus incessit Romam; fiducia crescit  
Adventu propiore Dei, cum lassa resedit  
Contages. Ingens solido de marmore templum  
Ergitur, suffixa tholo donaria <sup>6</sup> pendent,  
Grata salutifero quae Roma exolverat angui.

Hoc templum, has aedes <sup>7</sup> posthac, labentibus annis,  
Romulidae obscoeno incestabant crimine. Servos

Omnibus exhaustos jam casibus, omnium egenos  
Si tandem urgeret senii illaetabile pondus,  
Immiles domini funesto exponere luco  
Assuêrant. Vitae laetos consumpserat annos  
Sudans mancipium <sup>8</sup>; viridantem severat hortum  
Ingrato domino, convivia lauta pararat,  
Textilibus magnas donis oneraverat aulas;  
Auxerat ingentem duplicato fœnore censum;  
Post grave servitium, post duros mille labores  
Praemia quae seniori? obscoena habet insula mortis  
Ludibrium. Petrus indignans opprobria Romae  
Respicit, et senio iustos <sup>9</sup> instaurat honores  
Quos Deus antiquo concessit foedere, quosque  
Firmavit Christus. Postremae incommoda vitae  
Continuo miserans scelerata ad littora cerlos  
Millebat pacta mercede reducere luco  
Expositos, verumque Deum, Christumque docere.  
Nec semel occiduam spatii mortalis ad horam  
Caligans nebula ex oculis diffugit apertis;  
Summa brevis vitae immortale redintegrat aevum.  
Haec tua culpa fuit, Tarsensis maxime: sancta  
Munera, quae ignorans romana potentia spernit,  
Fungentem indignans rabies deprehenderat, atque  
Clauserat insontem tenebroso carceris antro.

Et jam tardipedes agitans per inania bigas  
Nox caeli Regina, suas diffuderat umbras;  
Illa Dei magnum munus damnosa diurnae  
Vitae reparat dispendia, corpora fessa  
Rore soporifero recreans, validumque vigorem  
Artubus instaurans. Quid si miseranda cœgit  
Sors rerum, et gravior telis percussit acutis?

Illa redit pia solatrix, oculisque fluentes  
Detergit lacrymas, alternaque gaudia miscens  
Affert hesterni jucunda oblivia casus.  
At tibi quae patrio consuêsti vivere caelo,  
Gens Christo devota, tibi gratissima semper  
Hora superveniet. Taciturna silentia noctis <sup>10</sup>  
Eligis ipsa, Deo calidas adhibere querelas.  
Dum strepitu tacuere urbes, dum ignava silescit  
Tellus, et veluti nigranti condita peplo  
Victa sopore jacet placido, dum sidera cursu  
Circumeunt tacito, legemque secuta triumphant  
Auctori rerum; obsequiis communibus addis  
Ipsa tuum obsequium, misero secura tumultu  
Ipsa Deo frueris, sanctisque absorpta loquelis  
Spernis humum, optatique inhias commercia caeli.

Jamque alii fugere alio, noctisque per umbras  
Immixti tuta quærunt requiescere sede;  
Ipsi Pastores, Petro mandante, recedunt  
Solliciti, ut sanctum possent defendere ovile;  
Pontificum senior, caris digressus amicis,  
( Ipse Pudens invito animo, carique sodales  
Deseruere ) uni per amica silentia caelo  
Suspirat tacitus. Saepe immortalia rerum  
Gaudia commemorat, terrasque perosus inânes,  
Totus inardescit sanctae dulcedine flammae.  
Saepe Deum alloquitur: Pater est, neque taedeat illum,  
Terrarum ut dominos crebras audire querelas.  
Urget cura gregis, casusque insontis amici.  
Qualis ruricola impatiens, cui pinguis culta  
Germinè odorifero, pictis cui floribus omnis  
Arbos luxurians verno jam tempore laetum

Fecere augurium, medio si cernit aprili  
Misceri horrida totum caligine caelum,  
Et borea surgente novum concreescere frigus,  
Haerescit pavitans, ne spissae grandinis imber,  
Horrida vel glacies laeti spem dissipet anni;  
Haud secus ambiguum contristant turbida mentem.  
Anne hoc principium belli, quod maxima Christo  
Roma parat, trahimurque nova in discrimina rerum?  
Omnipotens Genitor, nulli confidere quibo  
Terrigenum: confido tibi, qui cuncta gubernas,  
Et paret natura uni nolensque volensque.  
Quod si Christigenum modo nata Ecclesia diam  
Iram promeruit, placandae si hostia defit  
Justitiae, pastor caput offero: concidat unum  
Pro populo, gregis innocuam tutare quietem.  
Sic ait illacrymans, iterumque moratur in una  
Voce Dei curisque vacat caelestibus. At non  
Omnia fas animae <sup>22</sup> semper, quaequae ignea virtus  
Ingerit: interdum raplat caelestis origo:  
Illa solo editior per caelica regna volatu  
Audaci graditur patriamque perambulat aulam  
Indulgens, dia correpta cupidine; jamque  
Longius arcano fluitaret vortice rerum  
Absorpta: infelix! miserando pondere tardat  
Materies, pensique vocant mortalis amores.  
Sic temere adnexus candenti marmore ( marmor  
Fit Petro thalamus ), curis operisque diurnis  
Ut confectus erat, frontem reclinat honestam  
Parietibus, dulcemque haurit per membra quietem.  
Qualis pax animi! Quae multa pericula cingunt  
Pontificem magnum, nulla formidine turbant.



Quem Nero persequitur quaerens terraque marique,  
Secretae noctis latitans horrore, rigentem  
Ad silicem, placida compostus pace quiescit;  
*Qui in Domino fedit* <sup>12</sup>, *sanctae super arce Sionis*  
*Constituet Dominus, qua vis ignota timorque.*

Et jam maiores umbrae discedere noctis  
Incipiunt, caeloque suum vaga sidera cursum  
Emensa occiduo pallescunt lumine, surgens  
Candidior vacua procedit Lucifer aethra.  
Ecce autem Senior scruposi e pumice saxi  
Corripuit latus exurgens. Si somnus amico  
Rore fatiscentes renovarat corpore vires,  
Ipsa anima aetherium rapuit calefacta vigorem,  
Impete jamque novo exiliens super aethera poscit  
Te, rerum Genitor, tibi primos sacrat amores,  
Et matutino <sup>13</sup> compellat carmine: Salve  
Perpetuae lucis dator, et mortalibus aegris  
Principium finisque, novum qui cernere solem  
Annuis. En primo radiantis lampadis ortu  
Caelum navigerumque mare, atque jacentia rura  
Fulgere conspicio! Atque utinam admirabile Verbum,  
Qui sol <sup>14</sup> aeterno manans de lumine lumen  
Aeternum venit stygiam perrumpere noctem,  
Hicet in toto videam illucescere mundo!  
At quoniam ingenti merces quaerenda labore,  
Ipse mihi, populum tua qui sub nomina gigno  
Ingentem, ipse fave innumeris, qui rura coloni  
Per patria incumbunt divinum spargere semen <sup>15</sup>.  
Eja tibi sit sacra dies: volventibus horis  
Cuncta tibi momenta dico; tua gloria crescat.  
Tum vero volvens hesternae pericula rerum

Cernuus ante aram procumbit, et ignea caelo  
Lumina converlens: Benefactis talia reddunt  
Praemia terrigenae? dixit. Qui cuncta potenti  
Numine compescis, magnoque misertus amore  
Concilia haec hominum caecis obsepta tenebris  
Luce nova irradias, teque aspernata cruorem  
Unigenae effundens in regna paterna reducis,  
Nos tua progenies, quantis jactamur in undis,  
Adspicis. Ah! miserere pater; nox incubat atra  
Coelibus humanis: huc semina prima malorum  
Detulit infernae deterrimus incola sedis!  
Sic inscripta tuis manibus caelestia vera  
Rescidit, ut lucis radiantia tela tueri  
Caecigeni <sup>16</sup> infensi nequeant, umbrisque morari  
Praelulerint. Miserere Pater, tua regna propaga,  
Et dum cuncta tibi bellantur, protere cuncta  
Inferiora tibi. Tibi cuncta fatebitur orbis  
Debita, si victus tandem tua nomina adorat.  
Talia suppliciter calefacto e pectore Petrus  
Fundebat, longoque simul fletu ora rigabat.

Parte alia, quibus illa fuit nox longior anno,  
Mane novo comites aderant, Cletusque Linusque  
Et Lucas saevoque recens a vulnere Pauli  
Tychicus ante omnes moerens, magnusque Senator,  
Natorum comitante choro, et lectissima matrum  
Cornelia. Haec ducit geminas gavisa puellas  
Splendidulis suaves oculis, habituque decoras,  
Lilia puniceis velut intermixta rosetis.  
Postquam introgressi, laeto circum agmine magnum  
Cingunt Pontificem, et merito venerantur honore.  
Non mage nocturnae post horrida frigora brumae,

Sicubi flammanti illucescit lampade Titan,  
Plenaque per terras jaculatur spicula, saeva  
Lentescit glacies, subitoque novata calore  
Viscera terrarum viguere; ut nube repulsa  
Tristitiae, Senior venientes conspicit, atque  
Miratus primo cunctos exurgere eoo,  
Obsequii pignus, lacrymis affatur obortis:  
At non hacc pietas magna sine laude manebit,  
Qui me Pastorem, tot consurgentibus undis  
Jactatum excipitis, tantoque fovetis amore  
Christiadum patrem. Qui conspicit omnia caelo,  
Cujus servo vices, caelesti prolegat umbra  
Atque domum, et dominos, et munere compleat omni.  
Crescite vos, pueri, patria pietate: puellae,  
Discite materno exemplo contemnere terras,  
O amor atque decus genitorum, et gloria gentis.  
Inde Pudens animum graviori extollere cura  
Sollicitus; spretis at tu, Pater optime, dixit,  
Insidiis, totam potuisti ducere noctem,  
Credo equidem, orando? Petrus sic farier inquit:  
Id volui, ast animae mortalia membra vigorem  
Debilitant; improvisus sopor occupat artus.  
Sacra parata, Pudens? positam advolvamur ad aram  
Ocyus, et Patri solitum instauremus honorem;  
Dona ferunt, onerantque aras festina juvenus.  
Remque facit Senior pro tempore, totus in uno  
Qui fas a caelo certae tibi, Paule, salutis  
Spem facere: hoc orant Senior lectique ministri,  
Et firmant animos caelesti munere. Raptat  
Martyris invicti pollens exemplar, et omnes  
Lethum audent Christi magna pro laude pacisci.

Talibus exactis, ut dulci saucia cura  
Tota cohors summi pendebat ab ore parentis,  
Cornelius primum dictis compellat amicis:  
Maxime Pastorum, Pauli infortunia, si fas est,  
Prosequar invidia. Felix, cui praemia virtus  
Parturiit sancti facta inter maxima amoris!  
Bellipotens valli nonne excubat aggere ductor,  
Atque occursantem manet imperterritus hostem?  
At nos, quandoquidem forsán graviora minatur  
Horrida barbaries, haec ara tuebitur omnes,  
Et domus; has nemo audebit tentare latebras.  
Ex quo praecipuo concessum munere verum  
Nosse Deum, veteris vitae commercia cuncta  
Deserui, oblitumque forum, oblitusque senatus.  
Riserunt proceres, risit Nero, totaque risit  
Aula, putans odio rerumque hominumque maligno  
Me latuisse domi. Norunt mea vendita rura,  
Quae magni stabunt usu mutata sacralo.  
Quin ubi tot Divûm statuas et athenaea signa  
Antiquo dejecta loco, et spoliata domorum  
Limina conspexere, novo insanire furore  
Crediderunt: juvit Christi pro nomine dici  
Insanum '7: mihi parla quies, securaque vila,  
Notaque pauperies discrimina cuncta removit.  
At tu, namque sinit tempus, nostram accipe mentem.  
Ni gravior, venerande Senex, te cura remordet,  
Per spem Christiadam, per magni exordia regni,  
Anne datas melius traducere possumus horas,  
Quam si romanae cathedrae primordia, totque  
Per maria et terras actos, te principe, motus  
Enarres nobis primaeva ab origine? Lucas

Hic aderit: scripto, ne postera nesciat aetas,  
Audita accinget saeculis mandare futuris.  
Cui sic lactato respondit lumine Petrus:  
Grata, Pudens, poscis: mihi dudum magna cupido  
Sederal hoc ingens narrare nepotibus aevum.  
Ut facile cunctis lux orla nitesceret oris,  
Consultum apprime: variis bona nuncia linguis <sup>18</sup>  
Evulgata patent, et vero creditur uni,  
Unaque cognatas sociat concordia mentes.  
Magnum operae prelium porro, si Ecclesia Christi  
Qualis ab incoeplo magnum processit in orbem,  
Per varios casus, vivo depicta colore  
Extet Christiadam populis. Nec respuo munus  
Interea, quandoque parum Deus obtulit olî,  
Expediam dictis magnarum exordia rerum.  
Eja tuo digna ingenio, Luca <sup>19</sup>; excipe: scribe,  
Et tua perpetuo celebrata volumina vivent.  
Discite Romulidae, discant venientia saecula  
Ingens prodigium et renovati foedera mundi.  
Sic ait atque crucem, quae summa desuper ara  
Eminet, adspiciens, obtutu fixus in uno  
Constitit; inde nova incoeptis quaesisse videtur  
Robora: compressis labris meditatur ibidem  
Quae canere incipiat, variaeque ardentis ab ore  
Scintillae absistunt: lectissima turba tenebat  
Ora animosque, flagrans priscoe virtutis honores  
Audire. Ille autem pleno sic pectore coepit:  
Quae nunc in majus veneranda Ecclesia <sup>20</sup> crevit,  
Hoc primum moneo, nostro non incipit aevo.  
Et fortunato primum prognata recessu,  
Et postquam infecta maculatum ab origine semen,

Divina deducta manu stirps inclyta <sup>21</sup> numquam  
Desiit, at serie innocua servata tenebras  
Per medias viguit. Foedi contage veneni  
Progeniem egregiam vasti munimine valli  
E circumpositis divisit gentibus ipse  
Omnipotens, monstrans, quid turpe, quid utile, quid non <sup>22</sup>,  
Donec, perfecto divini temporis orbe,  
Instaurata novo cultu, laetata beato  
Adventu Domini in tantos succrevit honores.  
Connubio dignata recenti Ecclesia, gentem  
Non tantum hebraeam, stirpis primordia nostrae,  
Ast omnes populos cognata ab origine crelos  
Promissam in partem heredes, regnumque vocavit.  
Quae Sator omnipotens primo documenta parenti  
Tradidit illustrans mentem, diaque loquela  
Enucleans, tandem pleno renovata <sup>23</sup> locavit  
Lumine Messias, divinaque tela furoris  
Contudit, ultricem diffuso sanguine placans  
Justitiam. Ecce Dei nati sumus <sup>24</sup>; ecce paterni  
Expectare licet pretia immortalia regni,  
Atque Deo, caeloque frui <sup>25</sup>, quae maxima merces  
Christiadum, humanae quae meta novissima vitae.  
Unde autem incipiunt caeco felicia mundo  
Saecula, queis unum populos jus continet omnes,  
Una fides <sup>26</sup>, unusque Deus, baptismatis una  
Religio cunctis, atque unus pastor ovilis?  
Dicam equidem, et magni narrabo exordia regni.  
Morte triumphata, superam remeârât ad auram  
Omnipolens Jesus, et dia luce coruscans  
Agmen apostolicum cultu exhilarârât amico;  
Deque Dei regno, de caelo multa locutus

Audaces animos ad maxima coepta creârat;  
Ecce autem frontem sol quadragesimus auream  
Extuleral: ducente Deo, convallè virenti  
Paciferas oleas inter secessimus omnes,  
Magnaue tractantem stupefacto audivimus ore  
Extremum: Ille monet Solymis considerare cunctos:  
Tempus adest, inquit, mea vos promissa, meique  
Expectare Patris. Joannem flumine vivo  
Vidistis lustrare viros, neque tempore longo  
Vos Flamma ignipotens lustrabit ab aethere missa:  
Vos virtute nova Spirabilis Aura replebit;  
Atque mihi testes eritis Solymaea per urbis  
Compita, Judaeamque omnem, et Samaritica rura,  
Perque alias terras, qua sol oriturque caditque.  
Talia dicta dedit, cunctisque stupentibus ingens  
Majestate nova emicuit Deus: inde potenti  
Deservit virtute solum, atque assurgit ad auras.  
Transeuntem agnoscit Dominum, et capita ardua totum  
Flectit oliviferum nemus, et stupefacta fluenta  
Practrepidans Cedron \*7 tenet: ille per æera magnum  
Evolat, et vario quo tranat inania tractu,  
Immoli siluere curi: jubar aethera vestit  
Purpureum. Ast acie quantum servare sequendo  
Possumus, ille parum cursus remoratur, et imas  
Extremo miseris conspectat lumine terras,  
Et socios stantes manibus benedicit apertis.  
Aurea tum nubes radiantì interlita luce  
Excepit gremio, interclusaque culmina caeli.  
At gemini juvenes aderant. Et candida vestis,  
Et frontis formosus honos, et membra decora  
Caelestisque humerus ceu versicolore nitescens

Remigio alarum aethereos demonstrat alumnos.  
Qui juxta steterunt, et sic rosea ora resolvunt:  
Unde, Galilaei <sup>28</sup>, tantus stupor? aethera purum  
Namquid suspicitis? Jesus, quem cernilis aura  
Sublatum propria, et caelestia regna petentem,  
Inde iterum terras, finito tempore rerum,  
Adveniet, patriaque ultor pro lege sedebit.

Hec quoniam verbis nostros vulgare dolores  
Aggrediar? quanto mens inscia fluctuat aestu!  
Ille aderat Deus, et praesenti numine firma  
Nostra videbatur tuto procedere vita.  
Dulce fuit comitare Deum, vultuque morari  
Ambrosio, et veras audire et reddere voces.  
Et nunc immemori quisquam demittere mente  
Ardentes oculos poterat, frontemque serenam,  
Verbaque suaviloquo manantia dulciter ore?  
Amisso veluti ignotas rectore per undas  
Erramus, laetaque adeo sine luce manemus.  
At mox attonitis subire novissima verba;  
Excitimur somno, et clivum frondentis olivae  
Linquimus, et cuncti Solymam properamus ad urbem,  
Qua mandata dabant. Jonas <sup>29</sup> quem nomine dicunt  
Marcum, collectos palefacta exceptit in aula.  
Agmen apostolicum, sacri omina prima senatus  
Quos domui sanctae artifices Deus ipse creabat,  
Surgenti moli tot fundamenta <sup>30</sup> futuri,  
Ingredimur: mirata Deum per rura, per urbes  
Consequitur manus; in coenacula magna venimus,  
(Isacidae summas aedes coenacula dicunt)  
Bissexaginta, quae prima Ecclesia fratrum,  
Spirandaeque Aerae mentes et corda paramus.



Ipsa choro praecrat summo acceptissima Regi  
Immaculata Parens, quae primae nuncia pacis  
Mutavit nosrae miseranda pericula sortis.  
Semianimem cernens funesto e robore Christus  
Dixerat alludens: Pro nato, Mater, adempto  
Omne hominum genus accipies. Dicta illa revolvens  
Undenos sequitur summa ad fastigia fratres,  
Oratura patrem, complensque novissima verba  
Maternis totum curis complectitur orbem.

Ut regno staret concordia magna futuro,  
Providit Jesus ( et quae nam improvida menti  
Divinae esse queant? ) legitque ex omnibus unum,  
Cui summam magni imperii commisit habendam.  
Jordanem propter laeta regione peragrans,  
Et qua Pancada <sup>31</sup> antiqui dixere, Philippus  
Caesaris Augusti memori de nomine dixit  
Urbem, continuo campis remoratus apertis,  
Eqquem me dicunt homines? quondam ipse rogavit  
Discipulos. Illi praeconia cuncta tulere,  
Et quae per varias ibant vaga murmura gentes:  
Joannen alii communi voce vocatum  
Baptisten: Heliam alii, plerique salutant  
Jeremiam, aut priscis ingentem e valibus unum.  
Tum vero Jesus <sup>32</sup>: *At vos quem dicitis esse?*  
Illic ego confidens animo: *Tu es Christus, et ingens*  
*Progenies patris.* Quibus ille haec magna reponit,  
Valicinans: *Felix Simon! abscondita rerum*  
*Non earo, non sanguis potuere ostendere; caelo*  
*Ipsae Deus docuit, verique arcana relexit.*  
*Atque ego dico Tibi: Tu Petri nomine gaudes,*  
*Et super hac Petra mea quondam Ecclesia surget,*

*Quam poterit Regum nulla exuperare potestas,  
Nullaque vis erebi. Tibi ego tibi trado potentes  
Caelestis regni claves; quaecumque ligabis  
In terris, eadem firmabit vincula caelum,  
Quaeque soluta tibi, caelesti numine solvam.*

Tunc promissa dedit, primique insignia honoris:  
Promissam praestare fidem, et fundamine certo  
Jura potestatis voluit firmare, priusquam  
Desereret terras, patriamque rediret ad aulam.

Funerea victor Jesus surrexerat urna,  
At nos amisso ignaros genitore per arva,  
Per mare desertum dolor, et formido trahebat.  
Fortle pererrabam patrii per littora stagni  
Et comites aderant pauci: nox languida velo  
Coeperat umbrifero caeleste obnubere templum:  
Discipulis gravior sub noctem cura recurrit.  
Multa super Christo rogitant, et multa loquuntur  
Prodigia. At quoniam tellus, mare, sidera rident,  
Eccur piscando non fallimus otia? laudant  
Consilium, in tulas navim deducimus undas.  
Persaepe aequoreo fallacia retia ponto  
Objicimus, persaepe labor frustratur hiantes.  
Jam matutino tandem surgebat in ortu  
Lucifer et summos surgebat lumine fluctus:  
Littore constiterat Jesus, neque novimus illum.  
Ille autem accedens: An pulmentaria habetis,  
O pueri, dixit? Simul audiit ipse querentes  
Tota nocte laborasse, et recidissem laborem  
In vacuum, ad dextram jussit dimittere navim  
Retia, quae demum spoliis cumulantur opimis,  
Squamigerumque strues viridanti exponitur alga.

Tunc patuit Dominus: divino e vertice flamma  
Emicuit, vultuque sacro pulcherrimus arsit.  
Ocyus e cymba cuncti descendere: prunis  
Illicet accensis majorum imposta natantum  
Gorpora, festivaque paratae littore mensae.  
Ipse etiam accumbit Jesus comeditque: stupebant  
Discipuli interea: sic Jesus ora ferebat  
Vivens: tale viri sonuit vox dia loquentis;  
Versicolore nitens talis subtegmine vestis,  
Incessusque habitusque: at nota major imago  
Venerat, atque oculis insuetum afflârat honorem.  
Postquam prima quies epulis, cunctique priores  
Deposuerunt metus, in me flammantia vertens  
Lumina sic fatur: *Simon, e sanguine Jonae* <sup>33</sup>,  
*Me plus his adamas?* Ego tunc: *Te pectore toto*  
*Ipse amo te, Domine.* At Jesus, responsa ferenti  
*Pasce meos agnos*, inquit. Tum quaerere rursus:  
*Me plus his adamas?* Et respondere roganti  
Gestio: *Scis equidem, scis ipse:* et rursus Jësus,  
*Pasce meos agnos*, addit. Nec deinde moratus  
*Me, Simon, adamas?* quaerit. Mihi tristitia mentem  
Turbant: et dubitans, quorsum tam multa rogaret,  
*Omnia tu noris, nec cuiquam est fallere; nosti*  
*Ut te sollicito dilexi semper amore.*  
Tunc Jesus laeto vultu subrisit, *ovesque*  
*Pasce meas*, inquit. Quae mira potentia verbo!  
Scilicet immensus caeli terraeque Creator,  
Cum nova constituit nullique audita priorum  
Jura potestatis, voluit notescere terris  
Nil esse humanum, divinitus omnia caelo  
Procurare Deum <sup>34</sup>. Dignatur munere primo

Me qui nil merui, qui multa indigna relatu  
Admisi. E saxo <sup>35</sup> Abramidas Deus excitat; ingentem  
Exertans humerum caelo dextramque coruscans  
Deiecit solio populorum numina reges,  
Pauperiemque humilem sublimi in sedē locavit.

Ast ego, quandoquidem cunctos simul unus agebat  
Ardor, et una fides, concesso munere fungens  
Ardebam in primis sanctum complere senatum.  
Ergo expectanti fervere sedilia coelu  
Conspiciens, certam pando per singula mentem.  
Undeni fratres, veneranda oracula Patrum  
Omnia divino cecinerunt carmine. Judae  
Non tacuere seclūs, sancti qui ad magna vocatus  
Jura ministerii parva mercede magistrum  
Prodidit. At scelēri indigno data praemia quidnam  
Profuerunt? ramo sese suspendit ab alto  
Impius, et medio diffudit viscera campo.  
Id cecinit Psalles: *Fiant deserta domorum*  
*Limina, neve habitet quisquam: sua munera lectus*  
*Alter suscipiat* <sup>36</sup>. Numerum complere necesse est;  
E medio coelu vestigia sancta seculo  
Carpere praestiterit, qui vastum incedat in orbem  
Nobiscum, testaturus facta inelyta Jesu.  
Sic ego; seligimusque duos ex agmine toto,  
Joseph, communi dictum cognomine Justum,  
Et Mathian <sup>37</sup>. Simul oramus: Qui pectora nostri  
Omnia, tu, Jesu, ostendas, qui dignior alto  
Munere, quod tenuit Satanac damnatus Iudas,  
Et dedimus sortes <sup>38</sup>; e ductis sortibus exit  
Electus Mathias, et bissenum integrat agmen.

Hesternā jam luce sacris memoravimus aris

Semper honoratum nobis semperque verendum  
Prodigium. Ex illo perfecta Ecclesia coepit,  
Cum primum summo veniens Rex aethere sponsam  
Longo praeceptam gemitu, miserisque tenebris  
Connubio junxit stabili, et conclavibus aureis  
Progressam supero Reginam in monte locavit  
Conspiciam <sup>39</sup>. At sanctam quae exornat gloria sponsam,  
Intus <sup>40</sup> corde laet. Quî tanta potentia verbo,  
Ut facies animae <sup>41</sup>, ablato velamine, coram  
Emicet humanis oculis? qui splendor honestat?  
Captus amore suo, pulchraeque cupidine formae  
Ipse quidem sponsus divina charismata, sanctae  
Spiramenta aurae fudit. Quae Gratia sanctos  
Caelestesque facit, quae rerum arcana tuctur  
Immaculata Fides, neque conscia foedera rumpit  
Spes promissa sequens sperato gaudia risu,  
Atque Amor aeterno scintillans puriter igne,  
Sanctae hi custodes animae, miscentque foyentque  
· Virgineo in gremio caelestis munera vitae.

Et nos inprimis spirabilis ambiit Aura  
In nova piscantes miseros <sup>42</sup> miracula rerum  
Transformans. Strepitum fugiens, curisque soluta  
Terrenis, stabat Christi selecta propago  
Orabatque Deum, tantum caelestia sperans  
Gaudia. Multifidae sed vix sub imagine flammae  
Aura potens, amor omnipotens, spirabile Numen  
Supra quemque stetit comitum, cunctique potenti  
Turbine corripimur, virtus ciet ignea mentes,  
Quos modo ductoris tremefactos funere acerbo  
Palantes timor ut pavidos prostraverat agnos <sup>43</sup>,  
Aut vitam trahere errantem piscosa secundum

Flumina venatu assiduo cogebat egestas;  
Jamque manus ignota adigit; penetralibus altis  
Egredimur, ducente Deo, variisque loquelis  
Eloquimur populis sanctarum abscondita rerum.

Dives opum, munita situ, atque uberrima campis  
Florebat Solyme: populosa exaestuât unda  
Per plateas, decurrantque viri; pars munera pacis  
Exercent artes varias et divitis omni  
Inventa, externis faciens commercia terris  
Pars inhiat lucris, mercesque importat emendas.  
Tunc vero major populus convenerat: omnis  
A Juda soboles totum dispersa per orbem <sup>44</sup>,  
Evolvens veterum celebrata oracula patrum  
Affore crediderat tempus, quo nuncia pacis  
Pignora venissent Judam exhilarare jacentem;  
Crediderat, famaue volat mirabile factum  
Circumquaque ciens vicinas protinus urbes:  
Conveniunt Solymam, solymaeaque templa frequentant.  
Ut vero insucto commotos numine spectant  
Bissenos procures, linguas centum oraue centum <sup>45</sup>  
Audierunt resonare, omnes caeleste stupescunt  
Prodigium, et vario secum sermone requirunt:  
Nonne Galilaea <sup>46</sup> hi veniunt? miranda loquuntur  
Humana majora fide. Quos medus Hydaspes  
Educat, aut Parthus Tigris, quique avia rura  
Cappadocum, tumidoque tenent contermina Ponto  
Littora, florentemque Asiam, et squalentia lesqua  
Cyrenae, Arabiaeque domos, Cretaeque potentem,  
Et septingemino venientes vertice Romae  
Adsumus hic, gentes variae et diversa loquentes <sup>47</sup>.  
Omnes quisque suo fantes audivimus ore,

Narrantesque Deum, et Christi nova sacra ferentes.  
Quae nova prodigii facies? per compita talis  
Rumor in ambiguo est: alii spectacula rerum  
Intentis lustrant animis, alii omnia rident,  
Et capita illudunt chio madefacta calenti.  
Ast ego, cui dederat sensus penetrare repostos  
Omnipotens, dextra vultuque silentia posco,  
Et socios ipsos jubeo obmutescere; solus <sup>48</sup>  
Eloquor, atque omnes arrectis auribus instant:  
O fratres, Judae genus alto a sanguine, fratres,  
Et qui signatam Solymae venistis ad urbem,  
Eja agite, huc paulum vestras convertite mentes.  
Magna feram. Nam quae spumantia pocula vino  
Jactatis, quando vix tertia labitur hora?  
Talia praemonuit divino carmine Jöel:  
Magna dies veniet, cum dius Spiritus omnem  
Implebit carnem: caelo dictante, futurae  
Natique et natae cantabunt munera sortis.  
Et super his juvenes rerum admiranda videbunt,  
Elataeque senum mentes nova somnia cernent.  
Ipse meos caelo famulos famulasque replebo  
Flamine; discutiens caecae caliginis umbram,  
Arcanas Flamen leges, aevumque jubebit  
Pandere venturum. Dabo prodigialia caelo  
Monstra, dabo terris, manantes sanguine rivos  
Ignemque, et rapido fumantem turbine nimbum;  
Ipsam etiam roscio defectum lumine solem  
Cernere erit; pallens suffuso luna cruore  
Inficiet vultum, extrema in luce, priusquam  
Magna dies veniat: Domini quicumque vocabit  
Nomen, salvus erit. Nunc vos Isrâele nati,

Vocem audite meam. Jesus, cui Nazzara nomen <sup>49</sup>  
Tradidit et patriam, quem virtus ignea vexit  
Supra homines, per quem vestris ostendit in oris  
Mira Deus, nece per vos interfectus acerba est.  
At vestra Omnipotens mutavit crimina caelo,  
Diaque caelestem vestivit gloria Natum,  
Isacides qualem praesaga mente videbat.  
Panditur extemplo moles operosa sepulcri,  
Ille triumphator supera expatiatur in ora  
Jamdudum, et resides animos et rustica corda  
Hortatus comitum, se in caelica templa recepit,  
Unde potens regni, divini flaminis auram  
Omnipotentem auram misit, quam cernitis ipsi,  
Per nos arcanas caeli vulgare loquelas.  
Talia dicebam; in fletus solvuntur amarus  
Omnes continuo: ceu mollis cera liquescit  
Ignibus admotis, ceu sole oriente tepescens  
Nocturna astrictus glacie dissolvitur humor,  
Paullatim obtusae incipiunt mollescere mentes  
Cordaque praedura, et quae faciendâ requirunt.  
Ast ego: Si innocuo scelerastis funere vitam,  
Exitiale nefas lacrymis detergite; puris  
Lustrabit Christus lymphis auraque salubri.  
Nec mora, quot sacri suavissima gratia veri  
Corripuit, sancto lustravi fonte salutis,  
Et mea sacrati posui primordia regni.  
Nam primo sermone virum tria millia nostro  
Credunt alloquio, et sacrum ingrediuntur ovile <sup>50</sup>.

Tertia jam orantes commoverat hora, Deoque  
Quod majus terris templum Judaea sacrârat,  
Scandere gestieram, lecto comitatus amico



Joanne. Ecce autem primaevo claudus ab ortu  
Illacrymans stabat Speciosae <sup>51</sup> ad limina portae,  
Si quisquam miserans clamanti accurreret aegro.  
Qui me marmoreo subeuntem limine spectans,  
Alius inclamabat, opemque in vota vocabat.  
Nec frustra: sistunt comites; atque ipse querenti  
Respice me, dixi. Lacrymis rorantia claudus  
Lumina sustollit, magnoque ego numine plenus:  
Si mihi non auri, dixi, argentique metalla,  
Accipe quae possum: Tibi dico, in nomine Jesu  
Nazzaei consurge: manumque amplexus inhaesi,  
Erexique solo. Gradientem vincula nulla  
Impediunt; stetit exiliens, Jesuque Deique  
Collaudans nomen. Firmo vestigia gressu  
Ponentem, et superis tanto pro munere grates  
Solventem spectans (cui non innotuit ille  
Ante fores recubans?) populus glomeratur in altis  
Porticibus <sup>52</sup>: tantam sed ego increbrescere turbam  
Attonitam spectans: Quid vos mirabile factum  
Usque adeo tenet intentos? nec dextera nostra  
Id porro poterat: manifesto numine caeli  
Talia succedunt. Promissi muneris auctor  
Omnipotens Deus, ille Deus, quem Abramus, Isacus  
Et Jacob coluere <sup>53</sup>, hominum lumenque ducemque  
Messiam voluit magna inclarescere luce.  
Quid dubitalis adhuc? Jesu nomenque fidesque  
Concessit claudum firmato incedere gressu.  
O lectum genus antiquo de sanguine Judae,  
Quae Samuel olim, quae tot cecinere prophetae,  
Tempora venere. Heredes properate: reclusum  
Testamentum ingens <sup>54</sup>, quod certo foedere sanctis

Promisit populis Abrahami in nomen ituris  
Omnipotens, lecto benedicens semine cunctis  
Terrarum populis. Vos haec oracula poscunt;  
Vobis in primis caelo descendit ab alto  
Messias, vobis tumultu surrexit aperto.  
Eja agite, atque animum patrio convertite caelo.  
Turbae flexanima rerum dulcedine molae  
Auribus arrectis steterunt, mentemque benignam  
In nos accipiunt, nos nostraque jussa sequuntur:  
Excita Jerusalem monstris ingentibus haeret.

Qualis bellator si circum moenia tendit  
Urbis, et indugredi parat auxiliaribus armis;  
Justitia incoepti virtutem exuscitat; acres  
Praeterea assistunt acies, quae robore duro  
Praevalidae sanctam jurârunt prodere nunquam  
Militiam; obsessus primum molimina vana  
Irridet: mox primo ausu si audacia decrit,  
Atque interlucens muris jam spissa corona  
Nulantum numero coepit rarescere, pendet  
Addubilans, subeunt irae, et suspecta pericla  
Ultrices jaciunt laniata in pectora flammæ;  
Haud secus Isacidæ primum conamina nostra  
Illudunt, mox successu perfecta secundo  
Spectant obliqui, atque armis, atque arte resistunt.  
Postquam Judæam, primi incunabula veri  
Romulida evicit, regnumque oppressit iniquo  
Imperio, Christus mysteria magna ferebat  
Hebraeae genti: sed quosdam falsus agebat  
Igniculus patriæ; regem excupiere potentem  
Abrami de stirpe satum, qui in regna remittat  
Progeniem antiqua, et metuendos proleat hostes,

Transversos agit hos carnis vitata libido <sup>55</sup>;  
Altera pars caelo missam vocem audiit; olli  
Dia fides potior, meliusque oracula patrum  
Intellecta: Dei natum de semine Jesum  
Christum amplectuntur, qui toti nunciat orbi  
Ignotas leges, qui in mutua vincula fratrum  
Omnes terrigenas uno convertit amore,  
Qui, spreta tellure, poli immortalia regna  
Recludit, cupidosque oculos mentesque scatentes  
Terrenis nebulis rerum ad caelestia raplat.

Namquis victori primum contendere Christo  
Ausit? sacrato primum de limine bellum  
Erupit: neque enim tantos consurgere motus  
Securi Isacidum proceres videre. Coactum  
Concilium magnum (Synedrim <sup>56</sup> cognomine dicunt);  
Quod, mandante Deo, quondam delegerat ipse  
Legifer illustris Moyses, dederatque supremo  
Servare imperio sacrali oracula juris.  
Scilicet horrendae falso qui crimine mortis  
Prodiderunt Christum, simul atque increescere vulgi  
Impatiens studium, et Solymam videre stupentem,  
Non ullam fecere moram, sacrumque tribunal  
Indicunt. Vocor ipse, simul comitante Joanne,  
De me, de Christo rationem reddere; claudio  
Allatum auxilium, et causas agnoscere quaerunt.  
Ergo introgressus, nostro Deus affuit ori,  
Talibus incoepi: Clarissima lumina gentis  
Hebraeae, magnique senes, audite loquentem.  
Vos tantum haec benefacta movent, ceu nostra potestas  
Tanta foret: Judae tellus haec audiat omnis.  
Vobis vera loquor. Si vulnere clauda recepit

Membra aeger, pedibus rectis si incedere coepit  
Ille diu recubans Speciosae ad limina portae,  
Christi omnis virtus: per Christi nomen Iesu,  
Nazzara quem genuit, qui victa morte triumphat,  
(Aeternam tali sobolem illustravit honore •  
Omnipotens ) veniam claudus suscepit eundi.  
At Jesus, falsa quem proditione prehensum  
Damnastis, vobisque male aedificantibus actus  
In praeceps, Jesus, qualem cecinere prophetae,  
Est lapis <sup>57</sup>, unde novae domui stetit angulus ingens,  
Quae domus ingenti passim consurgit honore  
Complexura suis populos penetralibus omnes.  
Una salus Jesus, nec fas sperare salutem  
Ex alio. Nomen venerabile tradidit ipse  
Terrigenis Deus antiquas reparare ruinas.  
Immotis animis caelestia jussa canentem  
Omnes audierunt patres. Stupor urget inertes,  
Et dum magna animo virtus, dum insigne recursat  
Eloquium (neque nos humili de gente latebat  
Esse omnes studiisque rudes), violentia gliscit,  
Consiliumque ineunt: constat sententia cunctis  
Protinus audaces commota extrudere ab urbe.  
Tunc ego pauca loquor pro re, sed cuncta diremi  
Cetera tentamenta virum: Cognoscite, Patres,  
Quae rerum ratio: vobis parere necesse est,  
Anne Deo <sup>58</sup> id porro certum: quaecumque jubetis  
Mandatis Christi nostraeque obstantia causae,  
Jussa cadent cuncta in vacuum. Quae vidimus omnia,  
Quae Christus docuit, cunctis vulgabimus oris.  
Humanum non istud opus: divinitus istud  
Obligat officium, commissaque jura loquendi.

Tunc ego nutantem incertis rumoribus aulam  
Deserui. Sociis certamina prima laborum  
Enarro, mentemque paro maioribus ausis.

Et jam siderei vestigia Flaminis omnis  
Praesentit tellus: cognata potentia caelo  
Mutatas mentes vocal, instaurataque vero  
Pectora monstrato gaudent se vertere caelo.  
Ingens, spe major Solymaea crescit in urbe  
Credentum coetus. Summo data gratia Regi,  
Auspicium coeptorum operum tunc prima locata  
Regni fundamenta novi; consortia sacra <sup>59</sup>  
Constitui, atque stalis horis in templa receptos  
Paseebam eloquio, et certa pro lege regebam.  
Omnia quae reputans felicius ire, gregique  
Primo commodius, proprius si pastor adesset,  
Consului fratres: et pastor traditus urbi,  
Plenoque emicuit Solymaea Ecclesia cultu.  
Qua prior incoepit fidei surgentis origo,  
Quaque cruce e summa mysteria magna peregit  
Christus, Jacobus sancto praefectus ovili,  
Qui frater Domini, nec erat praestantior alter  
Justitiae studio, Dominum per cuncta secutus;  
Atque potestatis dedimus gestamina magnae.  
Aurea tum attonsos circumdedit infula <sup>60</sup> crines,  
Et sanctam ascendit, coetu plaudente, cathedram,  
Pascua lactifico monstrans uberrima cultu.  
O bene partus honos, cathedraeque insigne decorum <sup>61</sup>,  
Quam magno ambibunt studio venientia saecula!  
Ipsa operis magni auspicio exemploque loquetur  
Ingenti, et rapiet fratres ad magna sequaces.  
Paulatim interea Christi consuescere mori

Atque novae speciem vitae praeferre redemptae  
Incipiunt gentes. Quos sancto foedere amoris  
Junxerat una fides, fraterno nomine cuncta  
In commune ferunt <sup>62</sup>: veteres tellure recludit  
Thesaurus locuples, irritamenta malorum  
Quondam, nunc tristis solamina dulcia vitae.  
Incumbunt operi comites: per tecta domorum  
Compositam frangunt cererem, mensisque paratis  
Excipiunt inopes. Hi Christo vivere discunt,  
Qui nudos vestit, qui alimenta ministrat egenis:  
Ipse Pater caelo signis praesentibus ingens  
Juvit opus: pictas alios movet incluta; saeva  
Terrificant alios rerum portenta scelestos.

Ecce autem fama per totam inclaruit urbem  
Cyprius: ille Joseph communi nomine dictus,  
Barnabam <sup>63</sup> appellare alii consuevere. Calenti  
Ingenio abreptus, mutato sidere, sese  
Transtulerat Solymas, qua fertilis ubere campi  
Ditior, et positus nummis in fenore, vitam  
Desidie in molli luxuque trahebat inertem.  
Ut vero nullis saeculorum visa priorum  
Prodigiosa videt, tum formidabile caelo  
Turbavit signum, conversaque pectora moris  
Anteacti extemplo ceperunt laedia: solis  
Incubuisse opibus noctemque diemque parandis  
Poenituit: multo lacrymans divendidit auro  
Pinguia camporum, pretioque politus opimo  
Ante pedes sanctos retulit, blandisque querelis  
Oravit: Si quae juste injusteque parata  
Sunt mihi, sponte fero. Sinite ut damnosa refringam  
Vincula, quae terris animam remorantur inertem:

Haec date pauperibus; ego pondere liber ab omni  
Vos quacumque sequor, qua Christi gloria ducit.

Venit Ananias posthac, Zaphiraque venit  
Conjux. Incensi vitae melioris amore  
Ambo vendiderant agrum, pretiumque receptum  
Pontificis partem ante pedes statuere: sub arcam  
Abscondere aliam, sperantes posse latere.  
Ast ego praesensi simulata mente locutos.  
Quid te tentavit Satanas corrumpere verum?  
Infelix! tua te perdet fallacia: non tu  
Mentiris porro nobis: tua Spiritus almus,  
Cui tu mentiris, caelo perjuria damnat.  
Fatus eram, exanimisque solo, ceu fulminis ictu  
Haesit Ananias. Nec tertia fluxerat hora,  
Atque ignara mali mulier, mortique nefandae  
Ipsa etiam devota petit sacra tecta: sed olli  
Occurrens: Mulier, nec falsa fatebere nobis,  
Dic age, quo pretio conjux venundedit agrum?  
Ast ubi dissimulans eadem mendacia firmat;  
Quid vos, exclamo, Spirabile fallere Numen  
Creditis? ecce tuum subito posuere sepulcro  
Falsum, mendacemque virum: similique secuta  
Fraude virum, conjux simili ne desere poena.

Talia vicinam sparguntur monstra per oram:  
Morbis tentatos variis matresque virosque  
Jerusalem asportant. Ut lecto fessa jacebant  
Corpora tabificis dudum languoribus acta,  
Per plateas exposita manent, quacumque pererrans  
Incideram <sup>64</sup>, saltem orabant gradientis imago  
Tegmine obumbraret sancto, caussaeque repente  
Longarum effugerent febrium. Neque multa rogantes

Destituit praesens favor; implorantibus omen  
Gratia caelestis superastat. Cuncta recedit  
Sanis corporibus pestis. Tum spiritus ater  
Sicubi sollicitos miseris cruciatibus artus  
Vexaret, jussus possessa relinquere membra,  
Infrendens stygiae repetebat lurida vallis.

Quid tantis faceret signis Judaea rebellis?  
Infremuit secum, tacita neque mente cruentum  
Judicium mansit: facto velut agmine sistunt  
Magnorum auctores operum, injiciuntque catenas  
Aerisonas, caeduntque flagris et carcere claudunt.  
Quae vos improbitas agitat, quae amentia Judae  
Sacricolae? jurastis ineluctabile bellum  
Christo? sed Christus spes omnis et unica virtus  
Praebuit auxilium: tenues ceu fumus in auras,  
Irrita vanuerunt foedae molimina fraudis.  
Nocte super media, loca caligantia, caeli  
Angelus ingreditur, reseratque obstrusa repente  
Ostia: Jamque exite, inquit: conscendite templum,  
Et miserac plebi dios monstrate recessus.  
Et jam mane novo vix titan aureus urbem  
Commotam exhilarat, populi inspectante corona,  
Cernere erat diae vulgantes dogmata vilae.  
Desipuit Synedris: miseram timor iraque mentem  
Praecipitant, Princepsque aulae properata vocabat  
Fratrum colloquia, et magnis de rebus agebat:  
Quo res summa loco, quae, si fortuna sequatur,  
Gens nova molitur coeptis audacibus, uni  
Cuique patent, Proceres, manifesta, nec ipse  
Praecipiam eventus. Tantum cognoscite noctis  
Praeteritae casus. Duodenos undique captos



Muletâram abstruso latebrosi carceris antro.  
Excubiae alternae vigili statione tenebant  
Portas vestibuli aeratas. ( Vix credere dignum,  
Ni res ipsa fidem faceret ). De carcere cuncti  
Evases: tamen facti via nulla patescit.  
Ut primum ferro clausa, et compagibus arctis  
Ostia magna manent: ipsi per compita laeti  
Interea volitant, civesque, in limine templi,  
Doctrina elatos in aperta pericula mittunt.  
Eventus rerum insoliti subsellia terrent,  
Implacati odii flammis incendia gliscunt;  
Jamque faces inferre parant, lapidesque minantur.  
Dum fera tempestas immania murmura miscet,  
Surgit Gamaliel <sup>65</sup>, qui consultissimus omnis  
Legis erat, talisque habitus: is totius aulae  
Consilium regit, et commotas temperat iras:  
O Proceres, extrema sequi contra omnia jura  
Arbitror; ire suo potius pede cuncta sinamus.  
Plerique et meministis enim et memorare potestis,  
Quantos seditio toties malesana tumultus  
Intulerit Solymis. Cuneo defensus agresti  
Bacchatus Theodas <sup>66</sup> per pingua rura, per urbes  
Terrebat populos. Dum saevis cuncta rapinis  
Arderent, quid tum? male conciliata peremptum  
Agmina deseruere ducem. Galilaea per arva  
Commemorem Judam <sup>67</sup> furialiter omnia caede  
Complentem et furtis: quid demum? morte nefanda  
Ipse perit: conjuratae fugere catervae,  
Amisso ductore. Novam consurgere gentem  
Adspicio, haud equidem ferro indignisque rapinis  
Grassantem: nostras tantum nova sacra per urbes

Jactant innocui; neque me latuere recentis  
Dogmata doctrinae. Nostram cognoscite mentem,  
O Proceres: loquor ipse palam, nostrasque loquelas  
Figite vos animis. Homines si talia quaerunt  
Moliri, mox cuncta suo procumbere motu  
Cernitis: at summo si militat ab aethere quidquam  
Divinum Omnipotens <sup>68</sup>, hominum vis nulla valebit  
Excutere: anne Deo caeci bellare paratis?

Talia commotis agitabant murmura in aulis  
Primores Solymae, pacisque inferre loquelas  
Nequicquam audebat Sapiens servantior acqui.  
At nos interea cœu tempestate tumentis  
Impavidi nautae, quo fiat divinior aura,  
Pergimns ire vias, laxantes nomine Jesu  
Retia <sup>69</sup>: quo pontus graviores aggerat aestus,  
Auctu majore omniparens Ecclesia crescit.  
Nec soli veniunt judaeo e sanguine nati.  
Grajugenûm <sup>70</sup>, quoquot sancta versantur in urbe,  
Judaei nomen generis ritusque sequentum  
Indociles animos caelestis gratia tangit;  
Una orant, eademque una convivia lustrant.  
Hic primum audiavi Judacos munere mensae  
Temnere Graiorum viduas: perrepere voces  
Coepere ambiguae, et fraternum rumpere foedus.  
At mihi bisseum surgit sententia coctum  
Cogere, conventuque sacro peragenda videre.  
Consilium exposui fortunatumque piorum  
Crescentem numerum: Nostis quae murmura, fratres.  
Si placet, e numero comitum decerpite septem,  
Quos puram nostis vitam famamque tuentes.  
Mite ministerium <sup>71</sup> praestabit credere moestos

Solari omnigenos, sanctisque assistere coenis.  
Munia nos graviora vocent, penetralibus altis  
Exorare Deum, caelestis semina verbi  
Per populos vulgare. Placet sententia cunctis,  
Et legimus septem: viridi spectabilis aëvo  
Primus adest Stephanus, casta dein laude Philippum  
Florentem capimus, Procherumque, Nicanora Christi  
Saevos devincentem hostes, fortemque Simonem  
Parmenamque pium, atque illis qui forte diebus  
Nicoleos magna Antiochi prognatus ab urbe  
Venerat. Extemplo, cunctis in templa vocatis,  
Pluribus oramus, te Spiritus alme, manuque  
Omnibus imposita, officium committimus ingens.  
Nec mora nec requies; opera ad caelestia pergunt  
Septeni comites; pietas praestit omnibus una,  
Magnificasque domos, crassoque mapalia fumo  
Intröcunt alacres, quacumque vocatur amica  
Religio referens duris solatia rebus.  
Quisnam Jerusalem se subtrahit angulus armis,  
O pietas veneranda, tuis? tu tergis amaras  
Desertae viduae lacrymas: tu patre relictos  
Per plateas quaeris pueros, gremioque localos  
Munda veste operis: tu moestas ipsa puellas  
Omnibus insidiis objectas protegis, alis  
Obnubens, suadensque sacrum servare pudorem.  
Quotquot mendacis fugientia gaudia mundi  
Experti, quotquot rerum refluentibus undis  
Vitrea terrenae norunt ludibria vitae,  
Laeti spem caeli accipiunt, laceramque reducunt  
In portu navim, et tuta statione residunt.

Gaudia tu primum nostra incolumesque triumphos

Turbasti, Stephane: o Juvenum lectissime, nostras  
Primus habes lacrymas: primus radiante corona  
Martyrii ingrederis caelestis templa Sionis,  
Et primum Indigetem sanctas memoramus ad aras.  
Pastori Solymae septem delecta ministri  
Pubes adstabant, Patremque in sancta juvabant  
Munera: foecundo Stephanus supereminet ore,  
Surgentis certans pro Relligionis honore.  
Intrârat coctus 7<sup>a</sup> varia de gente coactos,  
Sermonemque sacrum intulerat, vatumque recludens  
Veridicum eloquium, vitae immortale futurae  
Arcanum ediderat. Quem misit Nazzara, Jesum  
Ritus delesse antiquos, migrasse figuras,  
Messia adveniente; repleta oracula vatum.  
At frustra eloquitur: studia in contraria certant  
Diversae gentes; juvenemque arcana loquentem  
Hic stupet, hic ridet, saxa hic minitatur et ignes.  
Sed magno eloquio non exuperabilis heros  
Perculit audaces: Tibi nempe, Hebraca propago,  
Dura fuit semper cervix, durissima corda.  
Spiritus sancto nobisque obsistere semper  
Audebis? veterum funesta exempla parentum 7<sup>3</sup>,  
Qui vates caelo missos et digna canentes  
Derisos foedae multarunt crimine mortis,  
I, sequere. Attoniti tenuere silentia cuncti;  
At Martyr sancto correptus Flamine, in auras  
Ardentes oculos volvit, sive ille periclis  
In mediis animum aethereo tutamine firmat,  
Sive Dei contra ingratos horrentia tela  
Avertens caelum facit exorabile terris.  
Ecce autem ardenti fulgescere lumine visi

Tractus siderei, patefactaque maxima caeli  
Regia, et interior divini gloria templi.  
Ille, velut terra superos ablatus in orbès,  
En ego Caelicolas, inquit, Jesumque sedentem  
Ad dextram Patris intueor, Patremque suprema  
Majestate throni illustrem, qualemque videre,  
Et quantum solet aetherei gens incola regni.  
Haec fatur gaudens, visuque immobilis uno  
Haerebat, totus radians ab imagine solis.  
Tum vero insolitum turbata per atria murmur  
Insonuit: Juvenis confidentissimus audet  
In nostram gentem stolidi convicia lingua  
Fundere? nosque diu vivum patiemur inulti?  
Mos erat, et veterem lex condita sanxerat usum,  
Religione nova siquis praevertere mentes  
Judaeum auderet, populariter ire liceret  
In poenas, lapidumque immissa grandine sontem  
Obrueri, et crimen scelera morte piare.  
Magnanimum juvenem simulato crimine spargunt  
Contra stare Deum, et Mosis contemnere jura.  
Atrox seditio in vulgus commota repente.  
Innocuum arripiunt Stephanum; velamina vestis,  
Candida quam genitrix ad sacros fecerat usus,  
Exutum ejiciunt turbatae e moenibus urbis,  
Nimbosum ad boream qua Cedar <sup>74</sup> semita ducit,  
In medioque locant, religatum terga columnae.  
Saxeus interea crebra ceu grandine nimbus  
Sibilat. Ille nihil: teneris prae pectore palmis  
In morem crucis, intextis, interritus haeret;  
Poplite suppliciter flexo, manibusque revinctis  
Lumina sustollit caelo juvenilia, et omnes

Caelicolas in vota vocat: Tuque excipe, Jesu,  
Hanc animam, Tibi commendo, neu temne precantem  
Funere in extremo: miseris, Pater optime, parce,  
Nec peccatum ollis statuas. Nec plura profalus  
Dormiit in Domino. Truculenta caede cadentem  
Suspiciunt juvenem, fuso exultantque cruore.

Per Lybiae deserta vagae truculenta leaena,  
Si suadente fame plenum speculatur ovile;  
Illa agnum rapit innocuum largoque cruore  
Perfurit infrendens; mox agmina saeva sororum  
Advocat exululans, pastuque immota minatur  
Discerptarum ovium magnos attollere acervos;  
Et faceret, ni saeva canum custodia obsesset,  
Montanasque cito peterent armenta latebras;  
Tales Hebraeum procures contage cruenta  
Lymphati certant Sanctorum invadere septa,  
Cunctaque vastarent late loca, buccina signum  
Ni daret, innocuas pecudes in tuta reducens.  
Polluta e Solyma patiens Ecclesia fugit,  
Deseruitque Galilaeam, diffusa propinquis  
Finibus: ast humana Deus mala corrigit: illa  
Augescit, casu et nequicquam excussa sinistro  
Undique propagat sancti bona semina verbi.

Tum vero errantem tenuit Samaria Philippum  
Aversata diu Solymas Samaria <sup>75</sup>, superbum  
Ausa sub aërio templum sibi condere monte:  
Quam Jesus quondam magno miseratus amore  
Viserat erudiens, praeruptaque compita lustrans  
Excierat populum rerum novitate stupentem.  
Ergo discipulum non dedignata ministrum  
Excepit Samaria, novisque arrecta loquelis

Christiadum extemplo numero exullavit opimo:  
Quos inter primus magica doctissimus arte  
Accessit Simon. Variis ambire popellum  
Insidiis suetus, multa prece mergier orat  
Fonte salutifero, et Christi de nomine dici;  
Mansissetque utinam, neque Christo bella tulisset  
Successus fidei insolitos, auditaque praesens  
Visurus, saxis positam silvestribus urbem  
Intrabam, natumque cito miratus ovile  
Omnibus, irriguo quot Gratia tinxerat amne,  
Imposui palmas, divinaque Flaminis aura  
In flammae morem, caelo descendit aperto.  
Attonitis oculis signum admirabile cernit  
Ipse incantator Simon <sup>76</sup>. Quis crederet? altae  
Incaluit menti tumefacta superbia, et ultro  
Affatur comites: Mihi si conceditis istud  
Imperium, impositis manibus spirabile Numen  
Elicere e caelo, vobis congesta talenta  
Millia multa dabo. Quis non justa arserit ira?  
Sacra incestantem, rerumque indigna petentem  
Asper acerba tuor, metuendaque multa minatus:  
At tibi, praedixi, male parta pecunia tecum  
Dispercat male, qui credis mercarier auro <sup>77</sup>  
Incluta dona Dei. Pravae perjuria linguae  
Eluito infelix: si nulla piacula solvent,  
Ipse ulciscetur Christus; dabis improbe, poenas.  
Incantatori solvuntur frigore membra;  
Contremuit, largoque humectans flumine vultum,  
Implorabat opem, nosmet placabile Numen  
Conciliare sibi, et caeleste avertere fulmen.

Parte alia aetheria compellans voce Philippum

Angelus, eja, jubet, consurge, viamque capesse  
Qua Solymis Gazam ire datur. Candacis opimam  
Sectatus pompam, et magnis genitoribus ortus  
Aethiopum Eunuchus <sup>78</sup> Solymas advenerat, atque  
Regina comitante, sacra celebrârat in urbe  
Paschales epulas. Justis de more solutis,  
In patriam remeabat ovans, curruque superbo  
Sidens Isäiae magni divina legebat  
Carmina, qui vati sensus, quae tempora rerum  
Ignorans. Caeli volitans per inane Philippus  
Adstilit ad rhedam; volventem ut forte tuelur  
Vaticinum librum: Anne putas comprehendere, dixit,  
Arcanis commissa notis? neque multa moratus  
Reddidit Eunuchus: Possem, si ostensa fuissent;  
Et secum oravit supra conscendere currum.  
Pagina Messiados monumentum insigne futuri  
Monstrabat. Locus ille oculo occurrebat aventi:  
*Qualis ovis mactanda, sacras ducetur ad aras,  
Aut agnus qualis coram tondente quietus  
Nullos balatus tenero incitat ore; sed illum  
Despectum atque humilem non infima gloria restit:*  
*Quis genus effari valeat* <sup>79</sup> ? Quae verba? stupescens  
Quaesiit Eunuchus: qualem cecinere prophetam?  
At sacer interpres primaeva ab origine volvens  
Narrabat Christum Jesum, quem sacra docebat  
Littera, descendisse polo, et praesepibus altis  
Prognatum, aeterni Sapiens Patris incrementum  
Doctrinam vulgasse novam mortalibus agris.  
Demum funereo mactatum monte cruore  
Delevisse suo primae vestigia fraudis,  
Et veteris pulsasse omnem caliginis umbram.



Talia narrabat divina voce Philippus;  
Intentosque tenens animos Eunuchus et ora  
Currere vicino speculatur margine flumen.  
En aqua; quid prohibet sacro perfundere rore?  
Ille autem: In Christum toto tu pectore credis?  
Credo. Sic vario fantur sermone vicissim.  
Imperat Eunuchus currum consistere: in undas  
Descendant ambo, et puro ter mergere fonte  
Sanctus eum gaudet. Tum circumfusa Philippum  
Eripuit nubes; Christi nova dogmata doctus  
Eunuchus patriam pergit legatus ad oram.

Quis vero ille autem ductor Syrii aequora campi  
Quadrupedante quatit sonitu? rabida aestuat ira,  
Haud secus instructus ferro, quam si aspera pugna  
Evocat, ardenti clypeo gladioque coruscans  
Fulmineo: nosco calidae impacata juventae  
Ausa: sed ipse manu Deus omnipotente leonem  
Contudit indomitum, et placidum convertit in agnum.  
Romula <sup>8o</sup> pugnatori est Tarsus patria: doctus  
Re sacra Hebraeum, et magno inflammatus amore  
Excidium templi, et Solymam fulcire labantem,  
Audebat Christo adversis obsistere signis:  
Atque ubi Levigenam perfusum caede recenti  
Conspexit Stephanum, Sanctos extinguere jurans,  
Moenia palmiferae repetebat nota Damasci,  
Horrida judaei referens mandata Senatus,  
Ut si forte viros usquam, si forte puellas  
Compererit, Christi fulgentia signa secutos  
Pertraheret Solymas. Jamjam apparere propincae  
Incipiunt urbis praecelso vertice turres  
Ipse feram educens aciem ad vicina parabat

Praelia, et horribiles acuebat mente furores.  
Confestim nova de caelo lux emicat, ingens  
Et circum irradians: quadrupes bellator in auras  
Prosilit impatiens, arrectisque excutit armis  
Sessorem. Ille autem, improvise lumine oborto,  
Incertam amisit mentem, genua aegra soluta,  
Procubuitque solo: superis vox redditur auris:  
Quid me persequeris? jam desine, Saule. Minaci  
Attonitus juvenis viso, imperioque tremendo:  
Nam quis me alloquitur? dixit. Tum luce coruscans  
In media, et solis fulgore nitentior ipso:  
En ego sum Jesus, inquit, quem turbidus, amens  
Persequeris: quidnam stimulo parere recusas <sup>81</sup>?  
Surge, et vicinam qua semita ducit ad urbem  
Ingredere: hic noris quidnam tibi restat agendum.  
Nec plura, et priscae redierunt cuncta quieti.  
At stipata phalanx, animis opibusque parata  
Hoc ipsum ut strueret crescentem evertere prolem,  
Ut videre virum misere tellure jacentem,  
Mirati lucem insolitam, vocesque sonantes  
Audierant, confestim omnis de pectore fugit  
Effera vis animi. Posita formidine tandem,  
Semianimem accipiunt. Paullatim assurgere Saulus  
Nilitur, ast oculis caligo obvolvitur atra;  
Illum vi multa attollunt, manibusque prehensum  
Ambiguo haerentem gressu duxere Damascum.  
At Saulus diu sublapsus in viscera telum  
Haussit, jamque aliam praesentit pectore mentem.  
Continuo antiquae capiunt fastidia vitae.  
Tres duxit luces solidas, tres ordine noctes  
Illacrymans, et multa orans, somnique cibique

Immunis: sed prompta fuit clementia caelo.

Jerusalem fugiens pollutaque tecta, Damascus  
Venerat Ananias <sup>82</sup>, Domini fidissimus olim  
Discipulus, fandique potens exciverat aulam  
Judaeum, atque adeo magnum firmarat ovile,  
Tantaque virtutum comitarat gloria, ut ipsa  
Suspecti excuteret titubantia corda Senatus.  
Ille autem coepta in melius firmata fovebat,  
Qua prece qua lacrymis. Lux praevia matutino  
Surgebat radio, et Superis gratissimus heros  
Conspiciens caulam foetu uberiore nitentem,  
Prima precum gaudens solvebat munera caelo;  
Extemplo Christus manifesto in lumine pandit  
Eventus rerum varios, monuitque timentem,  
I vicum ad rectum, et notos exquire penates  
Judae <sup>83</sup>, ubi repperies Tarsensem nomine Saulum.  
Ille Deum supplex magna spe fervidus orat.  
Ast ille: O Domine, audiui crudelia multa,  
Audax quae juvenis solymaea gessit in urbe.  
Et nunc vastator <sup>84</sup> Syria bacchatur in omni.  
At Jesus: Agedum summi cognosce reposta  
Consilii: Deus hunc coetu secrevit ab omni  
Laturum extremas divinum nomen in oras.  
Quot pro me casus terraeque marique subibit!  
Hinc Solymae assurgens odium, caeco inde furore  
Commotae gentes certamina mille ciebunt:  
At vas <sup>85</sup> electa virtutum fruge replebo,  
Ipseque bellatori animos, atque arma ministro.  
Talibus obstupuit dictis venerabilis heros,  
Certaque nutantem firmat fiducia. Surgit  
Et Judae, ducente Deo, monstrata requirit

Limina; signatumque virum praedictaque cuncta  
Comperiens; o Saule, inquit, me conspice: Jesus  
Qui tibi monstratus gressu per plana viarum,  
Dum nostra irrueres equitans ad moenia, Jesus  
Impulit admonitum, quo libera lumina caeli  
Susciperes, donoque datum spirabile Numen.  
Sic ait imposuitque manus, clausisque repente  
Conciderunt oculis squamae visumque recepit,  
Atque salutifero Christi renovatus in amne est.  
Ex illo Saulus mutato nomine dictus  
Paulus <sup>86</sup>; Christicolas ferro flammaque secutus,  
Christicolis sese miscet, judaeaque lustrat  
Concilia, et magni spargit mysteria verbi.  
Inde novum emicuit judaea sidus in ora  
Antiquam rumpens noctem; mox maxima lampas  
Lustratura suis totum splendoribus orbem.

Interea placida compostae pace quierant <sup>87</sup>  
Gentes; multiplici crescens florebat honore  
Christi magna, licet modo nata Ecclesia; centum  
Oppida Judaea, Samaritidis ardua saxa  
Et Galilaea sacrum audierant mirabile verbum;  
Et Domini timor injecto commixtus amore <sup>88</sup>  
Imis pectoribus sese insinuabat, et almus  
Spiritus omnigeno fundabat munere regnum  
Christiadum. Me ducit amor per singula adire  
Agmina, quae longis quamvis distantia terris  
Vinxerat una fides, et opes lustrare novamque  
Progeniem Christi, et surgentem invisere caulam.  
Antiochia potens primum vocat; incluta gazis,  
Incluta tot populis, stygioque oppleta veneno  
Primas Pontificis curas et munia poseit.

Tempore jam primo, Stephani post funus amarum,  
Gratia commotam geminârat monstra per urbem,  
Qua Solyma profugi radiantia lumina solis  
Discipuli <sup>89</sup> intulerant. Vix venit rumor ad aures,  
Barnabbam emisi, patriaque advenit ab urbe  
Paulus, et extemplo bene natum adolevit ovile.  
Laetatas complector oves, oviumque magistros  
Barnabbam et Paulum firmo: vigili ille labore  
Extiterat primus dilecti cultor agelli,  
Ille erat exemplum hebraeis senioribus ingens,  
Si saperent, legisque novae documenta seculi  
Cessarent Christo adversis contendere castris.  
Fortunati ambo! caelo superastitit ingens  
Spiritus, atque ambo e vulgo seponere jussit:  
Ipse coronavi juvenilia tempora vittis,  
Atque dedi complere vices, si forsân abessem.  
Me posthac Lydde <sup>90</sup> excepit, quae littore magni  
Aedificata maris magnum collegerat agmen  
Christiadam. Crevit praesentibus excita signis  
Religio. Aeneas <sup>91</sup> octavum languidus annum  
Affixus lecto noctemque diemque trahebat.  
Ipse vocor, comitante choro, multumque roganti  
Dia fides priscum resoluta in membra vigorem  
Infudit. Surge, Aenea, vix ipse profatus,  
Ille thoro e misero exurgens, in nomine Christi  
Ire viam pergit; gradientem et sacra canentem  
Mirati Lyddae populi, mirata Sarone <sup>92</sup>,  
Quae deserta diu tanto commota triumpho  
Confestim fidei fructu exultavit opimo.  
Ecce duo venere viri: contermina Joppe <sup>93</sup>  
Miserat, ut paulum vicinam accederem ad urbem.

Veni, meque ferunt coenacula ad alta: jacebat  
Exanimis thalamo mulier sanctissima Dorcas <sup>94</sup>;  
Circumstant viduae passis per colla capillis,  
Suspirantque inopes, et luctisono ululatu  
Ostendunt tunicas, quas sanctis saucia curis  
Ipsa suis mulier manibus contexere suêrat.  
Ipse foris jubeo paulum consistere cunctos,  
Inflexoque genu oravi: tum flebile corpus  
Intueor, clamans: Thabita surge; reclusos  
Extulit illa oculos, et me speculata rêsedit.  
Ipse manu prendo, thalamumque relinquere cogo,  
El viduas inopesque vocans: Quam flêstis ademptam,  
En mater, vivit, Thabita, et vescitur aura  
Aethëria. Joppe magnum conterrita factum  
Audiuit, Christique fidem obsequiosa recepit.  
Successu exultans tanto vicina parabam  
Oppida lustrare; ast alio discedere cogor;  
Namque inopina fides mutato saecula cursu  
Nuntiat, et caelo gentes communicat omnes.

Italica <sup>95</sup> de gente cohors, Oriente subacto  
Constiterat, latique ferebat signa manipuli  
Centurio, pietate ingens, qui marte sub ipso  
Largiter omnigenis suêrat succurrere egenis.  
Cornelius <sup>96</sup> ( nam tale viro de gente Quiritum  
Nomen erat ) magna remoratus Caesaris urbe  
E stratis primo surgebat lumine, Patrem  
Rite precaturus, consuetaque vota ferebat.  
Ecce autem praepes stellatae nuncius aulae  
Sese fert oculis manifesta in luce videndum,  
Et sic affatur: Caelo tua cognita virtus,  
Romulidum ductor: benefacta ingentia Christi

Pauperibus solium ante Dei ascendere serenum;  
Et nunc ipse Deus benefactis praemia reddit.  
Mitte viros Joppen; et quemdam nomine Petrum  
Quaere (domo degit juxta mare); dixerit ipse  
Quae facienda tibi. Nec plura, domumque reliquit  
Aliger aetherei. Viso conterritus ibat  
Cornelius, famulumque vocans, spectaculaque narrans  
Demisit Joppen. Jam sexta advenerat hora,  
Qua summam de more domum <sup>97</sup> conscendere suam,  
Atque orare Deum; menti novus incidit ardor,  
Deserui terras, et in aethera raptus apertum,  
Talia conspexi: Vaga lintea <sup>98</sup> passa per auras  
Ingentem tractum tenuere, oraeque quaternae  
Desuper emissae extremo contingere visae  
Tellurem limbo: gremio cava carbasa lato  
Alituum genus omne tenent speciesque ferarum  
Innumeras. Visu steteram defixus in uno,  
Cum vox insonuit superam delapsa per auram:  
Surge, Petre, occide et comedas. Ego talia fanti,  
Avertant omen Superi: communia vesci  
Atque immunda nefas <sup>99</sup>. Caelo vox clarior instat:  
Tunc immunda vocas, macula quae tersit ab omni  
Ipse Deus? Mihi ter manifesta patescit imago,  
Ter voces hausi, dilapsaque cuncta recedunt.  
Talia sollicitoolvebam pectore mecum,  
Tresque viros venisse ignota veste reportat  
Nuncius: hi monstrata duci miracula narrant,  
Quodque erat in votis domino, me quaerere dicunt.  
Namqua laetitia exilui? quae magna cupido  
Compellare virum, tantosque agnoscere casus?  
Tu melius nosti, Jesu pulcherrime; nam me

Nil aliud terris, quantum tua gloria tangit.  
Deseritur Joppe; paucis comitantibus, urbem  
Caesaris advenio, monstrataque tecta subibam,  
Cum procul accurrens, magna stipante caterva,  
Ductor: Tune, inquit, Senior, quem mane nitenti  
Aliger aetheria veniens signavit ab aula?  
Dixit, procubuitque genu, me pronus adorans.  
Ast ego: Ne facias, clamo, dextraque minorem  
Erigo: meque vides hominem de semine cretum  
Humano, assimilemque tui. Patuere repostae  
Interiora domus, lectisque sedilibus omnes  
Sedimus, et medios magnum circumstetit agmen.  
Quos ego conspiciens: Nostis quae injuria quondam  
Judaeos alienigenae<sup>100</sup> conjungier: at me  
Mutato Omnipotens monuit procedere cursu  
Tempora; lustratis nullum fas dicere terris  
Amplius impurum, atque Dei mandata sequemur.  
Hic subito ductor signis praesentibus actus:  
Adsumus ecce tibi, dixit, quaecumque jubebis.  
Atque ego: Nunc video, quod magno a munere nullos  
Eximit Omnipotens. Quisquis fas jusque tuetur,  
Acceptus fiet. Tunc prima ab origine rerum  
Incipiens, Solyma in magna Spirabile numen  
Narrabam emissum: Judaeam effusa per oram  
Nuncia: Caelicolûm portas reserasse nitentes  
Christum, perque illum magnos cecinisse prophetas  
Concedi veniam oranti, quicumque fatetur  
Divinum nomen. Tali sermone loquebar  
Plurima, jamque illi linguis animisque favebant;  
Ecce autem summo dilabitur aethere sanctus  
Spiritus, et supra quotquot mysteria verbi



Audierunt, veniens, sacro astilit igne: stupebant  
Omnes. Ipse videns non inferiora secutas  
Gentes promissae dignari munere lucis,  
Quid prohibet, dixi, sacris perfundere lymphis  
Ilos etiam, summa quos Spiritus almus ab aethra  
Signatos sancti septis transcripsit ovilis?  
Vivaces latices, certae argumenta salutis  
Accipiunt, Christique sacro dant nomen ovili.

Inde pedem referens judaea per oppida sparsos  
Arcessi fratres jubeo. Convenimus omnes  
Attoniti Solymam, et cunctis miracula narro,  
Lintea passa polo, vocum mirabile signum,  
Et verum arcana latitans velaminis umbra.  
Te, Christi magna omniparens Ecclesia <sup>10</sup>, poscit  
Visio, quae totum regina incedis in orbem.  
Lintea te monstrant: ceu nullae lintea blattae  
Corrumpunt, virtute nova incorrupta virescis,  
Et nullam praefers praestanti in corpore labem.  
Ter sonuit caelo vox aurea, terque patentem  
Fimbria contingit terram; namque omnipotenti  
Nomine Patrisque et Nati et Spiraminis almi,  
Christiadae sancto nascuntur fonte salutis.  
Denique fatidicum sese per quatuor oras  
Explicuit tegmen: vasti nam quatuor orbis  
Partibus accurrunt divina voce vocati,  
Excipietque omnes populos Ecclesia, pascens  
Sacralis epulis, et caelica templa recludens.  
Quot saevos partus! quae lurida monstra ferarum  
Intueor sensim placida mansuescere voce!  
Barbaricae accedunt magna ad mysteria gentes,  
Quae tamen innocuam gaudentes tangere sedem,

Duritiem odere antiquam, moresque pudicos  
Accipient; divina fides caelestibus alis  
Proteget, ut priscae fugiant contagia vitae.  
Ipse recordabar Domini caelestia verba:  
Joannes perlustrat aqua; vos, Numinis aura  
Aspirante, sacro populos lustrabitis amne.  
Quod si non impar caelesti contigit ora  
Gratia, si verbum Christi acceperere fidemque,  
Num quimus prohibere Deum? Dum talia fabar,  
Laudavere omnes Dominum, gratesque ferentes,  
Promissam humano generi venisse salutem  
Agnôrunt: terris magno pro funere Christo  
Imperium sine fine datum, pretiumque cruoris  
Divini immensum: cunctos discrimine nullo  
Judaei externive fuant, stygio hoste redemptos.  
Ex illo fidei patuerunt ostia caecis  
Gentibus; hac allata tenus bona nuncia solis  
Judaeis <sup>102</sup>, populo tenebrosa in nocte sedenti  
Attulimus: reserata patet supera omnibus aula.

Ast ego, quandoquidem caelo constare sereno  
Cunela videbantur, dispersa tot agmina Christi,  
Quae fratres passim eum statuere per orbem,  
Digessi in numerum, neu quae discordia foedus  
Rumperet, ex uno pendentia cardine firmo.  
Romanus victor, cunctis Orientis in oris,  
Urbem selegit peramoenum propter Orontem,  
Imperii sedem. Qua praefectura Quiritum  
Antiochena stetit, magna dilione regebat  
Victos Romulida coos, sociataque jura  
Agnôrant populi. Mos idem ad sacra regunda <sup>103</sup>.  
Hic ubi bellipolens Syriam Antiochia per omnem

Florebat, romana suis provincia virgis  
Tota Palaestina, et Solyme subjecta Quirino  
Parebat, sacrae posui monumenta calhedrae <sup>104</sup>;  
Atque volente Deo, et rebus dictantibus urbem  
Connubio junctam stabili propriamque dicavi,  
Unde plagam regere eoam, cunctisque liceret  
Invigilare choris. Inerat fiducia porro,  
Si validas arces, et propugnacula foedae  
Nequitiae expugnare datum, Syriaeque potiri  
Augustam dominam, si victor in urbe locassem  
Magna trophaea Crucem, cunctis Orientis ab oris  
Victa superstilio fugeret, neque tempore longo  
Tigris et Euphrates indignarentur iniqua  
Imperia, et nostro fluerent sub jure volentes.

Nec spes conceptum votum frustrata fefellit.  
Quae doctis caeci spoliis orientis onusta  
Omnigeni cultus fallaci luce nitebat,  
Christiadum studio ante alias caput extulit urbes.  
Ipse tuum grato memorabo carmine nomen,  
O Theophile <sup>105</sup>; Deo atque mihi domus inclyta surgit  
Quae quondam tua, Christiadum qua sacra locata,  
Pontificis summi solio dignata verendo.  
E Juda <sup>106</sup> collecta prius Ecclesia, cunctis  
Terrarum populis tentoria vasta recludit:  
Magnaue caelesti subrisit vinea fructu.  
Vinea Saronis, Engaddi vinea cedunt,  
Antiochia, tibi! quantis ornata racemis  
Splendescis! quanto ditescunt palmitum colles!  
Barnabbas serit et Paulus: sata pingua curant,  
Ipsorum nutu, fusco Niger ore vocatus  
Simon, et cyrenensi prognatus arena

Lucius, et Manahen <sup>107</sup> mammis nutritus iisdem,  
Quae magna Heroden aluere e gente Tetrarcham;  
Qui modo falsiloquas obliviscuntur Athenas,  
Et sanctum melius venerari Golgotha discunt.

Quae virtus et quanta, boni, resplenduit ipsis  
Principiis rerum! Quo circumfusa reluxit  
Lumine Relligio damnatis desuper umbris!  
Hic primum ( quoties recolo, mea lumina laetis  
Rorant lacrymulis ) omen credentibus ingens  
Natum Christiadum nomen <sup>108</sup>, quod magnus Isai  
Praedixit Natus: *Magnoque vocabitur ipse  
Nomine, quod Dominus summa super innuit aethra:  
Sanctus erit populus, caelesti nomine notus.*

Quis se discipulum Pauli, quis dicere Cephae <sup>109</sup>  
Amplius audebit? communi nomine dicti  
Christiadae, Christi vocem quicumque sequuntur.

Salve augusta, ingens sedes, et maxima, quotquot  
Vidit prima aetas eoa surgere in ora.

Te sacro statui potiore jure, tibi que  
Concessi cunctas alias parere minores.

Non quod prima manu jeci sacra semina verbi,  
( Discipuli Solymae fugientes moenia primam  
Attulerant lucem ): nec quod fundamina prima  
Ipse Petrus statui: ( quis sedes dicere quibit,  
Quas primus toto fundavi Pastor in orbe ? )

Nec quod praesentis dignata es semper honore  
Pontificis: ( Mihi nam totus superincubat orbis,  
Et munus cunctas sedes invisere, cunctas  
Hortari sollemne fuit, dum bella moverent  
Judaei et gentes ). Tu prima et maxima sedes,  
Quod te prae cunctis Deus hoc signavit honore.

Hunc sequor: ipse regit vestigia nostra, novumque  
Aedificare statum rerum, te principe, gaudet.

---

<sup>1</sup> *Phoebigenae*. — Aesculapius versu dicere non est latine, nec graece *Asclepias*. Filius fuit, uti fabulantur poetae, Apollinis et Coronidis. Medicinam artem vel laude vel opere ampliavit, et ob eam rem in Deorum numerum receptus. Duo ejus Filii Podalyrius, et Machaon, bello trojano Agamemnonem secuti sunt.

<sup>2</sup> *Epidauro*. — Epidaurus, vel Epidaurum urbs est Peloponnesi in ora Argiae ad Or. apud Spiraeum promont. et sinum Saronicum, hodie *Pigia-da*, aut *Cheronis* ubi amplum Aesculapii templum fuit.

<sup>3</sup> *Romani Proceres*. — Liv. Joh. Freinsheimii suppl. LIV, XII. Decem legati missi sunt, qui Aesculapium ab Epidauro, qua in urbe natus credebatur, Romam arcesserent.

<sup>4</sup> *Thrasymede*. — Liv. ibid. XIII. Huc adducti, dum ingentis molis simulacrum, Thrasymedis Parii nobili ingenio fabrefactum admirantur, ingens repente serpens ex ipsis adytis prolapsus, animos omnium horrore summo, et terrore perfudit. Sacerdotes enim venerabundi ipsum in hoc angue numen esse, et nonnunquam hac forma adspici salutari semper ostento clamatant.

<sup>5</sup> *Suffimen*. — Liv. ib. Ad spectaculum incredibilis rei tota effusa civitate, passim in ripa fluminis, quo subvehabatur, positae arae sunt, accensique odores, et victimae caesae.

<sup>6</sup> *Donaria*. — Liv. ib. Relicta nave serpens, eam insulam, quae post Aesculapii vocata est, natatu petens, cerni ulterius ab hominibus desiit. . . Templum mox, insignibus donariis, et hominum qui remedii salutaribus, ab eo numine se adjutos ferebant, praedicatione nobilitatum est.

<sup>7</sup> *Hoc templum, has aedes*. — Svet. Tib. Claudius, XXV. Cum quidam negra, et affecta mancipia in insulam Aesculapii taedio medendi exponerent, omnes qui exponerentur, liberos esse sanxit, nec redire in ditionem dominorum si convaluissent: quod si quis necare quem mallet, quam exponere, caedis minime teneri.

<sup>8</sup> *Mancipium*. — Romanorum civium erat vivere et frui. Servi, quos exercitum potius, quam privati hominis familiam dixeris, commodo et utilitati dominorum unice studebant, variisque ministeriis erant mancipati, et saepe invenies *actores*, *anagnostas*, *atrienses*, *cellarios*, *cubicarios*, *librarios*, *notarios*, *villicos* ab diversorum munerum perfunctione.

<sup>9</sup> *Senio justos*. — Sap. IV, 8. Senectus enim venerabilis. Eccl. VIII, 7. Ne spernas hominem in senectute sua. De servis autem habes apud Eccles. VII, 22. Non laedas servum tuum in veritate operantem, neque mercenarium dantem animam suam. 23. Servus sensatus sit tibi dilectus, quasi anima tua, non defraudes illum libertatem, neque inopem derelinquas illum.

<sup>10</sup> *Noctis*. — Quod Isaïas desiderabat, *Anima mea desideravit te de*

*nocte* ; quodque Plasmorum auctor confirmabat : *Media nocte surgebam ad confitendum tibi super judicia justitiae tuae*, Apostolorum traditio et exemplum instituit. Sic de Paulo dixit Lucas, Act. : Media autem nocte Paulus et Silas orantes laudabant Deum, et audiebant, qui in custodia erant. Hinc tribus nocturnis horis tres illae preces, nimirum ipso noctis exordio, media nocte et in fine recitatae, et a Patribus dictae *lucernariae preces*.

<sup>11</sup> *Animae*. — Matth. XXVI, 41. Spiritus quidem promptus est, caro autem infirma.

<sup>12</sup> *Qui in Domino fides*. — Ps. CXXIV. 1. Qui confidit in Domino, sicut mons Sion.

<sup>13</sup> *Et matutino*. — Sic Regius Psalter : Prae venerunt oculi mei diluculum, ut meditarer eloquia tua. Unde matutinae laudes quae nocturnis accesserunt. Sic Ignatius ad Magnes : Ad orandum in idem loci convenite : sit una communis precatio, una mens, una spes.

<sup>14</sup> *Sol*. — Joan. I, 5. Quoniam Deus lux est, et tenebrae in eo non sunt ullae. Cum enim, peccati culpa, humano generi sempiternae noctis offusa esset caligo, ut nova luce cuncta clarescerent, misit Deus ex se genitum, suaeque substantiae filium, nempe *candorem lucis aeternae* (Sap. 7.) *lumen de lumine, lucem veram* (Joan. 1.), *justitiae solem* (Apoc. 1.), ut novum illum institueret diem, de quo dictum fuit : *Haec dies, quam fecit Dominus*. Psal. CXVII.

<sup>15</sup> *Semen*. — Luc. VIII, 11. Semen est verbum Dei.

<sup>16</sup> *Caecigeni*. — Matth. Ev. XIII, 15. Incrassatum est enim cor populi hujus, et auribus graviter audierunt, et oculos suos clausurunt, ne quando videant oculis, et auribus audiant, et corde intelligant, et convertantur, et sanentur eos. Joan. Ev. III, 19. Lux venit in mundum, et dilexerunt homines magis tenebras, quam lucem.

<sup>17</sup> *Insanum*. — Sic de Apost. Lucas, Act. Apost. V, 41. Et illi quidem ibant gaudentes a conspectu concilii, quoniam digni habiti sunt pro nomine Jesu contumeliam pati. Et Paul. I, Corinth. I : Verbum enim crucis pereuntibus stultitia est. Ib. IV, 10 : Nos stulti propter Christum.

<sup>18</sup> *Bona nuncia linguis*. — Utrum graece an latine Marcus suum Evangelium scripserit, dubitant eruditi. Nos sequimur libentissime sententiam Baronii, qui latina oratione potius concinnasse ex eo existimat, quod ipse Romae scripsit ex Petri praedicatione : cumque vero Aquileiae moraretur, illuc missus a Petro, ad eam erigendam Ecclesiam, in graecum ipsemet transiit. De Matthaeo apertissime testatur Irenaeus, lib. III, c. 1. Matthaeus Hebraeis ipsorum lingua scripturam edidit Evangelii, cum Petrus et Paulus Romae evangelizarent, et fundarent Ecclesiam. Sanctus Hieronymus ex Hebraico fonte se excipisse testatur. Lucas, perpetuus Pauli peregrinantis comes Evangelium suum graecanica lingua conscripsit, neque alia profecto Joannes, filius Zebedaei et Salomes, Jacobi majoris frater a Graecis

cognomento Theologus, qui, ut ait Hierony. coactus est ab omnibus pene tunc Asiae Episcopis et multarum Ecclesiarum legationibus de divinitate Salvatoris altius scribere.

<sup>19</sup> *Luca excipe.* — In sua ad Evangelium praefatione Lucas ipse proficitur, *ordinare narrationem, quae in nobis completæ sunt, rerum, sicut tradiderunt nobis qui ab initio ipsi viderunt, et ministri fuerunt sermonis.* Hinc antiqui rerum sacrarum tractatores illum non Dominum, sed Apostolorum fuisse discipulum dicunt. Et praecipue Irenaeus 1, 20: *Lucas sectator et discipulus Apostolorum.* Quae cum vera sint suo ejusmet testimonio, nemo profecto a sincero poeticae fictionis ingenio abhorrere autumabit, quod hic excogitavit vates, Petri consilio et auctoritate factum esse, ut Acta Apostolorum Petri et Pauli sive Ecclesiae historiam describeret.

<sup>20</sup> *Ecclesia.* — *Synagogae et Ecclesiae* vocabula idem sonant ac coetum sive congregationem. Verum illud Hebraeorum, hoc Christianae addicitur societati, licet Christianorum congregationem *Ecclesiam* in veteri novoque Testamento saepissime dictam invenias. Nos Synagogae vocabulum carminis epici ingenio neutiquam accomodatum libentissime omittimus; et Ecclesiae nomine societatem agnoscimus, quae Christi fide, et vocatione cohaeret.

<sup>21</sup> *Stirps incluta.* — Ecclesia, altera Christum antecessit, altera subsequuta est. Illa quidem ab ipsius mundi exordio in Adamo primum et Eva fuit, post lapsum, ex fide in Christum venturum justificatis. Exinde fideles omnes eundem fidei spiritum habentes, unius omnes Ecclesiae membra censentur. Mundo adhuc recente, unius Dei Creatoris memoria mortalibus animis inhaerebat: sed paullatim vivida illa Dei recordatio a patribus ad filios ore tradita obliterari coepit, simulque idolorum cultus tanta insanientes homines superstitione inquinavit, ut pauci ex Heberis familia unius Dei veritatem servarint. In Ur Chaldaeorum Abraham ex eo genere satus erat in media gentilitate, ut facile ad idola se vertere posset. Sed Deus, ne qua contagione tum ille, cum populus ex eo nasciturus pollueretur, eum jussit de terra et cognatione exire, atque in Mesopotamiam proficisci, inde postea in terram Chanaan transducendum.

<sup>22</sup> *Quid utile, quid non.* — In pravis erroribus consepulti omnes orbis terrarum populi praeter Hebraeum a veritate decurrerunt, inde *hospites testamentorum* vocat Paulus: unum foederatum populum Deus habuit, unde Psalmographus: *Notus in Judaea Deus.* Ubi plenitudo temporum advenit, et umbræ imago successit, in proclivi erat, ut Hebraeorum Respublica, quae veluti praeludium erat Ecclesiae, dissolveretur. Sed bismillesimo a priore foedere anno, maximum illud vocationis gentium opus perfectum est; tunc voci propheticae: *Notus in Judaea Deus,* occinebat Apostolus: Numquid Judaeorum tantum Deus? nonne et Gentium? immo et gentium. Ubi igitur sanguine suo sanctissimo Christus perillustre foedus cum Ecclesia sanxisset, eum omni-



bus januam illam patefactam, quae unis Hebraeis adhuc usque, exclusis gentibus, patuerat.

<sup>22</sup> *Renovata locavit.* — Paul. ad Ephes. II, 14. Ipse enim est pax nostra, qui fecit utraque unum, et medium parietem maceriae solvens, inimicitias in carne sua. 15. Legem mandatorum decretis evacuans, ut duos condat in semetipso in unum novum hominem, faciens pacem. 16. Et reconciliavit ambos in uno corpore Deo per crucem, interficiens inimicitias in semetipso. Et IV, 13. Donec occurramus omnes in unitatem fidei et agnitionem filii Dei. Et ad Corinth. XII, 13. Etenim in uno spiritu omnes nos in unum corpus baptizati sumus.

<sup>24</sup> *Nati sumus.* — Paul. ad Eph. II, 10. Ipsius enim sumus factura, creati in Christo Jesu, in operibus bonis, quae praeparavit Deus. Joan. I. Epist. III, 18. Videte qualem caritatem dedit nobis pater, ut filii Dei nominemur et simus.

<sup>25</sup> *Caeloque frui* — Paul. Corinth. I, 30. In Jesu Christo qui factus est nobis sapientia a Deo, et justitia, et sanctificatio, et redemptio. Et XIII, 12. Videmus nunc per speculum in aenigmate: tunc autem facie ad faciem. Matth. III, 12. Merces vestra copiosa est in caelis. Et XVIII, 10. In caelis semper vident faciem Patris mei, qui in caelis est. Luc. XII, 33. Thesaurum non deficientem in caelis; XIX, 38. Pax in caelo et gloria. Paul. ad Hebr. XIII, 16. Non enim habemus hic manentem civitatem, sed futuram inquirimus.

<sup>26</sup> *Una fides.* — En ipsa Ecclesiae Bellarminiana definitio: *Coetus hominum ejusdem christianae fidei professione, et eorumdem sacramentorum communione colligatus sub regimine legitimorum pastorum, et praecipue romani Pontificis.* Paul. ad Ephes. IV, 3. Unus Dominus, una fides, unum baptisma. Sed Christus Ecclesiae unitatem lueulentissime patefecit. Joan. X, 16. Et alias oves habeo, quae non sunt ex hoc ovili; et illas oportet me adducere, et vocem meam audient, et fiet unum ovile, et unus pastor. Quin ipse nihil enixius a Patre postulasse videtur, quam Ecclesiae unitatem: Joan. XVII, 11: Pater sanete, serva eos, quos dedisti mihi, ut sint unum sicut et nos.

<sup>27</sup> *Cedron.* — Secus Olivetum torrens, de quo saepissime in divinis scripturis occurrit mentio.

<sup>28</sup> *Galilaei.* — Duae erant Galilaeae in Palaestina, altera confinis Judaeae, altera Phoenicibus contermina, quas Josephus nominat superiorem et inferiorem. Superior posita in tribu Nephtalim Galilaea gentium dicta fuit; inferior in tribu Zabulon circa Tiberiadem et stagnum Genesareth, in qua habitavit Christus Dominus: hinc *Galilaeus* ipse, et discipuli *Galilaei* fuerunt appellati.

<sup>29</sup> *Jonas.* — Ex Oliveto Apostoli regressi coenaeulum ascenderunt; quae autem fuerit Domus, etsi nominatim a Luca non indieetur, facile illa creditur, quam inferius, Aet. XII, innuit, Mariae Matris Joannis qui cognominabatur Marcus, quo Petrus etiam vinculis liberatus accessit, discipulosque in precum officio congregatos invenit. Praestat audire acta Barnabae, quibus

hujus Domus gloriae praedicantur : In illo coenaculo Dominus Pascha fecit ; in illo apparuit Thomae Apostolo , cum a mortuis surrexisset ; illic , postquam in caelum assumptus est , discipuli cum reliquis fratribus centum viginti , in quibus erat Barnabas et Marcus , ex monte Olivarum pervenerunt ; illic Spiritus Sanctus in linguis igneis ad discipulos descendit in die Pentecostes ; illic collocata nunc est magna et sanctissima Sion , omnium Ecclesiarum maxima.

<sup>30</sup> *Fundamenta futuri.* — Paul. ad Ephes. II, 3. Estis cives sanctorum et domestici Dei , superaedificati super fundamentum Apostolorum , et prophetarum , ipso summo angulari lapide Christo Jesu.

<sup>31</sup> *Paneada.* — Philippus Tetrarcha , ut gratiam Caesaris Augusti sibi conciliaret , Paneada urbem sitam ad Jordanis fontem auctam aedificiis Caesarem dici voluit.

<sup>32</sup> *Tum vero Jesus.* — Petro Christi divinitatem confitenti sic dixit Dominus , Matth. XVI, 18. Tu es Petrus , et super hanc petram aedificabo Ecclesiam meam , Et tibi dabo claves regni caelorum , et quodcumque ligaveris super terram , erit ligatum et in caelis , et quodcumque solveris super terram , erit solutum et in caelis. Ex quo Petrus dicitur *petra* sive fundamentum , cui superstructa est Ecclesia , et *claves* illi promissae sunt symbolum domini , universam in ecclesia praefecturam et principatum Petri luculentissime colliges.

<sup>33</sup> *Simon e sanguine Jonae.* — Obligatam Petro fidem de ejus supra ceteros Apostolos principatu liberavit Christus , Joan. XXI, 15. Cum autem prandissent , dicit Simoni Petro Jesus : Simon Joannis , diligis me plus his ? Dicit ei : Etiam Domine , tu scis , quia amo te. Dicit ei : Pasce agnos meos. Dicit ei iterum : Simon Joannis , diligis me ? Ait illi : Etiam Domine , tu scis , quia amo te. Dicit ei : Pasce agnos meos. Dicit ei tertio : Simon Joannis , amas me ? Contristatus est Petrus , quia dixit ei tertio , Amas me ? et dixit ei : Domine tu omnia nosti , tu scis , quia amo te : Pasce oves meas. Ex quibus verbis , *Pasce agnos meos , pasce oves meas* , pastorale regimen Petro datum habes , in agnos , sive fideles , quos Christus ei commisit , et in oves , sive Pastores , per quos Christo filii gignuntur.

<sup>34</sup> *Procurare Deum.* — Clarissime haec omnia Paulus I, 27. Quae stulta sunt mundi , elegit Deus , ut confundat sapientes , et infirma mundi elegit Deus , ut confundat fortia ; et ignobilia mundi et contemptibilia elegit Deus , et ea quae non sunt , ut ea , quae sunt , destrueret , ut non gloriaretur omnis caro in conspectu ejus.

<sup>35</sup> *E saxo Abramidas* — Matth. III, 9. Dico enim vobis , quoniam potens est Deus de lapidibus istis suscitare filios Abrahae.

<sup>36</sup> *Alter suscipiat* — Act. Apost. I, 20. Scriptum est in libro Psalmorum (LXVIII, 26) : Fiat commemoratio eorum deserta , et non sit qui inhabitet in ea : (Ps. CVIII, 8) Et episcopatum ejus accipiat alter.

<sup>37</sup> *Mathian.* — Quod Petro dixerat Dominus: *Et tu aliquando conversus confirma fratres tuos*, apertissime patuit in electione Matthiae. Princeps enim Apostolorum, pastoralis sollicitudine Ecclesiae, Judae proditoris exitio afflictæ consuluit, et primus habuit concionem de aliquo ex discipulis in ejus locum subrogando. Iste Joseph qui et Barsabas et Justus cognominatus, et Matthias ambo erant e numero septuaginta duorum discipulorum. Erant alii duo Josephi, alter cognominatus Barnabas de quo inferius, alter vero Judas, quem una cum Sila Apostoli miserunt Antiochiam. Hi tres vel nomine, vel cognomine, vel rebus gestis distinguuntur.

<sup>38</sup> *Dedimus sortes* — De sortibus hic loquitur Lucas, quas super duos discipulos dederunt apostoli: Hierony. de Ecc. Hier. par. III, 5. Videtur mihi Scripturam sortem appellasse divini quiddam et praecipui muneris, per quod illi choro sacratissimo insinaretur, qui esset divina electione declaratus. Quomodocumque tamen se res habet, animadvertendum est cum Baronio, eam licentiam nonnisi ante adventum Spiritus Sancti apostolos usurpasse: nec id tentasse nisi praevia precatione.

<sup>39</sup> *Conspiciam.* — Hanc Ecclesiae claritatem jamdudum Isaias vaticinatus erat. II, 2. Erit in novissimis diebus praeparatus mons Domus Domini in vertice montium, et elevabitur super colles, et fluent ad eum omnes gentes, et ibunt populi multi, et dicent: Venite et ascendamus montem Domini. Unde Augustinus: Ecce mons implens universam faciem terrae, ecce civitas de qua dictum est, non potest civitas abscondi supra montem posita.

<sup>40</sup> *Intus corde latet* — Psal. VII, 16. Omnis gloria ejus filiae regis ab intus.

<sup>41</sup> *Facies animae.* — Cum Ecclesia dicta fuit, quasi *evocatio*, sive quod omnes ad se vocet, sive quod quicumque ad eam conveniunt, hi non meritis, et justitia sua, sed Dei gratia et vocatione conveniunt, eam Ecclesiae Christianae animam dicimus, quae ex gratia sanctificante, fide, spe et caritate constat.

<sup>42</sup> *Piscantes* — Matth. IV, 19. Ait illis (Petro et Andreae): venite post me, et faciam vos fieri pisces hominum.

<sup>43</sup> *Agnos* — Matth. XXVI, 36. Tunc discipuli, omnes relicto eo, fugerunt. De mulieribus a monumento redeuntibus Marcus XVI, 8. At illae exeuntes fugerunt de monumento; invaserat enim eas tremor et pavor: et nemini quidquam dixerunt: timebant enim. Et de discipulis ipsis ita Marcus 14. Novissime recumbentibus illis undecim apparuit; et exprobravit incredulitatem eorum et duritiem cordis, quia iis, qui viderant eum resurrexisse, non crediderunt.

<sup>44</sup> *Judae.* — Electus a Deo populus *hebraei* nomen accepit ab Abrahamo, qui trans Euphratem habitabat, Deique jussu amnem transmiserat, ut in Chanaanitide consisteret. Hiuc *Hebraeus* idest *transitor* dictus fuit, quod nomen (uti apud nos *transalpini*, *transpadani* dicuntur, qui ex transalpi-

nis sive transpadanis regionibus adventunt) filiis posterisque suis est propagatum. Dictus etiam fuit *isrl̄iticus*, ab Isrl̄ele scilicet, altero Jacobi nomine, qui duodecim filios totidem tribuum patriarchas suscepit. Demum ultimis temporibus Judaeus appellatus a tribu Juda, quae tantummodo florens atque integra e deportatione rediit, cui ceterarum tribuum laciniae postea fuerunt immistae.

<sup>45</sup> *Oraque centum.* — Censet Joan. Chrysostomus tot linguarum locutiones Apostolis caelitus fuisse impartitas, quot erant nationes externae Hierosolymis commorantes. Juxta vero graviorum interpretum testimonium, istud donum linguarum non ita accipiendum, ut una sua quique lingua loquerentur Apostoli, omnesque licet diversarum nationum audientes intelligerent, sed propriis audientium linguis, scilicet externis, loquerentur.

<sup>46</sup> *Nom̄e Galilaea.* — Quod Galilaei diversa a Judaeis uti lingua consueverint, ex ancilla ostiaria apparet, quae Petro in praetorio commoranti dixit: *Galilaeus es, nam et loquela tua manifestum te facit.*

<sup>47</sup> *Diversa loquentes.* — Judaei ex omni natione quae sub caelo est, audiebant. Judaei enim tunc temporis non in Palaestina solum, sed in Asia, Africa et Europa magno numero habitabant. Ex his quindecim nationes enumerat Sanctus Scriptor.

<sup>48</sup> *Solus.* — Habe Petrum primum omnium concionantem, solemne aliud sui principatus testimonium.

<sup>49</sup> *Nazara* — Nazareth, ut inquit Hieronymus, est viculus in Galilaea juxta montem Thabor, unde et Dominus noster Jesus Christus Nazarenus vocatus est, habetque Ecclesiam in loco quo Angelus ad beatam Mariam evangelizaturus intravit, et aliam ubi Dominus est nutritus. A Jesu, quem et Angelus apud Marcum, et Apostoli honoris causa Nazarenum vocant, ipso nascentis Ecclesiae principio, omnes Christiani nazaraei dicebantur, et ipsa eorum religio *Secta Nazaracorum*. Act. XXIV. Judaei accusabant Paulum, velut *auctorem seditionis sectae Nazaraeorum*.

<sup>50</sup> *Ovile.* — Saepissime hac similitudine utimur ad Ecclesiam significandam, siquidem nulla alia usitatio in Scripturis, praecipue apud Joannem X, 1. Qui non intrat per ostium in ovile. 16. Quae non sunt ex hoc ovili . . . Fiet unum ovile et unus pastor.

<sup>51</sup> *Speciosae.* — Prae ceteris templi portis duae pulcherrimae habebantur, altera dicta Major, altera Corinthia: illa, ut ait Josephus de bell. Jud. lib. VI, quod crassiori argento atque auro vestiebatur; haec quod aere corinthio fabrefacta, multum argento inclusas et auratas honore superabat. Cum vero porta major proprio nomine vocaretur, corinthia illa quod pulchritudine ceteris praestaret, dicta fuit *speciosa*.

<sup>52</sup> *Porticibus.* — Porticus Salomonis locus fuit extra templum, ut pateret Gentilibus, quamvis eo ambitu universa templi constructio clauderetur.

Exemplo Domini Redemptoris, ait Baronius, qui cum Hierosolymis esset, docebat in templo, Apostoli illic doctrinae cathedram erexerunt. Ad quam aludit Tert. cum ait: Quid ergo Athenis, et Hierosolymis? quid academiae et Ecclesiae? quid haereticis et christianis? nostra institutio de porticu Salomonis est (de Praescript.).

<sup>53</sup> *Et Jacob coluere.* — Cum gente hebraea, et in primis cum ejus conditore Abrahamo Deus primum icit foedus. Non omnes tamen Abramidae Dei foederati fuerunt, sed ii tantum, qui ab Abrahamo per Isaacum, Jacobumque dimanarunt. Hinc quoties Hebraei Deum invocabant, Deum Abraham, Deum Isaac et Deum Jacob appellabant.

<sup>54</sup> *Testamentum ingens.* — Testamentum in Scripturis idem ac διαθήκη apud Hellenistas valet, quo pacta, sponsiones et foedera notantur. Duo extant *testamenta* sive foedera Dei cum hominibus: alterum cum Hebraeorum gente ejusque conditore Abramo percussum et cum Mose repetitum, alterum cum Christiano coetu, quem Dominus Noster Jesu Christus non modo ex Hebraismo, sed ex omnibus gentibus cœgit.

<sup>55</sup> *Carnis vitiosa libido.* — Quoniam Isrâeliticum foedus Christiani exemplar fuit, ubi christianum foedus Christi sanguine consignatum, Hebraeorum respublica in hujusmodi foederis expectationem consociata, re ipsa dissolvebatur. Sed Hebraeorum animis carnalibus ea insederat opinio venturum Messiam in splendore majestatis suae, ut debellaret armorum potentia nationes, terrenumque Isrâelis regnum restitueret, totoque orbe amplificaret. Obliviscebantur Messiae regnum non temporarium, sed caeleste futurum, uti praedixit Zaccharias IX, 9. Exulta satis, filia Sion: jubila, filia Jerusalem: Ecce Rex tuus veniet tibi justus, et salvator; ipse pauper, et ascendens super asinam, et super pullum filium asinae.

<sup>56</sup> *Synedrin.* — Synedris sive Synedrium magnum illud erat septuaginta duorum seniorum concilium, a Deo per Moysen constitutum, ut summa auctoritate de lege cognoscerent, de prophetis et de regibus judicarent. Eo tum, Lucae testimonio, Annas princeps Sacerdotum, et Caïphas, et Joannes et Alexander, et quot erant de genere sacerdotali, convenerunt.

<sup>57</sup> *Est lapsus.* — Quod Psalmo CXVII praedixerat David: Lapidem quem repronaverunt aedificantes, hic factus est in caput anguli.

<sup>58</sup> *Anne Deo.* — Act. apost. IV, 19. Si justum est in conspectu Dei vos potius audire quam Deum, judicate.

<sup>59</sup> *Consortia sacra.* — Quod in act. Apost. II, 42, ait Lucas: Erant autem perseverantes in doctrina Apostolorum, et communicatione fractionis panis, et orationibus, clarissime demonstrat, ab Apostolis esse loca assignata et officia, quaeque domi, quaeque in templo essent agenda. Ad verbi Dei praedicationem, et communem omnium precationem templum adibant. Quem ritum certis horis in templo orandi, quamvis e Judaeorum fontibus ab Apostolis in Ecce-

siam tractatum, et prima Ecclesia Hierosolymitana, et ceterae deinceps servarunt. *Consortia tecta* dixit Virgilius pro communibus, et nos *Consortia sacra* usurpavimus.

<sup>60</sup> *Infula crines.* — Quod Episcopalis dignitatis ornamentum laminam auream seu bracteam Jacobus in capite gestare consueverit, omnes pene Ecclesiastici scriptores antiqui testantur. Praecipue Epiphanius et de hac corona sacerdotali eloquitur, et rationem addit, haer. XIX. Largitus est autem sub se constitutis regnum, ut ne diceretur a parvis ad majora procedere. Manet enim thronus ipsius, et regni ejus non erit finis; et sedit super thronum David, ita ut regnum David una cum pontificatu transtulerit, ac largitus sit servis suis, hoc est Pontificibus Catholicae Ecclesiae. Jacob cognomento Justus et frater Domini dictus, sedit Hierosolymorum episcopus annos viginti novem. De quo *εμπατρις* Chrysostomus: Si quis a me percontaretur, quomodo Jacobus sedem Hierosolymorum accepit, responderem ego hunc totius orbis magistrum praeposuisse Petrum.

<sup>61</sup> *Cathedraeque insigne.* — De Jacobi cathedra haec scribit Eusebius, hist. lib. VII, 14. Jacobi Apostoli cathedram (qui primus erat ad Hierosolymitanam Ecclesiam Episcopatum a Salvatore et ceteris ejus Apostoli delectus, quemque fratrem Christi nuncupatum divina perhibent eloquia) ad illud tempus servatam, Apostoli qui illic ordine successerunt, permagni aestimant.

<sup>62</sup> *In commune ferunt.* — En primae Christianae vitae exemplar! Omnes etiam qui credebant, addit Lucas, erant pariter, et habebant omnia communia. Possessiones et substantias vendebant, et dividebant illa omnibus, prout cuique opus erat.

<sup>63</sup> *Barnabbum.* — Quamvis Agiographi Barnaban scribant, nos metrologiae ratione in hanc sententiam venimus, ut Barnabban diceremus. Habemus aliud exemplum in voce Barabbae; quod facillime usuvenit in omnibus vocabulis quae fiunt in *Abba*, Pater.

<sup>64</sup> *Incideram.* — Non per Petrum tantum, sed per ceteros Apostolos etiam signa et prodigia fiebant, ut ipse testatur Lucas. At Petri in miraculis praerogativam solertissimus indicat Scriptor, cumque a Christo primatu inter omnes Apostolos esset auctus, praeclara quaedam, atque insigniora ab eo fieri Deus concessit. In judiciaria vero potestate, qua Petrus de crimine Ananiae, et Zaphirae inquit, Deus autem poenam infligit, vides aliud pontificii primatus exemplum. Belle Hieronymus, de Apostol. Petro: Dei iudicium prophetico spiritu annunciat, ut poena duorum hominum sit doctrina multorum.

<sup>65</sup> *Gamaliel.* — Baronius eum autumat christianum, qui consilio Apostolorum inter seniores se occultum tenuit, ut ea ratione melius Ecclesiae posset consulere. Quod adhaeserit Christianis, certissimum indicium est, cum apud Stephanum protomartyrem fuisse sepultum. Ille enim tum Stephani, tum Barnabae et Sauli fuerat magister.



<sup>66</sup> *Theodas*. — Narrat Josephus hunc praestigiatorem multitudini suasse, ut assumptis suis facultatibus sequerentur eum ad Jordanem flumen. prophetam enim se jactabat, pollicens scissurum se verbo Jordanem. Sed Fadus missis equitum turmis multos interemit ex quibus ipsum Theodam, cujus caput abscissum Hierosolimam reportarunt.

<sup>67</sup> *Judam*. — Judas Galilaeus fuit, qui occasione census a Quirino acti, indignum et contra patrias leges ratus alienigenis judaeos vectigal pendere, populum ad defectionem a Romanis sollicitavit. Hinc secta Galilaeorum, qui pro hebraeorum legum integritate pugnabant. De Juda ait Gamaliel: Ei ipse periit, et omnes, quotquot cossesserunt ei, dispersi sunt.

<sup>68</sup> *Divinum omnipotens*. — Act. Apost. V, 39. Si vero ex Deo est, non poteritis dissolvere illud, ne forte et Deo pugnare inveniamini.

<sup>69</sup> *Retia*. — Luc. V, 5. In verbo autem tuo laxabo rete.

<sup>70</sup> *Grajugenas*. — Nondum Gentilibus Christianae Ecclesiae ostium patuerat: idcirco hic de Hebraeis in graecis regionibus commorantibus est intelligendum. Quod Lacedaemones, nobiles Graeciae populi ab Abraham originem ducere gloriarentur, brevis illorum epistola ad Oniam Judaeorum pontificem testatur: in Jonia Graecorum provincia, quamplurimi habitabant Judaei, id quod Josephus Antiq. lib. XVI, c. 4. affirmat, et Antiochiae in Syria, et Ephesi in Asia, aliisque civitatibus erant municipes. Recte Baronius: Graeci dicebantur a Judaeis, qui in Graecia Hebraei agerent: Palaestinae vero indigenas, proprio nomine appellabant Hebraeos.

<sup>71</sup> *Mile ministerium*. — Videsis munus Diaconorum ex Act. II, 46. Quotidie quoque perdurantes unanimiter in templo, et frangentes circa domos panem sumebant cibum cum exultatione et simplicitate cordis. Hinc S. Leo de S. Laurentio: Non solum ministerio sacramentorum, sed etiam dispensatione ecclesiasticae substantiae praeminebat. *Diaconi* vox graecanica est, nec metrologiae latinae accomodata: hinc nos et *ministerium*, et *minister* quod latine significant, usurpamus.

<sup>72</sup> *Intrarat coctus*. — Josephus testatur Antiq. lib. XX, c. ultimo, Graecorum scientias et nationum linguas non licuisse publice tradi; sed collegia Judaeorum omnium regionum Jerusalem ut metropolis habebat. Ergo Stephanus signis et prodigiis quae patrabat quotidie, et Christi fidem fortiter nuntiando facile omnium sodalium et condiscipulorum in se impetum movit, et praecipue Sauli Tarsensis qui in Synagoga eorum qui e Cilicia erant, princeps erat.

<sup>73</sup> *Exempla parentum*. — Quod Judaei antiquos vates ingenti furore persecuti sint, Jeremias, XXX, affirmat: Devoravit gladius vester prophetas vestros, quasi leo vastator. Jure igitur Stephanus eos exprobravit: Quem prophetarum non sunt persecuti patres vestri? Et occiderunt eos, qui praenuntiabant de adventu Justi, cujus vos nunc proditores et homicidae fuistis. Ipsimet Judaei Jesum olim audiverunt inclamantem. Matt. XXIII, 38. Jerusa-

lem, quae occidis prophetas et lapidas eos qui ad te missi sunt, quoties volui congregare filios tuos, quemadmodum gallina congregat pullos suos sub alas, et noluisti? Ecce relinquetur vobis domus vestra deserta.

<sup>14</sup> *Cedar*. — De loco quo lapidatus est Stephanus, nihil quidquam dubitant eruditi, siquidem et porta qua urbs vergit ad Aquilonem dicta est *Porta S. Stephani*, quae antea porta Ephraïm, et ipse locus quo nex Stephani consummata, ne integro quidem stadio Hierosolymis distabat, quo Eudoxia Augusta nobilissimam Ecclesiam aedificavit.

<sup>15</sup> *Samaria*. — Samaritani etsi Judaeis erant infensi, et diversam religionem excolerent, non ejusmodi tamen erant, ut gentiles appellarentur; sed a Judaeis, accepta olim circumcisione et lege Judaeorum, nomine potius secernebantur. Cum vero dixit Dominus (Matt. X,): In viam gentium ne abieritis, et in civitates Samaritanorum ne intraveritis, sed potius ite ad oves quae perierunt Domus Israël, id eo pacto intelligendum est, ut prius illud Israëlitis impertirentur. Idcirco Philippi diaconi, qui prius omnium annuntiavit evangelium Samaritis, praedicationem sequentia signa adeo nova atque admiranda fuerunt Hierosolymis, ut Apostoli ad eos miserint Petrum et Joannem legatos. Act. X. Obstupuerunt, inquit Lucas, ex circumcisione fideles qui venerant cum Petro, quia et in nationes gratia Spiritus Sancti effusa est.

<sup>16</sup> *Simon*. — E vico quodam in provincia Samaria, cui nomen Gitton, fuit Simon. Qui de perpetrato scelere non modo non egit poenitentiam, sed recedentibus Samaria Apostolis eorum doctrinae coepit adversari, portentosa quaedam de se Judaeis persuadens. Sed de eo inferius. Hic potius adnotabimus, Petrum Apostolorum principem Samariam missum esse, ut primum heresiarcham damnaret. Divino quidem factum consilio, ut ipso Christianae Reipublicae exordio innotesceret, Petri ejusque successorum interesse, ut haereticos adversus catholicam fidem insurgentes eorumque haereses apostolica auctoritate proscriberent. Quod vero ex impositione manuum orta sit in Simone admiratio, observandum est, Philippum qui diaconus, baptizasse Samaritanos *in nomine Domini*. Sed Petrus et Joannes imponebant manus super illos, et accipiebant Spiritum Sanctum. Ex his verbis videre licet, per manus apostolicae institutionis exemplo impositionem, conferri Spiritum Sanctum, hancque facultatem, sicut olim Apostolis, sic hodie eorum successoribus Episcopis concessam. Quod vero post Baptismum fiebat manus impositio, hujusmodi mysterium aut *Sacramentum* antonomastice, aut *Sacramentum Confirmationis* nuncupatum: imo, quoniam non impositione manuum tantummodo, ac signaculo Crucis, sed et sacra unctione perfici solitum, usitato vocabulo *sacrum chrisma* vocari consuevit.

<sup>17</sup> *Mercarier auro*. — Sic Dantes noster Inf. XIX, 1.

O Simon mago, o miseri seguaci

Che le cose di Dio che di bontade



Denno esser sposc, e voi rapaci

Per oro e per argento adulterate.

Hinc italum *simoneggiare*, *far simonia* est res sacras vendere, vel emere.

<sup>78</sup> *Eunuchus*. — Non Gentilis, uti errasse videtur Eusebius, sed proselytus ex Gentibus ad Judaeorum religionem adductus Eunuchus iste habendus. Ad Paschalem enim celebritatem, sueto Hebraeorum more, convenerat. Ceterum Aethiopas circumcisionem ab Aegyptiis didicisse auctor est Herodotus, quem Josephus Judaeus lib. VIII, 4 citat. Constat veterum scriptorum testimonio foeminas in Aethiopia regnare consuevisse, easque Candaces esse appellatas. De Eunuchis sic scribit Dorotheus in Syn: Eunuchus Candacis Reginae Aethiopum in Arabia Felici, et in insula Taprobana, inque universa Erythra Evangelium Domini nostri Jesu Christi praedicavit. Ferunt et martyrium gloriose tulisse, ibique sepultum esse. Et coemeterium ipsius, munimentum insuperabile est fidelibus, barbaros scelestos fugans, morbos pellens, et sanationes operans usque ad praesentem diem.

<sup>79</sup> *Quis genus effari valeat*. — Locus scripturae, quem legebat Eunuchus, est apud Isaïan LIII, 7. Tanquam ovis ad occisionem ductus est, et sicut agnus coram tondente se, sine voce, sic non aperuit os suum. In humilitate iudicium ejus sublatum est. Generationem ejus quis enarrabit, quoniam tollitur de terra vita ejus?

<sup>80</sup> *Romula Tarsus*. — Act. XXI, 39. Tribunum alloquitur Paulus: Ego homo sum quidem Judaeus a Tarso Ciliciae non ignotae civitatis municipis. Tarsus enimvero Ciliciae metropolis jus municipale a Romanis fuerat consecuta, nempe ut coloni non modo cives romani dicerentur, sed munus romanorum participes esse possent. Eam cives meruerunt dignitatem, quod in bello civili Caesaris primum, deinde Octavii partibus studuissent, ita ut Tarsus ipsa mutato nomine Juliopolis fuisset appellata.

<sup>81</sup> *Parere recuses*. — Act. Apost. IX, 6. Durum est tibi contra stimulum recalcitrare.

<sup>82</sup> *Ananias*. — Dum Saulus totus erat in illis perquirendis, qui domesticis latebris se occultaverant, Ananias unus ex septuaginta duobus discipulis, Damascus profectus Evangelium promulgavit, adeoque magnam collegit Ecclesiam, ut rei fama Hierosolymis allata summum Synedrii pontificem, ut illuc Saulum mitteret, incitavit.

<sup>83</sup> *Judae*. — Act. Apost. IX, 11. Surge, et vade in vicum qui vocatur rectus, et quaere in domo Judae Saulum nomine Tarsensem.

<sup>84</sup> *Vastator*. — Hoc nomine designat Saulum. Act. VIII, 3. Lucas: Devastabat Ecclesiam per domos intrans et trahens viros ac mulieres, et tradebat in custodiam. Neque satis habuit Christianos qui erant Hierosolymis vexasse, sed a Principe Sacerdotum litteras accepit, ut foris etiam, si qui occurrerent, christianos persequeretur.

**At vas.** — Act. Apost. IX, 15. Vade, quoniam vas electionis est mihi iste, ut poriet nomen meum coram gentibus, et regibus et filiis Israhel.

**Paulus.** — Fuit haec Hieronymi sententia, nempe e Saulo Paulum fuisse nominatum, cum ad Christum conversus ab Anania Damasci fuit baptizatus. Hier. XXX. Ubi pluvia super eum lavacri caelestis influxit, necatur blasphemus, necatur persecutor, necatur et Saulus: vivificatur Apostolus, vivificatur justus, vivificatur et Paulus. Usque adeo autem perdidit veterem cum actibus hominem, ut cum moribus mutaret et nomen.

**Pace quierant.** — Lucam sequimur qui Act. IX, 31. praesentem Ecclesiae statum his verbis indicat: Ecclesia quidem per totam Judaeam et Galilaeam et Samariam habebat pacem. Qua tam opportuna tranquillitate usus Petrus, Hierosolymis egressus, regiones circumpositas obibat. Erat summi Pontificis officium universo gregi prospicere.

**Commixtus amore.** — Act. IX, 32. Ecclesia aedificabatur ambulans in timore Domini, et consolatione Sancti Spiritus replebatur.

**Discipuli.** — Siquis numerum colligere curabit, uti ex Act. Apost. fecit Baronius, ultra quindecim millia Christianorum in illa persecutione Stephani reperiet fuisse dispersa per diversas regiones. Nec tantum se Judaea aut Samaria tenuerunt, sed e Palaestinae finibus egressi. En. Lucas Act. XI, 19. Illi quidem qui dispersi fuerant a tribulatione, quae facta fuerat sub Stephano, perambulaverunt usque ad Phoenicem et Cyprum et Antiochiam.

**Lyddae.** — In hac provinciae lustratione Lucas ait quod Petrus *pertransiret universos*; praecipue Lyddam, Joppen, et Caesaream nominat, quo insigniora Supremus Pastor edidit miracula. Locupletissimis omnis antiquitatis testimoniis innixi pro certo habemus, hoc eodem tempore, quo in Palaestina et Syria surgentes invisebat Ecclesias, Antiochenam cathedram fundasse. Siquis ampliorem hujus argumenti tractationem desiderat, Annales adeat Baronii, qui A. Ch. 39, Caii Imp. 1, et traditione, et Conciliorum auctoritate, et sanctorum Patrum assertionem rata omnia et firma facit. Est Lydda civitas ad littus maris mediterranei sita, in ipso exordio Judaici belli ab Caestio incensa, quae postea restaurata appellata fuit Diospolis.

**Aeneas.** — Curationem paralytici sic narrat Lucas, Act. IX. Invenit autem ibi hominem quemdam nomine Aeneam, ab annis octo jacentem in grabato, qui erat paralyticus.

**Sarone.** — Sarona non est nomen oppidi, sed regionis Caesareae Palaestinae usque ad oppidum Joppe pertingentis: est enim *campestris locus pascendis gregibus aptus*.

**Joppe.** — Urbs Palaestinae maritima, in ora maris mediterranei, in edito saxo extructa, cum portu non infrequenti. Sunt qui antiquissimam omnium urbium orbis terrae credunt, et conditam ante diluvium. Hodie excisa est, et nomine *Jaffa* nihil extat nisi turris, et diversorium excipiendis peregrinis, qui ex Europa Hierosolymam tendunt.

<sup>94</sup> *Dorcas*. — Hanc sanctissimam christianam foeminam Lucas, Act. IX, 40. et *Thabitam*, et *Dorcada* appellat.

<sup>95</sup> *Italica*. — Petrus divino ductus numine primum omnium Gentilem hominem Cornelium baptizavit Centurionem cohortis italicae. Dubium non est, quin ipsa *italica* sit nominata, quod ejus nationis nempe *Itali* fuerint milites. Erant cohortium nomina, sicut et legionum. Dio lib. 59 ait Judaeam regionem ad hiberna fuisse traditam legioni, Ferratae vocabulo insignitae: quae legio ab Augusto ibi fuerat locata, et vix Neronis tempore amandata fuit in Armeniam. In una cohortium quae appellabatur Italica, ordinem ducebat Cornelius.

<sup>96</sup> *Cornelius*. — Habes mores Cornelii his verbis Lucae: Vir autem quidam erat in Caesarea nomine Cornelius, Centurio cohortis, quae dicitur Italica, religiosus et timens Deum cum omni domo sua, faciens eleemosynas multas plebi, et deprecans Deum semper.

<sup>97</sup> *Summam Domum*. — Antiquus Hebraeorum mos erat locis superioribus Deum precari. Sic in Troade, in superiore Donius parte, synaxin fecerat Paulus, et de tertio coenaculo auditor Eutychus adolescens proruit in praeceps.

<sup>98</sup> *Vaga lintea*. — Hoc anno, nempe Christi quadragesimo primo, celebris illa Gentium vocatio ad Ecclesiam facta est. Lucas uti rem maximi ponderis diligentiori studio in Act. X. persecutus est. Hujusmodi fuit Petri visio: Vidit caelum apertum, et descendens vas quoddam, velut linteum magnum, quatuor initis submitti de caelo in terram, in quo erant omnia quadrupedia, et serpentina terrae, et volatilia caeli.

<sup>99</sup> *Immunda*. — Praeceptum dedit Dominus de non vescendo immundis, Lev. XX. Separate et vos jumentum mundum ab immundo et avem mundam ab immunda. . . Eritis mihi sancti, quia sanctus sum ego dominus. et separavi vos a ceteris populis, ut essetis mei. Sed hac in visione immundae et ferae bestiae erant gentes omnes verum Deum ignorantes, quae turpibus imbutae moribus nec mansuescere, nec pie vivere poterant.

<sup>100</sup> *Alienigenae*. — Act. Apost. X, 28. Vos scitis, quomodo abominatum sit viro Judaeo conjungi, aut accedere ad alienigenam: sed mihi ostendit Deus, neminem communem aut immundum dicere hominem.

<sup>101</sup> *Ecclesia*. — Explicationem S. Augustini sequuti sumus de diver. ser. XXVI. Fortassis quaeratur etiam, quare linteum erat, in quo erant illa animalia? Non utique sine causa. Novimus enim quod linteum tinea non consumit quae vestes alias corrumpit. Excludat unusquisque de corde suo corruptiones malarum concupiscentiarum, atque ita incorruptibiliter firmetur in fide, ut pravis cogitationibus tanquam tineis non penetretur, si vult ad sacramentum illius lintei pertinere, quo figuratur Ecclesia. Quare ter de caelo submissum est? quia ipsae omnes gentes quae pertinent ad omnes partes omnis terrae, qua disseminatur Ecclesia, quam significabant quatuor lineae quibus vas

ille connectabatur, in nomine Trinitatis baptizantur; in nomine Patris et Filii et Spiritus Sancti credentes innovantur, ut pertineant ad societatem communionemque Sanctorum.

<sup>102</sup> *Judaeis.* — Clarissime in Act. Apost. XI, 19. Nemini loquentes verbum nisi solis Judaeis.

<sup>103</sup> *Sacra regunda.* — Sicut Petrus ad eos qui Samariae in Christum crediderunt, missus est, quod erat principe Apostolorum digna legatio, ita cum ex discipulis post necem Stephani dispersis non nulli venissent Antiochiam, multisque ad fidem conversis magnam Ecclesiam collegissent, omnium profecto Apostolorum sententia factum est, ut Petrus ipse Princeps Apostolorum principi in tota Syria civitati atque Metropoli, cui Hierosolyma ipsa et Palestina subjaceret, Episcopus praeficeretur. Porro in instituendis Ecclesiarum sedibus eam inierunt majores rationem, ut provinciarum divisionem et praerogativas a Romanis antea stabilitas sequerentur. Exemplum esto haud longe petitum ipsa sedes Antiochena. Sicut enim inter orientales praefecturas Syriae proconsulatus eminebat, ejusque provinciae metropolis erat Antiochia, prima omnium in Syria Antiochena cathedra et praestantior habebatur, prae ipsa Hierosolymorum Ecclesia, quae origine temporis et nobilitate rerum quae in ea fuerunt completae, ceteris orientalibus Ecclesiis fuisset anteferenda.

<sup>104</sup> *Cathedrae.* — Pro certissimo id ab Eusebio accepimus, Caesareae Episcopo, et sedi Antiochenae proximo; qui in Chron. Olympiade ducentesima tertia anno quarto, antequam Tiberius moreretur, Petrum Antiochenam ait fundasse Ecclesiam. Sunt haec ejus verba: Petrus Apostolus Antiochenam Ecclesiam fundavit, ibique cathedram adeptus fuit. Et idem *Cathedrae* nomen servat Ecclesia, quae die XXII Februarii ejus commemoratorem celebrat.

<sup>105</sup> *Theophile.* — Hoc Theophili nomen putarunt nonnulli non fuisse proprium alicujus viri, sed cognomen Christiani cujusdam, uti Ignatius dictus fuit Theophorus. Verum in lib. Recognitionum Clementis X, cap. ult. reperimus fuisse Theophilum nobilem civem Antiochenum, qui a Petro ad fidem adductus domum suam usui Christianorum mancipatam in Ecclesiam mutavit. Lucas ipse et patria Antiochenus ad Antiochenum civem, amicum suum de Dei Ecclesia optime meritum, et Evangelium et Acta Apostolorum mittit, illum honestissimo etiam exornans titulo *Optime Theophile*. Baronius censet *bonos viros candidatos*, magistratum adeptos *optimos* esse vocatos, unde *optimates*.

<sup>106</sup> *E Juda.* — Quamvis solis Judaeis etiam Antiochiae loquerentur Apostoli, sive eorum discipuli, nequis putet parvum esse numerum Judeorum in illa Syriae metropoli degentium. Josephus testatur ingentem fuisse multitudinem, eosdemque Judaeorum nobilissimos, quos Seleucus civitate donavit fecitque municipes: quae aeneis tabulis privilegia consignata Titus servari

voluit. Licet ergo ostium fidei gentibus nondum esset apertum, ex Judaeis Antiochenis nobilis potuit colligi Ecclesia cui Petrus ipse Apostolus praecesset. Quid vero, reserato semel gentibus aditu ad fidem? Act. XI, 21. Et erat manus Domini cum eis, multusque numerus credentium factus est ad Dominum.

<sup>107</sup> *Manahen.* — Quanta gloria floruerit Antiochena Ecclesia, audi ex Act. Ap. XIII, 1. Erant autem in Ecclesia, quae erat Antiochiae, prophetae et oratores, in quibus Barnabas, et Simon qui vocabatur Niger, et Lucius Cyrenensis, et Manahen, qui erat Herodis Tetrarchae collactaneus, et Saulus.

<sup>108</sup> *Nomen Christiadum.* — *Christiani* vox versui accomodari nequit: nos utimur *Christicolae*, *Christigenae* et *Christiadae* vocabulo. In sede igitur Petri, in ipsa Antiochena Ecclesia Christianorum nomen inditum est discipulis, ut ait Lucas: *ut cognominarentur primum Antiochiae discipuli Christiani.*

<sup>109</sup> *Cephae.* — Ad eas alludit contentiones, de quibus loquitur Paulus I, ad Cor. I, 12. Hoc autem dico, quod unusquisque vestrum dicit: Ego quidem sum Pauli, ego autem Apollo; ego vero Cephae; ego autem Christi.

# PETREIDOS

## LIBER III.

---

### ARGUMENTUM

Intermissa Christianae Ecclesiae Historia, ut suis, pastorali qua par erat sollicitudine, consultoribus responderet, cum principum Christianorum salutatione, tum Lucinae romanae matronae adventu recreatus, eam resumit Petrus, cum grano Sinapis (quae fuit Christi parabola) Ecclesiae a parvis initiis progredientem in dies magnitudinem comparans, infernis potestatibus frustra obluctantibus — Agrippa senior, primus romano nomine Rex, hebraicae religionis amplificandae studio incensissimus, ut auram aucuparetur popularem, et Synagoga calumniis velificaretur, Christianam Ecclesiam persequitur — Jacobus Alphaei, frater Joannis, ab Hispania redux primus inter Apostolos martyrio coronatur — Petrus Antiochia accurrens, ut Ecclesiae periclitanti praesens auxiliaretur, a regis satellitibus comprehensus in vincula truditur; sed Rex dies Azymorum et augustissimum anni tempus reveritus, mora interposita, rem extrahit, spectaculum de ejus nece post dies paschales populo exhibiturus — Azymorum et Paschatis origo — Ecclesia, totius aedificii fundamento excusso, maxima aegritudine contristatur; dumque gloriosissimam Christiani Paschatis memoriam celebrat, pro communi omnium parente atque pastore ardentissimas preces ad Deum effundit — Neque Deus orationem despexit — Ecce Angelus e custodia Petrum liberat, portisque carceris et

civitatis divina virtute reseratis, ad triumphi speciem educit usque Joannis Marci domum, qua aegros et exulceratos animos inopina praesentia exhilarat — Agrippa pudoris et indignationis flamma exagitatus in Tyrios et Sidonios stomachum effundit: sed Dei Angelus ex adverso erumpens temerario divinitatis fastu superbientem lethali spiculo confodit — Petrus non amplius tutam fore moram Hierosolymis videns, admonitis per cursorem ceteris Apostolis, ut Antiochiam convenirent, ipse per Palaestinae maritimas regiones Pontificiam sedem petit: dumque per tranquillitatem noctis, gratias agunt Deo debitas pro Ecclesiae capite servato, divino oraculo admonentur, ut in diversas orbis terrarum regiones proficiscerentur, evangelium nuntiaturi — Petro divinae voluntatis interprete, tessera verae Christi Ecclesiae, communi consensione constabatur — Symbolum Apostolorum e cathedra pronunciato, sortiuntur Apostoli suam cujusque in universo orbe terrarum Evangelii procurationem — Spiritus Sanctus omnibus consultor — Ad totius mundi principem civitatem princeps Apostolorum mittitur — Petri iter in Italiam — Vis ille Italiam tetigit, solemni super Tiberis ripa precatione Christum obsecrat, ut in romana urbe christianae reipublicae principatum auspice tur — Michäel innumera Angelorum acie stipatus de caelo descendens, Petrum oblata pontificiae Romae condendae imagine recreat, Romaeque possessionem capit, e tyrannica Erebi potestate liberaturus — Ipsa Petri praesentia Roma exhilaratur, gentilicis quibusdam superstitionibus abolitis — Prima Petri mora, et praedicatio apud Judaeos Transtiberinos ab Pompeio, et Augusto Romam traductos — Primo successu confirmatus, apud Romanos orare coepit — Pudentis Clariss, Senatoris ad Christum conversio — Qui Petro domum suam Sacris obeundis offert: ibique Petrus gloriosissimae Christi Passionis memorias ab oriente allatas, velut arca-na sacra imperii collocat — Ecclesia Romana XV Kal. Febr. ab Apostolorum principe Romae instituitur, Evodio episcopo Antiochenae Ecclesiae subrogato — Ex illo Petrus Episcopus urbis et orbis — Rebus romanis ex animi sententia procedentibus, Italiam omnem, missis apostolicis viris qui cum ex oriente comitaverant, Evangelii luce illuminat — Siculi ac Italici episcopatus a Petro constituti, et episcopi creati — Linus, Cletus, et Clemens e christianis praestantiores in opus ministerii cooptantur — Majus Romanae Ecclesiae incrementum e Pauli adventu ad Urbem. Qui, tumultuantibus Solymae Judaeis, ab Romano tribuno in castra abreptus, utque de Christo conticesceret, verberum et virgarum minis frustra deterritus; se Romanum civem pronunciat, et ad Caesarem provocat — Triumphale iter Pauli per totum mare mediterraneum — Christianorum Romae laetitia ad tres Tabernas obviam occurrentium — Prae-



dicatio Pauli ad Judaeos ad viam Latam qua libera custodia detinebatur, vocatos — A quibus male habitus se convertit ad Gentes — Vinculis exolutus apud collegium Pontificum, et senatum verba facit — Augusta Aula ejus nomine personat, in dies aegrescentibus Judaeis, et Christianis firmitate fidei convalescentibus — Hierosolymitana synagoga quotidianis Christianae gloriae incrementis indignata, missis exploratoribus universas synagogas subvertit, totaque Judaea quae veluti Evangelii praeludium, deductis coloniis, sub Christi ortum universas orbis regiones opleverat, in Christianum nomen insurgit — Praecipue Romae adeo tumultuantur, ut Claudius Judaeos, quo nomine Romae Christiani etiam habebantur, expulerit — Petrus Linum et Cletum Episcopos creat, suique absentis vicariam operam committit — Clementem sacris initiat — Roma egrediens, divina quadam providentia, in Orientem vocatur, ubi de judaeis legalibus orta quaestione, Ecclesia ancipiti certamine versabatur — Re mature perspecta, naturales leges animis impressas aeternas esse intelligens, at multas Hebraei imperii praescriptiones veluti domesticas et umbratiles, luce umbris succedente, ad nihilum recasuras, Petrus Apostolos Fratres consulit de re gravi, quae universae christianae reip. intererat — Primum concilium Hierosolymitanum, ubi, Petro et Jacobo potissimum orantibus, decernitur Judaea legalia cessisse; unum e cunctis terrae gentibus christianum populum fieri, christianam legem sufficere — Petrus Orientem pastorali peregrinatione lustrat, et paterna quadam oblectatione praecipuas Ecclesias enumerat — In Judaea florebat Ecclesia *Hierosolymitana, Caesareensis* — In Syria, Ecclesia *Damascena, Tyria et Sidonia* — Singularis recordatio de *Metropoli antiochena* — In Graecia, Ecclesia *Atheniensis, Corinthia*. — In Creta, Ecclesia *Cretensis* — In Macedonia, Ecclesia *Thessalonicensis, Philippensis*. — In Thracia, Ecclesia *Heraclaeensis* — In Asia Minori, Ecclesia *Ephesina, Galatensis, Colossensis* — Claudia tempestate quiescente, Summus Pontifex Romam redit — Florescens Ecclesiae Romanae status Lini, et Cleti laboribus: confirmaturque eo magis, quod Oriens Occidenti, assidua ultro citroque comitantium peregrinatione, adhaerescit — Tanto rerum prosperarum aspectu exhilaratus ad occidentalis orbis regiones Petrus admovent oculos, et missis apostolicis viris *Gallicanam, Germanicam, Britannicam Ecclesiam excitat* — Marcus Petri interpretes *Alexandrinam Ecclesiam* aedificatum amandatur — Sic triplici Patriarchatu constituto, *Antiocheno, Alexandrino et Romano*, totus Oriens Occidenti connectitur, Romanusque Pontificatus per universas Orbis regiones suam exercet sollicitudinem, ex novo fonte manantibus rivis, ex uno sole radiis — Quatuor Evangelia per orbem promulgata, natura ipsa impellente gratiaque caelesti adjuvante offusas



humanae intelligentiae tenebras propulsant—Totius orbis terrarum vastissimam silvam purgare , monstra ferarum atque portenta perdomare e Galilaea piscatores missi sunt — Romae pontificalis prae Roma Romuli illustrior gloria — Illa armiferis expeditionibus universas cogniti terrarum orbis nationes suo imperio subiecit — Haec una verbi persuasione , novam sanctioremque humani generis consociationem in Christi nomine et auxilio creat — Quae dum terris peregrinatur , in Evangelio pacem, et malis medicinam reperit , futurumque domicilium in caelis perpetuamque beatitudinem expectat — Hic finis Pontificiae orationis , stupescuntibus omnibus, de mirifica Christiani nominis propagatione.

At non te solum, pastorum Maxime, linquit  
Christiadum pietas, neque te per mille pericla  
Desertum sacrae solum tenere latebrae.  
Plurimus in noctem suspectam allabitur aedem  
Nuncius, et primos simul ac subsidere fluctus  
Cernunt Presbyteri, properant invisere Patrem  
Et jussa accipere. Et Senior pro tempore cuncta  
Componens moderatur oves, oviumque magistros.  
Pontificem in primis matronae nobile movit  
Propositum. Lucina <sup>1</sup> potens, Clementis amicis  
Incita consiliis, praecelsa palatia scandit.  
Ipsa sacris primum pedibus dedit oscula: deinde  
Surgit, et ardenti tales dat pectore voces:  
Christiadum Genitor, quoniam lux magna sacratis  
Addidit ordinibus, Christi documenta secula  
Ante pedes depono tuos bona cuncta: propinquo  
Janiculo domus est: aegris seu squalida morbi  
Contages, senibus gravior sive incubat aetas,  
Auxilium tulae poterit succurrere sedis,  
Qua tibi jucundo famulabor serva labore  
Cum famulis, qui mille meis conclavibus errant.  
Tusculana quae tellus servat, pomaria rivis  
Roscida mobilibus cape laetus: cuncta resigno  
Pro miseris pueris. Certos per compita mittam

Colligere expositos, rapta seu matre dolentes.  
Audierat viduam commoto pectore fantem  
Maximus Antistes, lacrymaeque per ora volutae  
Ipsi etiam, et tantae pietatis imagine tactus:  
Ast ego Presbyteros aut mane aut vespere mittam,  
Inquit, qui primum puerilia corda nitenti  
Lumine praevertant, vitaeque obstantia pellant,  
Doctrinaque Crucis firment aegrosque senesque;  
Qui juga Calvariae memorant, totumque cruore  
Manantem Jesum, mortisque extrema ferentem,  
Et gaudent cessare suos minuique dolores.

I, sequere incoeptum, mulier: *Qui flentibus adsunt* <sup>2</sup>,  
*Caelestem accipiunt certa mercede coronam,*  
*Et redit impensum fructu centuplice munus.*

Sic ait, atque choro comitum se reddidit. Illi  
Sepositam historiam, et regni decora alta futuri  
Noscere flagrant: neque secius orsa petebat  
Augustus Senior, coeplamque absolvere telam.

Quo primum prognata die est Ecclesia, caelo  
Spiritus omnipotens in munia magna creatam  
Sustinet, immotoque regit vestigia gressu.  
Illa, bonum semen <sup>3</sup> jactum tranquilla secundum  
Flumina, mox foliis virgultum assurgit opimis.  
Improba dabacchetur hyems, ferus ingruat Euris;  
Illa solo bene compactis radicibus haeret  
Firmior, adversa decussaue grandine crescit  
Arbor opaca, ingens, et luxuriantia pandit  
Brachia, ramorumque virentes explicat umbras.  
Contentae pecudes sub texta umbracula ludunt:  
Orbe peregrino, securae nomine pacis,  
Grex avium accurrit, foliisque sub omnibus haeret.

Ista Dei domus, ista aevi volventis imago.  
Infremit insidiis Satanas armatus et astu,  
Milliaque ingeminat gradienti obstantia in horas.  
At lateat, quemnam victoria laeta sequatur?

Ut primum Roma, sceptroque potitus opimo est  
Claudius, Agrippam <sup>4</sup> magno cumulavit honore:  
Namque patrum studiis quondam certantibus, ille  
Planum stravit iter solio, in partemque senatum  
Traxerat incertum. Memori stat gratia facto:  
Judaeam regi et Samariam donat habendam,  
Juratamque fidem romano foedere <sup>5</sup> sancit.  
Judaeam in vacuum primis Agrippa redibat  
Ominibus, templumque petens votivaque dona  
Fortunae memor ambiguae, auratamque catenam  
Servitii titulum ad fastigia sacra ferebat.

At non praeclaris respondent cetera coeplis.  
Vix et inexpertas regni tractavit habenas,  
Hebraei Proceres ignarum incendere falsis  
Criminibus coepere: novo de nomine dictam  
Progeniem regni firmam turbare columnam:  
Christiadas nova moliri, nova condere jura  
Atque novos mores: quid porro principe tanto  
Dignius, insolitae quam si contagia pestis  
Pelleret e Solyma? Non omnia falsa videbat,  
Quae rex audierat: Christi per rura, per urbes  
Vulgari nomen: monstris caelestibus omnes  
Excussas gentes Christi concurrere ad aras.  
Ille diu ardebat priscam instaurare coronam:  
Praeterea Hebraeum spretis si accederet aris  
Antiquum jubar, et magnum fore munus amanti  
Sperabat populo, et regni praesagia magnis

Laudibus aucturum 7. Tali spe fervidus ipsos  
Ductores certa aggreditur pessumdare clade.  
Quae feriit Stephanum scelerata insania, in unos  
Saevit discipulos; at nunc violentia major  
Insequitur procures 8. Turma deprensus iniqua  
Zebedeo natus tumidi prior ora tyranni  
Audacter subiit, nec voci iraeque pepercit.  
Ut Christo quondam Samariae regna petente,  
Ille praebat ovans, populoque rejectus agresti  
Haudquaquam patiens tristem tolerare repulsam,  
Igniferas pluvias et formidabile fulmen  
E caelo orabat, nî Christus mitior audax  
Consilium, et consurgentes componeret iras  
(Tunc gemini e tonitru 9 hauserunt cognomina fratres);  
Talis erat senior: nec quemquam impune tulisset  
Insultare Deo, se coram, aut temnere Christum.  
Illum tantus amor, Christi illum tanta cupido  
Ceperat, ut tartlessiaci per littoris oram  
Ignolos populos, quos dives lambit Iberus  
Auricolorque Tagus, Christi legatus adiret,  
Elatumque Crucis signum ostentaret Iberis 10.  
Inde redux Solymas sanctos invisere fratres,  
Criminis arguitur: Christum crimenque fatetur  
Coram rege ipso, tantoque oravit honore,  
Ut veniam facti delator 11 posceret ultro,  
Seque daret Christo. Ille suum complectitur hostem,  
Atque offert pacem. Praeclaro funere vitam  
Deseruere ambo, mutâruntque aethere terras.  
At non Calaeis tua vox oblita, dataeque  
Principium fidei, Pastor venerande: requirent  
Augustum corpus, lectoque e marmore templum

Constituent, tanloque superbiet ora beala  
Thesauro, atque alio veniens peregrinus ab orbe  
Gestiet oblati cumulare altaria donis <sup>12</sup>.

Jamque procul magnae sonitum, strepitumque ruinae  
Audieram. Antiochi deserta protinus urbe  
Advenio, tantum propius spectare periculum.  
Hei mihi! quid regem poterat latuisse, notansque  
Cuncta satellitium? paluit praesentia Petri:  
Tum vero ratus, ingenti si avulsa ruina  
Fundamenta forent <sup>13</sup>, totam procumbere molem,  
In me conversas irarum effudit habenas.  
Turba ferox aderat, primoque imbuta cruore  
Sepositam irrupere domum, raptumque, triumphi  
In speciem, claudunt latebroso carceris antro.  
Agrippa exiluit praeda ditatus opima.  
Sperabat demens, truncato vertice, membra  
Omnia deficere, et totum languescere corpus.

Festum urbi solemne aderat <sup>14</sup>, Iudaeaque tota  
Laetiliae signis sese effundebat honestis,  
Ingens prodigium memorans, magnosque triumphos,  
Cum Pater Omnipotens externo jure subactam  
Progeniem, immitique jugo servare praecoplans,  
Lactentem jugulare agnum, postesque linire  
Sanguine mandavit. Vastator, nocte silenti,  
Angelus Isacidum signalas sanguine sedes  
Transilit innocuus: Aegyptia tecta cruento  
Flumine inundavit gradiens, natuque priores  
Interimens omnes. Ollis data copia tandem  
Barbarico migrare solo, et via facta per undas.  
Poenituit Pharaona viam, veniamque dedisse,  
Armisonasque movens inopina ad bella phalanges

Insequitur Judam, et comprehendere gestit euntem.  
Quae mora? servati ripa ulteriore canebant  
Isacidae, dictante duce, admirabile carmen:  
Per mare reclusum Pharaon atque exercitus omnis  
Ingreditur: medium vix contigit, unda relictum  
Deflua replet iter, pelagoque absumpta voraci  
Aegyptus periit: natal aurea gaza per aestus,  
Absorplaeque acies fundo volvuntur in imo.  
Ex illo Isacidae, sic jusserat ipse Creator,  
Septenas celebrant, festum memorabile, luces:  
Atque ubi collecti consanguinitate propinqui  
Convenere, domus media discumbitur aula,  
Sinceras nullo fermenti semine fruges  
Vescuntur, foetusque ovium, ceu lege tenentur,  
Subjiciunt flammis, dapibusque epulantur opimis,  
Longae quisque hastae incumbens, ceu saepe viator,  
Thaureaque ad gressum circumdans vincula plantis.  
Haec Judaea vetus solennia vota novabat.  
Ast ubi lux aderat priscis praelata figuris,  
Certatim Judaea recens caelestibus aris  
Pascha novum, Divinum Agnum mactare parabat,  
Sanguine quo ablutus primaevi labe parentis  
Terrigena infernae ferrata repagula sortis  
Dirumpit, liberque Dei bona jura potitur.  
Et quoniam ferro <sup>15</sup> vitalem abrumpere cursum  
Haud fas per septem, sanctissima tempora, luces,  
Ipse novi Princeps populi solennia festa  
Queis praeceram, gemitu captus luctuque trahebam  
Turris inaccessae tenebras dejectus in imas.  
Si quidquam poterat pacem turbare serenam,  
Una gregis pietas erat. Insatiata luporum

Ira fremet caulis? Ecclesia junior ibit  
Per varios casus? opera interrupta jacebunt?  
Non ita: quandoquidem caelo tu vivis in alto,  
Christe Pater vigilans, neque pastor deforet alter,  
Auspice te, firmum pavido tutamen ovili.

Triste Palaestinam manârat murmur in omnem  
Pontificem captum, latebrosa nocte sepultum  
Expectare necem. Subito turbata dolore <sup>16</sup>  
Christiadum varias Ecclesia sparsa per urbes  
Contremere: et regni novitas, et proxima Jacob  
Funera turbabant justa formidine mentes.  
Quod superest unum, sanctis accurritur aris;  
Unus Judaea clamor se tollit in omni  
Te, Christe adjutor, calida prece compellantum.  
Tu Deus omnipotens <sup>17</sup>, te nostra in vindice causa.  
Tu celsum insistens solium celsumque tribunal,  
Terribili in tumidos tonuisti voce nocentes,  
Et subito periere: perit quoque nomen in altis  
Absorptum tenebris: ausae te laedere quondam  
Procubuere solo viduae civibus urbes,  
Famaque sacrilegis jacuit tumultata ruinis.  
Surge age, surge <sup>18</sup>, Deus: te contra pulvis et umbra  
Stare audet? Tales jactabant pectore voces,  
Et non ille inopum lacrymas gemitusque piorum  
Oblitus. Laetae depulsa luce diâi,  
Nox circumfusa obnubens caligine terras  
Terrificam foedi geminârat carceris umbram <sup>19</sup>.  
Ipse pruinose latere inclinatus ad antrum  
Tristior haerebam: malefidae incommoda sortis,  
Incultusque situs, trepidaeque silentia noctis  
Turbatum oppressere animum: tamen ore supremo,



Omnipotens Genitor, noctis solemnia vota  
Explêram, et placidae laxâram membra quieti;  
Confestim nova lux °o tristi circumnitet antro.  
Qualis ubi primo irradians intermicat ortu  
Aurora, immundo squalore horrentia tecta  
Exiluere viri aspectu gradientis; ab arce  
Aliger aetherea pictis juxta astitit alis.  
Vanuit ex oculis somnus, jam jamque videnti,  
Quid cessamus, ait? tua desere vincla (catenae  
Exciderant manibus), caligis vestigia claude,  
Me sequere. Exurgo, atque viam quam monstrat eundi,  
Pone lego audacter: patuere ingentia saevae  
Claustra domus: vigilans magnum excubitoribus agmen  
Perfacile superare datur: quin ferrea porta,  
Quae postrema triplex foribus stridebat ahenis,  
Sponte sua patuit. Jacet extra compita vicus  
Desertus, tutaque domus regione quiescit  
Dilectae Mariae °¹. Hic superas sublatus ad auras  
Angelus excedit, mediaque in nocte relinquitur.  
Vix ego credideram fieri quae cuncta videbam.  
Somnior an vigilo? Splendorem et verba notavi  
Alitis aetherei; me non vaga somnia fallunt.  
Haec recolens summas properabam scandere ad aedes,  
Qua lectus de more chorus matrumque virumque  
Supplex orabat Superos volisque vocabat.  
Namquis complexus comitum? quis gaudia narret?  
Ipse steti in medio, primaque ab origine narro,  
Omnipotens, divina tuae miracula dextrae:  
Inflexoque genu dulci pia turba triumphans  
Lactilia meritas gestit persolvere grates.  
Postera purpureo lustrabat lampade terras

Orta dies, longaue natanlia lumina nocte  
Excierat miles, reserataque carceris antra  
Repperiens, frustra circum vacua omnia lustrat.  
Rex fremit indignans <sup>22</sup>, miserasque ad saeva reposcit  
Supplicia excubias. At tu quid plura fatigas,  
Impie, Coelicolûm regem? temerarie, nescis  
Quanta fero capiti superest lapsura ruina.  
Dum propria pudet heu! victum considerare sede,  
Egreditur tibi multa, Tyros, tibi plurima, Sidon,  
Ipse minans: semper varium et mutabile vulgus  
Olli assentatur, servaloremque deumque  
Acclamat. Tumido dementem assurgere fastu,  
Et non concessos homini deposcere honores  
Angelus adspiciens telo confixit acuto:  
Quo tactu subita putrescit tabe, tumetque  
Corpus, et impuri depascunt viscera vermes.

Infelix Solyme, tota nos pellis Iduma,  
Quae dedit Omnipotens promissa parentibus arva,  
Ut legem acceptam dociles, verumque tenerent?  
Audiat hoc caelum <sup>23</sup>, tellus hoc audiat omnis.  
Bos dominum agnovit, possessoremque propinquum  
Agnovit pascens plena ad praesepia asellus:  
Tuque tuum ignoras dominum, atque ingrata repellis?  
Supplicium, miseranda, lues. Deserta jacebit  
Tot regum sedes, urbes populabitur ignis:  
Externae gentes pingui regione sedebunt  
Omnia raptantes, hostiliter omnia caede  
Complentes: tuque obsidione videbere trisli  
Arentis tugurî desertum culmen in arvo.  
At promissa fidem accipient: domus inclyta surget,  
Attolletque super sacro fastigia monte

Collibus edilior cunctis, totamque replebit  
Gloria magna Dei. Cunctis e partibus orbis  
Ipse Deus caecas vocat ad nova foedera gentes.

Tum vero varias, obscura mapalia, sedes,  
Quo sese abdiderant Proceres, primosque furores  
Effugere optârant, festinus cursor <sup>24</sup> obibat,  
Errantesque pios, Christo dictante, monebam  
Moenia Jerusalem sancto irrorata cruore  
Descrere, et tutam in Syria reperire salutem.  
Dicto exultantes parent, caecasque latebras,  
Qua tutos fratrum pietas operosa tenebat,  
Deseruere viri: sub noctem incerta pererrant  
Oppida Judaeae, notaque excedimus ora.  
Nos habet Antiochia <sup>25</sup>: domum convenimus unam  
Qua pastoralis tractabam munera sortis;  
Servatosque Deo immortale rependere votum  
Unanimus suadebat amor, cum prolinus omnis  
Emicuit domus; auricomus transcurrere nimbus  
Visus, et innocuae considerare vertice flammae,  
Et vox aethereas sonuit demissa per auras:  
Ite, Deus jubeo: vobis maria omnia pando,  
Atque omnes terras: Christus notescat ubique.  
Nec plura his; calidasque animas novus impulit ardor.  
At patuere mihi manifesta oracula caeli,  
Et mandata Dei sociis mirantibus edo:  
Magnanimi fratres, quibus est concessa facultas  
Imperium fundare novum, regnique futuri  
Mores diversas orbis vulgare per oras,  
Tempus adest suprema sequi mandata Parentis.  
Herodes ira insanus, jamque alter ab illo  
Qui primum rubros puerili sanguine rivos

Infecit, Christum ferro flammaque repellit.  
Innocuus cecidit Jacob; circumdedit ipsum  
Me fera barbaries, atque ad peiora reservat.  
Praesentem nobis intentant omnia mortem.  
Quandoquidem immitis Princeps, Judaeaque proles  
Juravit totum Christi pessumdare semen,  
Eja, viri, migrandum alio: monet ipse Redemptor  
Visere tot populos diuturna in nocte sedentes.  
Ante tamen quam diversi data regna sequamur,  
Doctrinam juvat indiciis comprehendere certis.  
Tessera Christiadam statuenda: ut nocte propinqua  
Tessera vicinum socio discriminat hostem,  
Firmemus signo, quae Christi Ecclesia verax <sup>26</sup>.  
Assensere omnes. Caelo tu, Spiritus alme;  
Mitis ades, certoque inspiras lumine mentes.  
Quisque opere in tanto partem sibi vindicat: inde  
*Symbolon* appellant <sup>27</sup>. Quae tum suffragia librans  
Supremus Pastor, cathedraque insignis ab alta,  
Fratribus intentis, suprema oracula dicto.  
Omnibus una fides, veluti Deus omnibus unus.  
Nempe Deus Pater omnipotens caelique creator  
Terrarumque: Patris Jesus aequaeva propago  
Unica, quem sancto conceptum Flamine Virgo  
Parturiit mater: qui humanae incommoda vitae  
Immitemque tulit mortem, tumuloque resurgens,  
Effractis foribus, caelestia templa petivit,  
Qua solio in magno Omnipotens sedet Omnipotentis  
Ad dextram Patris, unde extremo in tempore rerum  
Terrigenas ad iudicium solemne vocabit.  
Nec minus et Patris et Nati Spirabile Numen,  
Credimus esse Deum, atque Deum ter dicimus unum.

Humana maiora fide quaecumque docebit  
Digna triumphalis regnare Ecclesia terris,  
Gentes excipient fidae, docilesque tenebunt.  
Caelicolas terris communia foedera jungunt.  
Terrigenas patriae siquos caelestis amore  
Avertent noxae, Christi per vulnera fontes  
Poeniteat, caeloque Deus peccata remittet.  
Adveniet tandem, lustris labentibus, aetas,  
Cum tumulo ex omni redivivo corpore cuncta  
Exurget caro; tunc peritulum finiet aevum,  
Aeternae incipiet series decurrere vitae.

Talia fatus eram; carmen venerabile toto  
Pectore combiberant comites, Vigor actus ab allo  
Irradiat, variasque plagas habitabilis orbis  
Sortimur, Christi posituri ingentia regna.  
Ilicet eductae concordii foedere sortes,  
Aequalisque labor cunctis. Pulcherrima tellus  
Italiae, tellus caelo acceptissima nobis  
Obligat, Andreas Syriam perlustrat opimam,  
Joannes Asiae laetissima regna pererrat,  
At te regna manent Asiae editiora, Philippe.  
Bellaces Parthos et fuscas permeat Indos  
Thomas; Armeniae campis versatur in amplis  
Bartholus; Aethiopus visit Matthaeus adustos,  
Et molles Arabas Judas et cognita caelo  
Flumina quae dirimunt sala pingua. Persidos oram  
Lustrat achaemeniam Simon, aegyptia regna  
Matthias. Cuncti accipiunt data fata, Deoque  
Sacramenta novant, coeptisque ingentibus instant.

At quisnam justos potuit compescere fletus,  
Cum tibi supremum moesto vale diximus ore,

Diva Parens? Libani ceu vertice surgit odora \*S  
Cedrus, sive Sion juga per formosa cupressus  
Ardua, sive Cades lectis vaga palma virelis,  
Hebraeas omnes divino nomine matres  
Exuperas. Rosa quae lactis Hierichuntos in hortis,  
Quae speciosa jugo frondescit oliva virenti,  
Quae platanus surgit sala flumen propter amocenum,  
Cedunt ultro tibi. Tu suavia cinnama vincis,  
Tu myrrham ambrosio stillantem rore sabacam,  
Tolaque procedis tanto circumflua odore,  
Ut caeli regem et terrae radiantibus astris  
Illectum virtute tua, natumque beato  
Ubere nutrieris. Pacis mediamque salutis  
Suspiciamus, caraeque loco genitricis habemus.  
At tu Joannem cui Natus credidit ipse,  
Exhilarans, Asiae magnas comitaris in oras,  
Unde regis duodena virum vestigia, Christi  
Praesens effigies, et vivida solis imago.

Mox ubi fidentes animis jussisque paratos  
Prospexi comites, renovo excedentibus omen;  
Qualis caelesti Christus virtute creatum  
Misit in imperium, et terras concedidit omnes,  
Diac commemoro monumenta insignia vocis:  
Ibimus, o fratres, misit Deus, ibimus omnes.  
Quo tamen ingenti maneat concordia regno,  
Vos memorate patrem, cui Christus sceptrā vicesque  
Tradidit in terris. Ego vos maria omnia circum  
Dux sequor atque comes, regio quaecumque tenebit.  
Si spes nulla manet, si nosmet visere terris  
Non dabitur, summo promisit gaudia caelo  
Christus, ubi socio copulabimur agmine Christo,

Caelestumque jubar Christumque Deumque fruemur.  
Nec plura effatus: libataque basia pacis <sup>29</sup>,  
Colloquium extremum, et mixto inter gaudia fletu,  
Quisque viam carpit, quo sancta oracula ducunt.

Magnanimi heroes concredita regna peragrant,  
Arcana excelsi monstrantes lumina veri.  
Ipse viam auxiliumque paro, sociosque recensens  
Quamplures mecum Italiam lustrare paratos,  
Omina quandoquidem firman't caelestia mentem,  
Haec mecum recolo: Pastorum primus <sup>30</sup> ad arcem  
Romani imperii mittor, quo vertice summo  
Vis nova progrediens cunctos se fundat in artus.  
Hic delenda manent Sophiae documenta vetustae,  
Hic sancto effraenis reprimenda licentia more,  
Sacrilegae hic artes incantamentaue pravi  
Solvenda ingenii, quo cuncta pudenda cœgit  
Foeda superstitio. Quis Romae nesciat urbem?  
Romanis quacnam regio se subtrahit armis?  
Anne ullam in terris gentem ignorare licebit,  
Quae Roma edidicit, quaeque in sua jura recepit?

Protenus imperiis caelestibus obsequor: ora  
Solvens eoa, dextra laevaue jacentes  
Inviso terras, verbi mysteria spargens.  
Trinacriae propiora legens latera, agmine nostro  
Tres carpo agricolas campum exercere virentem.  
Parthenope errantem hospitio senioris amici  
Obsequiosa diu tenuit, lumenque recepit.  
Inde peto Romam, quae meta extrema viarum.

Qua flavus thusco confunditur aequore Tybris,  
Navigium appulimus, gressumque ad moenia duco  
Romulidum, comitante choro. Jamque alta tuenti

Culmina successus subiit spes alta futuri:  
Procubui, fudique preces has pectore ab imo:  
Christe, graves hominum semper miserate labores,  
Qui veterem aggredieris nutanti pondere mundum  
Instaurare, pias renovato semine gentes  
Fingens, quam arcano monuisti numine, magnam  
Prendimus Italiam, signataque tangimus arva.  
Hi septem colles, et collibus addita Roma,  
Hic magnus Tybris, hesperidum regnator aquarum.  
Per te, nequicquam Hebraeis certantibus, ingens  
Christiadum signum antiochena desuper urbe  
Erectum, unde potens Syriam regina per omnem  
Religio, populis indicit jura vocalis.  
Haec promissa mihi tellus, quae maxima Roma est.  
Hic ego, quae Solymis nostrae monimenta salutis  
Armaque clavosque et spinas sanctumque cruorem  
Classe veho mecum, statuendi pignora sacra <sup>31</sup>  
Imperii, qua sede locem, tu consule caelo.  
Hoc caput orbis, et hic corruptissimus omnis  
Nequitiae gurgis: lethacum huc arbiter antrum.  
Transtulit, et capitolina spatia in aula  
Rex rerum Satanas. Solio regnabis in uno  
Tuque hostisque tuus? Caelo demitte nitenti  
Aethereas acies, purumque per aëra lapsae  
Moenibus impuris palantia monstra malorum  
Agmina spirituum excutiant, vigilique corona  
Defendant sanctam, insomnis custodia, Romam.  
Nec mora; per sudum summa descendere ab aethra  
Pennipotens genus intueor: gratatur eunti  
Aura levis circum resonans, stellaeque coruscant  
Innumerac. It Michäel ardens caelestibus armis <sup>32</sup>



Ductor, et anlevolans Tyberis subsedit ad undam.  
Atque ubi me attonitum magna cinxere corona,  
Progreditur Michäel, placidaque haec voce profatur:  
Haecenus hesperiae miserati damna ruinae  
Flevimus indigna septem caligine Romam.  
Praevalidae stirpi, nec jam virtutis egenti  
Praemia persolvit Deus, ingentique potentem  
Imperio, et clara dedit illucescere laude.  
At nunc majori Omnipotens dignatur honore.  
Nempe alii peragrant alio: tibi, maxime Pastor,  
Romani rerum domini gentesque togatae  
Quaeque urbs una sibi septem circumdedit arces,  
Obvenere: potens Capitolium, et inclyta sedes,  
Unde ferox Caesar saevis dominatur habenis,  
Subjectos populos cedent tibi: maxima Roma  
Mox oblita feri martis spectacula, fiet  
Pontificum veneranda domus: quas possidet armis  
Innumeras gentes, sparsas quacumque, tenebis  
Relligione una et concordi foedere amoris <sup>33</sup>.  
Sic ait, atque oculis totum se proripit agmen.

Invia silvarum densis horrentia dumis <sup>34</sup>  
Ingredior maiore animo, quam summa paterni  
Aequoris insilui, Christo exhortante, vocatus.  
Memet mutatum video: qui limine primo  
Expavi ancillam, confidentissimus Urbem  
Ingredior mundi dominis, saevoque tyranno  
Regnatam. Qualis, bello superante Philistin,  
Per mediam Azotum divini foederis arca  
Processit, Dagon <sup>35</sup> foedum subitura cubile  
(Horrida semihominis species et cetera piscis  
Dagon numen erat populis), praesentia magni

Numinis excusso tremefecit cardine foedam  
Effigiem, Mystae immoto ter marmore sistunt,  
Terque, die veniente, fera sublapsa ruina  
Aerea signa jacent, per terram sparsa feruntur  
Fragmina; non aliter Romae decrescere visa  
Caeca superstilio <sup>36</sup>, simulacra antiqua labascunt,  
Adventante Deo. Pollutam sacra per urbem  
Plurima ( quis foedas species, numerumque Deorum  
Enarret? ) sacrosque dies romana potestas  
Contrahit; eversae effigies ritusque minuti.

Postquam romanis cessit provincia virgis  
Pompeja devicta manu Judaea, triumpho  
In speciem Hebraeos captivaeque corpora Romam  
Transtulerat victor. Jus libertatis adeptos  
Trans Tiberim Augustus tuta regione locavit,  
Concessitque etiam tota mercarier urbe.  
Compita Romulidum tentans incognita, primum  
Trans Tiberim sisto, et Judaea per agmina versor  
Nuncia laeta ferens. Deus omina prima secundat:  
Judacum magnus coepit crebrescere coetus  
Credentum Christo. Praeda ditatus opima  
Romulidas posco: vix alter coeperat annus.

Nulla dies nostro delebit pectore, nunquam  
Delebit sanctis romana Ecclesia fastis,  
Quando ignotus, egens, nulla confisus opum vi  
Pro Christo orabam, magna stipante corona:  
Ipse Pudens aderas: stimulante cupidine veri  
Tangeris eloquio, et Christi memorabile nomen  
Accipiens Christo laqueata palatia pandis.  
Haec primum visa est statio fidissima sacris,  
Hic aram posui primam sanctique locavi

Arcana imperii, unde sacrae res publica Romae  
Incoepit, totique potens dominabitur orbi.  
Antiochia, mihi certo quam foedere sponsam  
Annos septenos <sup>37</sup> fovi, in Christoque creatam  
Dilexi magis his oculis (quo candida cultu  
Lux Syriae luces, quanto virtutis honore!),  
Ahi ego te linquo: sed tecum nostra moratur  
Relligio. Quamvis longo distantia cursu  
Aequora nos dirimunt, Romam populosaque lustrans  
Compita, sollicito quaeram te pastor amore.  
Me nunc Pontificem mavortia Roma tenebit,  
Ast aller pastor nostris operabitur aris.  
Ex illo posita coepit consurgere sede  
Pontificalis honor solii, solioque sedemus  
Mentis divinae interpres, morumque magister  
Petrus ego, et Petri divinum in nomen ituri  
Pontifices. Nostro Evodius praefectus ovili  
Antiochiae, Urbis romanus episcopus ipse  
(Sic placitum Superis) dicor, quem deinde secula  
Pontificum series non defectura perennet <sup>38</sup>.

Ergo datum molimur opus divinaque crescit  
Gloria. Verborum nova lux adapertha penetral  
Pectora: discurrent diae praenuntia vocis  
Numinis adventum magni testantia: turbae  
Deproperant dociles, nostroque docentis ab ore  
Pendent attonitae, et sanctae praecepta salutis  
Accipiunt. Miseris congesta mapalia culmis  
Marmoreaeque domus, Christo praeunte, palescunt.  
Mox graviora petens augustam Caesaris aulam  
Accedo, atque choro in magno praetoria circum <sup>39</sup>  
Caesareos equiles doceo caelestia; magna

Nuncia non aegri et vocem audivere loquentis,  
Multaque de Christo agnoscunt et multa requirunt.

Omnia dum Romae caelo constare sereno  
Adspicio, occiduum sanctis splendoribus orbem  
Illustrare paro. Extremo ex Oriente profecti  
Magnanimi Proceres (namquis sermonibus aequet  
Ingentem numerum <sup>40</sup>?) submola invisere regna,  
Atque novae gaudent caeleste effundere semen  
Doctrinae, et terras pace exhilarare reperta.  
Italia, Italia, o regni pars maxima nostri,  
Nimbifero alpinæ quam cingunt vertice cautes  
Magnaue trigemino claudit Trinacria monte,  
Te primum enati lustravi lumine solis.  
Centum urbes magnas, positas regione beata  
Pastorum ingenti vidi lustrare corona.  
Tu prior Asprenas <sup>41</sup>, quæ primo in limine magnæ  
Considet Italiae, atque fuit prima hospita tellus,  
Parthenopen luxu oppletam choreisque vacantem  
Excutis, et syrenacos das spernere cantus.  
Clara dicarchæo surgentia moenia portu  
Baianosque sinus lustrat juvenilibus annis  
Celsus <sup>42</sup>, perfectæ virtutis robora servans.  
Et tu campanis passim florentia in arvis  
Oppida tot populis præclara et fortibus armis,  
Priscæ <sup>43</sup>, colis: Capuæ gens dura atque aspera cultu  
Debellanda tibi, Vulturique accola caelo  
Lumina sustollat foedo depressa veterno.  
Impositum saxis, Epaphra <sup>44</sup>, candentibus Anxur  
Ingredere: duce te, foedatis Jupiter arvis  
Anxurus, et tristi excedat Feronia luco.  
Ut propius cernit romana patescere rura

Mascula progenies pomptina effusa palude  
Romulci patris sanctas assuescat ad aras.  
Nec vos, Aequicolae, montosa cacumina laelos  
Venatu assiduo et denso circumdare ferro  
Contemnit Marcus <sup>45</sup>, romana natus in urbe  
Marcus. Qua brevior graecas appulsus ad oras,  
Quaque magistratus Romaeque exercitus omnis  
Utro citroque adveniunt statione quieta  
Brundusii, erexit Christi venerabile signum  
Lucius <sup>46</sup>. O quantum patriae virtutis in illo!  
Parte alia superis Italûm regionibus errant  
Delecti proceres, Romaeque oracla propagant.  
Non ego, quae adriacas specularis desuper undas  
Finibus Italiae extremis, Aquilëia, noctis  
Tartareae aeterna liqui torpescere in umbra.  
Nunciat eous Marcus lucem: inde secutus  
Hermagoras <sup>47</sup> solis radiantem lampada praefert.  
Hinc Ligurum fines subiectasque Alpibus urbes  
Taurinûm ingentes, genus insuperabile bello,  
Nazzarius Celsusque <sup>48</sup> pares tenere coloni.  
Quid Mediolani memorarim pingua regna?  
Barnabbas <sup>49</sup> Christo statuit venerabile templum,  
Innumeras qua ducit oves ad pabula laeta.  
Et quae Ticini sinuosa interluit unda,  
Aequora camporum Syrus <sup>50</sup> exercebit, opimans  
Triticæas messes et inexpugnabile gramen.  
Et quae murali dominatur septa corona  
Urbs monti subjecta suo, subterque fluentem  
Pontibus impositis Athesin regina cœercet,  
Veronam Euprepîus <sup>51</sup> pascit, cui proxima certat  
Urbs Patavî sacris Latium ornatura coronis,

Auspice Prosdocymo <sup>52</sup>. Ponto exporrecta Ravenna,  
Romanae classis statio, fluctuque profundi  
Pulsata adriaci, pastorem excepit amatum,  
Qui sanctum falso sibi fecit Apolline <sup>53</sup> nomen.  
Pollens ingeniis ludisque Hetruria pollens  
Obscoenis, tandem meliores induit cultus.  
Paulinum <sup>54</sup> Luca, ingentem Florentia jactat  
Frontinum <sup>55</sup>. Saxo residet fundata vetusto  
Fesula, quam latio descendens sanguine doctus  
Romulus <sup>56</sup> illustrat: dextra laevaqué jacentes  
Urbes Roma regit, cunctasque amplectitur uno  
Foedere doctrinae atque uno Pastoris amore.

O macti virtute nova, tria lumina Romae,  
Romano. Clemens, latio sate sanguine Clele,  
Tuque, Line, ad Tiberim florens quem miserat Arnus,  
Accipite, o meriti, justae praeconia laudis.  
Vos estis comites opera ad caelestia, per vos  
Fervet opus, magnoque potens adolescit honore  
Religio, passimque novas exuscitat aras.  
Ac velut arenti cum sidere perfurit aestas  
Pulverulenta diu, plenis si nubibus imber  
Plurimus exhilarat morientia jugera, cultor  
Semina laetatae praegestit credere terrae;  
Ecce solo e pingui, et viridanti germinal herba  
Expectata seges, placidi clementia caeli  
Educat adridens, tepidaque Favonius aura;  
Sic tellus nostris respondet romula votis.

Hic aliud majus cecidit, quo gloria Christi  
Ingenti strepitu Judaeam effusa per omnem,  
Internique maris ripas emensa propinquas  
Lunine romanas inopino perculit aulas.

Mores accepisse novos Paulum, omnia tela  
Voce palam contra ritus vibrare paternos  
Et super externis praelatum effulgere castris,  
Qui vindex fuerat quondam asseritorque labanti  
Concilio, Judaea animo indignata videbat.  
Saepius extremas olli molita ruinas:  
Sed rabidas rixas, et amaro perlita felle  
Murmura caecasque insidias adaperlaque bella  
Vicit, Christe parens, duce te, qui rebus in arctis  
Praesidium et custos aderas, ut gloria major  
Majorem in belli segetem sequeretur euntem.  
Aemathiae campum et grajis regionibus urbes  
Egregias, et troiano collisa duello  
Littora lustrârat spoliisque indutus opimis  
Laetos complexus fratrum Solymamque petebat:  
Conjuratores furtim erupere frementes,  
Et medium amplexi: Saevas densate calervas,  
O socii; via nulla: virum comprehendere tempus,  
Otia qui rumpit patriae, quem vidimus ipsi  
Adversus legem et Moysen permulta canentem.  
Nec mora, collatis totum ruit agmen in unum  
Viribus, injiciuntque manus. Turbante tumultu  
Continuo irrumpit legio romana, minaci  
Terrificans vulgus gladio. Silet excita turba:  
Sed celsi Paulus podii fastigia scandens,  
Judaeae gentes, inquit, celebrate faventes  
Quod venit numen speratum in saecula: venit,  
Venit, io, dominus: laetae capite omnia sortis.  
Ut vero magis atque magis sonuere tumultu  
Atria, romano violentior ira tribuno  
Exarsit, bellique caput caussamque furoris,

Athletam Christi impavidum super aggere valli  
Constituit, saevisque jubet laniare flagellis.  
Circumdant omnes certantque illudere capto  
Et loris religare manus. Sed morte propinqua  
Non tamen ipse sui oblitus: Quo neclitis, inquit,  
Vincula? Romanus civis sum: caedere virgis  
Civem indemnatum fas nulli aut tradere morti.  
Provoco caesareum ad solium <sup>57</sup>. Miranda videtur  
Ductori primisque ducum fiducia tanta,  
Et laxare jubent manicas et vincla levare.  
At non caesareum potuit vitare tribunal.

Qua mare per magnum felix tanto hospite navis  
Errat, virtutis vestigia nota relinquit.  
Suspiciunt nautae caeli astrorumque peritum  
Et tempestati dictantem jura furenti.  
Quacumque egreditur, laeto clamore salutant  
Fratres, et Sidon Meliteque et magna Dicarchus <sup>58</sup>  
Obsequii pignus venienti solvere certant.  
Inde salutatum tota procedere Roma  
Lecti gestierant fratres, Tribus atque Tabernis <sup>59</sup>  
Prima fuit mora. Quo procerum stipatur honore!  
Vix saevos casus praenuncia fama Philippos  
Attulit, Aemathiae sparsi tellure frequentes  
Christiadae, cari sorte indoluere magistri,  
Auxiliumque ferunt. Venit legatus Epaphras <sup>60</sup>,  
Ingens Aemathiae pastor delectus Epaphras,  
Pignora certa ferens longum testantia amorem,  
Ne quid deficeret patri, quorum indiget usus.  
Venit ab Iconio indignum lenire dolorem  
Gratus Onesiphorus <sup>61</sup>; duras non ille catenas  
Erubuit capti, noctemque diemque revisit.



At vero Paulus vix magnam venit ad Urbem,  
Hoc unum cupiens late protendere Christi  
Nomen, Judaeum proceres ad nota vocabat  
Concilia aetherei pandens mysteria regni.  
Quos simul oblatam vidit contemnere lucem;  
At bene regalem Spirabilis Aura prophetam  
Affatur, vestrosque jubet damnare parentes:  
Auribus adstabunt nequicquam, oculisque videbunt <sup>61</sup>,  
At non obtusa poterunt comprehendere mente:  
Ollis pectus hebet foeda pinguedine septum.  
At divina salus vos aversata reposcet  
Caecigenas gentes: has vestra in jura vocabo.  
Dixit: vix falsa sub proditione prehensum  
Novit, et insontem proclamat Curia captum,  
Egreditur: fantem, collegia magna, Quirilum  
Pontifices stupuere: stupet tota aula Senatus  
Infremuitque Leo <sup>63</sup>, trepidis sed inhorruit armis  
Incassum. Virtus tota tarsensis in Urbe  
Insonuit, magnaeque aderat novitatis amore  
Annaeus Seneca <sup>64</sup>, assuetus latebrosa reperta  
Argolici ingenii, et naturae quaerere causas.  
Non secus ac puro micat aethere fulgur, in auras  
Continuo subita exardescere lumina cernunt  
Attoniti, sed iners mortalia corda relardat  
Segnities; trepidans majestas romula pallet  
Ipsius aspectu orantis, jaculataque linguae  
Fulmina perstrinxere inopina luce tuentes.  
At quae divino crevit fiducia regno?  
Qui nuper Christum agnôrant, mysteria rerum  
Cernentes fantem audacter, posuere timorem,  
Liberiusque Dei verbum didicere fateri.

Qui caecam invidiam propter graviora putabant  
Damna inferre olli, Christi inclarescere nomen  
Invitis videre oculis. Dum densa malorum  
Circum turba stelit, vincto succurrere cerlant  
Christigenae, oblatoque dies concrevit in omnes  
Nutrimento amor et sacri concordia coetus.  
It Christum Paulus populosa per oppida spargens,  
Et nova complevit totam sapientia Romam.

At phlegelontacis Erebi damnata cavernis  
Pestis, Christiadum laetum consurgere regnum  
Segniter atque suas poterat spectare ruinas?  
Cum strepitu agglomerans graviora incendia surgit,  
Surgit inexhausto Solyme implacata furore.  
Nulla fuit regio, quo non pervaserat ingens  
Progenies Judae. Jampridem septa praecaltis  
Montibus et circumpositas contingere gentes  
Non audens, gelido Bethles vix vagiit antro  
Editus Omnipotens Puer, ilicet omnis ab oris  
Egreditur patriis, odii que oblita vetusti  
Semina longinquum sese diffudit in orbem.  
Quas non insedit judaea colonia terras?  
Plurima per magnam Europen Lybiamque Asiamque  
Tutam constituit sedem, commercia pacis  
Exercens cumulansque auri argentine metalla.  
Non tamen immemores sese confundere mixtis  
Gentibus: antiquae tutantes munera sortis  
Legiferi servant Moysis mandata, sacrosque  
Conventus cogunt, Solymaque a principe pendent,  
Qua majus templum genti caput extulit uni:  
Et quae Concilio in magno veneranda Senatus  
Curia dictaret, dociles praecepta facessunt.

Jamque adeo nobis nonus processerat annus,  
Ex quo pacati imperii tractabat habenas  
Claudius: ipse animo recolens benefacta sagacis  
Agrippae, Hebraeos magno est amplexus amore.  
Ut vero Hebraei (veteres neque mente dolores  
Exciderant) Christi sanctum increbescere semen  
Aegris spectabant oculis, Solymae insuper ingens  
Concilium missis exploratoribus audet  
Extremum Christo, si fas, indicere bellum;  
Quae tenuis hac rabies Solymis exarserat unis,  
Acrius exoriens toto bacchatur in orbe.  
Christiadas contra truculenta assurgit ubique  
Seditio: Hebraei cognata per agmina murmur  
Spargunt et sese foeda exhortantur ad arma,  
Terrificantque animos facta atque infecta canentes.  
Claudius edicto tota procul ejicit Urbe  
Hebraeos, quique Hebraeis confundimur ipsis,  
Innocui quamvis, Roma migrare jubemur <sup>65</sup>.  
Quale iter incoeptum secura mente viator  
Accelerat, secumque animo memor antemalorum  
Laetatur, finemquae viae finemque laborum  
Praecipiens, subito si inopina pericula motu  
Mortis in extremos deturbavere dolores,  
Turbatur cursu laetissima mentis imago;  
Haud aliter mihi volventi laeta omnia trislis  
Nuncius incubuit mutataque gaudia luctu.

Egredior Roma, paucis comitantibus: at non  
Exul, et externas abeo peregrinus in oras.  
Credidit omnipotens Nato regna omnia mundi:  
Ipse mihi Natus vigili quaerenda labore  
Credidit. Hesperii graviora negotia mundi

Tulatus praesens eoum ventor ad orbem,  
Deserti partem consolaturus ovilis.  
Nec credo hoc ipsum magno sine numine factum  
Coelicolum. Judaeam omnem Syriamque Asiamque  
Traxerat in geminas ingens discordia partes <sup>66</sup>.  
Namque tenax veterum morum Judaea propago,  
Aspectans gentes in Christi castra receptas,  
Communes aras, consortia sacra vetabat,  
Atque sibi soli credens allata salutis  
Munera quaerebat solemnia prisca tueri,  
Atque recisuros adhibere in corpore cultros,  
Siqui Christiadam excuperent dare nomina septis:  
Dixisse Isacidis Mosen legem omnibus unam.  
Maxima res peragenda, viri: mecum ipse voluto  
Legifer audivit quae Moses aethere quondam:  
*Ipse tibi <sup>67</sup> mandata dabo, regnoque regendo  
Immotam legem, et ritus sollemnis honorem.*  
Porro Naturae arcana, atque potentia jura  
Quae Deus humanis animis primo indidit ortu,  
Nulla potest delere dies. Solemnia ritus  
Singula spectabant, perfecto tempore, Jesum  
Venturum, adventuque Dei cessere latentes  
Ambages rerum, praeae cessere figurae.  
Haec ego: confestim Jesu monimenta recurrunt,  
Si quando in sanctum nomen veniamus in unum,  
Affore polliciti <sup>68</sup>: bissenos cogere fratres  
Constitui, cunctis firmum immotumque tenendum,  
Quidquid dictaret caelo Spirabilis Aura.  
Tempus erat populis morem dictare recentem  
Qui coeptus Solymis toto constaret in orbe.  
O Chanaam, Chanaam, populo quae abrepta profano

Sacrificis suberas regnanda parentibus, ( Ipse  
Concessit Deus et certa statione locavit  
Errantes ducens deserto errore viarum)  
Auspicio tantorum operum dignata superbo  
Exulta, et tantos laetae cape sortis honores.  
Qua Salomon templum superas eduxit ad auras  
Augustum, templum felix! nō perfida proles  
Sponte sua enatae clausisset lumina luci;  
En novus ingreditur Christi nova templa sacerdos,  
Gloria quae major toto illustrabit in orbe.

Convenere quibus caelo concessa potestas  
Pascere Christigenas, varia regione vocati,  
Agmen apostolicum: nobis socia agmina jungunt  
Presbyteri: excepit Solymaea Ecclesia coetum,  
Primum concilium Patrum, ingentemque Senatum.  
At nos, quandoquidem magnis de rebus agendum,  
In Christi unanimis collecti nomine primum  
Suppliciter laeti sanctam celebramus ad aram  
Patremque et Natum et te, Spiritus alme, novumque  
Poscimus auxilium et dubiis oracula rebus.  
Mox in Concilium missos subsellia in orbem  
Accipiunt; vigili quaesitum indagine verum,  
Atque ubi per varias ibat sententia voces,  
Talibus exhortor nutantia pectora dictis:  
Magnanimi Proceres, et vos quoscumque supernus  
Spiritus electo voluit praeponere ovili  
Custodes fidei; signum admirabile caeli  
Commeminisse reor, quod magna Caesaris urbe  
Monstravit Deus: ipse Deus rerum obtulit ingens  
Principium, posuitque novi fundamina mundi.  
Quid? si qui penitus corda interiora penetrat,

Consilii decreta sui testatur apertis  
Prodigiis? doctos mysteria sancta, salubri  
Lustratos unda dignatur Flaminis aura?  
Hebraei Gentesque <sup>69</sup> ergo discrimine nullo  
Distamus, simul ac caelesti luminis igne  
Emicuit divina fides animasque novavit.  
Quid veteres ergo sine re, sine nomine ritus  
Commemorare juvat? sociis imponere pondus  
Excupimus, quod nostri humeri jam ferre recusant,  
Vix nostri tulerunt patres <sup>70</sup>? Sed gratia Christi  
Sufficit: humanum Christus genus omne redemit,  
Atque unum fecit populum, communibus aris  
Participem terris, caelique ad regna vocatum.  
Talia fatus eram: subsellia cuncta movebat  
Veridicum monitum, et caelestia signa canentes  
Gaudebant comites meritas persolvere laudes  
Supremo auctori rerum. Tum laetus Iacob,  
Iacob qui primus solymaei pastor ovilis,  
Meque audite, inquit: neque ego non vera fatebor,  
Quae docuit Petrus: divina voce vocavit  
Gentes ipse Deus: populum sibi finxit, et olli  
Nomen et imperium terras concessit in omnes.  
Haec eadem quondam vales miranda canebat  
Falidicus: *Vestras <sup>71</sup> post ipse revertar ad oras,  
Atque tabernaculum Davidis, quod decedit, omne  
Restituam. Spatia ampla domus, superante ruina,  
Aedificabo volens, quam toto ex orbe requirent  
Terrigenae dociles, qui nostrum nomen habebunt.*  
Quod Deus aeterno foedus concepit ab aevo,  
Nunc opere explevit. Mea stat sententia, gentes  
Si dociles dominum mutata mente reposeunt,

Si caveant se concubitu incestare profano,  
Et simulacra Deûm fugiant, et sanguine foeda  
Viscera taurorum, quae vis elisit iniqua,  
Amoveant mensis, satis est. Nec plura locutus  
Antistes Solymae; nutuque et murmure laeto  
Assensere omnes. Toto plaudente senatu,  
Perscriptum decretum ingens, Syriamque per omnem  
Perque urbem Antiochi et cunctas dispergitur oras.  
Ex illo genus humanum, qua utrumque recurrens  
Adspicit oceanum Titan, communia jura  
Accipit: Hebraeus Graecusque et Barbarus <sup>72</sup>, ingens  
Quos murus tenuis hac toto secrevit in orbe,  
Aequantur: qui animae donum immortale creavit,  
Ipse Deus prima maculatam labe redemit,  
Mutatum instaurans concordi foedere mundum:  
Nomine Christiadam populus nec tempora noscens,  
Nec metas rerum totum amplexabitur orbem.

Non ego vestra sequi valeam vestigia, sancti  
Christiadam Proceres, qui sancti jussa sequentes  
Concilii cunctas vexilla undantia ad auras  
Panditis, et populis Christi bona nuncia fertis.  
Quis vestros valeat cursus aequare? nec aestus  
Solis flammivomi remorantur et horrida cano  
Bruma gelu: laetis animis per tela, per ignes  
Vaditis immemores vitae. Vos tanta fatigat  
Cura novo in melius populos educere cultu!  
Mira dei! Macedo <sup>73</sup> duplicis confinia mundi  
Europam atque Asiam per mutua foedera junxit,  
Constituitque urbes longis compendia terris.  
Quae patuere diu saevi commercia belli,  
Christus apostolicis facit ostia magna triumphis.

Quae silice et saxo statuit monumenta viarum  
Roma potens, per quas subitam latura ruinam  
Agmina cursarent, mutata sorte, remittent  
Nuncia coelestis vitae. Qui splendor euntes <sup>74</sup>,  
Qui comitatur honos! quae magnae munera pacis  
Exportant populis! Demissam attollite frontem,  
Terrigenae, atque animo vestras praevertite sortes.  
At mihi dulce fuit prolem enumerare meorum,  
Eoas lustrare acies, gentesque ducesque  
Lustrare hesperios, gemino qui crescit in orbe  
Christiadum nascens communi foedere mundus,  
Et nova Pontificis romana edicere regna.

Quamvis prima Deo Solyme certamina movit,  
Nostrae prima dedit genti incunabula: quando  
Sacra specus Bethlem, funestaque Golgotha honestant  
( Altera principium, periturique altera Christi  
Testamentum ingens ), magnam moderaberis urbem,  
Jacob, atque urbi tantos memorabis honores.  
Nec quae Stratonis mutavit nomina Turris <sup>75</sup>  
Caesarcos referens titulos et grandia facta,  
Urbs populosa virum sacris desiderat aris  
Praelatum. Quoniam volitantia lintea caelo  
Hic primum visa, hic caeca caligine mersis  
Janua caelestis patuit, castra horrida linquens  
*Cornelius* lento exiluit convertere pilo  
Pastorale pedum, reserataque pascua monstrat.  
Per juga Carmeli aëria benevolentia cedro,  
Eliae quae nomen adhuc strepitusque rotarum  
Igniferos repetunt, loca sancta nepotibus olim,  
Pascentes deducit oves qui nomina factis  
Exaequat *Fidus*. Judaeae proxima Gaza



Horrida trigemini refugit spectacula Marnae <sup>76</sup>.

Tuque etiam, Syria, innumeros mirata triumphos  
Christiadum, salve. Meminit turrita Damascus  
Quadrupede ex alto trifidi ceu fulminis ictu  
Prolapsum Paulum ingentem, Christumque fatentem.  
Pastor *Ananias*, cui maxima gloria caelo  
Contigit augustas fidei praepandere portas  
Magnanimo heroi, tota fundavit in ora  
Cultus fundamenta novi: renovata Damascus  
Mendaces Soli renuit persolvere honores  
Et Venerem Alphacidem cultu incestare profano <sup>77</sup>.

Cautibus aëriis fluctus speculata marinos  
Slat regina Thyros, neque Sidon aemula cedit  
Imperio maris aut mercatoribus orbe  
Submoto appulsis. Fervent navalia classe  
Innumera, rubro saturatur murice et auro  
Purpura contexto peregrina aulaea domosque  
Ornatura. Tamen vastas se immiscet in aedes  
Insinuans pictas. Peragrata per oppida Paulus  
Uni indulgentem lucro rebusque caducis  
Edocuit gentem, caeloque adaperla vocavit  
Lumina, sidereos melior quo meta per orbes  
Non peritura sedet Deus unus maxima merces.  
Praecelsas Berythi turres, Ptolemaida ponti  
Spernentem furias et Biblon nobile *Quartus*  
Instituit: totaque potens inclaruil ora  
Pancade posita irrigui Jordanis ad undas.  
Extat adhuc signum solido de marmore, Christe,  
Quod tibi rorantes mulier perpessa cruores <sup>78</sup>  
Imposuit, longos monumentum insigne per annos.  
Illustres meritis omnes, virtutibus omnes

Antiochia urbes vincit, palmisque decoris  
Ditior eois praefecit adorca regnis.  
Hic primum doctrina, uno quae patre creatos  
Terrigenas docet, et cunctas in vincula gentes  
Dulcia conjungit, magnis pulcherrima factis  
Emicuit sancti ostendens miracula amoris.  
Dum fureret malesuada fames et tristis egestas,  
Quam cecinit vates praesago carmine Agabus 79,  
Aruerant herbae, victum seges aegra negabat;  
In capita hic primum collata pecunia <sup>80</sup> fratrum;  
Inde manus properans Syriam festina per omnem  
Succurrit cunctis, nullo discrimine, egenis.  
Aspera cuncta minans judaea per oppida vortex  
Ingruerat: dubio fugientes tempore rerum  
Christicolae errabant, neque erat vestisque cibique  
Copia: maluerant sub aperto vivere caelo  
Atque extrema pati, quam Christo fallere dextram.  
Excipit antiochena volens Ecclesia, dumque  
Insequitur gladio feritas armata minaci  
In Christo genitos et sancta in signa receptos,  
Adjuvat hospitio consolaturque dolentes.  
O, salve mihi cumque meo firmata labore  
O Domus, et nostris statio benefida colonis.  
Quanta laetitia exultas occurrere Patri?  
Quo studio orantem comitas sequerisque monentem?  
Qua tamen humanum maiori efferbuit aestu  
Ingenium, et veris certatim falsa remiscens  
Graecia deflexit variarum ambage viarum,  
Cura fuit major lucem monstrare coortam.  
Praecipue duo nequitiae incunabula campos  
Helladis, et clarae campos tentamus Achaïae.

En magnam ingreditur mentitae Pallados urbem  
Tarsensis, lustransque virum subsellia, mille  
Inter divorum effigies, altaria cernit  
Sacra *Deo ignoto*. Micuerunt lumina flammis  
Magnanimo heroi: caelesti saucius igne  
Constitit in medio, dextraque silentia poscens:  
Salvete, o Proceres, inquit, lectissima Grajum  
Pectora. Per terras quis vestram nesciat urbem?  
Sed si fama canit vestrae decora inclyta gentis,  
Ipsa superstitio doctis it maior Athenis <sup>81</sup>.  
Namque diu peragrans thermas, fora, compita, centum  
Conspicio effigies, et ahenea signa Deorum.  
Ast me per vestram decurrantem protinus aulam  
Non tam majestas magni veneranda senatus  
Perculit: in primis visa hic me perculit ara,  
*Ignoto ara Deo* <sup>82</sup>, votis quae maxima vestris.  
Eja agite huc paulum attentas convertite mentes,  
Quodque ignorantes colitis, cognoscite Numen.  
Qui mundum effecit Deus et quaecumque per orbem  
Cernitis, Omnipotens templis non indiget: ille  
Spiritus arcano complectitur omnia flatu.  
Gentibus humanis, quot quot plaga lucida caeli  
Irradiat, variae sortilis munera vitae  
Omnibus una eademque fuit communis origo.  
Ipse potens hominem viridanti condidit horto  
Terrigenam: ipse dedit vario succrescere foetu,  
Diversisque locis varias consurgere gentes,  
Tempora constituens, terraeque habitabilis oras.  
Quid procul externos certatis quaerere divos?  
Stat prope cuique Deus noster, latet intus, in uno  
Vivimus atque sumus, cunctique movemur in ipso.

*Inde homini genus est: vestra de gente poeta* <sup>83</sup>  
Sic olim. Lapidē aut auro argētiq̃ metallo,  
Terrenisque Deum fas est componere formis?  
Degeneres curae, vacuae deliria mentis  
Vim fecere Deo: per turpia cuncta ruentem  
Evocat ipse hominem vitae melioris amore.  
Ah! vos paeniteat maculis scelerasse pudendis  
Sidereas animas: terraeque affigere sanctam  
Aurae particulam divinae, et semina caelo  
Indita poeniteat turpi deperdere limo.  
Talīa Tarsensis: mirum, si fulmine vocis  
Flexanimae steterunt stupefacta sedilia Patrum?  
Nonne *Dionysium* sacro descendere monte  
Mutatum adspicitis? Paulum caelestia fantem  
Audivit, sequiturque pius: nunc inclytus aris  
Praesidet Antistes doctas moderatus Athenas <sup>84</sup>.

Et quae consurgit bimari vallata Corinthus  
Aequore, clara opibus quondam, sed clade cruenta  
Clarior, et foedo vitiorum perditā coeno,  
Exiluit puros pietatis noscere fontes;  
Dum Cotys, impurus daemon, tremefactus ad urbem  
Adventare videt Sanctos, doluitque tuendo  
Damnosae veneris fano migrare puellas,  
Velatisque comis Christi se dicere sponsas.  
Cresce corinthiacis, Ecclesia, moenibus <sup>85</sup>: aude,  
Et animus fortis, lato juvenescere campo.  
Nola domus *Titi* quantos pietatis odores  
Expirat! Princeps judaea *Crispus* in aula  
Sacrificis vatū labiis praedicta tuetur,  
Et Christum sequitur, neque *Sosthenis* igneus ardor  
Cedit verberibus. Quis nomina vestra silebit,

O *Fortunate* et *Cai*? nec *Achaïce*, flamma  
Te minor accendit; vitali spargitur amne  
Tota domus *Stephanæ*; tecta interiora recludit  
Alma *Chlœ* Christo, magnosque indicit honores.

Tu quoque, *Creta* <sup>86</sup> potens, atque urbibus inclita centum  
Insula, delectos spectas adolescere coetus.  
Heu nimium miseram tenuerunt somnia gentem!  
*Titus* adest Pastor, *Titus* Tarsense magistro  
Missus presbyteros totam sacrare per oram.  
*Cretæus* mendax <sup>87</sup> vulgo segnisque vocatus  
Ingluvieque vorax, mutata mente, recentes  
Exequitur leges, moremque inducit honestum.  
*Artemas* testis, qui insueta luce coruscat  
Virtutis: testis *Zenas* consultus in omni  
Doctrina juris, Christi pius assecla factus.

Ecce autem auricomi solis sub lumina Paulus,  
Dum dubius sopor irriguos complectitur artus,  
Extemplo insolitam vidit splendescere rerum  
Effigiem. Macedo contra stetit <sup>88</sup>, ultro precatul:  
Quid non *Aemathiam* venias, nostrosque labores  
Juveris? eja Deum miserae da noscere genti.  
Paullum deseruit somnus, rectaque nivalis  
Tendit in *Aemoniæ* campos <sup>89</sup>, quo magna vocabant  
Omina divinum Christi diffundere semen.  
Quid vero illa furens rapido fremit ore puella?  
Pithius exagitat furor illam: compita lustrat  
Vaticinans, pretioque ævi responsa futuri  
Venundat populo. Casu concussus acerbo  
Tarsensis manet; illa viros stupefacta tuctur  
Concursu in magno, et nutu obsequiosa salutat.  
Tum miseret Paulum, jussitque abscedere membris

Tartaream pestem. Servata Virgine, custos  
Infremuit dominus. Subito turbante tumultu,  
Pacis latores lapidosa grandine tundunt,  
Discerptosque flagris tenebroso in carcere claudunt.  
Sed divina viros servat custodia: magnae  
Contremuere specus, portisque patentibus ingens  
Captivum numerus superas evadit ad auras.  
Christiadum manet una cohors. Tremefactus abibat  
Janitor ante pedes Pauli, Christumque professus  
Ipse domusque sua irriguo lustrantur in amne.  
Proh mirum! expulsos turbata protinus urbe  
Sanctos pauperior tatrix et carceris atri  
Custos suscipiunt atque auxiliantur egenis 90.

At Silam Paulumque rapit diviniior aura.  
Amphipolim intröeunt, culloque ab Apolline dicta  
Oppida, thermaïcique sinus submota recessu  
Moenia contendunt, qua quondam natus Amynta  
Thessalicas magna perfregit clade cohortes.  
O *Jason*, Jason, extento notus in aevo  
Vives, qui sanctos lecto interiore recondis.  
Orantes magnus numerus matrumque virumque  
Audierunt: terrarum inter stygiosque furores  
Aemoniis surgit victrix Ecclesia campis,  
Thessalonicenses acquans virtute Philippis 91.  
Illis dux *Epaphras*, istis bona pabula praebet  
Pastor *Aristarchus*: movet igneus ardor utrosque.  
At rigidi silices praeduraque robora cedunt  
Ultro tibi, pietas: tu saxea pectore corda  
Abripis, inque vicem tenera mage mollia carne  
Sufficis alloquio. Quamvis silvestria corda  
Thracia progeneret, torvoque horrentia Marti

Sanguinis humani gaudet spectacula ferre,  
Complexa est nostros ritus: Heraclaea <sup>92</sup> potentem  
Nectarei rore eloqui suscepit *Apellem*:  
Jesum Haemus repetit, repetit Rhodope ardua Jesum.

Quanta Lycaoniam narrantur signa per oram,  
Gentesque excutiunt omnes? Conterrita Derbe,  
Et Lystre ingressos sanctos mirantur, et ipsos  
Caelicolas vultu humano apparere, Jovemque  
Mercuriumque ratae humanis errare figuris  
Ingentem properant ollis mactare juvenum.  
Et facerent: sed culta vetat facundia Pauli,  
Debita sacra Deo monstrans, qui condidit unus  
Et caelum et terram. Veri facundia praesens  
Raptat *Timotheum* juvenem, partoque triumpho  
Ingens bellator stetit auxiliariis armis  
Sub Christi vexilla, ducis vestigia sectans.  
At tu jam felix in caeli templa recepta,  
Grandaeva o *Lodoys*, tuque o sanctissima mater  
*Eunice* <sup>93</sup>, caro quondam advigilare puello  
Gavisae, mentemque fide formare tenellam,  
Quae modo caelesti capitis nova gaudia mente,  
Cum pastoralis praecinctum tempora vitla  
Cernitis, atque Ephesi positis operarier aris?

Non ego te asiacas celebris Regina per urbes  
Transierim, o Ephese: ipsa forum venale propinquis  
Una pates populis, totaque inclaruit orbe  
Foeda superstilio. Sed quaestus divitis artis  
Deficiet sensim, et turpis simulacra Dianae  
Conflata argento atque auro dispersa feruntur,  
Adventante Deo, rapidis ludibria ventis.  
At non his titulis regio illaudata manebis

Quam Solyma excedens sedem delegit amicam  
Judaeas inter Virgo sanctissima matres <sup>94</sup>,  
Quae superum ab puro concepit Flamine Regem.  
Vix vulgum innumerum sacra renovavimus unda,  
Impositaeque manus, supero vis ignea caelo  
Advenit, arcano velut icti numine solvunt  
Insuetis laeta ora sonis, panduntque futura.  
At tibi duritiem antiquam, Judaea propago,  
Nil mollire valet: Christum tu rejicis: ipse  
Hospitium modicum, benefidi tecta Tyranni <sup>95</sup>  
Ingreditur, docilemque docet mysteria plebem.  
Et pugnabis adhuc? Dictu mirabile! febres  
Diffugiunt jussae, possessaque membra relinquit  
Ira stygis violens in Jesu nomine. Jesum  
Septeni *Scaevae* <sup>96</sup> nati per compita nostrum  
Auxilium appellant, dirasque in Tartara trudent.

Non ego te Ponto mihi nata Ecclesia linquo.  
Ipse pererratas utroque in littore gentes  
Inviso gaudens; quoquo vestigia firmo,  
Assurgit lectus sacras Antistes ad aras.  
Salvete, o Galatae <sup>97</sup>: occiduis exercitus oris  
Gallorum impavido quondam ductore remotae  
Per campos Asiae Phrygia insedistis aperta  
Immixti Hebraeis: at nunc ingentia claustra  
Quae geminam tenuere diu in contraria gentem,  
Procubuere. Quid o ritus jactatis avitos?  
Percussum foedus bipatentis vertice Sinæ  
Servilio genuit, nunc, Christi pace sequestra,  
Allera Jerusalem <sup>98</sup>, caelestis, libera natos  
Parturit innumeros, et libera jura recludit.  
Unica justitia est cunctis, legem edidit unam,



Quae cunctos mundi populos moderatur, amorem.  
Tuque mihi semper salve beneculta Colosse 99,  
Cui pastor sapiens *Epaphroditus* opima  
Pascua suppeditat: vosque olli, *Archippe* minister,  
*Nymphaque* non humilis mulier lenire labores  
Quacritis, atque domo rebusque juvatis egenum.

Claudia tempestas latia subsederat Urbe.

Ast ego tot terras laetus lustrasse beatas  
Romam expectantem redeo, caeloque favente,  
Christiadum reperi numerum affluxisse novorum,  
Innumerasque horto in magno revirescere plantas,  
Quas, Petro absente, irriguis divinitus undis  
Nutrierat Deus ipse, aura educasque salubri,  
Maturo dederat passim dilescere fructu.  
Quae, Line, quaeve tibi, Clete et tibi, candide Clemens,  
Par tantis meritis referetur gratia? magna  
Italia natos neque enim migrare cōegit  
Seditio Roma, meque excedente seculi  
Pascere romanum per pingua pabula ovile.  
Dum nos per cunctas opus admirabile terras  
Ordinur, dispersa sacri vos ordia regni  
Prima per Italiam, et tenui pendentia filo  
Munistis, lectosque duces a principe Roma  
Et Romam certo junxistis foedere primo  
Pontifici coam peragranti sideris oram.  
Vobis certa Deus persolvat praemia caelo;  
Nec tamen immemori romana Ecclesia corde  
Posthabitos spernet; quaecumque haec nostra verendi  
Majestas solii, seu formidabile pondus,  
Angelici quod porro humeri perferre recusent,  
(Neu fugite officium) vos grata Ecclesia Romae

Rerum usu doctos ad munera magna vocabit <sup>100</sup>.

Ut Romam veni, ut lactis procedere cuncta  
Auspiciis reperi, caelo monet ipse Redemptor  
Accelerare gradum: sanctis splendoribus orno,  
Ut coepi, Europen, et Christi regna propago.  
Gallia jampridem luce exhilarata nitenti.  
Laude pudicitiae caelo capita alta ferentes,  
*Magdala* <sup>101</sup>, quaeque pari in Christum flagrârat amore  
*Marta* soror ( *Marcella* suas ancilla secuta  
Est dominas ), simul ac Solymis truculenta coorta est  
Seditio, lethoque truci videre peremptos  
Discipulos, leve navigium quod forte paratum,  
Conscendunt, alio quaerentes orbe salutem.  
*Lazarus* e tumultu revocatus voce magistri  
Il comes, externas obtestaturus in oras  
Ingens prodigium. Fertur sine remige navis  
Vim pelagi superansque minas: delectaque pubes,  
Massiliae, ductante Deo, tetigere beata  
Littora, et optata laeti exponuntur in ora.  
At nunc abstrusas, gentes, praepandite portas.  
Quos mittit mea Roma viros, optata reportant  
Nuncia solamenque malis, juga barbara collo  
Dejicient, laetamque docent traducere vilam.  
Ceu, sole exorto, longe lateque micantes  
Erumpunt radii, romana e sede profecta  
Illustris legio per cunctas diditur oras.  
Bellacem sobolem <sup>102</sup> meliora ad fata vocatam  
Ingreditur ductor *Martis* cognomine dictus  
Burdigalin, Lemovicen, doctamque Tolosam  
Sacris erudiens: portus Arelatis amicos  
Succedit *Trophimus*: natae hinc ad praelia gentes

Cenomanes *Julum* accipient Senonesque *Sabinum*,  
*Ursinum* Biturix: Rhaemi custodia *Sixti*.  
Et te quam medio, seclusa Britannia <sup>103</sup>, ponto  
Omniparens natura foris veniente fragore  
Fixit inaccessam, magnorum dignus avorum  
Arimathacus felici allabitur auso,  
Qui Christum exanimum summo dignatus honore  
Composuit: Crucis attollit venerabile signum,  
Londinique arces validas, notamque Quirino  
Camalodunum docuit praecepta salutis.  
Nec te, quae umbrosis gaudes, Germania <sup>104</sup>, silvis  
Ignotasque ferens stirpes, ignota locorum  
Nomina Romanis, ita libertatis avita  
Pignora tutaris, nullo superabilis astu,  
Praetereo. Arduenno, Tungri, procedite saltu,  
Tuque Agrippinae celebrata Colonia, vosque  
Bellaces Treveri, vix legi assueta latinae  
Oppida, *Materni* et *Valeri* sanctissima jussa  
Perficite: ipsa etiam praeclara Moguntia, gaude  
Sorte tua: *Memmi*, *Catalauniquae* pique  
*Crescentis* sub terna voca vexilla colonos,  
Quos Rhenus fluitans sinuoso vortice lambit.  
Nec te praetereo, pugnax Hispania <sup>105</sup>: celsae  
Pyrenes gelidas gaudent transcendere cautes  
Septeni proceres: praeclarum nomen avorum  
Augeat *Torquatus*; *Ctesiphon* contemnit Achaeae,  
*Caecilius* Sophiae spernit figmenta latinae,  
*Hesychiusque* potens lingua, *Euphratiusque*, *Secundusque*  
Atque *Indelicus*. Quae nomina, quantaque virtus!  
Salve, sancta acies, quae nullo milite, nullis  
Auxiliis rerum, nullis spectabilis armis

Egrederis Roma, insuetas committere pugnas.  
Vincere vos animos, non corpora quaeritis, et quos  
Martia Roma armis nequit componere, Roma  
Christiadum innumeris gestit superare triumphis,  
Qui nullas victis lacrymas, suspiria forsan  
Victori permulta ferent, et funerá amara.

Tum verò Marcum <sup>106</sup> his compello vocibus ultro.  
Marce, comes mihi jamdudum fidissime, Romae  
Omnia felici video procedere cursu.  
Munia te graviora manent: interpretes in urbe  
Sufficiet Glaucas; alius te flagitat orbis.  
Quanta Aegyptiacis horrens nox incubat oris?  
Stat septingemini foecunda sub ostia Nili  
Dives Alexandria, potens, Carthaginis altae  
Postquam arces cecidere solo, magnae acmula Romae:  
Quas alit Aegyptus, quas Africa terra potentes  
Urbes exuperat, statio benefida carinis,  
Qua mercatores Asiae Europaeque recurrunt  
Spe lucri certa venalem exponere gazam.  
Gentibus e variis ter magna Ecclesia surgat,  
Quae post romanam primo succedat honori <sup>107</sup>.  
I felix, quo te caelo Deus evocat alto.

O Christi genus, o sancto fundata cruore  
Agmina, quae totum passim dispersa per orbem  
Omnia dius amor jungit, spes omnibus una,  
Una fides, Christi sanctum concrescite ovile.  
At sperare licet: terrarum maximus orbis <sup>108</sup>,  
Haerebit Romae junctus compagibus arctis.  
Antiochia parens Asiae imperat, Africa tellus  
Paret Alexandriae, urbes supereminet ambas  
Magna gubernatrix rerum, pulcherrima Roma.

Tres dius magnas selegit Spiritus urbes,  
Quas rerum caput et sancti primordia regni  
Esse dedit: triplici prognatae e fonte loquaces  
Dissiliunt lymphae: morientia sidere rura  
Aestifero irriguus solatur roscidus humor,  
Pralaque jucundo rident depicta virore.

Quatuor interea undanti flammanlia luce  
Candelabra <sup>109</sup> nitent, totumque allata per orbem  
Nigrantes phlegethontaeae caliginis umbras  
Propellunt. *Jesus coepit facere, atque docere,*  
Factaque doctrinamque Dei vulgare remotis  
Incumbunt populis divino numine ducti  
Quatuor heroes. Galilaea e gente coactor  
Matthaeus linquens turpe exiliale tribunal  
Explicuit doctum hebraeo sermone volumen,  
Concessas olli pergens invisere gentes.  
At mecum Marcus submoto oriente profectus,  
Ut primum Romae patresque equitesque tueri  
Quaerere doctrinam, flammis caelestibus actus,  
Plurima quae audierat nostro narrantis ab ore,  
Viventis Christi immortalia facta sategit  
Doctiloquis latia lingua committere chartis,  
Atque Deum atque hominem stupefactae ostendere Romae.  
Te quoque, fide comes Pauli dulcissime rerum  
Luca, qui longa ingenium assuetudine doctum  
Sacris vovisti studiis, quae dia voluptas  
Mendacis Sophiae nebulis ad maxima vera  
Christiadum elicuit? totam turbabat Achaiam  
Bocolasque urbes fuco medicata docentum  
Calliditas: sacris ne qua fallacia factis  
Reperet, ad Grajos graio sermone locus.

Luce locas verum, fabellas pellis aniles.  
Te major terris rapuit divini<sup>or</sup> Aura,  
Candide Joannes: dio requiescere corde  
Sortitus quondam, divino e pectore rores  
Potans largifluos, caelique abstrusa recludens  
Principio omnipotens et inenarrabile Verbum  
Explanas, verbumque Deum: qui cuncta per ipsum  
Fecit, nec quiddam non ipso auctore creatum.  
Talia per cunctas divina volumina terras  
Lucida inextinctae jaculantur tela diei.

At si me Romae immotum remoratur ovile  
Succrescens, humeris totus superincubat orbis.  
Europamque Asiamque oculis vigilantibus erro  
Hortaturus oves omnes oviumque magistros.  
Quam multi Jesum judaea per oppida nôrant,  
Seu cum immortalī divinae frontis honore  
Alliceret, dioque animos sermone teneret,  
Sive resurgentem reserati e mole sepulchri  
Mirati, et domito extollentem Acheronte trophaca;  
Quam multi Isacidae signum Spirabilis aurae  
Obstupuere; Viros dextra Deus omnipotenti  
Bissenos arcana loqui et caelestibus egit  
Prodigiis naturam ipsam parere loquelis  
Altisonis, cursuque suas suspendere leges;  
Quam multi innocuae stipendia prima merentes  
Militiae, Christi noti virtutibus omnes,  
Hostili superante odio, migrare coacti  
Per Ponti ripam et latam Bithinida, perque  
Cappadocum Galatumque Asiaeque uberrima regna;  
Dispersos sequor, et patrio complector amore:  
Longinquae quamvis exul Babylonis <sup>110</sup> in ora,

Alloquor in Christo et sanctae dono oscula pacis.

At tibi quae virtus et inexuperabilis ardor,  
O verbi manifesta fides? te nulla potestas  
Occulere valeat, simul ac terrena revisis  
Concilia, et primae ostendis mysteria lucis  
Caecigenis populis. Ut, sole oriente, tenebrae  
Effugiunt, lumenque novum de lumine manat;  
Matutina prius montana cacumina lampas  
Irradiat; mox auricomo fulgore coruscant  
Aequora camporum et nemora in convallibus imis;  
Non aliter tibi contingit, mirabile Verbum.  
Te verique tua sparsas de lampade flammās  
Ut semel acceperē animi, docilesque tenebunt,  
Inque vices aliis fraterno munere reddent  
Sponte sua, Tuque abrumpens obstantia cuncta  
Omnigenum peragras radiis caelestibus orbem.  
Scilicet humanis animis natura creatrix  
Indidit arcanas rerum perquirere causas,  
Tuque viam monstras: duce te, mortalibus aegris,  
Ne labyrinthaei rapiant vaga devia flexus,  
Aërias superare plagas, et linquere nubes  
Sub pedibus datur atque ipsum prope cernere solem.  
Nonne putem veri ad normam divinitus actas  
Formatasque hominum mentes ""? cognata ministrat  
Lumina Religio Christi, offusamque resolvens  
Caecis noctem oculis veteres integrat honores,  
Natura stimulante ipsa, caeloque juvante.

Agmen apostolicum per totum vadimus orbem.  
Non "" gravidæ telis humero sonuere pharetræ,  
Non lateri incedunt densis horrentia pilis  
Agmina, non acies ferri mucrone corusca,

Copia non auri quocumque potentior iclu  
Fulmineo, magicac non incantamina linguae.  
Exuli saccli pompis illustribus una  
Induimur virtute Dei: rerum omnium egenis  
Omnia suppeditat caelestis gratia, cunctis  
Pectora thesauris integra opulentior ornans,  
Et terrae statuit dominos caelique potentes.  
Sic duodena cohors terrae deserta maligno  
Horrida dumelo ingredimur; malefirma vigori  
Reddimus integro, per stagna jacentia puros  
Excultimus rivos, foedos opplemus hiatus,  
Agricolae fortes terram molimur inertem  
Et jacimus semen: segetem juvat aethere Christus,  
Frugiferamque parat caelestia in horrea messem.

O Roma, o Petri Roma, o pulcherrima rerum,  
Eja, triumphatum secura incede per orbem.  
Hem qualis quantusque decor! quae gratia in ore!  
Qui gravis incessus! roseo quae lumine flamma!  
Quanta sedens capiti fluitat per candida colla  
Caesaries! qualis vestis circumdatur artus,  
Ostro auroque rigens, variisque notata figuris!  
Hinc atque hinc lateri sacro glomerantur in orbem  
Obsequiosa cohors, pendentque loquentis ab ore.  
Eloquere, o Regina potens: tua jussa minores  
Accipiant populi, memorique in pectore condunt.  
An quidquam simile in terris? tu maxima nempe  
Filia, quot rerum genitor primo impete amoris  
Condidit insueto donans splendescere risu,  
Nata omnes populos patria ditione tenere,  
Auricomam veri sustentans lampada solis,  
Nata sacris lustrare omnem splendoribus orbem.



Hoc tibi munus erit. Quondam insuperabilis ausu  
Impavidos fremere arma duces, fremere arma phalanges  
Adspexti; hostili rorantes sanguine turmas  
Belligerasque aquilas procurrere subditus orbis  
Vidit et obstupuit, gelida formidine tactus:  
At vetere e Roma formosior altera surgis,  
Quae cunctas gentes in dulcia vincula amoris  
Compones, legesque dabis: qua sede sedebit  
Sincerae interpres fidei morumque magister,  
Eloquium dictante Deo; qua fonte perenni  
Prosiliet pura rivus placidissimus unda;  
Qua cupidae venient gentes haurire salutis  
Vivificos latices aeternaque gaudia caeli.

Illic finis fandi: venientis imagine saccli  
Obstupefacta manet pubes: miracula rerum,  
Romanum assiduis peragratum cursibus orbem,  
Mutatumque senes cernunt, cacloque morantur  
Attoniti, unde fluit decus omne novaeque resurgens  
Auspicium Romae atque aevi spes certa futuri.

<sup>1</sup> *Lucina potens.* — In Martyr. Romano die 30 Julii sanctissima hæc mulier sic celebratur: Hæc in facultatibus suis sanctorum necessitatibus communicans, Christianos in carcere detentos visitabat, et martyrum sepulturae inserviebat; juxta quos et ipsa in crypta a se constructa sepulta est.

<sup>2</sup> *Qui flentibus adsunt.* — Matth. XIX, 21. Si vis perfectus esse, vende, vende quae habes, et da pauperibus, et habebis thesaurum in caelo. Et 29. Omnis qui reliquerit domum, vel fratres, aut sorores, aut patrem, aut uxorem, aut filios, aut agros propter nomen meum, centuplum accipiet, et vitam aeternam possidebit.

<sup>3</sup> *Bonum semen.* — De grano sinapis Christi parabola, quam Matth. XIII, 31. Simile est regnum caelorum grano sinapis... Quod minimum quidem est omnibus seminibus; cum autem creverit, majus est omnibus olivibus, et fit arbor, ita ut volucres caeli creverint, et habitent in ramis ejus.

<sup>4</sup> *Agrippam.* — Circumcisionis tempore solebant Judaei indere nomen. Observant tamen eruditi, etiam incoepto Romanorum imperio, neminem Judaeorum hebraeum nomen cum nomine romano jungere consuevisse. Hujusmodi exemplum primum dedit Herodis filius Aristobulus, qui filium avi nomine dixit Herodem, et nomine romano Agrippam.

<sup>5</sup> *Foedere.* — Josephus Antiq. lib. XIX, 4. paucis complectitur omnia: Claudius edictum proposuit, quo Agrippam in regno per Cajum ante concessio confirmabat, collaudans simul ejus operam et industriam, addita insuper Judaea, et Samaria, quod olim ad ejus avi Herodis regnum pertinuissent: has igitur veluti familiae debitas restituit; Abilam autem, et finitimam ejus ditionem in Libano, quae Lysaniae fuerat, adjuunxit de suo. Foedus deinde regis cum Romano populo in aes incisum est, in Urbis foro medio.

<sup>6</sup> *Catenam.* — Josephus ib. 5. Quamprimum venit Hierosolimam, vota sacrificia persolvit, nihil omittens eorum, quae lege praescripta sunt... Et catenam auream a Cajo donatam, pondere parem illi ferream, quae regias manus vinxerat, monumentum adversae fortunae mutatae in prosperam suspendit in sacrario super gazohylacium, quae doceret spectatores et sublimia posse corrui, et Deum valere omnia erigere denuo.

<sup>7</sup> *Laudibus aucturum.* — Quod Agrippa Rex judaeae legis erat observantissimus, perfacile fuit Judaeis Christianae fidei hostibus ipsum adversus Ecclesiam concitare. Luculentissime id patet ex Act. XII, 3. Videns autem Herodes (sic appellat Lucas Agrippam nomine avi) quod placeret Judaeis, apposuit, ut apprehenderet et Petrum.

<sup>8</sup> *Insequitur proceres.* — Luc. Act. XII. Eodem tempore misit Herodes rex manus, ut affligeret quosdam de Ecclesia: occidit autem fratrem Joannis gladio. Revera omnes Christiani expulsi fugerunt Hierosolymis, Apostoli manserunt, quorum causa tot turbæ a Judaeis fuerant concitatae. Nonnulli studio

atque operae Gamalielis tribuunt, alii timori Judaeorum; Apollonius antiquus Theologus se accepisse testatur Salvatorem Apostolis mandasse, ne ad duodecim usque annos Hierosolymis discederent. Lucas aperte praedicat: Omnes dispersi sunt per regiones Judaeae et Samariae praeter Apostolos.

<sup>9</sup> *Tunc gemini a tonitru.* — Marc. III, 17. Et Jacobum Zebedaei, et Joannem fratrem Jacobi, et imposuit eis nomina Boanerges, quod est Filii tonitru.

<sup>10</sup> *Ostentaret Iberis.* — Constans apud veteres est hujusmodi opinio, hodieque gloriantur Hispani ab Apostolo Jacobo Evangelium accepisse. Baroni in suo marty. ad diem 25 Julii, qui Jacobo sacer est, varia rationum momenta expendit, et de eo in utramque partem disputat. Graeci Hispaniam ab initio vocaverunt *Iberiam* a flumine ejus celebratissimo *Ibero*.

<sup>11</sup> *Delator.* — Id Eusebius refert, hist. lib. II, 8. Nimirum eum ipsum qui Jacobum in judicium adduxisset, cum testimonium Christo illum tam libere perhibentem cerneret, ea re commotum, se esse Christianum ingenue confessum esse. Igitur ambobus una ad supplicium ductis, hunc inter eundem a Jacobo postulasse veniam sibi concedi. Jacobum autem paululum rem animo complexum dixisse: Pax tibi: illumque osculatum esse; et sic tandem utrumque securi percussum vitam deseruisse.

<sup>12</sup> *Altaria donis.* — Compostellae ferunt, hodieque creditur Jacobum sepultum esse. Templum fuit celebratissimam peregrinationibus per aliquot saecula factis, quaeque hodieum sunt. Quamvis vero haec omnia pro fabulis nonnulli habeant, liceat mihi vatum optimorum vestigiis insistere, qui a poetica facultate non dissentire arbitrati sunt, pulcherrimas vetustatis memorias, licet infirma auctoritate inniterentur, in suis carminibus inserere. Gallaeci populi sunt Gallaeciae hodie *Gallicia* in Hispania Tarraconensi extrema; *Compostella*, Gallaeciae caput, et *S. Jago* ab ipsis D. Jacobi ossibus dicitur.

<sup>13</sup> *Fundamenta forent.* — Sic Aug. de sanct. Ser. XXIX, de Petro: Dignus certe, qui aedificandis in domo Dei populis lapis esset ad fundamentum, columna ad sustentaculum, clavis ad regnum.

<sup>14</sup> *Festum urbi solemne.* — In Exodo, et in libro Numeri habemus Azymorum et Paschatis institutionem duplici ex beneficio a Deo accepto: primum quia Angelus Domini transiliens domos filiorum Israel, Aegypti primogenita interfecit; secundum, quod populus Israel ex Aegypto liber egreditur. Ex. XXIII. *Septem diebus Azyma comedetis*: Et Deut. XVI, Immolabisque Phase Domino Deo tuo de ovibus, et de bobus: ubi *phase* idem est ac *Pascha*. Expletis vero diebus Azymorum, erat Pascha, de quo Ex. XII. Dies prima erit sancta atque sollemnis; et dies septima eadem festivitate venerabilis.

<sup>15</sup> *Et quoniam ferro.* — Religionem ceteris Judaeis majorem praesetulit Agrippa, qui ob dies festos Azymorum a nece Petri abstinendum puta-

vit. Atqui illi Christum Jesum ipso Paschatis die in crucem agendum curarunt.

<sup>16</sup> *Subito turbata dolore.* — Act. XII, 6. Petrus quidem servabatur in carcere. Oratio autem fiebat sine intermissione ab Ecclesia ad Deum pro eo.

<sup>17</sup> *Tu Deus omnipotens.* — Psalmus IX, *Confitebor*: eligimus illum prae ceteris, quod in eo David gratias agit Deo pro relata ab ipso, et a toto Israele victoria, Christique et Ecclesiae triumphos vaticinatur. Laetabor et exultabo in te: psallam nomini tuo, Altissime. In convertendo inimicum meum retrorsum: infirmabuntur et peribunt a facie tua. Quoniam fecisti iudicium meum, et causam meam: sedisti super thronum qui iudicas justitiam. Increpasti gentes et periit impius: nomen eorum delesti in aeternum et in saeculum saeculi. Inimici defecerunt frameae in finem: et civitatem eorum destruxisti. Periit memoria eorum cum sonitu, et Dominus in aeternum permanet.

<sup>18</sup> *Surge.* — Ps. IX, 19. Quoniam non in finem oblivio erit pauperis: patientia pauperum non peribit in finem. Exurge, Domine; non confortetur homo: iudicentur Gentes in conspectu tuo. Constitue, Domine, legislatorem super eos: ut sciant Gentes, quoniam homines sunt.

<sup>19</sup> *Carceris umbram.* — Tempore Agrippae regis, Hierosolyma duplici muro circumdabatur. Cum Petrus ab Angelo liberatus per portam ferream ingressus fuerit civitatem, dicendum est carcerem hunc Herodianum inter primum et secundum murum extitisse, eo magis, quod Iosephus testatur de bell. Jud. VI, 6. in secundo muro munitissimas turres fuisse aedificatas, in quarum aliqua Petrus conjectus a militibus erat custoditus. Petri vincula veluti nobilissima gloriosae victoriae trophaea, omnium Sanctorum Patrum celebrata praeconiis, perpetua memoria fuerunt consecrata. Hinc Romana Ecclesia *S. Petri in vinculis*.

<sup>20</sup> *Confestim nova lux.* — Act. XII, 7. Ecce Angelus Domini astitit, et lumen refulsit in habitaculo, percussoque latere Petri, excitavit eum dicens: Surge velociter.

<sup>21</sup> *Dilectae Mariae.* — Eadem domus est, quam saepe memoravimus, quaeque in Ecclesiam conversa prima sedes episcopalis fuit Jacobo tradita. Act. XIII, 12. Venit ad domum Mariae matris ubi erant multi congregati et orantes.

<sup>22</sup> *Rex fremit indignans.* — De Herode eluso sic Act. XII, 18. Facta autem die, erat non parva turbatio inter milites, quidnam factum esset de Petro. Herodes autem cum requisisset eum, et non invenisset, inquisitione facta de custodibus iussit eos duci. Post Pauli fugam, Agrippa animadvertit in custodes, cumque dicat Lucas, *quod erat iratus Tyriis et Sidoniis*, credendum est Petrum liberum ea Syriae loca peragrasse usque ad Antiochiam; qua de causa Caesaream se contulit Agrippa, et in Tyrios et Sidonios transfugae custodes ira excanduit. Mortem Agrippae, quam hic nos collocavimus, anno

quarto Claudii reliqui ponunt scriptores. Sed nos secuti sumus Lucam, qui post necem Jacobi et carcerem Petri ejus miserandum finem recensuit in ultionem admissorum facinorum.

<sup>23</sup> *Audiat hoc caelum.* — Isaías, I, 2. Audite, caeli, et auribus percipe, terra, quoniam Dominus locutus est. Filios enutrivì, et exaltavi; ipsi autem spreverunt me. Cognovit bos possessorem suum, et asinus praesepe Domini sui: Israel autem me non cognovit, et populus meus non intellexit . . . Terra vestra deserta, civitates vestrae succensae igni, regionem vestram coram vobis alieni devorant, et desolabitur, sicut in vastitate hostili. Et relinquitur filia Sion, ut umbraculum in vinea, et sicut tugurium in cucumerario, et sicut civitas, quae vastatur.

<sup>24</sup> *Cursor.* — Inter ecclesiasticos ministros habitus est *Cursor*, qui nempe ad Ecclesias Episcoporum perferret litteras. Quantam solertiam in eo deligendo adhibuerint prioribus Ecclesiae saeculis, intellige ex Ignatio, qui epist. II, sic ad Polycarpum scribit: Decet te, Beatissime Polycarpe, Concilium cogere sacrosanctum, et eligere, si quem vehementer dilectum habetis et impigram, ut possit divinus appellari Cursor, et hujusmodi creare, ut in Syriam profectus laudibus celebret impigram caritatem vestram.

<sup>25</sup> *Nos habet Antiochia.* — Quod fuerit Petri iter de carcere in libertatem vindicato, Metaphrastes die 29. Junii ex antiquioribus chartis exscripsisse testatur, illud denique adjungens: *Venit Antiochiam Syriae civitatem.*

<sup>26</sup> *Ecclesia verax.* — Ab ipsis Christianae Religionis incunabulis, innumeri hostes in humana divinaque omnia debacchati, omni machinarum genere Ecclesiae auctoritatem oppugnarunt. Sed divina ope fundata Ecclesia oppugnari quidem haereticis potest, expugnari nequaquam; quin ipsa e pugna fortior evadit. Ut malignantibus atque perduellibus os primo ipso initio praecluderetur, de vera Christi Ecclesia certissima signa constituerunt Apostoli, quibus ceu testibus locupletissimis Ecclesia catholica ab Satanae Synagoga, atque Ecclesiis malignantium, veluti sponsa a pellice secerneretur.

<sup>27</sup> *Symbolon.* — Ante hanc dispersionem, seu potius divisionem, Apostoli, Catholicae fidei consulturi, quosdam fidei canones qui universam Christianam rem perstringerent, inter se constabilerunt, quos proprio nomine Ecclesia symbolum Apostolorum nominare consuevit, quod eo Christiani symbolo, veluti tessera militari data possent dignosci. Sic Rufinus in praef. exposit. symb. Apost. Symbola discreta unusquisque dux suis militibus tradit, quae latine signa vel indicia nominantur, ut si forte occurrerit quis de quo dubitetur, interrogatus symbolum prodatur, si sit hostis an socius.

<sup>28</sup> *Surgit odora.* — Quae de Sapientia Ecclesiasticus, XXIV, 17. praedicat, ea communiter Ecclesia Virgini BB. attribuit, nosque hic in Deiparae laudem libentissime referimus: Quasi cedrus exaltata sum in Libano, et quasi cypressus in Monte Sion; quasi palma exaltata sum in Cades, et quasi plan-

tatio rosae in Jericho. Quasi oliva speciosa in campis, et quasi platanus plantata sum juxta aquam in plateis. Sicut cinnamomum, et balsamum aromatizans odorem dedi: quasi myrrha electa dedi suavitatem odoris.

<sup>29</sup> *Basia pacis.* — Non modo Petrus, sed et Paulus primis Ecclesiae fidelibus praecepit: *Salutate vos invicem in osculo sancto*, quod Petrus vocat *osculum dilectionis*. Antiqua ergo fuit et ab Apostolis instituta christiana salutatio in osculo sancto impartienda: eaque oscula erant veluti pacis et amoris symbola.

<sup>30</sup> *Pastorum primus.* — S. Leo Serm. I, in Nat. Apost. sic emphatice: Cum duodecim Apostoli, accepta per Spiritum Sanctum omnium locutione linguarum, imbuendum Evangelio mundum distributis sibi terrarum partibus suscepissent, beatissimus Petrus Princeps Apostolici ordinis ad arcem romani destinatur imperii, ut lux veritatis quae in omnium gentium revelabatur salutem, efficacius se ab ipso capite per totum mundi corpus effunderet. Cujus autem nationis homines in hac urbe non essent, aut quae unquam gentes ignorarent, quod Roma didicisset? Hic conculcandae Philosophiae opinioniones; hic dissolvendae erant terrenae sapientiae vanitates; hic confutandi daemonum cultus; hic omnium sacrilegiorum impietas destruenda.

<sup>31</sup> *Pignora sacra.* — Supremo Trojae excidio Hector Aeneam alloquitur, Aen. II, 293.

Sacra suosque tibi commendat Troja penates:

Hos cape fatorum comites: his moenia quaere,

Magna pererrato statues quae denique ponto.

Et Aeneas, ut idem cecinit vates:

Cum sociis natoque, penatibus, et magnis dis tendit in Italiam. SS. passionis Christi instrumenta, veluti quaedam trophaea victoriae et magna fuerunt diligentia asservata, et divina quadam virtute facta toti orbi conspicua communi adhuc veneratione decorantur. Quid mirum, si vates tempora praecipiens ipsum Petrum ea sui veluti imperii arca sacra Romam induxerit ferentem?

<sup>32</sup> *Caelestibus armis.* — Quicumque Romam invisit, Hadrianam molem, quae pro sepulchro illius Imperatoris aedificata fuit, conversam nunc in arcem munitam ad Tiberim reperit, supraque eminentem Michaëlem Archangelum, districto ense, quasi Romanae Ecclesiae hostes terrefacientem, inque sanctae urbis custodiam excubantem.

<sup>33</sup> *Foedere amoris.* — Sic S. Prosper in Carm. de ingratitis:

Sed Roma Petri, quae pastoralis honoris

Facta caput mundi, quidquid non possidet armis,

Relligione tenet.

<sup>34</sup> *Dumis.* — Idem S. Leo. Silvam istam frementium bestiarum et turbulentissimae profunditatis oceanum constantior, quam cum supra mare gra-

dereris, ingrederis. Nec mundi dominam times Romam, qui in Caïphae domo expaveras sacerdotis ancillam.

<sup>25</sup> *Dagon*.—Apud Philistaeos in templo Dagon vix Arca foederis fuit collocata, idolum suam cadendo imbecillitatem monstravit.

<sup>26</sup> *Superstitio*.—Quod fundatione Romanae Ecclesiae Idololatria Romae decreverit, clarissimum extat testimonium Dionis lib. LX. Post haec Claudius tertium Consul multa sacrificia, multasque ferias abrogavit, nam major anni pars in his absumebatur non sine magno Reipublicae detrimento. Igitur eas et reliqua omnia quae poterat, contraxit. Cum nempe Romae Christiana fides plantata coalescere coepit, ethnica superstitio decidit. Hic notanda arbitror verba Taciti, lib. 11. Retulit (Claudius) deinde ad Senatum super collegio Aruspicum, ne vetustissima Italiae disciplina per desidiā exolesceret. . . Et quia externae superstitiones valescant, et laeta quidem in praesens omnia, sed benignitati Deū referendam gratiam, ne ritus sacrorum inter ambigua culti, per prospera oblitterarentur, factum ex eo senatus consultum, viderent pontifices, quae retinenda firmandaque aruspicum. Quid, quaeso, externae superstitionis nomine intelligitur, nisi Christiana Religio disseminari in urbe coepa?

<sup>27</sup> *Annos septenos*.—Petrum Antiochenae Ecclesiae Episcopatum fundasse, eumque septem circiter annos tenuisse, ex testimonio veterum scriptorum constat, quos confer apud Baronium Annotat. in Martyrologium Romanum die 22 Februarii. Secundo anno Claudii quamvis Romam perrexerit, etiam ipse annum integrum administravit, et anno tertio Claudii, Antiochenae Ecclesiae subrogavit Evodium. Ignat. Epist. 12 ad Antiochenos scribens: Mementote, ait, Evodii beatissimi Patris nostri, qui primus post Apostolos gubernacula Ecclesiae vestrae sortitus est. Si Evodii successor Ignatius talia profiteatur, quid aliis egemus testibus?

<sup>28</sup> *Perennet*.—Communis omnium sententia est Petrum anno secundo Claudii Romam primum venisse, et romanam Ecclesiam instituisse anno sequenti, qui est tertius Claudii Imp. Jesu Christi Ann. 43, Claudio Augusto tertium, et L. Vitellio Coss. Quod vero decimo quinto Kal. Februarii Romana sedes Pontificia erecta fuit, ea dies in tantae rei perennem memoriam anniversaria celebritate consuevit antiquitus celebrari: qui usus in urbe, et in toto christiano orbe in hodiernum usque diem perseverat. Sed hanc opinionem Pagius infirmat in suis adnotationibus, auctoritatis Chronici Alexandrini testimonio, qui scribit Petrum venisse Hierosolymam ob controversiam de Circumcisione, anno sexto Claudii, eoque anno celebratum fuisse Concilium Hierosolymitanum, apostolis nondum invicem disjunctis. Roboratur huiusmodi sententia testimonio Lactantii, qui Nerone imperante Petrum venisse proficitur. Sed Pagii opinio innumeris veterum scriptorum monumentis, et perpetua omnium saeculorum consensione refellitur: duplex, non



unus Petri in urbem adventus. Cl. Mossonius in suis tabulis chronologicis not. 33 Baronii sequitur opinionem, sed Petrum ait venisse Romam sub Claudio, et circa extremum anni 42.

<sup>39</sup> *Praetoria circum.*—Narrat Clemens Alex. in epist. Petri tom. 6. Bibl. Sanctus Marcus Petri sectator, praedicante Petro Evangelium palam Romae coram quibusdam Caesarianis equitibus, et multa Christi testimonia profere, petitus ab eis, ut possent, quae dicebantur, memoriae commendare, scripsit ex his quae a Petro dicta sunt, Evangelium quod secundum Marcum vocatur.

<sup>40</sup> *Ingentem numerum.* — Quod plures discipuli ex oriente in occidentem secuti fuerint Petrum venientem, non est, cur oratione longiori persequamur, cum ipsorum nomina in occidentalium Ecclesiarum praefecturis etiam ipsa per se indicant. Sede romana constabilita, Summus Pontifex, cui cura gregis universi a Domino fuerat commissa, ad ceteras occidui orbis provincias, et primum per Italiam hosce discipulos suos amandavit. In hac sententia nos confirmant gravissima verba Innocentii Papae ad Decentium, ep. 1.: Praesertim, cum sit manifestum in omnem Italiam, Gallias, Hispanias, Africam et Siciliam insulasque interjacentes, nullum hominum instituisse Ecclesias, nisi eos quos venerabilis apostolus Petrus, aut ejus successores constituerunt sacerdotes.

<sup>41</sup> *Asprenas.* — Innumeri prope scriptores rerum nostrarum sunt, qui Neapolim a Sancto Petro institutam christianis doctrinis contendunt. Nos Ecclesiae nostrae metropolitanae memorias et patriae amore, et carminis ipsius progressionem compulsi in medium afferemus. *Aspren*, sive *Asprenus*, sive *Asprenas* fuit primus episcopus Neapolitanus.

<sup>42</sup> *Celsus.* — De Fratribus, quos Paulus Puteolis reperit, quique eum cöegerunt omnibus officiis, ut septem dies apud eos moraretur, res est extra dubitationis aleam, cum in Act. Lue. apertissimis verbis commemorat. Nonnulli vero Proculum, alii Celsum primum Puteolanorum Antistitem autumant. In alteram sententiam ibo libentissime, postquam Joann. Scherillius, Can. Puteolanus, cum quo et studiorum et convictus communionem in Seminario Puteolano habui, et dulci sane recordatione commemoro, penitiori uti solet antiquitatis notitia, eam firmavit.

<sup>43</sup> *Prisce colis.* — Priscus fuit unus ex antiquioribus Christi discipulis, qui Petrum secutus est Romam. Sic omnia Martyrologia referunt, et quamvis Prisci nomen Romanum videatur, tamen ipsum genere judaeum fuisse, non ambigit Michäel Monachus in Sanctuario Capuano, quo res Capuae sacras pertractat, et suae auctoritati acquiescimus. *Vulturnus* etiamnum idem nomen retinet; fluvius Campaniae, ipsam a Samnio magna parte disterrinans hodie alluit Capuam.

<sup>44</sup> *Epaphras.*—Paulus ad Philipp. II, 25. de Epaphrodito loquitur quem nominat suum fratrem, et cooperatorem, et commilitonem, ipsorum autem A-



postolum, et ministrum necessitatis suae. Unde hunc Epaphraditum fuisse Episcopum Philippensium, extra dubium videtur, et nos ipsi hanc opinionem sequimur. At in Martyrologio Romano de Epaphrodito a Petro Apostolo Tarracinesi Ecclesiae praefecto habetur mentio. Nisi dicere velimus unum eundemque in diversa loca translatum fuisse, cum et alium Epaphroditum Colossensem praesulem habemus, dicendum est tres esse Epaphroditos. *Anxur* est neutro et masculino genere: Jupiter ab ipsa urbe dictus *Anxur* aut *Anxurus* singulari cultu colebatur. *Anxur* dicebatur olim *Tarracina*, et *Tarracine* hodie *Terracina*. *Feronia* erat Sabinorum et Latinorum Dea. *Feroniae* lacus cum fonte et templo fuit inter Circaeos, et Tarracinam: nonnulli hoc nomine Junonem salutatam credunt.

<sup>45</sup> *Marcus*. — Duobus aliis hoc nomine distinctis, altero Evangelista, altero Joanne Marco, de quo supra, de Marco hoc mentionem habemus, Aequicolarum Antistite. Romanum dicimus, in tanta rerum antiquitate, ne cum aliis confundatur. *Aequicolae*, sive *Aequi* sive *Aequicola gens*, ut ait Virgilius, fuere ad orientem superioris partis antiqui Latii, a fontibus Anienis usque ad Tibur.

<sup>46</sup> *Lucius*. — Leucius (qui mendose in textu inscribitur Lucius) Brundisiam Ecclesiam erexit. Quod vero a Petro missus fuerit, habes memoriam a Paulo diacono in Chronice. Episcop.: Igitur Petrus cum Romam pervenisset, illico qui summas quasque urbes in occiduo positas Christo Domino per verbum Fidei subjugarent, optimos eruditosque viros ex consortio suo direxit. Tunc denique Apollinarem Ravennam, Leucium Brundisium misit.

<sup>47</sup> *Hermagoras*. — Aquilejenses a S. Marco, ejusque auditore Hermagora fidem accepisse contendunt. Idem Mamachius hanc opinionem refert, siquidem Marcus Evangelista, cum Romam venisset, antequam in Aegyptum contenderet, Aquilejam pervenit, et jactis Ecclesiae fundamentis Hermagoram praefecit, eique mandavit, ut in omni circum regione Evangelium nunciaret, coetusque Christianorum instituere conaretur.

<sup>48</sup> *Nazarius, Celsusque*. — Ligures primum a Petro, tum a Nazario et Celso, se doctos quid esset credendum, existimant. Martyrii palaestra fuit Mediolanum, primis Christianae fidei initiis, uti canit Ennodius in Nazariano carmine XVIII, quo triumpho nobili carnis ruinam repulisse Nazarius dicitur.

<sup>49</sup> *Barnabbas*. — Mediolanenses Barnabae Apostoli labore, ac diligentia idolorum superstitionem tolli in urbibus suis proximisque oppidis coepisse defendunt. Sic Mamachius, sed in not. observat sola traditione hanc opinionem niti.

<sup>50</sup> *Syrus*. — Boll. XXIX. Julii sic S. Syri Episcopi in Liguria commemorationem peragunt: Ecclesia quae nunc Sancti Syri de quo agimus Episcopi est, priscae temporibus Sanctorum Apostolorum appellata fuit, nec sancti Syri nomen accepit, nisi ab inventione sacri corporis ejus, diu post tem-

pora S. Gregorii, Fuerit igitur alius olim Genuae S. Syrus Martyr, cujus memoria deinde oblitterata.

<sup>21</sup> *Euprepus, sive Euprepus.* — Ghinius in Natalibus Sanctorum canonicorum ex traditione Veronensium sic habet: Veronae Sancti Euprepii Episcopi et confessoris, quem ferunt S. Petri Apostoli discipulum, ibidem primum episcopum eandem Ecclesiam sancte instituisse ad Christi fidem et pietatem.

<sup>22</sup> *Auspice Prosdocymo.* — Prosdocymum Patavinorum Antistitem facit Baronius.

<sup>23</sup> *Apolline.* — Ravennates S. Apollinaris Petri discipuli opera testantur se Christianam religionem amplexos, ad eamque rem demonstrandam utuntur S. Petri Chrysologi auctoritate, qui sermonem CXXVIII de S. Apollinare scripsit.

<sup>24</sup> *Paulinum.* — Luca, urbs Etruriae antiqua apud Aserem fluvium, et Sarcolum caram habet S. Paulini memoriam, quem suscepit tanquam primum Etruriae Apostolum, Martyrum Etruscorum primitias, primum suum Antistitem, patronum et sospitatorem. Sic Boll. XII Julii, ubi passos sub Nerone eum episc., Severinum presbyt., Lucam diaconum, Theobaldum militem, et eorum socios faciunt.

<sup>25</sup> *Frontinum.* — Florentini Frontino usos esse contendunt Evangelii promulgatore. Quamvis nonnulli non esse tanta antiquitate Frontinum censent, ut Petro se tradere in disciplinam potuerit, nos pro Ecclesiae Florentinae traditione stabimus, primumque Florentinorum Episcopum Frontinum habebimus.

<sup>26</sup> *Romulus.* — Die sexta Julii tractant Boll. de sancto Romulo episcopo ejusque sociis, martyribus Fesulis et Volaterris in Etruria. Eum ab Apostolo Petro missum referunt, ut Sutrii, Volaterris, Brixiae, Bergomi fidem nunciaret; tendens Foeculas, Angeli monitu, quamvis primo ejicitur, denuo regressus martyrium cum sociis subiit.

<sup>27</sup> *Provoco.* — Act. XXV, 12. Dixit Paulus: Caesarem appello: tum Festus cum Concilio locutus respondit: Caesarem appellasti? ad Caesarem ibis.

<sup>28</sup> *Dicarchus.* — Hoc iter Pauli a Luca describitur, quaeque singulis locis evenerint, enumerantur, Act. XXVII, 3. Sequenti autem die devenimus Sidonem; humane autem tractans Julius Paulum, permisit ad amicos ire, et curam sui agere. Apud *Melitem* insulam naufragium fecit, de quo plurima inferius dicemus. De *Dicarcho*, quod idem est ac Puteoli: Secunda die venimus Puteolos, ubi inventis fratribus, rogati sumus manere apud eos diebus septem.

<sup>29</sup> *Tribus tabernis.* — Quod Roma exierint plurimi Christiani Paulo occursuri, habes ibi. Et sic venimus Romam. Et inde cum audissent fratres, occurrerunt nobis usque ad Appii forum et tres tabernas. Appii forum erat in

agro Latino, in via Appia; tres tabernae vero contra Antium, de quibus Cic. ad Atticum epist. XXIX. lib. 2. Emersimus commode ex Antio in Appiam ad tres Tabernas. De foro Appii nulla sunt vestigia, ob paludes Pomptinas; *Tres tabernae* corrupto vocabulo hodie dicuntur *Cisterna*.

<sup>60</sup> *Epaphras*.—De hac legatione Philippensium, Paulus ad Philip. V, 18. scribit his verbis: Habeo autem omnia et abundo: repletus sum, acceptis ab Epaphrodito quae misistis, odorem suavitatis, hostiam acceptam, placentem Deo.

<sup>61</sup> *Gratus Onesiphorus*.—*Onesiphorus* cujus velut martyris memoria in Ecclesia tum graeca tum latina celebratur, Ephesi multum Apostolum juit, et Romae in vinculis consolatus est. Ex Ep. II, 1. Pauli ad Timotheum, Ephesinum episcopum, conjici licet quod Romae fuerit mortuus. 16. Det misericordiam dominus Onesiphori domui quia saepe me refrigeravit, et catenam meam non erubuit. 17. Sed cum Romam venisset, sollicite me quaesivit et invenit. 18. Det illi Dominus invenire misericordiam a Domino in illa die. Et quanta Ephesi ministravit mihi, tu melius nosti.

<sup>62</sup> *Videbunt*.—Vix attigit Romam Paulus, permissum est, ut ait Lucas, manere sibi cum custodiente se milite. Sed tertio die convocavit primores Judaeorum, *propter spem enim Israel catena hac circumdatus sum*. Quae autem facta sint, ipsemet Lucas enarrat, XXVIII, 24.: Et quidam credebant his quae dicebantur, quidam vero non credebant. Cumque invicem non essent consentientes discedebant, dicente Paulo unum verbum: Quia bene Spiritus Sanctus locutus est per Isaiam Prophetam ad Patres vestros dicens: Vade ad populum istum, et dic ad eos: Aure audietis, et non intelligetis; et videntes videbitis, et non perspicietis. Incrassatum est enim cor populi hujus, et auribus graviter audierunt, et oculos suos compresserunt, ne forte videant oculis, et auribus audiant, et corde intelligant; et convertantur et sanem eos.

<sup>63</sup> *Infremuitque leo*.—Res a Paulo Romae gestas ab ipso saltem ex parte in suis epistolis possumus colligere. Jam enim in maximo vitae discrimine quod Hierosolymis subierat, ipse Dominus cuncta praedixerat, Act. XXIII, 11: Constans esto: sicut enim testificatus es de me in Jerusalem, sic te oportet et Romae testificari. Sed de duro Neronis judicio ipsemet ad Tim. scribit In prima mea defensione nemo mihi adfuit, sed omnes me dereliquerunt. Qui autem illi praecipue adversarentur, Tim. II, I, 15. patefacit: Scis, quod aversi sunt a me omnes qui in Asia sunt, ex quibus est Phigellus, et Hermogenes. Cum tam gravem tumultum causa Pauli Hierosolymis concitasset, credere par est, Judaeos, quod saepe alias fecerunt, insigniores viros qui apud Neronem gratia possent, misisse, quo Paulo damnum facerent. Sed non reliquit eum Dominus, uti testatur ibi. 17. Dominus autem mihi astitit, et confortavit me, ut per me praedicatio impleatur, et audiant omnes gentes. Et liberatus sum de ore leonis. Sic Neronem nominat.

<sup>64</sup> *Seneca*.—Extant quaedam acta passionis Pauli, Lini nomine consi-

gnata, in quibus haec leguntur de Seneca et Paulo: Institutur Imperatoris adeo est illi amicitia copulatus, videus in eo divinam scientiam, ut se a colloquio illius temperare vix posset. De fide Epistolarum Senecae ad Paulum dubitamus, sed huic sapientissimi illa aetate viri de Pauli sapientia admirationi non aegre adstipulamur, siquidem in omni praetorio causa Pauli cognita fuit. Testatur ipse Paulus ad Phil. I, 2. Scire autem vos volo, fratres, quia quae circa me sunt, magis ad profectum venerunt Evangelii: ita ut vincula mea manifesta fierent, in Christo, in omni praetorio, et in ceteris omnibus; et plures e fratribus in Domino confidentes vinculis meis, abundantius auderent sine timore verbum Dei loqui. Quidam quidem et propter invidiam et contentionem, quidam autem et propter bonam voluntatem Christum praedicant. Quidam ex charitate, scientes, quoniam in defensionem Evangelii positus sum; quidam autem ex contentione Christum annunciant non sincere, existimantes pressuram se suscitare vinculis meis.

<sup>65</sup> *Migrare iubemur.* — Judaeos non in Palestina tantum, sed in Asia, in Africa, et Europa magno numero habitare est exploratissimum. Sufficiat pro omnibus supplex libellus Agrippae ad Caicum, ubi de sancta civitate, patria sua haec effatur: Eam, nempe, esse metropolim non unius regionis Judaeae, sed et multarum, propter colonias inde olim deductas, vel proprius in finitimam Aegyptum, Phoenicem, Syriam tum citeriorem, tum eam quae Caele cognominatur, vel longius in Pamphiliam, Ciliciam, plerasque Asiae partes usque Bithyniam, et Ponti sinus intimos; pari modo in Europa Thessaliam, Boeotiam, Macedoniam, Aetoliam, Atticam, Argos, Corinthumque Peloponnesi partes praecipuas. Nec tantum continentes Provinciae plenae sunt coloniis judaicis, sed et insularum celeberrimae Euboea, Cyprus, Creta, ne quid dicam de Transeuphratensibus: excepta enim parva parte Babylonis, aliarumque praefectarum, omnes urbes quae bonum agrum habent, a judaeis incoluntur. Itaque si exorat mea patria tuam clementiam, praeter ipsam alias civitates demereberis plurimas, sitas in diversis Orbis tractibus, Asia, Europa, Africa, insulares, maritimas, mediterraneas. Huc usque Agrippa. Hierosolymitana Synagoga quae ceteris omnibus dominabatur, videre poterat Christianam religionem ubique gentium adulescentem? Facile fuit universas colonias per nuncios sollicitare; idque praecipue Romae factum A. Christi LI, Claudii vero imper. IX. Oros. lib. VII. 6. Josephi testimonio rem confirmat: sed ne magis Svetonius movet, qui ait, Clau. XXV: Claudius Judaeos impulsore Chresto (Christo) assidue tumultuantes Judaeos Roma expulit. Hoc edicto Judaeos tantummodo, an etiam Christianos, velut cognatae religionis homines, voluerit expelli, nequicquam discernitur. Sed etiam Christianos, qui ex Judaeis fidem sectati essent, ex urbe jussos abire, firmissimo Lucae testimonio comprobatur. Cum enim agit de Pauli adventu Corinthum, de Aquila Pontico meminit qui Judaeus genere erat, sed fide christianus. Qui nuper venerat, sunt Lucae verba, ab Italia, et Pri-

seillam uxorem ejus (eo quod praecepisset Claudius discedere omnes Judaeos a Roma) accessit ad eos. Petrus qui septem annis Romae morabatur, edicto Claudii, cum ceteris Judaeis Roma fuit expulsus.

<sup>67</sup> *Discordia partes.* — Quatenus harum partium origo, habet ex Act. XV, 1: Quidam descendentes de Judaea docebant fratres: quia nisi circumcidamini secundum morem Moysis, non potestis salvari. Facta ergo seditione non minima, Judaeorum nonnulli de circumcidendis Gentilibus qui Christo credidissent, acerrime depugnabant; nonnulli abolitam Christi adventu circumcisionem arbitrabantur.

<sup>68</sup> *Ipse tibi.* — Jus naturae, sive legum complexio a Deo per rectam rationem humano generi promulgatarum quae facienda, quaeve omittenda forent, nullam mutationem subire potest. De qua lege idem Cic. elegantissime et si unquam aliud egregie de Rep. III, apud Lact. Inst. Div. lib. IV, § ait: Huic legi nec abrogari fas est, neque derogari ex hac aliquid licet, neque tota abrogari potest. Nec vero aut per senatum, aut per populum solvi hac lege possumus. Nec erit alia lex Romae, alia Athenis, alia nunc, alia post-hac, sed et omnes gentes et omni tempore una lex et sempiterna et immutabilis continebit. Sed si hoc jus universum genus humanum stringit, estque universale, peculiare et aliud fuit, Judaicae genti proprium, quod praecepit per Moysen Deus, illudque ex vulgata omnium sententia in tres partes dividitur, in praecepta scilicet *Judicialia*, *caeremonialia* et *moralia*. Judicialia civilem Hebraeorum politiam constituebant, quae *Θεοκρατία* potius repraesentabat. *Caeremonialia* divinum cultum, sacrificia sacrosque ritus spectabant, eo tamen pacto, ut omnia Jesum Christum ex ea gente proditum non obscuris signis significarent. *Moralia* demum sunt ipsa Juris naturae mandata. Porro haec omnia complectebatur Deus his verbis Deut. V, 31. *Loquar tibi omnia mandata mea, et caeremonias atque judicia.* Quis porro non videbat caeremonias Judaicae legis adventu Christi esse induendas? quae uti Paulus ad Hebr. X, 1. Umbram habebant futurorum bonorum, non ipsam imaginem rerum. Ann. Ch. LI, Pet. VII; C. Imp. IX, celebratum est primum Hierosolymae concilium de abolenda Circumcisione. Cerinthus haeresiarcha qui et ipse contra Paulum et Barnabam Hierosolymam petiit quasi legum avitarum traditionem propugnaturus, antesignanus eorum omnium videtur fuisse, qui de circumcidendis Gentilibus, qui Christo credidissent, altercabatur: quinam Apostoli conventui interfuerint, ignoramus; Lucas tantum de Petro, Jacobo, Paulo et Barnaba meminit.

<sup>69</sup> *Affore polliciti.* — Ecclesiam universam in Concilio coactam falli non posse, ex Christi domini pollicitatione adstruitur, Matth. XVIII, 10. Ubi sunt duo vel tres congregati in nomine meo, ibi sum in medio eorum.

<sup>70</sup> *Hebraei gentesque.* — Ipse Petrus hac clausula usus in sua oratione apud Concilium: Sed per gratiam Domini Jesu Christi credimus salvari, quemadmodum et illi. Act. XV, 11.

<sup>10</sup> *Nec nostri tulerunt patres.* — Ipsa Petri verba a Luca audi, ib. 10: Nunc ergo quid tentatis Deum imponere jugum super cervices discipulorum, quod nec patres nostri, neque nos portare potuimus?

<sup>11</sup> *Vestras.* — Sua verba firmabat Joannes scripturarum veriloquio, apud Lucam, ib. 13: Et huic concordant verba Prophetarum, sicut scriptum est: Post haec revertar, et reaedificabo tabernaculum David, quod decidit, et diruta ejus reaedificabo, et erigam illud, ut requirant ceteri hominum Dominum, et omnes gentes super quas invocatum est nomen meum, dicit Dominus faciens haec. Notum a saeculo est Domino opus suum.

<sup>12</sup> *Barbarus.* — Paul. ad Corinth. I, 14. Ut aliquem fructum habeam, et in vobis, sicut et in ceteris gentibus Graecis, ac Barbaris; sapientibus, et insipientibus debitor sum: VIII, 6. Nobis autem unus Deus Pater, ex quo omnia et nos in illum; et unus Dominus Jesus Christus, per quem omnia et nos per ipsum. Ad Rom. X, 12. Non enim est distinctio Judaei et Graeci: nam idem Dominus omnium, dives in omnes qui invocaverint illum. 13. Omnis enim quicumque invocaverit nomen Domini, salvus erit. Et ad Galat. III, 28. Non est servus neque liber, non est masculus neque foemina. Omnes enim vos unum estis in Christo Jesu.

<sup>13</sup> *Mira Dei Macedo.* — Si omnia divina quadam providentia ita digessit Deus, ut quamvis Redintegrator humani generis Christus tam sero ad homines liberandos venerit, tamen paratus mundus in plenitudine temporum divinum Liberatorem exciperet, quid mirum si vias ipsas vel Alexandrias vel Romanas arcana quadam dispensatione praemunitas arbitramur, ut facilius apostolicis expeditionibus inservirent? Sane Judaeos omnes ante Christi adventum videre licet dispersos per Assyriam, Babyloniā, totamque adeo per Asiam, atque Aegyptum, Graeciam, Italiam, ut ex Sacrarum Scripturarum quas ipsi deferebant, lectione gentes toto orbe diffusae notitiam Messiae haurirent, atque ita ad eum expectandum postulandumque sese disposerent. Eodemque modo Alexander Magnus Alexandrinum orbem conficiebat, totius Asiae populis inter se commercio viisque communicatis, et Romanus orbis, adjecto occidente, amplificabatur, ut humana illa consociatio quam de toto terrarum orbe conficere studebat Christiana Religio, praeparata populorum comunione, facilius evaderet.

<sup>14</sup> *Qui splendor euntes.* — Paul. ad Rom X, 14. Quam speciosi pedes evangelizantium pacem, evangelizantium bona!

<sup>15</sup> *Turris.* — *Caesarensis Ecclesia*, quam sagulo deposito, et pallio indutus Cornelius amplificavit, et Episcopus rexit. Joseph antiq. lib. XVI, 9. de Herode narrat, quod civitatem maritimam amplissimam antea Turrem Stratonis vocatam, mutato nomine, in honorem Augusti Caesarem dixit.

<sup>16</sup> *Marnae.* — Gazae incolae maxima parte Jovis Cretaei superstitione fuisse detentos, quem Marnam vocabant, auctor est Stephanus, ad v. 7252: Episcopum Dorensium, (urbs Dororum erat ad littus Mediterranei maris, me-



dia inter Caesaream et Carmelum montem) primum omnium fuisse *Fidum* observat Lequienius fretus Cyrilli Scythopolitae testimonio.

<sup>77</sup> *Incestare profano.* — De *Damascenae Ecclesiae* origine: nihil opus est longa disquisitione, cum *Ananiam*, primum ejus episcopum omnes antiqui scriptores merito salutarunt. Quod Ananias primus episcopus Damasci fuerit, facile omnes consentiunt, eo magis quod Paulus christianis mysteriis ab eo initiatus fuerit. Sed Heliopoli studio ipsius Ananiae propagatum fuisse evangelium arbitramur. Constantinus, pace Ecclesiae reddita, vetuit, ne stupra et flagitia in Veneris Aphacitidis cultum patrata Heliopolitani persequerentur.

<sup>78</sup> *Cruores.* — De Caesarea Philippi, quam Phoenices Paniada vocabant, tractans Eusebius, sic de Muliere Syrophoenissa narrat, lib. VII, 14. Mulierem illam sanguinis profluvio afflictatam, quam Sanctorum Evangeliorum testimonio a Salvatore nostro morbi remedium invenisse cognovimus, ex ea civitate oriundam, illiusque domum illic ostendi, et admirabilia quaedam Salvatoris in eam beneficii monumenta et quasi trophoea ad hoc tempus durare memorant. Pro foribus enim domus illius aeneam mulieris effigiem genibus flexis, et manibus instar supplicantis in anteriorem partem extensis super editum lapidem collocatam.

<sup>79</sup> *Agabus.* — De ingenti hac fame per universum terrarum orbem valde grassata, sic Lucas, Act. XI, 27. In his autem diebus supervenerunt ab Hierosolymis prophetae Antiochiam; et surgens unus nomine Agabus significabat per spiritum famem magnam futuram in universo orbe terrarum, quae facta est sub Claudio. Baronius censet anno secundo Claudii Imperatoris.

<sup>80</sup> *Collata pecunia.* — *Antiochenae Ecclesiae metropolitanae* singularem virtutem, et maternum munus admirare! Illa urgente fame, qui erant Antiochiae Christiani, collectas pecunias ad Christianos qui erant in Judaea miserunt. De pio fraternae charitatis exhibito officio sic Lucas: Discipuli, prout quis habebat, proposuerunt singuli in ministerium mittere habitantibus in Judaea fratribus; quod et fecerunt, mittentes ad Seniores per manus Barnabae et Sauli.

<sup>81</sup> *Athenis.* — Sic Paulus in Areopago jussus causam dicere: Viri Athenienses, per omnia quasi supersticiosiores vos video. Act. XVII, 22.

<sup>82</sup> *Ara Deo ignoto.* — Vide *Ecclesiae Atheniensis* initia! Idem Paulus ib. 23. Praetereius enim, et videns simulacra vestra, inveni aram, in qua scriptum erat: *Ignoto Deo*. Quod ergo ignorantes colitis, hoc ego annuntio vobis.

<sup>83</sup> *Poeta.* — Aratus, graecus poeta Cilix. De veritate locutus, vel una naturali ratione lucem praeferente, cognita gentilicii poetae auctoritate ipse utitur.

<sup>84</sup> *Moderatus Athenas.* — Vide quam difficilem Spartam exornandam susceperat Paulus; praesertim cum capitis supplicium immineret, si quis

vel deos negaret, vel inconsulto Areopago, peregrinam religionem induceret. Poterant Atheniensens toto orbe celeberrimi, a quibus et Romani ipsi leges acceperant, a barbaro homine, a Judaeo, scilicet, divini cultus rudimenta accipere, ut Judaeus homo crucifixus, Deus esse crederetur? Atqui divino afflante Spiritu Paulus causam egit, et teste Luca, ib. 34. Quidam viri adhaerentes ei, crediderunt, in quibus et Dionysius Areopagita, et mulier Damaris nomine et alii cum eis. Hinc Chrysostomus: Rursus Areopagita ille, superstitionis civitatis illius civis, nonne una cum uxore, audita tantum Pauli concione, illum secutus est? Hic est ille Dionysius, qui primus fuit episcopus Atheniensium, postea Lutetiam Parisiorum translatus abiit in Galliam.

<sup>82</sup> *Moenibus.* — *Ecclesiae Corinthiacae* originem et praecipuos christianos habeto. Prima Pauli mora Corinthi fuit apud Aquilam Act. XVIII, 2. Et migrans inde (idest domo Aquilae, sive e Synagoga, ubi frustra praedicaverat), intravit in domum ejusdam nomine *Titi* Justi colentis Deum, cujus domus erat conjuncta Synagoga. 8. Crispus autem Archisynagogus credidit Domino cum omni domo sua, et multi Corinthiorum audientes credebant et baptizabantur. De *Sosthene* audi eundem Lucam, ib. 17. Apprehendentes autem omnes Sosthenem principem Synagogae percutiebant eum ante tribunal. Quod Christi fuisset studiosissimus ex epist. I, ad Corinth. intelligitur, quae incipit: Paulus vocatus Apostolus Jesu Christi per voluntatem Dei, et *Sosthenes* frater. De *Chloe* vero I, Ep. ad Corinth. I, 11: Significatum est enim mihi de vobis, fratres mei, ab iis qui sunt Chloes, quia contentiones fiant inter vos. Erat enim mulier qua pietate, qua opulentia Corinthi clarissima. *Caius* Corinthiensis fuit, a Paulo baptizatus, ut ipse fatetur I Cor. I, 11. Gratias ago Deo, quod neminem vestrum baptizavi, nisi *Crispum* et *Cajum*. De *Stephana* autem. Ep. I ad Cor. I, 16: Baptizavi autem et *Stephanæ* domum: ceterum nescio, si quem alium baptizaverim. Et iterum XVI, 15. Obsecro autem vos, fratres, nostis domum *Stephanæ*, et *Fortunati* et *Achaici*, quoniam sunt primitiae Achaiae, et in ministerium Sanctorum ordinaverunt seipsos. Et iterum in eadem Ep. 17. Gaudeo autem in praesentia *Stephanæ* et *Fortunati* et *Achaici*, quoniam id quod vobis deerat, ipsi suppleverunt. Qui omnes ex Corinthiacis Christianis erant selectissimi, et Satanicam impietatem destruxerunt. Audi Suidam verbo *Coty*s: *Coty*s daemon apud Corinthios colitur, praeses effaeninatorum et impudicorum. Quod vero Corinthii fuerint salacissimi, testatur Strabo, lib. 8, cum de fano Veneris loquitur celebratissimo, et sat vulgare proverbium: Non est Corinthum adire cuivis integrum.

<sup>83</sup> *Cretae.* — De *Ecclesia Cretensi* habemus nonnulla gravissimi quidem momenti in epistola ad *Titum* I, 5. Hujus rei gratia reliqui te Cretae, ut ea quae desunt, corrigas, et constituas per civitates presbyteros, sicut ego disposui tibi. Ex quo clarissime patet Titum Ecclesiae cretensis fuisse episcopum. De *Artema* et *Tychico* mentionem habemus ib. III, 12. Cum misero



ad te *Artemam*, aut *Tycheum*, festina ad me venire Nicopolim. De *Zena*. III, 13. *Zenam* jurisperitum, et Apollo sollicitè praemitte, ut nihil illis desit. Erat autem legis doctor sive romanae sive judaicae.

<sup>87</sup> *Cretaeus mendax*. — Qui fuerint, quodque eorum ingenium, patet ab eadem epist. ad Titum. II, 12. Dixit quidam ex illis, proprius ipsorum propheta: Cretenses semper mendaces, malae bestiae, ventres pigri. Quis vero fuit iste eorum proprius propheta? Epimenides creditur cretensis.

<sup>88</sup> *Contra stetit*. — In Act. XVI, 9: Et visio per noctem. Paulo ostensa est. Vir Macedo quidam erat stans, et deprecans eum, et dicens: Transiens in Macedoniam adjuva me.

<sup>89</sup> *In Aemoniae campos*. — De *Ecclesia Philippensium* pauca quidem habemus, sed e paucis videre est, quia ea fuerit clarissima. Apostolus in ipso litterarum suarum principio: Paulus et Timotheus servi Jesu Christi omnibus sanctis in Christo Jesu qui sunt Philippis cum episcopis et diaconibus. De *Lydia* muliere quae eos excepit, narrat Lucas, XVI, 14: Et quaedam mulier nomine *Lydia*, purpuraria civitatis Thyatirenorum coleus Deum audivit, cuius Dominus aperuit cor intendere his, quae dicebantur a Paulo. 15. Cum autem baptizata esset et Domus ejus, deprecata est dicens: Si iudicastis me fidelem Domino esse, introite in domum meam, et manete, et coegit eos. Quae hic narramus de puella, de carcere, deque carceris janitore, ibid. leguntur. In Macedonia duae erant praestantiores Ecclesiae alia *Philippis*, alia *Thessalonicae*.

<sup>90</sup> *Egenis*. — XVI. Act. Caput illis verbis concluditur: Exeuntes autem e carcere introierunt ad *Lydiam*, et visis fratribus consolati sunt eos, et profecti sunt.

<sup>91</sup> *Philippis*. — *Philippensi* primordia et incrementa addimus *Thessalonicensis Ecclesiae*. Fugiens Philippis per Amphipolim et Apolloniam Apostolus Thessalonicam venit, ubi erat Synagoga Judaeorum. Ibi verbum praedicavit, XVII, 4: Et quidam ex eis crediderunt et adjuncti sunt Paulo et Silae, et de colentibus Gentilibusque multitudo magna et mulieres non paucae. Quo autem potissimum Christianorum coetus conveniret, ex Act. eisdem comperimus. Versu enim 6 narratur, quod, concitata civitate, seditiosi ad principes civitatis clamabant: Quoniam hi qui urbem concitant et huc venerunt. 7. Quos suscepit *Jason*. Extant duae Pauli Epistolae ad Thessalonicenses, quibus Corinthi immorans, ubi fuga, consilio fratrum, salutem in tuto posuerat, Ecclesiam illam a se, Sylvano et Timotheo adjuvantibus, constitutum alloquitur et maximis laudibus extollit, quod facti erant forma omnibus credentibus in Macedonia et in Achaia: sed neminem Thessalonicensium nominatim commendat. *Epaphroditus*, et *Aristarchus* episcopi antiquioribus scriptoribus pronunciantur, ille *Philippensium*, iste *Thessalonicensium*.

<sup>92</sup> *Heracleaea*. — Princeps urbs est Thraciae Europae. Quod *Heracleensis Ecclesia* jam inde ab Apostolorum temporibus fuerit constituta, quodque

Heraclaeenses primum suum Antistitem *Apellem* Pauli auditorem fuisse contendunt, Lequienius, Tom. I, 5. 1093 refert; idemque profitentur Boll. mense Maji p. 183, et martyr. rom. ad 2. 7. martii, 7. jan. 13 april. 16 sept.

<sup>93</sup> *Eunice*. — Ex Iconio, ubi credidit Judaeorum et Graecorum copiosa multitudo, propter incredulos Judaeos, qui ad iracundiam concitaverunt animas Gentium contra fratres, confugerunt Paulus et socii Act. XIV, 6. ad civitates Lycaoniae Lystram et Derben. Lystris vir infirmus ex utero matris suae qui nunquam ambulaverat, audit Paulum magna voce dicentem: Surge super pedes tuos rectus, et exilivit et ambulavit. Quod signum admirati Lystriani Barnabam vocabant Jovem, Paulum vero Mercurium, et Sacerdos Jovis tauros et coronas adferens cum populis volebat sacrificare. Quod vetuere Apostoli, et sapientissima oratione sedaverunt turbas ne sibi immolarent. Quae fuerit *Ecclesia Ephesina*, quique praecipue eam illustrarint, ex Apostoli litteris licet cognoscere. Et primum extra omnem dubitationem possumus affirmare *Timotheum*, qui peregrinationis Pauli saepe numero comes fuit, ab ipso Apostolo Ephesi Episcopum fuisse praefectum. Ep. I, ad Tim. I, 3. Sicut rogavi te, ut remaneres Ephesi, cum irem in Macedoniam; et eadem epist. 19. Habes fidem et bonam conscientiam, quam quidam repellentes circa fidem naufragaverunt. Sed fides Timothei domo erat antiquissima, ut ad Tim. II, 1. 3. Recordationem accipiens ejus fidei, quae est in te non ficta, quae et habitavit primum in avia tua *Loyde* et matre tua *Eunice*, certus sum, quod erit in te.

<sup>94</sup> *Sanctissima mater*. — Quod sanctissima Virgo Mater cum Joanne perfecta sit Ephesum, ibique commorata sit, si cetera defuerint documenta, satis est epistola synodica sacrosanti Concilii ephesini, ad Clerum Constantinopolitanum data, de damnatione Nestorii: Quare et Nestorius impiae haereseos instaurator, in Ephesiorum civitate, quam Joannes Theologus et sacra Virgo Deipara Maria quandoque incoluerunt.

<sup>95</sup> *Tecta Tyranni*. — Act. XIX, 9. Cum autem quidam indurarentur, et non crederent, maledicentes viam Domini cum multitudinē, discedens ab eis, congregavit discipulos, quotidie disputans in schola Tyranni cujusdam. Fortasse hic est ille *Tyrannus* sophista, qui, ut ait Suidas, libros decem edidit de statu, et divisione orationis.

<sup>96</sup> *Scaevae*. — Non ergo tantum Pauli predicatione, sed nova occasione filiorum Scaevae principis Sacerdotum qui in nomine Jesu daemonia ejiciebant, magna ad rem Christianam facta est accessio. Act. Ap. XIX, 13. Tentaverunt autem quidam de circumcuntibus Judaeis exorcismis invocare super eos qui habebant spiritus malos, nomen domini Jesu, dicentes: adjuro vos per Jesum quem Paulus praedicat. 14. Erant autem quidam Judaei Scaevae principis Sacerdotum septem filii qui haec faciebant.

<sup>97</sup> *O Galatae*. — *Galata* sive *Gallograeia* dicta est in Asia minori provincia, ob Gallorum multitudinem, qui Alpes transgressi Italiam invaserunt,

impleverunt Graeciam, occupaverunt Macedoniam. Ex his Tectosagae e Narbonensi Gallia profecti, duce Leonorio, in Asiam cum venissent, Phrygiae partem Cappadociae et Paphlagoniae vicinam occupavere, Gallograeciam misto ex Gallis graecisque vocabulo cognominârunt.

<sup>98</sup> *Jerusalem.* — Apost. ad Gal. IV, 24: Haec enim sunt duo testamenta: Unum quidem in monte Sina in servitutem generans . . . 26. Illa autem quae sursum est Jerusalem, libera est, quae est mater nostra. Ib. V, 13: Vos enim in libertatem vocati estis . . . 14. Omnis enim lex in uno sermone impletur: diliges proximum tuum, sicut teipsum.

<sup>99</sup> *Colosse.* — *Colossus* una ex primariis Phrygiae urbibus. Quae fuerit *Colossensis Ecclesia*, ex Epistola colligere licet, quam Paulus Apost. Roma ad Colossenses scribit IV, 13: Salutat vos *Ephapras* qui ex vobis est, servus Christi Jesu, semper sollicitus pro vobis in orationibus, ut stetis perfecti et pleni in omni voluntate Dei. 13. Testimonium enim illi perhibeo, quod habet multum laborem pro vobis et pro illis qui sunt Laodicacae et qui Hierapoli. Cum autem Laodicaea et Hierapolis proximae urbes Colosso fuerint, *Ephapras* qui idem est ac *Epaphroditus*, habendus est earum Episcopus. Addit vero idem Apost. 13: Salutate fratres qui sunt Laodicacae, et *Nympham*, et quae in Domo ejus est, Ecclesiam. Ex quo clarissime patet in hujus *Nymphae* domo ad divina mysteria celebranda Christianorum caetum congregari. Denique in Epistolae clausula 17 habet: Et dicite *Archippo*: vide ministerium quod accepisti in Domino, ut illud impleas. Archippus itaque ejusdem Ecclesiae erat *diaconus*. De *Archippo* et ceteris in Colossensi Ecclesia clarioribus iterum meminit Ep. ad Philaemonem: 1. Philaemoni dilecto et auditori nostro. 2. Et *Appiae* sorori carissimae, et Archippo commilitoni nostro et Ecclesiae quae in domo tua est. 24. Salutat te Epaphras captivus meus in Christo Jesu.

<sup>100</sup> *Rerum usu doctos.* — Primum Linus, deinde Cletus, postea Clemens B. Petro in Romano Pontificatu successerunt. Romana Ecclesia et libertate electionis, et providentia singulari, quam postea semper praesetulit, in constituendis sibi Pastoribus, et Ecclesiae Catholicae, rerum experientia, duce ipso Petro, doctissimos ad supremam cathedram evexit.

<sup>101</sup> *Magdala.* — Opinione Baronii sequimur, vel potius Massiliensis Ecclesiae auctoritatem. In dispersione discipulorum a Stephani internecione facta, Lazarus, Maria Magdalena, Martha, et Marcella pedissequa, quos Judaei majori odio persequabantur, Hierosolymis expulsi et cum Maximino discipulo navi sive remigio impositi, vi tempestatis delati Massiliam pervenerunt, ubi Massiliensis, proximarumque Ecclesiarum fundamenta jecerunt.

<sup>102</sup> *Bellacem sobolem.* — Quamvis magna doctorum virorum dissensio-  
ne certetur de initiis Christianae Religionis in Gallia, nos tamen movet aureus Tertulliani locus VIII, lib. adv. Judaeos: Gaetulorum varietates et Mauro-  
rum multi fines; Hispaniarum omnes termini, et Galliarum diversae natio-

nes et Britannorum inaccessa Romanis loca, Christo vero subdita, et Sarmatarum et Dacorum et Scytharum et abditarum multarum gentium et provinciarum, et insularum multarum nobis ignotarum, quas enumerare non possumus, in quibus omnibus locis Christi nomen qui jam venit, regnat. Huic sententiae suffragatur Lucius Caecilius *lib. de mortibus Part. II*, ubi affirmat Neronis tempore: Non modo Romae, sed ubique quotidie magnam multitudinem defecisse ab idolorum cultu, et ad religionem novam, damnata vestustate, transisse. Et III: (Ecclesia) Manus suas in Orientem Occidentemque porrexit, ut jam nullus esset terrarum angulus tam remotus, quo non religio Dei penetrasset, nulla denique natio tam feris moribus vivens, ut non suscepto Dei cultu ad justitiae opera miteretur. Mamachius ad veritatem propensioem eam sententiam videt esse, quod vixerint primo Ecclesiae saeculo viri apostolici, qui in Galliam profecti Christianam religionem incolis explicare, inque omnes provincias introducere conarentur. Credit igitur quatuor Galliae provincias, ut ab Augusto facta divisio postulabat, hoc est, Narbonensem, Lugdunensem, Belgicam et Aquitanicam, fuisse Christo lucrifactas. In re tam dubia nos privatarum Ecclesiarum opiniones sequimur.

<sup>103</sup> *Seclusa Britannia.* — Josephus ab Arimathaea nobilis decurio ex Gallia in Britannias navigavit, incolisque primus auctor fuit, ut, relicta superstitione, Christo servatori assentirentur. Sunt qui Paulum ultimos illos Occidentis terminos lustrasse autumant, alii Simonem Zelotem Apostolum: sed maior numerus primordia lucis intulisse Arimathaeum censet. De *Simone* plura suo loco, inferius.

<sup>104</sup> *Germania.* — Aliquot Germaniae scriptores memoriae prodiderunt nostrorum nonnullos nihil veritos earum feritatem gentium, quas crudeles ac belluinis moribus esse intelligerent, ad eas contendisse, ut quas Romani subigere nequivissent, se in Christi potestatem permiserint. Quod de ea Germaniae parte facilius credendum est, quae Romanorum imperio parebat.

<sup>105</sup> *Pugnax Hispania.* — De Jacobo qui primus christianam religionem in Hispanias intulerit, diximus antea. Septem episcopi, quos textu nominavimus, auctore Baronio, peculiari Ecclesiae Hispaniensis commemoratione fulciuntur.

<sup>106</sup> *Marcus.* — Autumat Baronius anno tertio Claudii Marcum Alexandriam amandatum Alexandrinam Ecclesiam congregasse, opportuno adventu Philonis Judaei Alexandrini, de quo praestat Hier. de Script. Eccl. in Phil. audire: Ajunt hunc sub Caio Caligula Romae periclitatum, quo legatus gentis suae missus fuerat: cum secunda vice venisset ad Claudium, in eadem urbe locutum esse cum Petro Apostolo, ejusdemque habuisse amicitiam, et ob hanc etiam causam, Marci discipuli Petri apud Alexandriam sectatores ornasse laudibus suis. Conjicit ex hac habita Romae consuetudine, quod rediens Alexandriam Philo Marcum a Petro commendatum secum duxerit.

<sup>107</sup> *Honori.* — Alexandrina Ecclesia primum locum post romanam obti-

nuit, quod eam Marcus Petri nomine erexit. *Gelasius* idem his verbis testatur in Conc. Rom. decr.: Secunda autem sedes apud Alexandriam beati Petri nomine a Marco ejus discipulo et Evangelista consecrata est: ipse enim a Petro Apostolo in Aegyptum directus verbum veritatis praedicavit. Hic adnotandum, quod praefectura Alexandrina ab Augusto *augustalis* nomine insignita, longe praefecturae Syriae praestabat, ideoque Alexandrina sedes Antiochena maior fuit habita.

<sup>108</sup> *Maximus orbis*. — Quotquot romano suberant imperio, antiquitus *Romanorum* appellatione nobilitabantur, quique in orbe romano morarentur, *romani cives* omnes habiti. Sic fides *catholica* romana pariter dicta fuit. Cum enim Romana Ecclesia sit Petro peculiaris, qui totius Ecclesiae caput fuit a Christo Domino institutus, ipse non modo eorum qui Romae, vel in Italia essent, sed omnium in orbe terrarum Christianorum pastor dicitur, et universa Ecclesia in unam eandemque Romanam fidem convenit. Quae mirabilis mentium voluntatumque in una fide Christi societas, singularis Catholicae Ecclesiae est praerogativa, inque hoc munus Pontificiae sollicitudinis praestantissimum primis ipsis temporibus Petrus incubuit, firmatis illis sedibus episcopalibus Antiochiaae atque Alexandriae, quibus universus christianus orbis facillime Romae, principi et capiti totius imperii, copularetur.

<sup>109</sup> *Candelabra*. — Matth. V, 15. Neque accendunt lucernam, et ponunt eam sub modio, sed super candelabrum, ut luceat omnibus qui in domo sunt. Animadvertendum arbitramur quatuor haec Evangelia et eorum scriptores una hic nos, poeticae unitatis gratia, collegisse, quamvis Joannes serius et post Petri mortem suum conscripserit.

<sup>110</sup> *Babylonis*. — In fine epistolae Petri dicitur: *Salutat vos Ecclesia quae est in Babylone collecta*. Nomine *Babylonis* patres omnes Romam intellexerunt. Diversa ergo est Roma ab romana Ecclesia: illam Petrus improbat, hanc collaudat.

<sup>111</sup> *Formatasque hominum mentes*. — Si, uti ait Cicero, lex naturae est vera lex, recta ratio naturae congruens, diffusa in omnes, constans, sempiterna, quae vocet ad officium jubendo, vetando a fraude deterreat; si ipsum jus naturae hominum corde a Deo inscriptum nova solemniorique promulgatione per Moysen Hebraeis in lapideis tabulis exaratum Deus ipse restituit; si primo concilio Hierosolymitano Synagoga honorifice ad sepulchrum delata fuit; si praecipua Christianae legis praecepta non sunt novi juris vincula, sed ipsissima immutabilia naturalis juris mandata; nonne ad veri normam a natura ipsa comparatam mentem existimabimus? Jesus ipse primigeniam eorumdem praeceptorum intelligentiam explanaturus, clarissime testatus est. Matth. V, 17. Nolite putare quoniam veni solvere legem aut prophetas . . . non veni solvere sed adimplere. . . jota unum, aut unus apex non praeteribit a lege.

<sup>112</sup> *Non gravidae telis*. — Sic Joannes Chrysostomus ad Haer. Gentil. Dei virtutem in praedicatione Apostolorum ostendit: Peragranter Apostoli or-

hem terrarum et infirmum invenientes ad sanitatem reduxerunt, et in ruina positum ad stabilitatem revocarunt, non arcus tendentes, non sagittas mittentes, non pecunias largientes, non eloquentia confidentes. Erant nudi quidem saeculo, sed induti Christum, pauperes sed divites, pecuniae indigentes et regnum caelorum possidentes, non habentes humana solatia, habentes autem dominum Deum suum. Ego enim vobiscum sum usque ad consummationem saeculi.



# PETREIDOS

## LIBER IV.

---

### ARGUMENTUM

Hermus, Atheniensis ille juvenis, qui a teneris unguiculis Eunen adama-  
verat, eamque spe nuptiarum christianis sacris imbuerat, ubi primum  
Iphitum iusanientem in externas regiones filiam abegisse novit, ingenti  
fluctuatione animi perturbatur — Ingeniosus sane adolescens, omnibus  
vel naturae vel doctrinae praesidiis ad dicendum paratus gloriosam pe-  
riculae eloquentiae imaginem praesetulisset, si ad rem publicam geren-  
dam accedere potuisset — Sed ubi Graeciam privatis moribus lascivien-  
tem, publice romana dominatione pessumdatam offendit, a civili consue-  
tudine abhorrens in una Christi religione conquiescit: totoque animi  
affectu novam illam Graeciam salutatur, Christigenarum patriam, dome-  
sticis umbris adhuc delitescentem, quam pro explorato habebat et an-  
tiqua Graecia fore gloriosiore — Aegrotantem nepotis animum novit  
Dionysius Arcopagita, eamque attulit medicinam, ut sacram peregrina-  
tionem obiret, crebrisque itineribus christianae religionis incrementa  
cognosceret — Praecipue Romam viseret, ubi christianae Reip. princi-  
patum gerebat Petrus, summus Christi in terris Vicarius — Non gra-  
vate paruit adolescens, seque mari committit — Athenis discedentem  
patriae imago ubique gentium comitatur — Praeclaro locorum, insu-  
larum, portuum spectaculo exhilaratus ex pulchritudinis fragilitate, bre-



vem graecanicae vitae pulchritudinem lamentatur — In Augustaea apud Actium promontorium victoria orienti occidentem praelatum meditatur — In conspectu Paxos insulae, narratiunculam de Panos interitu, a gubernatore maris relatum audit, enucleatque — Brundusii surgentem Ecclesiam visit, Leucique, Brundusini Episcopi humanitate recreatur — Appiam viam populorum exercituumque ex occidente in orientem comitantium concursu celebrem, interminatas Apuliae regiones maturis messibus flavescentes contemplatus ad sublimia quaeque rapitur — Sed maxime Romae miraculo obstupuit — Et natura et situ, et viarum, et aedificiorum magnitudine, una omnium florentissima et potentissima urbs illi videtur, verumque, uti fama canebat, omnium populorum domicilium — Sed ipse domum Pudentis ad Exquilias petit, ubi Petrus Dionysii Areopagitae nomine ipso recreatus paterna eum caritate excipit — De Dionysio avo suo permulta Pontifici interroganti refert, permulta de graecanicae Ecclesiae statu, deque Areopagi gloria intermortua commemorat — Demum, siquid opus haberet, quaque de re Romam venisset, Pontifici percontanti, ipse juvenili verecundia suffusus, ejusdem misericordia implorata, infelicem amorum suorum historiolum texit — Sed supremus Christianae rei arbiter, Christiani conjugii institutione collaudata, eum consolatur, de nuptiis bene sperare jubet, et atticam virginem divinitus servatam, inque christianis castris tuto collocatam refert — Quo inopinato nuncio exhilaratus adolescens humi corruit, Deoque flens debitas gratias exolvit — Summus interea Pontifex tuta omnia, absente Nerone, putans e Pudentianae domus latebris egredi statuit, duobus praestitutus: 1. ut triduanae preces pro Pauli incolumitate ad Narcissi domum celebrentur: 2. ut, novis fluctibus Ecclesiae imminentibus, concilium ex omnibus Italiae Episcopis colligatur — Sed omnibus huic exeundi consilio obstantibus, ipse coortam in mari Tiberiadis tempestatem commemorat, quam Jesus, discipulis inopino periculo conclamantibus, dicto citius sedavit — Illamque navim patefacit fuisse Ecclesiae imaginem, quae turbari quidem, submergi nunquam potest — Qua oratione omnibus ad certam fiduciam arrectis, domo egreditur, ipso in limine fuis ad Deum precibus pro Ecclesiae tranquillitate — Parte alia infernae potestates contra Christi Ecclesiam conjurant — Satanas, ceterique impiae defectionis participes ex altissimis caeli sedibus in inferna latibula detrusi, nec una poenarum specie exagitati saepe per aëra versantur, Deo id concedente, ad excitandam electorum sollicitudinem, et ad peccatorum socordiam vindicandam — Satanas in primis perduellionis antagonus, per hominum coetus circumerrans omni machinationum specie eos a Dei consiliis praevertere conatur — Sed peragrato orien-

te , cum Christianam Religionem ubique gentium florentissimam vidisset, duosque daemones Moloch et Astaroth , alterum Palaestinae , Syriae alterum praefectum , relictis stationibus, fugitivos in sinibus Afrorum deprehendisset , eos in tartara secum abripit — In imperviis inferorum latibulis sua quisque primum infortunia conqueruntur — In eamque sententiam denique ventum , ut , relictis paullisper orientalibus plagis , Romam conveniant , collatisque viribus potentissimam illam infernae ditionis arcem omni ope teneant — Satanas aulam caesaream circumsideret , Neronemque ad cuncta atrocita et pudenda impelleret , eumque perterrefaceret , injecta alterius imperatoris formidine , qui ex oriente venerat Romanum solium occupaturus — Moloch Senatium , Hebraeos , Sophos , Magos tentaret , eosque disseminatis calumniis contra Christianos commoveret : praecipue Petro insidias strueret — Astaroth Romanam augeret corruptelam et praeposteras libidines , sollicitaret Christianos omnes impuris illecebris , et praecipue Eunem a proposita sententia demoveret — Conjuracionis caput est , uti Evangelicam lucem omnino extinguant , antiquam noctem per orbem terrarum effusam defendant : Petrum , quo super extractum aedificium , omni ope subvertant , in ejusque interuiccionem omnibus artificibus Neronem impellant : eo enim quasi fundamento collapsa , totam Ecclesiae molem ruituram — Quibus propositis , per Romana moenia dispescuntur , et primas Astaroth machinas admovent ad Eunae virginis mentem subvertendam — Quae ingenti illa trepidatione apud Pudentem sublata clanculum , domo Plautillae honestissimae viduae delitescbat — Sed recenti periculo defuncta , quamvis in portu conuiescebat , ancipiti praeteritorum malorum recordatione turbabatur , potissimum amissi patris , Hermique sponsi desiderio — Quam nactus occasionem veterator ille stygius libidinis faces adhibet , primum objecta Atheniensium ceremoniarum imagine , et jucundissima hortorum et littorum amoenitate — Mox primum Hermi conspectum , atque colloquium apud Cephisum flumen exhibet — Demum , abjectis fuco et fallaciis , Christianae vitae asperitatem deridet , et oblatam Romae sortem , ut caesarea maiestate praefulgeret , exaggerat — Gradu stetit huc usque Virgo : utque animi firmitatem perpetua constantia roboraret , caelestis internuncius , cui a Deo demandata erat Virginis tutela , inhonestae libidinis detegit blanditias — Mox , objecta Hermi effigie , prima loquentis verba commemorat , Christiano viro nubere non posse nisi christianam — Qua cogitatione veluti expegefacta , et illo , quo stabat lubrico et praecipiti , subsiliens ad Plautillam confugit , difficultates quibus affligitur , patefacit — Quae consilio , et auctoritate eam confirmat — Tum Mulieris fortis elogio e Scripturis Sanctis perlecto ad

Christianae militiae certamina inflamat — Eune victrix caelesti quada-  
dam voluptate perfunditur — Impius vexator tanta Virgunculae fortitu-  
dine tremefactus bene munitam domum relinquit, per ethnicam Romam  
sua incendia allaturus.

**S**ALVE, magna parens Sophiae, vatumque ducumque  
Graecia magna parens, salve. Quis nomine tantum  
Te memorare queat, nec dulci concita motu  
Pectora subsiliunt? O laetae tempora sortis,  
Cum tuba terribilem sonitum procul aere canoro  
Increpuit, patriae voce inflammata juvenus  
Impatiens in bella ruit, securaque mortis  
Barbaricam eluviem sacra e tellure rejecit!  
Tunc Asiae toti patuisti immane sepulcrum;  
Et dum bosphoricos pavidus Rex ' nabat in aestus  
Parva navicula, viduataque regna petebat,  
Pro patria functis vates praeconia laudum  
Solvebant, plenisque viis plenisque theatris  
Grata superstitibus plausu fremituque secundo  
Laeta triumphali decorabas tempora lauro.  
Heu! heu! quid video? tantos oblita triumphos  
Segnis inersque jaces? senioque aegrota situque  
Prostas? eja, solo ex humili consurge: recussam  
Ambitione mala, laceram civilibus iris \*  
Inclyta Religio veniet medicarier aegram.

Hermus Cecropidum praeclara ab origine natus  
Nil nisi sublime ab primis suspexerat annis.  
Hinc avus, inde parens, et gentis nomen agebant,  
Inque uno sors magna domus, et magna quierat

Gloria: namque olli, primaevae flore juventae,  
Uno eodemque anno genitorum gaudia rapta,  
Et super unus erat Dionysius: ille, senatus  
Actaei splendor, juveni advigilare nepoti  
Gaudebat, natam formans ad grandia mentem.  
Vivaci ingenio, roseo pulcherrimus ore  
Magnanima Periclem <sup>3</sup> referebat imagine priscum;  
Urbani mores, doctrinae copia pollens,  
Pollens eloquium: tantum vetus ille potentem  
Nactus erat patriam, et liberrima pectora quibat  
Arbitrio molare suo: neque segnior Hermus  
Altricem terram cura studioque fovebat.  
(Rebus in humanis nihil isto nôrat amore  
Dulcius <sup>4</sup>!) Obstupuit divinam ardescere lucem:  
At patriae non ille silet per mollia motus  
Pectora; suavis amor crescit, vitioque remoto  
Eluitur. Christi cultor gaudetque doletque,  
Ceu varia vice secretis concrescit in umbris  
Graecia Christiadum patriae praelata priori.

Nocte super media argoos mutasse penates  
Iphitum, et ausonia natam avexisse carina  
Audierat, casuque animum concussus acerbo,  
Nunc huc turbato nunc illuc pectore fertur.  
Infelix juvenis! studio properaverat omni  
Virginis unanimae mentem perfundere Christi  
Lumine: maturis jamjam speraverat annis  
Sponsam rite sibi sanctas conjungere ad aras.  
Heu! vanum desiderium! heu sors coeca futuri!  
Nec tantum amissa moeret pro conjuge, quantum  
Ne stygiis ruat in pessum data praeda tenebris.  
Sed non fugit avum gemitus, carique nepolis

Aerumnosus amor. Senior miserescit, et aegri  
Saepe dolet gemitu, atque jubet confidere dulci  
Alloquio. Tandem lectas deerrare per urbes  
Hortatur, Christique recens invisere regnum,  
Sicubi mutato caelo componere posset  
Irrequietum animum, et tristes avertere curas.  
Nulla olli mandata dabat, magnumque tueri  
Patrem Christiadam, et sacrae cognoscere Romae  
Principium. Extrema tum vero nocte, paranti  
Remigio celeri piraeum linquere portum,  
Praedixit Senior: Romae pomoeria, fili,  
Septenis dominata jugis, Romamque stupebis:  
At non externo cunctabere cortice: Roma  
Ethnica mirandis rerum deservit orsis,  
Quae Deus omnipotens caelo properata sereno  
Maturat: tacitis sed tu scrutare latebris  
Alterius Romae primordia; quaere Pudentis  
Limina, quo tanti motus cunctatur origo.  
Quae septingemina nova lux super emicat arce!  
Illa facem ducens totum circumvolat orbem,  
Irradians populos diuturna nocte sedentes.  
Talia dictabat senior, cupidoque bibebat  
Pectore magnanimus juvenis, rerumque novarum  
Illectus specie caris migrabat Athenis.  
Non ego te solum, rerum dulcissime, linquam.  
Seu rate velivola myrtoos findere fluctus,  
Seu juvet Italiae loca per diversa vagari,  
Tot caussas rerum, atque aevi monumenta recentis  
Perlustranti adero, mentisque arcana repostae  
Excipiam, saeculis satagens mandare futuris.  
Et jam siderca dimensus lampade gyrum

Titan hesperium sensim properabat in aequor;  
Qua cadit ille inter nubes, caelique marisque  
Lumine purpureo tractus intermicat ingens.  
Parte alia vidui solatur inania regni  
Cynthia languidulis assurgens pallida bigis,  
Ardentesque micant stellae, nitidaque corona  
Umbriferae irradiant matris mirabile velum:  
Per mare tranquillum velis felicibus ibat  
Navigium, et Zephyrus placide molantibus alis  
Ludebat, circumque levi plangore sonabat.  
Securus juvenis patrios excedere colles  
Viderat: at placidae noctis surgentibus umbris,  
Cum primum excedens vale caris dixit amicis,  
Desertae meminit patriae: salit impete dulci  
Mollius in tenero cor pectore<sup>5</sup>, cura momordit  
Acrior, humidulae rorarunt lumine guttae.  
Ipse notans variosque situs nomenque locorum  
Cycladas<sup>6</sup> apparere videt. Quae dulcis imago!  
Quam pulchre in gyrum superextant gurgite summo  
Ante fores patriae! manibus per mutua nexis  
Succincta aequoreas jurares veste sorores  
Motari in numerum! pulchrum mare, sidera, caelum!  
Pendent æriis impostae rupibus urbes,  
Et procul ambrosio ridentia flore virela  
Apparent, facilesque sinus, variique viarum  
Anfractus, portusque apti, centumque carinae.  
Haec avido circumspiciens oculo: Omnia pulchra!  
Junior exclamat. Terra tu pulchrior omni,  
Graecia, sed species cedit pede lapsa fugaci.  
Gaudia multa tibi lusu exhilarata jocisque,  
At lusus fragiles, et gaudia vana, jocique:

Ceu rosa purpureo quae mane refluoruit ostro;  
Ast, abeunte die, rubra cervice reflexa  
Languescit moriens, foliisque cadentibus omnis  
Cedit honor. Senii quis damna rependit inertis?

Praeruptos Ithacae scopulos, Læertia regna,  
Securus cernit: nihil illum regia tangit  
Alcinoi, atque horti Phoeacum, opulentaque tellus.  
Intentam maiora movent praesentia mentem.  
Nam vix Leucatae nimbose cacumina montis  
Emicuere, jugo e summo dominatus Apollo  
Virtutem Augusti memorat, positumque tropoeum,  
Immotis stetit ipse oculis, magnaeque revolvit  
Omina fortunae, mutataque tempora Romae <sup>7</sup>.  
At porro humanis prima unde exordia rebus  
Incipiunt, caelo referens: Sic magna vicissim  
Imperia Omnipotens certa ratione gubernat,  
Sicubi corruptos certa servare ruina  
Aggreditur populos, melioremque addere sortem.  
Romanis tremefacta armis aegyptia conjux  
Effugit; ipse oriens aevo macieque senescens  
Proruit in praeceps convexo pondere nutans;  
Spiritus occidua major superemicat ora,  
Et solvit veteris nutantia vincula mundi.  
Tum Deus eoum hesperio connexuit orbem <sup>8</sup>,  
Quo tellus omnis, sincera innoxia pace  
Composita acciperet Christi mirabile Verbum,  
Nullaque inerranti obstaret vis obvia luci.

Ecce autem Paxon <sup>9</sup> venientem nauta salutat.  
Confestim accedens navisque viaeque magister  
Haec, inquit, nobis venerabilis insula semper:  
Tempore nam Tiberi remeabat ab acquore pinus



Argolico, et fluctus findebat laeta tumentes,  
Jamque in conspectu Paxos patet insula; nautae  
Atque viatores tremulo sub lumine lunae  
Somno procubuere alii per transtra jacentes,  
Libabant alii spumantia pocula bacchi;  
Ecce repentino colles clamore propinqui  
Insonuere: vocat Thamum vox maxima: navim  
Ipse gubernabat, puppique sedebat in alta,  
Sidera collustrans: iterum ferit aethera clamor  
Nequicquam: clavumque regens velisque ministrans  
Ille gubernaculo haerebat. Sed tertia postquam  
Vox sonuit gravior, validoque exterrita pubes  
Remigio abstinuit, qua vocem silva remittit,  
Attonitus volvit flammantia lumina Thamus,  
Et fantem audivit: Quo pergere tendis, abito:  
Hoc unum moneo. Cum interlabere Palodi "<sup>10</sup>  
Pracruplas rupes, i nuncius, atque referlo,  
Quod magnus Pan occubuit. Mandata secutus  
Thamus, ubi primum scopulosa cacumina cernit,  
Signalamque oram, puppi denunciat alta  
Occubuisse Deum. Tenebris nox alta silebat,  
Sed subito auditi e luco resonare silenti  
Ingentes gemitus, et luctisoni ululatus  
Fusus lamentantum ingens tristemque ruinam.  
Miratur Thamus, miratur nescia pubes,  
Sed nemo potuit rerum cognoscere causas!  
Talia narrabat navis moderator, et omnes  
Pendebant miro eloquio: sed junior Hermus:  
Scilicet occubuit magnus Pan "<sup>11</sup>: nomine Panis  
Graecia caelumque et terras, camposque liquentes  
Naturamque sinu genitalia semina rerum

Gestantem, vastaque adeo se mole moventem  
Agnovit, plenaque Deum veneratur acerra.  
At nunc, exorto caelesti lumine, novit  
Veracem obsequiosa Deum natura, suoque  
Grata Creatori " male raptos reddit honores.  
Tartareae pestes trepidum regnare per orbem  
Assuetae ingemuere. Potens consurgit inertli  
Terrigena e somno, et victor nova robora sumit,  
Veracem agnoscitque Deum. Sic ille monebat  
Veras explanans causas: nautaeque potentem  
Christigenam stupuere, et dia oracula fantem.

Ecce gubernator puppi speculatus ab alta  
Italiam clamat: cuncti clamore sequuntur  
Italiam, ripasque vident adstare propinquas,  
Brundusiique arces: via tum tellure potitos  
Appia ducebat magnae sub moenia Romae.  
Tranquillus portus lentum est curvatus in arcum:  
Tutum perfugium confecerat arte magistra  
Impulsis fluctu adriaco Natura carinis.  
Leucius occiduas Petrum comitatus ad undas  
Christiadum coetum sanctas cogebat ad aras.  
Grajugena impatiens venerandum visere gestat  
Pastorem, atque Deo promissum exolvere votum.  
Inde viam repetit: spes addita crescit eundo.

Ut primum ausoniis posuit vestigia regnis,  
Aetlaeae sensim excedunt telluris amores,  
Assurguntque novi, qui pectus imagine complent  
Insueta rerum. Sublimia vastaque cuncta!  
Moribus it natura aliis, aliusque locorum  
Est habitus. Quantum poterat spectare, patescit  
Immenso veluti flavescens aequore campus,

Omnia frugiferis undantia messibus arva,  
Appiaque occurrit praestans Regina viarum <sup>13</sup>.  
Adspicit admirans monumenta insignia luxus  
Templaque magna Deum, praecelsa palatia mole  
Marmorea, tumulos dextra laevaue frequentes.  
Consistit crebro, tacitusque in mente revolvit:  
Haec via, qua humani generis glomerata propago  
Partibus e variis aeternam accurrat ad urbem.  
Planitiem immensam et cerealia jugera montes  
Claudunt perpetui, nemorosaque saxa praealtis  
Visa cacuminibus summum prope tangere caelum:  
Sed juga, sed montes viridanti palmile rident.  
Mox varias hinc atque illinc circumspicit urbes,  
Paciferis studiis, aut martis laude cluentes  
Omnes, egregiis oppletas civibus omnes,  
Quae strepitu vario fervent, et longa viarum  
Taedia praepediunt, et pingua culla coronant,  
Queis ver purpureum toto non deficit anno.  
Aëria tandem veluti consurgere nube  
Romani incipiunt colles. Miratur, et haeret  
Aspectu tanto, magnarum ingentia rerum  
Ordia praeicipiens; Romae reverentia crescit.

Qui sensus olli bipatentia moenia primum  
Intranti, passimque oculos per cuncta ferenti?  
Jamdudum egregius Juvenis monumenta vetustae  
Volverat historiae, fatoque excussa sinistro  
Viderat imperia, et praeclarae inviderat urbi,  
Quae virtute sua cunctas tremefecerat oras.  
Haecce Roma, inquit, quae parva palatia primum  
Mox septem tenuit colles, campique patens  
Aequora? quae primum posuit pomoeria, posthac

Saepius extendens, Tiberina desuper unda  
Injecit pontem, et clivis dominata propinquis  
Janiculi, vaticanis extruxit in arvis  
Ardua tectorum, et lucis habitavit opacis,  
Edomitumque orbem totum in sua tecta vocavit?  
Fertile qua Tibur, qua pinguis Aricia, surgens  
Immensa ceu mole gigas, undantia pandit  
Brachia: Tirrenus Tiberina sub ostia fluctus  
Claudit, et allapsu totam circumfremit oram.  
Majestate nova septenas occupat arces  
Alma triumphatrix: felix opulentia fulget  
Molibus extructis operum, artificumque labore,  
Quo victus fudit congesta aeraria mundus.  
Nobilitate potens praecelsis collibus, unde  
Lumine purpureo splendescit largior aether,  
Tollit luxurians fastigia summa minasque  
Murorum aërias: demissam humilemque Suburram  
Pauper habet, miserosque extra pomoeria pagos.  
In medio, veluti conferto examine densae  
Agglomerantur apes, domibus congesta domorum  
Culmina: dispersae varia regione morantur  
Devictae gentes, latiis decora alta trophoeis.  
Cappadocum haec regio: haec Scythicae telluris alumnis,  
Haec statio Hebraeis. Popularis fluctuat unda  
Per plateas, strepitu ingenti via personat omnis.  
Hic equitat longis acies praetoria pilis.  
Illinc patricius curru procedit ovanti,  
Atque eques asiacae monstrans documenta rapinae.  
It matrona potens pilentis mollibus, itque  
Moecharum stipata phalanx, famulique sequaces.  
Romanos rerum dominos miraris ubique.

Major vita foro tamen emicat: effluit illuc  
Roma catervatim varia ambitione laborans,  
Inde alios repetit cursus, aliosque recursus.  
Illuc praecipue sine re, sine nomine turba  
Laudans Romulidum fumum strepitumque potentum  
Vespere, mane ruit, segnisque perambulat almae  
Luce fruens Romae: Circos, et magna theatra  
Balneaque et victum romana aeraria pandunt.

Ille urbem explorat totam: Capitolia celsa  
Romanumque forum vidit, lautasque Carinas  
Et martis campum (Circos, et magna theatra,  
Milleque mygdonio fulgentia marmore templa  
Effugit, neque fas oculos, animaeque pudorem  
Virgineum effigie rerum temerare profana);  
Omnia perculerant animum, praeque omnibus unum hoc,  
Innumeros populos eadem consuescere in urbe,  
Germanos Gallis mixtos, Afrisque Pelasgos  
Incessu varios habituque et vestibus omnes.  
Conspicit, et magno stupefactus numine clamat:  
Terrarum dominam, et populis caput omnibus urbem  
Romam dixerunt, tali quae nomine digna.

At quamvis tantae percussus imagine molis,  
Omnia posthabuit juvenis, magnique Pudentis  
Limina, Christigenis unis loca nota subibat,  
Nuncia grata tibi portans, o Maxime pastor.  
Quem simul ac sancta trepidum formidine coram  
Conspexit Pater, et graia resonare loquela  
Audiit os, tabulasque videt pastoris amici,  
Hortatur subito juvenem, laetusque profatur:  
Ecquid agit rerum Dionysius? Ut valet ingens  
Lumen Cecropiae, et pastor clarissimus urbis?

Fortunatum, inquit, nebulas qui primus avitas  
Contempsit, simplexque animi sapientia verum  
Edocuit. Christi cum funere visa repente  
Omnia contremere, auditus fragor undique terris,  
Ipse videns subito defectum lumine solem,  
Unus praeveniens aevi documenta futuri  
Illas profudit stupefacto e corde loquelas:  
*Seu Rex Naturae patitur, seu cuncta feruntur* <sup>14</sup>  
*In nihilum, et natura ruit spoliata magistro.*  
Quid mirum, toto si pectore combibit ingens  
Eloquium Pauli? verique abscondita magnum  
Vicere ingenium exculta ratione paratum?  
Dic, agedum, quae grata refers, fili? Attica tellus  
Templa videt deserta deum? consurgere signa  
Christiadum videt et Christi notescere lumen?  
Audiit Hermus avi laudes, et nomina honoris,  
Attollitque animum, et roseo sic incipit ore:  
O Genitor, quae cuncta vides perfecta per orbem,  
Ipsi Grajugenae spectant: per rura, per urbes  
Tartareae fugiunt tenebrae, defessaque nugis  
Graecia suscepit verae argumenta salutis.  
Praestans Grajugenae ingenium, viridisque juvena  
Perculerant Petrum, rerumque exorsa capessens:  
At te, quandoquidem grajae virtutis imago  
Tanta nitet, quonam veterum decora incluta ducunt  
Praecipue? Pleno num Curia magna tonantem  
Eloquio patrum videt aequiparare magistrum,  
Et res Cecropidum meliora ad fata referre?  
Tunc Hermus toto suspirans pectore: Quidnam,  
O genitor, quaeris? quae virtus vivida, fandi  
Copia quae poterit patriae auxiliarier aegrae?

Istuc ingenii me libera vena tulisset.  
At postquam cessit romano subdita sceptro <sup>15</sup>  
Graecia, nil genti omnino nisi vita relicta est,  
Et privata nefas et publica quaerere jura;  
Quae fuit ingeniis melioribus alea major,  
Quam grave servitium? tota florebat in urbe  
Nomen Areopagi <sup>16</sup>: dum res stetit integra, dictus  
Divorum sedes, Themidemque aequaverat ipsam,  
Integritas donec morum rebusque regundis  
Incorruptus honos, annis prudentia maior  
Munivere viam. Nunc gloria prisca recessit,  
Et tantum historiis veterum descripta patescit  
Circumquaque nitens insueta Graecia luce  
Carminis altisoni, sophiaque et fulmine martis.  
Graecia servitum ruit omnis, perdita luxu  
Ludisque obscoenis. Heu! dum labefacta fatiscunt  
Omnia, dum foedo jacuere natantia somno  
Lumina, Tarsensis nostram veniebat ad urbem,  
Et fera flexanima movit subsellia voce.  
Insueti genus eloquii me perculit ingens;  
Per fora, perque domos Grajūm stupefacta morantem  
Pectora consector, magnaeque illectus amore  
Doctrinae, ejuro veteris documenta minervae,  
Nec Demostheneos flammantia spicula miror  
Amplius, atque Stagyritam, doctumque Platona.  
Ex illo, quoniam dotalis regia Christo  
Parla Redemptori permulto sanguine venit  
Jerusalem, invisio sancti incunabula regni:  
Inde Asiam peragro: quacumque Ecclesia Christi  
Emicuit, procerum relego vestigia sancta,  
Doctrinaeque novae sequor historiamque locorum.

Hic Senior grajum laeto jam lumine cernens  
Per sacra ingenium tensis spatiarier alis:  
Perge, ait, o fili: requiescat Graecia in uno,  
Unde malis hominum primum medicina parata est.  
A tu quid venias? age fare; negotia rerum  
Tractare, an magnae miracula visere Romae?  
Erubuit subita commotus voce, stupetque  
Cecropida attonitus: summi reverentia honoris,  
Quae secreta diu premit alto in corde, silere  
Consiliatur, et ultro genas suffundit honestas  
Ingenuus pudor, et tremulo vox errat in ore.  
Ancipites animos, curisque ingentibus aegrum  
Agnovit senior. Penetrans abscondita cordis,  
Interiora videt certamina, et ore paterno  
Ocyus alloquitur: Quaeenam te adversa fatigant,  
O fili? tibi numquid opus? quid nostra juvare  
Sollicitudo queat? Qualis post ignea noctis  
Tempora, cum caelum flammato incanduit aestu,  
Si tandem aurorae exorientis lumine, lenes  
Exurgunt Zephyri, placide motantibus alis  
Aequora crispantes, languescens nauta triremi  
Immota gestit, toto tum pectore captat  
Auras roriferas, anima interrupta resumit  
Officia, insuetumque capit per membra vigorem;  
Hermus talis erat. Patriis hortatibus haurit  
Antiquam virtutem animo, magnoque dolore  
Saucius ex imo traxit suspiria corde:  
Farier ergo jubes, Genitor '7? Rescindere velum,  
Quod premit arcana nostrum ceu nube dolorem?  
Quando jubes, fabor. Miseris succurrere suetus,  
Quandoquidem ipse malis medicamina prima referre



Diceris, eja precor, veniam concede roganti.  
Adventus longaeque viae, Pater optime, causa  
Est amor, unus amor. Vitae melioribus annis,  
Cum nihil ipsa sui mens conscia fertur, et omni  
Pellicitur specie, nullique obnoxia culpae  
Ludit, nota mihi formosa puellula: nobis  
Par aetas, animique pares: sic crevimus ambo:  
Utque diu nostros jungebant fida parentes  
Vincula amicitiae, et tectorum pervius usus,  
Crevit amor. Multos vicit facundia Pauli:  
Praecipue Patruus stupefactus numine tanto  
Restitit, heroemque sua intra tecta vocavit,  
Mutatusque sacra voluit perfundier unda.  
Ex illo foeda ejiciens simulacra deorum  
Ad sacra Christiadam aufugi, nomenque professus  
Sanctam militiam amplector. Formosa virago,  
Cui similes animos concordia fecerat, ingens  
Exemplum sequitur; nostris sermonibus aures  
Praebuit et Christum edidicit, fideique repostis  
Edocta alloquiis sacratio fonte renasci  
Expectabat ovans; socio mox foedere sanctus  
Jungeret Antistes. Tantum pater Iphitus <sup>18</sup> obstat.  
Oranti Paulo pleno pugnare senatu,  
Cum Jesum audivit dia virtute sepulchrum  
Vicisse, et superas surrexe ad luminis auras,  
Ausus; ubi veterum effigies liquisse deorum  
Deprendit natam, verbis castigat acerbis,  
Meque domo extrusit, natamque per avia ducit  
Terrarum, nostros quo obliviscatur amores.  
Audivit Senior pius, occultoque dolentem  
Vulnere festinat paullatim extollere: Christo

Fide tamen, Juvenis: nec connubialia vincla  
Servator solvit, castumque abolevit amorem.  
At caelo natum macula detergier omni  
Edocuit, terraque humili consurgere caelo.  
Et sibi conjugio copulata Ecclesia sancto,  
Ipseque formosos oculos, sponsaeque comantem  
Laudat caesariem, et sancto respondet amore.  
Et tu sume animos: quod nomen Virginis? instat.  
Ceū, spirante Euro, calefacto in fomite crevit  
Ignis inardescens, et vivida flamma rubescit,  
Haud secus exarsit juvenis, cum spectat amores  
Non damnare suos, potius miserescere Patrem.  
Laetatur, nomenque Eunae cito protulit. Eunen?  
Admirans repetit Senior: pater Iphitus? orbes  
Tunc spectans Petrus aethereos, animoque volutans  
Eventus varios: Quae suaviter omnia tractas,  
Omnipotens, cui fas hominum praevertere? Saepe  
Te fugit, in mediaque fuga tua jussa facessit  
Terrigena, obsequiturque volens renuensque jubenti '9  
Et mox laetato subridens respicit ore  
Hermum admirantem, et dictis affatur amicis:  
At tu parce metu; pacta laetabere sponsa.  
Haec tibi praedico: vestro benedixit amori,  
Sanctaque conjunxit caelo connubia Christus.  
Alloquio attonitus juvenis jam multa parabat  
Dicere, sed Senior: Satis haec: ne cetera quaere:  
Quin potius vestiga oculis per cuncta, require  
Patrem infelicem, qui nata afflictus adempta  
Aut jacet in tenebris majora pericula vitans,  
Aut natam amissam quaerit per compita fixum  
Corde gerens misero magnum, insolabile vulnus.

Crediderit tamen : ipse sacris altaribus Eunen  
Eripuit, raptam Christus custodiit Eunen,  
Incolumemque Patri meliori tempore reddet.  
Junior attonitus ( neque non certissima retur  
Singula, quae Senior secura mente profatur )  
Augurat oplatum finem superesse laborum  
Exultatque animo. Tum lenis lacryma laetis  
Emicat ex oculis; roseo vis purpurat ore,  
Ignea, poestano ceu lecta rosaria cultu  
Primo mane rubent, si caelo decedit humor  
Roscidus, atque ardent nativo suaviter ostro.  
Inflexo ipse genu media procumbit in aula:  
Ut te conspicio dubiis succurrere rebus,  
Rex caeli. Quaecumque paras, spes omnis, et omnis  
Christiadum a te uno pendet fiducia. Quando  
Et pater es, dicique cupis pater, accipe natum.  
Nec frustra eloquitur senior, tua sceptrā vicesque  
Qui gerit in terris: magnam tu mentem animumque  
Inspiras: sua dicta reponam condita mente.  
At Rex Christiadum ( sua quamvis otia fructum  
Atque sibi atque urbi geminato fœnore reddunt )  
Constituit tandem e tutis exire latebris.  
Quo mage praesentit tot operata tumescere bella,  
Acrior assurgit caeleste infundere robur.  
At discessurus sic digerit omnia: Tempus,  
O socii, tandem tacitis erumpere claustris.  
Multa mihi peragenda instant: absente Nerone,  
Pauca serenato nitet indulgentia caelo.  
At tu, magne Pudens, Romam quacumque vocato  
Pastores Italûm: dum tempestatis iniquae  
Horrida prospicio glomerari nubila, fortes

Casibus adversis socios concordia praestat.  
I, Clemens: quoniam spes caelo innititur omnis,  
Nostra refer mandata piis: tres ordine luces  
Pastores omnes libent, regemque supernum  
Orent suppliciter, magna comitante corona.  
At sedes mutare juvat: Capitolia ad alta  
Qua modo Narcissus <sup>20</sup> meliore palatia cultu  
Mutavit, Numen populus caeleste precetur,  
Ut fundata suo mysteria sancta cruore  
Illustret, sanctumque potens tueatur ovile.  
Talibus imperiis magno suspensa timore  
Haerebat stipata phalanx; nihil hiscere quibat  
Ipse Pudens; Glaucas sed longa silentia rumpit  
Junior, et juvenum ritu fidentior orsus:  
Sancte senex, quae deinde jubes? unum omnia contra  
Stant caput, inque ruunt unum jacta undique tela.  
Cede volens; aut polluta migremus ab urbe,  
Hanc timeo pacem, et quorsum tarsensia verlant  
Judicia, aut alios quamprimum exquire penates,  
Haec si adeo suspecta domus, neque credere tutum  
Per mediam sese Romam, per nota viarum.  
Adrisit Petrus: neque non jucunda Parenti  
Natorum pietas: demissaque lumina cernens:  
Vos omnes terrent aurae, sonus excitat omnis,  
Inquit: jam Christo dignas ostendite vires.  
His oculis, his, inquam, oculis conspeximus ingens  
Prodigium, arcani praesagia certa futuri.  
Forte Capharnaum <sup>21</sup> populosam advenimus oram.  
Dum pavidae gentes rerum novitate stupeunt,  
Seque Dei agglomerant lateri, et comitantur euntem,  
Ipse fretum transnare jubet. Quae margine ripae

Navis erat, subito in laetas deducitur undas.  
Ipse videbatur pontus gaudere fluenti  
Navigio: sed vix tellus urbesque recedunt,  
Horribili incubuit stridens aquilone procella.  
Ignibus aethra micat crebris, tonitruque tremiscunt  
Ardua terrarum, certoque excussa magistro  
Cymbula praeda natat pelago, rimisque fatiscit.  
Interea Christus placidam per membra quietem  
Hauribat. Comites magna formidine pressi:  
Serva nos, Domine, exclamant, mors imminet: ille  
Excitus clamore virum, strepituque marino;  
Namquae parva fides? inquit. Tum respicit aequor.  
Aequore pacato, venti posuere, reditque  
Nubibus amotis, placido lux aurea caelo.  
Hoc erat indicium saeculis insigne futuris.  
Hujus navis erat facies Ecclesia terris  
Sparsa pererratis. Consurgunt saepe frementes  
Venti transversa, et navim mersare minantur.  
Nec prudens Deus ipse velat, quo gloria maior  
Crescat Christiadam diaeque potentia dextrae.  
Nos navim interea regimus, clavumque tenentes  
Hortamur socios mediis surgentibus undis.  
Quis metus est? caelo supremus rector ab alto  
Invigilat: tumidis tot tempestatibus actam  
Per brevia et syrtes, videt ipse allidere navim:  
Undisonum extemplo pelagum prospectat, et undae  
Subsident, placidi reddit indulgentia caeli.  
Non dormit noster Dominus, sed numine magno  
Humanas jubet in melius procedere sortes.  
Traclantem caeli mysteria magna Parentem  
Omnes suspiciunt taciti et fiducia crescit.

Ille autem, quamvis omnes per tela, per ignes  
Arderent comitare seneni, contentus abibat  
Unius auxilio Glaucae. Tum limine portae  
Subsistit, calidumque hoc fudit ad aethera votum:  
At nos Te sequimur, Pater optime, maxime caeli.  
Praetentos valui toties transcendere muros \*\*,  
Te faciente viam, et potui procedere gressu  
Semper inoffenso. Tua fulsit dextra labantem,  
Et validos aptasti humeros, validosque lacertos,  
Siquando tumidos humana superbia fastus  
Extulerit, stygiaeque ausint obsistere turmae.  
Eja age, tanta tibi nostrae si cura salutis,  
Si toties potui insidias vitare paratas,  
Te duce, perpetuum proprio hoc da munere, semper  
Ut placeam tibi: luminibus tu lampada nostris  
Praefer divinam, tu nostros dirige gressus.

Extra anni solisque vias, orbisque creati  
Moenia, inaccessus vivis et nocte sepultus  
Est locus <sup>3</sup>: amolo nigricant cava viscera tractu,  
Quae Pater omnipotens inconsolabile vulnus  
Mente gerens tacita, primoque elusus amore  
Condidit, aeternaque domum caligine sepsit.  
Justam divina invenit sapientia poenam,  
Qua primum oblata specie regina niteret  
Virtus supremi decus admirabile regis,  
Justitia, et mulcta sontes compesceret aqua,  
Ingratam turbam stirpemque exempla sequentem  
Sperato ausuram male respondere favore.

Mira prius vasti quam staret machina mundi,  
Fama est aethereos stellata in veste ministros  
Effecisse Deum, solio qui astare <sup>4</sup> valerent

Conspicui, portentiferae primordia dextrae.  
Alipotens genus aethereis de fratribus unus  
Ducebat, facie pulchra et fulgentibus armis  
Insignis late, et cunctas ceu stella cohortes  
Anteiens, sparsa passim de luce vocatus  
Lucifer <sup>25</sup>. Infelix! propriae malesanus amator  
Formae damnosos concepit mente furores,  
Jamque ope divina nusquam indignuisse, suisque  
Credidit auspiciis semet praestare beatum <sup>26</sup>.  
Mox gravior trepidam malesuada superbia mentem  
Incessit, caelumque ipsum furialibus armis  
Poscere, stellanti e solio detrudere magnum  
Induperatorem caeli, sibi poscere honores  
Divinos, sibi stelligeras parere phalanges.  
Aethera conscendam <sup>27</sup>, super astra nitentia magnum  
Constituam solium, caelesti in monte sedebo,  
Stetque Aquilo lateri, subter cava nubila cernam:  
Par fuero similis Deo: sic ille profatur  
Per convexa poli, sociasque in foedera turbas  
Seditione potens quaerit, sonuitque rebellis  
Buccina, terrificis rumpens clangoribus auras.  
Demens! dum nimbos tempestatesque sonantes  
Excutiens, tumidosque ciens in bella maniplos  
Discurrit, subito disruptus ab aethere fulgur  
Insonuit, celeri scindunt se nubila tractu,  
Et bellator eques, trifido circumdatus igne  
Apparet. Cernis saevis concurrere telis  
Unum contra omnes: terror comitatur euntem.  
Contremuere acies, viso ductore, rebelles,  
Seque fugae dederunt. Cunctis mutatur imago  
Antiqua, informesque cadunt per inane figurae.

It Michäel, totusque ardet caelestibus armis,  
Horrendoque micat clypei septemplex orbe,  
Inscriptumque notis flammanli umbone coruscat:  
Ecquis par summo poterit certare Tonanti <sup>289</sup>

Ergo quae primo Pater immortalis ab ortu  
Munera concessit, quaeque ollis gratia vivax  
Contigerat, donum aligerae admirabile gentis,  
Amisere: vident defectum lumine solem,  
Dumque ruunt trepidas turba agglomerata per auras,  
Panditur extemplo pestem absorptura nefandam  
Horrida, opaca specus, ruptisque voraginis atrae  
Faucibus injiciunt sese, si fors an ore  
Conspectuque Dei fugiant majora timentes.  
Qui veluti primo lucescens phosphorus astro  
Fulgebat quondam, subita caligine mersus  
Umbrarum evasit princeps <sup>29</sup> artisque malignae:  
Quique Dei praedulce jugum sprevere, duellum  
Ausi barbaricum et saevos miscere tumultus,  
Imperium Satanae truculentaque jussa tulerunt.  
Stant geminae pestes inferno in limine, *Culpa* <sup>30</sup>  
Et *Mors*, quas uno atque eodem Styx horrida partu  
Parturiit, primique dedit stabularier antri  
Vestibulo, panduntque fores clauduntque tremendas.  
Cardine nigranti sublustri formula luce  
Nunciat: *Aeternum maneo*: aeternumque manebit  
Supplicio regnum, quod vasto moenia terna  
Circuitu totum cingunt, ternaque dehiscunt,  
Quantum acie nequeas inum contingere, fossae.  
Intus tartarei deserta horrentia regni  
Vanesunt, vastaue velut fornace liquescit  
Ignis avernalis. Foeda loca nocte sepulta



Horrifficae obnubunt tenebrae, longoque ululatu  
Omnigenoque strepit gemitu deterrima vallis.  
Per pice torrentes atroque bitumine fluctus  
Volvuntur fontes; sensum mentemque putares  
Ignibus ingenitos: poenae non omnibus aequae.  
Pro meritis flammæ<sup>31</sup> exagitant, flammisque moratur  
Omne mali robur, quas justa ventilat ira  
Aeternus iudex, et inexorabilis Ultor.  
Saepe acrumnosi exilii pertaedet, et astra  
Suspiciunt, sed dextra potens avertit: iniqui  
Immiserabiliter fundo volvuntur in imo.  
Saepe inclamantes misero finire labores  
Indomitos letho optarint; non audiet ullus;  
Caelestes rigido colles adamante rigescunt.  
Oderunt praesens, metuuntque futura, nec ulla  
Spes fulget superas quandoque evadere ad auras;  
Stat dolor, et rerum metas et tempora nescit.  
Atque utinam tenebrosa acies Acheronte sub imo  
Mansisset, neque vindictas meditata nefandas  
Foedasset misero modo natum crimine mundum!  
Namque ubi terrestri positum statione recentem  
Conspexere hominem, cui diæ semina mentis  
Indiderat genitor, manuumque insigne suarum  
Deproperabat opus vacuum transducere ad aulam;  
Non requiere, nisi communia damna creassent  
Humanae soboli, temerataque labe priori  
Stirps omnis stygium praeceps raperetur ad orcum.  
Sacrilego data poena dolo: caelestia templa,  
Quae generi Deus humano secreta parârat,  
Iratu clausit, gentesque habuere profanas  
Horrendae valles acherontaeaeque cavernae.

Vix pauci quos venturi spes ignea alebat  
Messiae caeloque beabat conscia virtus,  
Divinum effugere odium: sed cetera turba  
Innumera, immenso quaequae concreverat orbe,  
Tartareo ductori ibat damnata rapina.

Tempus erat, neque dum aerumnosum clausimus aevum,  
Gallica cum Sophia ingeniis tumefacta superbis  
Antiquo dejecta loco sacra dogmata sprevit,  
Rejiciens veluti infirmæ vaga somnia mentis.  
Dum passo errabat lymphata licentia crine,  
Illico materies misero circumdata coeno  
Invasit regnum: divinae semina flammæ,  
Per quæ cognato posset se tollere caelo  
Terrigena, ipsa novis studiis elata rejecit:  
Humanasque animas, caelique erebique ministras  
Aligerum mentes, fabellas sprevit aniles.  
Et nunc Ammericæ<sup>32</sup> quæ terris omnibus una  
Liberior, docet arcani commercia mundi,  
Ictus spirituum crebros, tabulasque rotantes  
Vociferans: quaenam referet vox nuncia verum?  
Scilicet huc recidet misero lymphata furore  
Mens hominum! Simul ac sacris discedere castris  
Audebit, qua auctor fidei morumque magister  
Verum commissum sacra tulatur in arce;  
Pestifera errorum nubes, quæ sæcula prisca  
Foedarat, rursum pollutam erumpet in auram.  
Huc ruit atque illuc ratio fidentior, atque  
Nullo firmata auxilio mendacia adorat.  
Si mentem et corpus<sup>33</sup>, quamquam diversa duobus  
Natura, Omnipotens terrena in mole manentes  
Conjugio tamen arcano junctoque vicissim

Foedere conciliat; ( ratio si cogitat, idem  
Continuo sequitur contacto corpore motus,  
Corporeo inque vicem motu ipsa movetur, et uda  
Materie impressos ictus per mutua sentit:  
Sic anima alterno coalescit foedere membris,  
Attamen ipsa potens quo divida vivere possit; )  
Anne Deum exuperat, fragili ut compage soluta  
Tandem anima effugiat mortalia jura superstes,  
Et bene promeritas in caelica templa receptet,  
Dulcia felicitis fruituras praemia sortis,  
At sontes foedo damnatas crimine poenis  
Ultricis flammæ et stygiis exerceat umbris?

Quo gemitu quave invidia damnata malorum  
Agmina spirituum Bethlaeo nascier antro  
Audierunt puerum? donum inviolabile pacis  
Agnovit <sup>34</sup> caelum, laetae quo nuncia sortis  
Insueta emicuit flammanli lumine stella:  
Agnovit mare; sub pedibus cita constitit unda,  
Dique substrato tenuit vestigia ponto.  
Agnovit tellus, subito quae concita motu  
Naturae auctorem ingemuit cecidisse, patremque.  
At non agnovit Satanas. Deus occulit illi  
Arcanos partus, majestatemque supremam  
Numinis, objecta mortalis imagine formae.  
Ille sed occultam, supraque humana ferentem  
Sese virtutem Solyma innotescere vidit.  
Vidit, et addubitans suspecta mente patrantem  
Mira tot aggressus crebro tentamine <sup>35</sup>: victus  
Proripuit sese, sed nescit ferrea solvi  
Ex oculis nubes, neque fas mysteria magna  
Complementem novisse Deum, et per foedera pacis

Certantem terras patrio conjungere caelo.  
Ast ubi Servator tenebroso irrupit averno  
Signa ferens Crucis, immortalique refulgens  
Imperio caliganti detraxit ab antro  
In nomenque suum, atque fidem sperantia patrum  
Pectora; apostolico impatiens mox audiit ore  
Bissenas resonare tubas, et tartara regna  
Paullatim antiquis sensit spoliata rapinis,  
Transcriptosque novos in caelica templa colonos;  
Id quod erat, novit: caeli reserata nitentis  
Limina viderunt: mortisque cōercita foeda  
Imperia et culpaē medicamina lata, polique  
Conciliis revocatum hominem mercede redemptum  
Ingenti, et summi pacatam vindicis iram.  
Pars tristes sine sole domos, caecasque tenebras  
Quois latuere prius, rapido perrumpere tentant  
Effugio; duplicat graviora repagula dextra  
Omnipotens, terramque inter volvuntur et astra,  
Caelicolūmque domos fidas, hominesque beatae  
Flumine laetitiae cernunt innare, feroxque  
Aegrescit cura invidiae superexcita flammis.  
Pars opus infandum peragunt, furtimque dolosis  
Insiidiis tendunt firmas evertere vires  
Christiadum, et mundo majorem offundere noctem.  
Nec vetat ipse Pater Superūm, quo intacta vigeret,  
Ornamentum ingens, homini concredita dono  
Libertas <sup>36</sup>, quiretque sua virtute mereri  
Praemia, sperati immortalia gaudia regni.  
Ipse Pater sinit aëriam deerrare per oram,  
Et sua fraternis regna excutienda trophaeis  
Cernere, dum certo benenata Ecclesia fato  
*Vol. I.* 30

Propagat magnum magna incrementa per orbem,  
Taenarias vincens furias, populisque vocatis  
Profert divini pretia infinita cruoris,  
Perfacilem cursum monstrata ad sidera pandens.  
Ipse praeit Satanas furibundo examine: gaudens  
Corda cupidineis humana lacessere telis  
Terrarumque orbem antiquis cohibere tenebris,  
Lucifugas acies <sup>37</sup> per vasti moenia mundi  
Disposuit, pugnasque regit stimulatque furorem.  
Aërio assuetus sese praecingere nimbo,  
Sicubi terrena ignotus regione vagatur,  
Saepius humanas audet simulare figuras.  
Divini nihil at superest, alienaque formae  
Furatus spolia, horrendum, execrabile monstrum  
Per terras se circumagit; terrorque minaeque  
Insidiaeque ferox stipat comitatus euntem.  
Hirsutam capiti galeam, clypeumque sinistrae  
Insertat, qualis funesta in praelia iturus.  
Vae misero! caeleste decus, cristasque decoras  
Amisit flictu horribili, parmamque adamante  
Sidereo ardentem divinus contudit ensis.  
Quaenam turbatos vultus circumlegit umbra  
Moestities? nigricant caperata fronte furores  
Perpetui, atque oculi flammata luce rubescunt,  
Sanguineus qualis sublustri nocte cometes.  
Loricam ingentem rupit penetrabile fulmen  
Desuper illapsum, patuitque in pectore hiulcum  
Vulnus, quod fecere ignes, sanieque cruenta  
Manat adhuc; vultu spectat saepe ille feroci,  
Et ferrugineo nequaquam obducit amictu;  
Namque dolet latitans, graviusque aegrescit aperlum;

Intus adest imas urens styx foeda medullas.  
Mens superinductis tenebris manet obsita <sup>38</sup>: vafrum  
Ingenium latrociniis insigne creandis  
Calluit insidias omnes artesque latentes.  
Mente mala est animus pejor: rectumque bonumque  
Ignorat, perstatque malo obfirmata voluntas <sup>39</sup>.  
Dumque assueta dolis injusta aversaque aberrat  
Mens, cui poena comes, diam splendescere lucem  
Conspicit, rebusque novis procul amovet ipsum  
Omnipotens manus: auricomo dum cuncta nitore  
Fulgere miratur, squalore informis iniquo  
Objectis circum stygiis remoratur in umbris,  
Conceditque Deus tantum spectare, quod acrem  
Augeat invidiam, renovati foedera mundi,  
Suppliciiue sui non eluctabile monstret  
Judicium. Saevit terramque perambulat omnem <sup>40</sup>,  
Tartareae ingeminans vestigia foeda ruinae.  
Sic et anhelantem triplicato ex aere molossum <sup>41</sup>  
Laxat sub noctem dominus; vasta ille cohortis  
Atria perlustrat rabidus, magnoque latratu  
Turbidus exululat; vicinia tota tremiscit.  
Custodit tamen ille domum, occultosque latrones  
Occursare ausos morsu discerpit acerbo.  
Non tamen ille suos sentit mansuescere luctus.  
Ceu quandoque aegrum <sup>42</sup> depascitur arida febris  
Quamvis aut caelum aut mutat conclavia, fulgens  
Indi dentis honos thalamis, pulcherrima vestis  
Stragula, sive jugis jucundior aether apricis  
Nil morbum relevant, fervorem et frigora sentit,  
Cognatique mali fibris vis serpit in imis.  
•Ergo peragrârat vasti confinia mundi

Rex Erebi Salanas, duplici tutamine firmans  
Regna olim sua, fraternumque ad dira perhortans  
Noctipotens agmen: sed magno inopina dolori  
Causa superfuerat, simul ac florescere Christi  
Conspexit sobolem, subitaque excussa ruina  
Hac illac passim labefacta dehiscere regna.  
Tum praetergredienti Aegyptia regna, reductis  
Finibus Afrorum, qua Khami foeda propago  
Laesi fatifera attulerat convicia patris <sup>43</sup>,  
Occurrere olli profugi statione relicta  
Judaeae et Syriae, duo propugnacula belli,  
Astaroth, et Moloch. Coeno lutulentus iniquo  
Astaroth <sup>44</sup> obsceno gaudens confundere gentes  
Concubitu in venerem rapiebat more ferarum,  
Humani delens vestigia prima pudoris,  
Errabatque furens per turpia lustra Corinthi,  
Impia perque Asiae fana, et praepostera furla  
Suadebat populo divis auctoribus, ipsum  
Fasque nefasque docens nullo discernere fine.  
At foedus Moloch <sup>45</sup> flamma gavisus et auro  
Constituit propriam per Caanitida sedem,  
Praecipue ammonias stimulans ad barbara gentes.  
Nec quidquam Isacidæ sacrarum fulmine vocum  
Profuerunt vates. Judaeam invasit in omnem  
Atrox improbitas; dira obsidione redemptum  
Abducens populum deserta per invia Moses  
Aversam plebem properatam ad numinis aram  
Repperit indignans sacrum celebrare nefandum.  
Quin etiam Salomon quo non sapientior alter,  
Postquam connubiis sese maculare profanis  
Ausit, Jerusalem prope moenia, vertice in ipso

Montis oliviferi, templum solemne sacravit,  
Et statuam solidis auroque atque aere metallis  
Imposuit, sacrosque dies, mystasque tremendos,  
Mos quibus aggestis cava per conclavia flammis  
Injicere ardentes pueros, dumque addita lignis  
Hostia flagrabat, berecynthia cymbala passim  
Excutere, et miseras tinnitu extinguere voces.  
Ut Satanas procul clapsos regione remota  
Daemonas insueta trepidos formidine vidit,  
Agnovitque fugae caussas, subitasque ruinas,  
Infremuit secum, totusque perhorruit, orco  
Extremum exitium metuens, cladesque propinquas.  
Jamque pedem referens supero revocabat ab orbe  
Praecipuos scelerum comites, regnique statores.  
Participes operum caeli convexa relinquunt  
Taenarii fratres, ingentisque intima luctus  
Corde recondentes vestigia lenta sequuntur  
Ductoris. Rabido is confixum pectore vulnus  
Securo aspectu abdiderat, truculentaque gestans  
Proposita abstrusas repetebat saucius umbras,  
Sepositam insidiis sedem arcanisque fovendis,  
Ne quidquam in lucem vulgi imprudentia prodât.  
Demens! qui caeli regem laluisse putaret  
Omnia cernentem! Jamque ipsa sub ostia dilis  
Perveniant: geminae, famularis turba, sorores  
Nigranti exiluire throno. Mors ossibus altis  
Nixa et membrorum laceris compagibus ollis  
Ibat in occursum, nunquam saturata recludens  
Guttura; nec comitem Culpa aversata refugit,  
Horrida sustollens capita informesque figuras,  
Inque patris foedos complexus corrui: ille



Horruit exitiale scelus, partumque nefandum  
Rejicit horrescens laeva, dextraque protervum  
Abscondit vultum, et foribus sese intulit altis,  
Et foedis Erebi patuit regnator in umbris  
Vasta mole gigas. Tribus ingredientibus, atrae  
Ingenti passim strepitu intonuere cavernae:  
Atque iterum atque iterum raucus circumsonat horror  
Frustra clamantium. Proceres regemque tuentur,  
Jamque recrudescit non consolabile vulnus,  
Et metus et lacrymae et dolor et suspiria et irac,  
Atque amissa subit fraternae gloria formae.  
Non tulit id Satanas, lacrymisque immania miscens  
Murmura turbatus refugit, penitusque caverna  
Sevocat horribili fratres, consultaque quaerit  
Exposuitque furens lymphati incendia cordis:  
Tartarei Proceres, regni spes maxima nostri  
Nostraque praesidia, huc vestras advertite mentes.  
Et vestra, atque mea intererit. Mihi sola voluptas  
Ultio: quae stygiis odia implacata fluentis  
Ardent, quaeque novo aeternus dolor aggerat aestu,  
Exaturare juvat: mihi gaudia sola relictæ hæc.  
Quanta per eos facit infortunia campos,  
Qui caelo extorres phlegelonte cöercuit imo,  
Conspicitis. Nostris quondam si prospera coeptis  
Defuerat fortuna, nitentes si aetheris arces  
Liquimus, at nostro steterat medicina dolori  
Tuta triumphatis dudum victoria terris.  
Continuo sua conspexit procumbere templa,  
Qui nos expulerat supera regnator ab aula:  
Ipse palaestinis secretus montibus una  
Judaea sese tenuit; mihi serviit omnis

Illa ingens moles, qua sol utrumque recurrens  
Aspicit oceanum: solus toto arbiter orbe  
Jura dedi. Everso ut posset succurrere regno,  
Una salus victo, stellati e limine caeli,  
Ut quivi humanis jamdudum haurire loquelis,  
Impulit Unigenam. Stetimus tela omnia contra,  
Vicimus; infami confixus robore Christus  
Servilem in morem letho expiravit acerbo.  
At nunc reliquiae miserae quae clade supersunt  
Infanda, insequimurque diu terraque marique,  
Nobis bella gerunt: e semiviro comitatu  
Quem vulgo excerpis, cui regni tradidit omne  
Imperium, rerum possessoremque reliquit,  
Bissenī totum indignis clamoribus orbem  
Personuere: Asiam perturbant nostra per omnem  
Sacra: Paraethonii superantes ostia Nili  
Punica regna vident, atque extremos Garamantas.  
Stabimus immemores, socii, foedoque veterno  
Oppressi patimur nostrum procumbere regnum?  
Dixerat haec Satanas: graviores aggerat iras  
Moloch commemorans sprete infortunia regni.  
Heu! quianam nostros cogor vulgare dolores?  
Me nec Idumaeum, veteris neque sacra Philistim  
Deseruisse putes oī dulcedine captum.  
Eoos video e nostris evadere sceptris,  
Ex quo per totum fidens exercitus orbem  
Pervolat, et matutinis nova victima sacris  
Nuper compositas centum maclatur ad aras.  
Imo ego Graiorum antiquissima fana relegi,  
Sicubi judaeis medicamina forte ruinis  
Compererim: cecidit spes, invitique fatebor,

Contremefacta silent majora oracula Phoebi;  
Delphica <sup>46</sup> responsis tacuit cortina negalis,  
Et dodonaeas quercus viduata rejecit  
Aemathia; horrendi jacuit spelunca Trophoni.  
Ipsa etiam Vates Ponto dominata propinquo  
Thaurica bajanoque sinu Cumaea Sybilla  
Deseruere diu consultas reddere sortes.  
Tartarcas sedes magni spiracula ditis,  
Unde specus nostra haec squalenti immanis hiatus  
Excedens superi prospexit lumina caeli,  
Nescia mens hominum magno celebravit honore:  
Taenara <sup>47</sup> contremuit stupefacta Laconia; montem  
Ad nonacrinum stygiam venerata paludem  
Arcadia, Epirus nigras Acherusidos undas;  
Quid loquor Amsancti valles, et frondibus atrum  
Horrendis nemus? at cunctis clarebat in oris  
Finibus Italiae posita, et sub montibus altis  
Credita nostra domus, fauces graveolentis averni.  
At nunc caelesti lustrati lumine cuncta  
Terrigenae sprevere diu: nos nostraque rident.  
Talibus ardescens socias jactantior iras  
Astaroth amplificat, foedoque haec corde profatur:  
Phoenicum terras, Syriaeque sacraria fugi  
Atque Asiae ipse etiam: fateor, me terruit ardens  
Quae duodena manus passim documenta propagat,  
Matres avertensque viros ipsasque puellas,  
Nuptos innuptosque docens nova condita jura.  
Quae si terrenas sinimus regnare per oras,  
Emoto nostrum procumbet cardine regnum.  
Pugnavi saepe, at pugna congressus iniqua  
Victus defeci, simul ac ceu vivida lampas

Debellatae Ephesi praecelsa in turre locata  
Habraeas inter fortunatissima nuptas  
Virginis os habitusque gerens, at matris honores:  
Diviparam rentur vulgo dicuntque Mariam.  
Ast ego, quae vidi submoto oriente, fatebor.  
Est senior, Petrum dicunt, qui prima malorum  
Causa fuit, natumque vigil moderatur ovile.  
Bissenum quando numerum complere necesse  
Et socium legere, Iscarii qui magna teneret  
Munia, pontificem vidi illum cuncta regentem.  
Si judaea fremit rabies, si murmurat audax  
Desipuisse viros jactans vinoque calere,  
Exprobat audaces Petrus. Si ferre salutem  
Claudo, si divina loqui mysteria, contra  
Primores urbis si fas certare potenter,  
Aegrotos curare licet si corporis umbra,  
Petrus adest: sive insidiae et discrimina rerum,  
Seu res tranquillae, nullis et nubibus aer,  
Ipse praeit; primo Petrus laetatur honore,  
Jure prior; primum luctus et gaudia tangunt <sup>48</sup>.  
Dum nova virtutum praelucent lumina, dumque  
Rarescit comitum usque magis viduata corona,  
Anne manus dabimus victas, animoque quieti  
Possumus hostiles spectare impune triumphos?  
Non ita: si decuit victos, oriente relicto,  
Cedere, nos alias potius revocemur ad oras,  
Quo nostrum regere imperium concessa potestas.  
Talibus excussi memorabant vulnera regni,  
Effugique abitusque gemunt opprobria: tristi  
Aegrescunt gemitu longumque silentia servant,  
Demittuntque oculos. Satanas dein increpat ardens:

Et graviora premunt: submoto oriente propago  
Bissena occiduum sese convertit ad orbem,  
Ausonidum fines magna legione penetrans,  
Piscatorque galilaeus consedit in urbe  
Roma jamdudum, et sedem hanc sibi deligit unam,  
Imperii caput; hinc vasti moderamina regni,  
Qua jacet Antiochia potens, qua tuta carinis  
Dives Alexandria, ingens compagibus arctis  
Imperium magno complexus foedere, Romae  
Ipse manens, magno fraenat regna omnia nutu.  
At vos eoīs terris, unde improba pestis  
Defluxit, fugisse duos, statione relicta,  
Non ego degeneres dicam: vis major, ibique  
Explicuere hostes vasti molimina belli.  
At nunc occiduo spes omnis constitit orbe.  
Huc omnem, comites, operam vestrosque labores  
Vertite, ne ausonios possint obsidere fines.  
In primis nostri fortissima moenia regni  
Firmate, et totum notissima templa per orbem,  
Verbenas qua adolet pingues, et mascula thura  
Caeca superstitio, praesentes visite: certa  
Jactent Romulidae prae se responsa deorum,  
Quamvis eventus evertent fata futuros.  
Et si adversa fuit fortuna, aliudque laborum  
Tentare auxilium jubeat, maria omnia caelo  
Miscete, et nostros quocumque ciete maniplos.  
Millia nec desunt tot defensoribus arma.  
Ipse palatinum denso cingam agmine collem,  
Et nova criminibus cumulabo crimina: vultus  
Caesarea antiquos virtus mutabit in aula,  
Virtutisque locum sublimi sede tenebit.

Crimen: virtutem <sup>48</sup> mutata voce vocabo.  
Et quoniam Senioris erit ceu vertice in uno  
Nixa salus, pariterque ruel, pariterque vigebit  
Cum Petro nostris praelata Ecclesia regnis,  
Infandum caput hoc mille objectabo periclis.  
Jamque graves casus versantem corde Neronem  
Exercebo novis odiis, suspectaque cuncta  
Efficiam, atque alium Romae ostentabo tyrannum  
Surgentem, excidiumque olli solioque minantem.  
Non faciet Nero? praevalidos agitabo Quirites  
Spe veteris Romae, justis miscebo nocentes  
Nequiter, imperium crescit per crimina nostrum.  
Tum vero Moloch sueta ambitione tumescens:  
Vidimus infandi tenus hac praeludia belli;  
Et prisco e numero foedum desiderat agmen  
Quamplures. Romae pugnandum cominus armis:  
Sed facilis labor hic, Petrus si concidit unus,  
In Petrum nostrae vertenda est machina fraudis:  
Quem frustra Solymis, romana persequar urbe.  
Serpere ubi videam venis furiale venenum,  
Agmina foeda magos, quos Romae immisit in urbem  
Graecia sive oriens <sup>49</sup>, nostri firmamina regni,  
Queis unum officium maculatam offundere nubem  
Romanis animis, odio inflammabo recenti.  
Nutantes tentabo sophos, tentabo rebellem  
Progeniem hebraeam, trepidum tentabo senatum,  
Et conturbatam infaustis rumoribus aulam  
Excutiam. Nescit rapidos cohibere furores  
Astaroth indomitus, dictisque superjacet audax:  
Quandoquidem imperium mundi, regimenque tuendum,  
Tartarei comites, mihi (tantum haec gloria maior

Praetulerit cunctis), date ineluctabile belli  
Augurium. Tecto positam interiore puellam  
Qua Nero vesana contactus peste flagrabat,  
Christiadum fraudes rapuere: perhorruit amens  
Insidiis Princeps, et tota perfurit aula.  
Ibo, atque obscoenam per foeda incendia mentem  
Obsidam, et veneris refricabo impura nefandae  
Vulnera. Si fatum est Christum regnare secundis  
Auspiciis, caelum terris avertere cogar,  
Totque per impuram rerum contagia Romam  
Miscebo, ut superas graveolens se tollat ad auras  
Halitus, et crasso contristet sidera fumo.  
Ipse profanatae renovabit fata Gomorrhae  
Totaque terrarum moles considet in ignes;  
Esto: collapsum labefacto pondere mundum  
Conspicere, in mediisque juvat ridere ruinis.  
Christiadas nostrosque eadem nox opprimit: ipse  
Deserta ignotus dominus spatiabitur aula.  
Nec plura: atque olli comites plausere loquenti,  
Quo plausu phlegethontaeae sonuere cavernae,  
Exiitque ferox Satanas, risitque malignum.  
Mox ait: o Socii, laetae capite omina sortis.  
In primis nova lux, vobis omni arte cavendum,  
Ne caliganti quacumque illuceat orbi.  
Si mundus priscis squalescet conditus umbris,  
Imperium sine fine datum tutabimur. Eja,  
Antiquos revocate animos: super aethera magnum  
Certatum atque Deo: terris certare licebit:  
Vincere non homines levius? Neque plura profatur.  
Impatiens terras parat ire ferocius agmen.  
Ammerice qualis per plana immensa viarum,

Qua rota ferralos superirruit incita tractus,  
Machina fumiferam anteferens ad sidera nubem  
Increpat horrendum, ignitoque adaperita vaporibus  
Valva fluentisono reboat stridore per auras;  
Talis foeda cohors per tartara nigra pererrans,  
Remigio alarum lethaeas dimovet umbras,  
Dumque feri resonant gemitus saevique ululatus,  
Horrissonae emoto panduntur cardine portae,  
Et superas caeli tendunt evadere ad auras.  
Tum nutu procerum sequitur stipata minorum  
Spirituum manus, ut miseris inferna per urbes  
Consilia armati insidiis astuque facessant.  
Ceu quondam adventu veris, dum germine primo  
Erumpit gleba e putri cerealis aristae  
Spes, cupido agricolae voto expectata virescit  
Herbida luxuries, nigrantum turba volucrum  
Praedae inhians denso circumvolat agmine caelum,  
Laetata et terras jam despectare videtur:  
O terra infelix, qua exercitus incubat ingens,  
Ingluvie longa validus, fessusque viarum;  
Haud secus infernis erumpunt sedibus, atque  
Visi romanis actutum incumbere terris.

Infelix Eune, qua te regione requiram  
Qua eve tuae loquar, aut taceam infortunia sortis?  
Cui neque laeta fuit patriae mora, Romaque sedes  
Credita laetitiae fuit ingens causa malorum!  
Christigenae demum, et consorti foedere dignae  
Prima nitescebat tot caligantibus umbris  
Aurea lux pacis; bacchantibus altera nimbis  
Tempesta oritur, teque abripit unda resorbens  
In medios actam fluctus; stant omnia contra,



Praecipitesque fugae formidataeque ruinae,  
Nec laetum praesens, et spes incerta futuri.  
Jamque operi styx foeda instat: pars ardua magnae  
Fundamenta domus, quae nunc assurgit in auras  
Pontificis fabricata manu, de sedibus imis  
Excutiunt: juvenum pars mollia pectora telis  
Obscoenis fodiunt: facilis jactura pudoris <sup>49</sup>,  
Extinctusque pudor virtutem diruet omnem.

Romanam ut Clemens trabeam, dominasque secures  
Deposuit, Petrique sequens documenta loquentis,  
Turpia posthabuit periturae gaudia Romae,  
Magnanimi sequitur fratris vestigia, Christo  
Se Plautilla <sup>50</sup> vovens. Vix sancta Ecclesia dio  
Edocta affatu sacris excepiit in hortis  
Virgineum decus, et viduis reverentia maior  
Obligat: exortes sociali foedere, sanctae  
Praetulerunt vitae speratas carpere lauros,  
Desponsamque fidem cineri servare sepulto.  
Servabat matronales moestissima vittas  
Plautilla, utque fuit lustrata salubribus undis,  
Urbano strepitu semota, Deumque timebat  
Instabatque precī assiduae noctemque diemque,  
Mortua deliciis, quas perdita Roma colebat.  
Unica nata fuit Domitilla, piaequē parentis  
Aemula perpetuis Christi se voverat aris.  
Aque ubi Plautillam rapuit diviniō aura,  
Tradideratque domus conclavia maxima Petro,  
Ipse videns una Christi pietate morantem  
Mite ministerium viduae <sup>51</sup> concesserat. Illa  
Externo peregre venientes littore Sanctos  
Excipit hospitio, lassos errore viarum

Devenérata pedes lavat, auxiliatur egenis,  
Et quocumque malo afflictos solamine blando  
Recreat et regnum pia per benefacta paternum  
Ostendit Romae, et natae argumenta salutis.

Has inter latebras vigili circumdata cura  
Attica delituit virgo. Custodia solers  
Externo strepitu procul, allapsuque Neronis  
Foverat incolumem, ut caram nutricula alumnam:  
Cumque per Aesquilias praenuncia fama Pudentis  
Limina turbaret, medioque in honore sacrorum  
Praetrepidans coetus suspecta excederet aula,  
Extulerat mater medio e discrimine, molli  
Complexu excipiens, facilisque recondidit umbris.

Vix dubios casus tectis evaserat altis,  
Et labyrinthaeis secretae anfractibus aedis  
Externata latet, tutam constare quietem,  
In quamcumque domus advertit lumina partem,  
Conspicit; at veteres labefacto in pectore curae  
Acrius assurgunt. Animae immedicabile vulnus  
Sopierat solemne sacrum praeclaraque pompa,  
Et modo nata fides expectatique triumphi.  
Quid vero tristes valeat mulcere dolores  
Mollius, atque salutifero manantia rore  
Balsama terrigenum laniato infundere corde,  
Quam tua, Religio, sanctis solemnia templis?  
Jamque serenato primum resplenduit ore  
Risus, securae donans incognita menti  
Gaudia; sed subito rursus violenta dolore  
Vulnera crudescunt. Turbat timor omnia, mentem  
Virgineam obscuro nubes densissima nimbo  
Occupat. Interea funesto saucia luctu

Flet noctem lucemque inconsolabilis. Illam  
Praecipue patris casus movet, atque per urbem  
Circumagi totam malletque requirere patrem.  
Sed latebris efferre pedem truculenta Neronis  
Barbaries vetat, atque agmen vestigia missum  
Observata sequi. Qualis pavefacta columba,  
Quam ferus accipiter fugientem pone fatigans  
Unguibus insequitur volucrique per aëra gyro  
Arduus insultat, si praedatoris iniqui  
Evasit furiis, latebrosi in pumice nidi  
Stat pavitans, non illa fugae, non illa pericli  
Immemor; infestae resonantia murmura pennae  
Praemetuit, rostrumque immane, pedesque rapaces;  
Haud aliter Virgo tectis se detinet altis  
Multa querens, miseroque ciens suspiria corde:  
O pater, o nostrae spes omnis et unica vitae,  
Ah! quo te quaeram? tua quis dabit ora tueri?  
Ah! natae malesuadus amor te perdidit, atque  
Dira superstilio. Mihi consuluisse, tibi que,  
Sperabas alio terras sub sole calentes  
Quaerens: quo ferimur confusi vertice rerum?  
Tu Roma in media abstruso tumultus in antro,  
Si tibi perfugium quisquam monstravit amicus,  
Odisti aetheriam justa formidine lucem;  
At mihi nec priscas languenti in corpore vires  
Instauras; vitae ancipiti famaëque periculo  
Insuperata fides, et caeli dextra tuetur.  
Taliam commemorans parvam secedit ad aram  
Illacrymans, ceciditque solo, tibi, Christe Redemptor,  
Credens arcanum alloquium, fletusque recentes:  
Ah! mihi quae superest terris fiducia? Jesu

Omnipotens, Jesu humanae pietatis origo,  
Quandoquidem humanis nulla est constantia rebus,  
Omnia deseruere, inopem defende puellam.  
Matrem nec novi miseram nisi nomine: Mater  
Infelix! cui lux aegris fuit ultima terris,  
Quae mihi prima fuit. Nec me solabor, ut olim,  
Cum mea mortales haec vita reliquerit artus,  
Aethere felicem complectar, matre recepta  
Lactior: una potest sors haec contingere lactis  
Christicolis: latuit matrem lux magna, nec istud  
Abscedens liquit miserae solamen amanti.  
At tu qui adverso perituram turbine servas,  
Qui patriam actaci fugientem littoris oram,  
Ne tibi thuricremas ultro sacrarer ad aras,  
Romam affers, diaque manu contraria pellens  
Sanctas inter oves, sine spe, sine matre puellam  
Excipis errantem, nonne ipse in corde creasti  
Hoc patris desiderium? haec suspiria cernis?  
Has cernis lacrymas, quae me noctuque diuque  
Conficiunt, incerta sequor dum cuncta, patremque  
Quaero nec invenio? Patrem mihi redde, tibi que:  
Ah! tibi redde patrem. Tua per benefacta morantem  
In terris cernens natam, qui perfidus hostis  
Depugnavit adhuc, duce te, tibi fiet amicus,  
Et qui me genuit, dono meliore rependam,  
Gigno tibi fideique tuae. Nec plura profatur  
Anxia, et ancipiti cura labefacta fatiscit.  
Accurrunt lectae nota pietate sorores,  
Alloquioque foveat: Virgo, depone timorem  
Inque Deum jace spes omnes: namque aethere in alto  
Alter adest genitor, nulli qui vota ferenti

Defuerit. Quae alia est generis fiducia nostri?  
Qui bonus hybernae implacato sidere brumae  
Exiguas defendit aves, et pabula praebet,  
Tegmineque alarum vestit <sup>5a</sup>, te, candida virgo,  
Ire indefensam turbata per aequora saeculi  
Projiciet? tua cura sumus, Pater optime, tuque  
Disjice tempestatem omnem, et miserere tuorum.  
Vix haec virgineo tempestas corde resedit,  
Altera consurgit furiosis horrida nimbis,  
Quae miscens saevos glomerato vortice motus  
Cor ciet insultans, et summa concutit arce  
Submotam mentem, extremam latura ruinam.

Una fuit quondam aoniis celebrata camoenis  
Gloria bellorum, malesana superbia quando  
Obducto varias dirimebat pariete gentes,  
Unde truces inimicitiae, funestaque bella:  
Carminis heroi praeses regesque ducesque  
Calliope cecinit, sonitumque audire tubarum  
Lethiferum exiluit, martemque accendere cantu;  
Dum fera sanguineum exagitans Bellona flagellum  
Horrida inhumanae offerret spectacula morti.  
Ast ubi desertas repelivit candida terras  
Iustitia, et vero docuit distinguere falsum  
Atque animum regere et naturam in prava ruentem,  
Atque placere Deo visa est victoria major;  
Tunc sacro passim excutiens regna itala cantu  
Magnanimus vates thusca depulsus ab urbe,  
« Impiger, iracundus, inexorabilis, aeer »  
Errabat, tria regna canens, regna invia vivis,  
Crimina quo, poenas, quo virtus, praemia ponens.  
Attonitae circum gentes stupuere canentem,

Europamque omnem invasit sacer ignis, ubique  
Barbaricos pellens inopino lumine mores.  
Tunc nostra emicuit caelesti luce poësis,  
Quae populos alio edoctos rectique bonique  
Lumine persuasit bellum execrarier atrox  
Indignos Christi fraternum rumpere foedus,  
Ni fas jusque sinant extrema recurrere ad arma.  
Ast ego Romulidûm numeros, animosque secutus  
Libera per vacuum ponam vestigia campum.  
Non aliena premam audaci pede. Mascula Virgo  
Monstrat iter: vatem juvat immemorata referre,  
Et dum ventosae fugio suffragia plebis,  
Altera monstrabo populis speciosius arma;  
Altera militiae austerae documenta docebo,  
Quae polior teneras ornet victoria frontes.

Ex quo cecropiis Virgo discesserat oris,  
Sperati effigies juvenis terraque marique  
Errantem sequitur miseram. Roseo illa labello  
Discit Christiadûm sanctas iterare loquelas:  
At non discessit sponsi gradientis imago,  
Occurritque oculis. Persaepe altare sub ipsum,  
Sub primae noctis tenebras, reminiscitur Hermunum,  
Hermum, quem primum Christi documenta loquentem  
Audierat. Bene nota animo documenta recursant,  
Et juvenis lecti monitus, et prodita flamma  
Conjugii, et lacrymis roseos suffundit ocellos:  
Cumque pias pro Patre preces altaribus offert,  
Flens Hermum memorat, votis atque adjicit Hermum.

Talia conspiciens surgentis semina flammae  
Vis sociata Erebi miseram conjurat in unam:  
Cumque serenato cernit requiescere portu,

Protinus accedens adversos duplicat ictus.  
 Selecto illa choro comitum secesserat, atque  
 Icta dolore gravi sese in secreta remorat.  
 Omnia sola tacent; per muta silentia compos  
 Ipsa sui mens liberior spatiat, et olli  
 Terraeque, tractusque maris, caelique profundi  
 Imperium sine fine datur. Damnosa Voluptas,  
 Blanda oculos, fucoque genas suffusa modesto  
 Omnibus illecebris ardentis corda puellae  
 Pellicere aggreditur. Molli praecincla rosarum  
 Stemmata, quae Idalii pulchris rubuere rosetis,  
 Ipsa manu laeta flammam sustentat odoram,  
 Unde liquor fluit ambrosius, totumque pererrat  
 Aëra, mollitiem inspirans blandumque venenum.  
 Qua graditur cumque, acteo vestita lepore  
 Omnia subrident; molles it vita per artus  
 Suavior, assistunt lateri risusque jocique  
 Et choreae. Natam viridi illam Amathuntos in horto  
 Et paphiae delubra deae circumdare Graeci  
 Finxerunt veteres. Vix limina prima puellae  
 Contigerat, curae effugiunt tristesque dolores:  
 Praesentem docet irrepens inopina per artus  
 Segnities: vario mens icta cupidine oberrat  
 Avia terrarum. Calefacta mente, videtur  
 Virgo sibi rursus mediis incedere Athenis,  
 Atque animo redeunt patriae fora, balnea, circus,  
 Aequaeque chorus comitum, delectaque pubes,  
 Inter delicias, laeta inter gaudia vivens.  
 Ipsa eadem sese miscet ludentibus; errat  
 Magnis porticibus, patriae quae templa Minervae<sup>53</sup>  
 Exornant, et ubi diae decora inclyta laudis

Exculpsit Phidiae manus. His intenta moratur  
Mens, jamque effigies rerum subit altera maior;  
Nam Panathenaeis <sup>54</sup> pleno cumulata canistro  
Orgia sacra refert, pepli mirabile donum;  
Ipsa manu et nutu dociles regit una puellas.  
Tum patriae ipsius lecta obversatur imago:  
O, salve mihi, cumque sonans examine Himette  
Mellifluo: salve, teneris bacchate Cithaeron <sup>55</sup>  
Virginibus: salvete mihi, piraea reductis  
Littora navigiis: stat contra Aegina virenti  
Margine, stat Salamin claris memorata trophaeis.  
Proh! quantum ridet, fluctus speculata, jugisque  
Edita oliviferis benecultae urbs Palladis, illa  
Artificum, heroumque potens, et patria divûm!  
Talia succedunt juvenili somnia menti.  
Ipsaque suspecta trepidabat imagine, rerum  
Nescia; sed graviora movent praeludia pugnam.  
Infelix Eune! claustris inclusa remotis,  
Inter languentis miseranda silentia vitae  
Vivis? et humanas longe superantia vires  
Dogmata persequeris? nescis, quae dogmata Christi?  
Horrida barbaries, feritas inamabilis, ingens  
Civilis cultus odium, socialia vincla  
Dissociare potens <sup>56</sup>. Haec religionis iniquae  
Praescripta: anne licet ludos spectare frequentes?  
Magnarum anne licet spectacula cernere rerum?  
Vitabis Romam, coetus vitabis amicos <sup>57</sup>,  
Heu! te conde domi, te conde silentibus umbris.  
Quae vita infelix! melius quae mortis imago!  
Talis moesta querens fertur concentus ad aures:  
Propositi sed Virgo tenax surgentia circum



Murmura contemnit, pugnamque interrita spectat.  
Haud aliter solidis structi molaribus arcus,  
Quos super insanus plenos equitavit in orbes  
Cajus <sup>58</sup>, subjectumque viros ejecit in aequor  
Neptuno sacrum, si infortunata Dicarchus  
Tempestate tremit, rapido immersabilis aestu  
Pons manet immotus: nequicquam spumea circum  
Vertigo insultat, nequicquam immurmurat ingens  
Ventorum rabies; pelago dominata tument  
Stat rupes immota, minas et despicit omnes.  
Hic Stygius daemon maiora incendia miscet:  
At tibi vix magnae subeunti moenia Romae,  
Quae sors obtigerat! Romani principis aula  
Ultro reclusa tibi! magnum ascensura cubile,  
Caesareo e solio, victrix Regina Quiritum  
Laeta ferebare, et sponsis factura latinis  
Invidiam. Fugis ah! demens, et despicias aureae  
Tecta domus, raris laqueata palatia gemmis.  
At tibi deseritur justa formidine Roma?  
Pro molli thalamo et regali munere mensae  
Montanos inter silices, spelaea ferarum  
Inter deserta errabis, stipulaeque rigenti  
Fessa inniteris? collecta urgebit edendi  
Ex longo rabies? nudos vix conteget artus  
Velamen lacerum? . . Tali molimine pugna  
Ardescit, circumque fremunt propiora pericla.  
Haud secus armata quando obsidione coronat  
Hostis castellum, quod propugnacula mille,  
Turrigerique apices super et latera ardua cingunt  
Montis inaccessi, vis et natura tuelur:  
Circum equitat bellator atrox, portisque minatur,

Si qua murales posset transcendere pinnas;  
Securus victor montana desuper arce  
Despicit insanos ausus, et inania circum  
Praelia: non aliter furiis jactata minisque  
Mens immota loco perstat, nec ab ordine cedit.

Tunc primum ignotae explorat molimina pugnae,  
Quae movet interiora animae tentamina, quamque  
Curant Christicolae adversa superare palaestra,  
Atque extrema pati anteferunt. Hinc lubricus error,  
Et concreta mali labes, et prava parentum  
Semina divini contra dictamina juris  
Languida membra cident <sup>59</sup>. Venis furiale venenum  
Serpit, et offusa obnubens caligine mentem  
Flamma cupidineo bacchatur mota tumultu.  
Hinc animae aetheriae cognata potentia, quamvis  
Viribus editior primaevae stirpis honorem  
Servat adhuc, tamen assiduis tremit ictibus, atque  
Longius ambiguo luclans certamine sensim  
Virtutem antiquam sentit discedere, jamque  
Anxia corporeis nutans compagibus ipsa  
Deficeret; tua sed caelo delapsa sereno  
Gratia, Christe Pater, rebus defendit in arctis,  
Quandoquidem humanum allato medicamine solus  
Sanasti arbitrium <sup>60</sup>. Duce te teque auspice, surgit  
Christicola, et palma victor discedit opima.  
Invida vis erebi juvenili in pectore virus  
Miscet agens, caecoque admota cupidine falsis  
Ludit imaginibus. Sed pugna hortator iniqua  
Aliger aetherius favet auxiliaribus armis,  
Et prope dexter adest. Rerum ipse hominumque creator  
Invia terrarum densis horrentia spinis

Conspiciens, mediaque via, qua tendere caelo  
Terrigena exquirat, post prima pericula patris  
Caecas insidias, adopertaque bella timenti  
Auxilium ipse viro, defensoremque ministrat <sup>61</sup>,  
Ex quo Christiadum sacro perfusus in anni  
Insuetum per iter patriam contendit in arcem.  
Ergo repentino cernens surgentia motu  
Praelia, dum prima Virgo proludit arena,  
Stat juxta Puer, et quamvis caelestia vultus  
Lumina siderii ærio contextit amictu,  
Ipse novas artes, dubio nova pectore versat  
Consilia, et menti formas inducit honestas.  
Jam subit illius laetissima lucis imago,  
Cum primum audivit Christi mirabile nomen,  
Doctrinaeque novae stupuit contrerita lucem.  
Ambo constiterant, ipsa et pulcherrimus Hermus,  
Margine gramineo Cephisi <sup>62</sup>. Labitur unda  
Subter, et halantem jucundis floribus hortum  
Exhilarat. Vario inter se sermone serebant  
Plurima, sed Virgo jamdudum saucia dulcem  
Versabat curam, et placito indulgebat amori.  
Demens! cecropias inter versata puellas,  
Suetaque moeonium cum patre evolvere vatem  
Crediderat Venerem, quod solum numen amantum  
Graccia tercentum sibi conciliabat ad aras,  
Aequoreae irrigua prognatam aspergine spumae,  
Terrigenisque deisque pari dominarier igni.  
Crediderat dominam aurato considerare curru,  
Quam dodonaeae purum per inane columbae  
Vectarent leviter, pueri innuptaeque puellae  
Fulgere conspicerent, pictaque incedere zona <sup>63</sup>

Insignem, qua mille ferat suspiria, mille  
Et desideria et lusus, dulcesque querelas.  
Ergo dum impatiens prima ardet pectore flamma,  
Compellans Hermum roseo sic exciit ore:  
Dic age, quem tanto Christum veneraris honore,  
Vota libens curat juvenum, et miseratur amantes,  
Et spes confirmat dubias, et prima secundat  
Omina? Tunc juvenis caelesti saucius igne:  
Ah! cave, ne mentem fallax abducat imago.  
Numina quae colitis, mentis damnosa libido  
Finxit, et insidians dio veneratur honore,  
Ut primum exueret natura oblita pudorem,  
Et genio indulgere suo, et peccare liceret  
Omnibus impune, atque diis auctoribus <sup>64</sup>. Eja  
Muta propositum, terrenis libera curis  
Aude Christiadûm doctrinae assuescere sanctae.  
Ah! tunc, quid sit amor, disces. Ceu populus undam  
Propter flumineam, cui vitis nixa recumbit <sup>65</sup>,  
Auspice crescemus Christo, foetusque novelli  
Crescent nobiscum, et supëram tendemus ad oram.  
Et me, si nescis, me par similisque perurit  
Flamma, sed impediior vota exaudire colentis  
Numina falsa deûm. Dubio in discrimine virgo  
Tales commemorat monitus; locus, hora recurrit,  
Cum primum roseo novus ignis fulsit in ore  
Dilecti juvenis, primoque adrisit amore:  
Ipsa quoque erubuit, naturaque jura resumpsit  
Abdita, quae stygiae potuere obnubere fraudes,  
Et Christus donat nativa effulgere luce.

Ergo novas animo sensit succrescere vires,  
Haec recolens. Imo subitus superingruit horror,

Certamenque putat dubium. Moestissimus Hermus  
Visus adesse sibi, iustoque reprehendere fletu:  
Ecquid agis, Virgo? Si Christum deseris, Hermum  
Deseruisse puta. Qualis convalle virenti  
Candida maternis egressa puellula ab ulnis,  
Quae primum argutae consederat ilicis umbra,  
Si propiore latens herba superexilit anguis  
Asper, acerba tuens, horrendaque sibila mittit,  
Illa repentina pallet formidine, matremque  
Advocat effugiens, pedibus timor addidit alas;  
Haud aliter tectis penetralibus attica Virgo  
Surgit, et ingenti rerum timefacta periclo  
Plautillam quaerit, vulnusque ostendit apertum:  
O Mater (quo alio dicam te nomine?) mater,  
Ecquidnam tanto turbantur corda tumultu?  
Crede mihi; Patris vix moesta quievit imago,  
Sentio visceribus foedos consurgere motus,  
Et me praeteritae deserta per omnia vitae  
Caecus raptat amor. Mentem circumvagus ambit  
Error, et occurrit ludis temerata profanis  
Graecia. Me fragilem video, promissaque Christo  
Fallere praemetuo. Mater, pax omnis adempta est.  
Dicam equidem: una meam sanat medicina furorem,  
Effigies juvenis, cui sponsae jura fidemque  
Promisi quondam. Neque enim praestantior alter  
Justitia et pictate fuit; cognoscere Christum  
Ipse mihi dederat, sperans deducere sponsam.  
Fecissetque utinam! ambobus Pater obstitit unus.  
Et nunc ipse suo me hortatur nomine: nomen  
Incorrupta meae tutatur foedera mentis  
Quae Christo pepigi, quaequae ipse incognita quondam

Narrabat toties iterumque iterumque monebat.  
Ah! succurre mihi. Dixit, lacrymaeque volutae  
Ex oculis. Quam maternis sic anxia curis  
Plautilla alloquitur: Mihi nata carior Eune,  
Parce metu: Christus vires, animumque ministrat.  
Audistin' Petrum? meministin' praescia verba?  
Ipse unus mala terrigenum medicare sategit,  
Romaque inauditis haesit conterrita signis.  
Lethali oppressos morbo ipsa corporis umbra  
Excitat: horrisonae extemplo posuere procellae  
Ipsius imperio: sub leges omnia duras  
Mors vocat: ipse jubet? tumulis rediviva resurgunt  
Corpora, perque omnem decerrantia vidimus Urbem.  
Quae sunt, quae fuerunt, et quae ventura sequentur,  
Cognovit: mihi crede, Dei sceptrumque vicesque  
Ipse gerit terra, atque mihi stat Numinis instar <sup>66</sup>.  
Saepius ille tibi: Patrem sponsumque revises,  
Virgo, inquit. Patrem incolumem sponsumque videbis,  
Ne dubita. Tacuit mater, timidoque puellae  
Pectore surgebat melior sententia, sortis  
Nuncia venturae: contemnit inania rerum  
Firmior, et sacros iterum se vertit ad usus.  
Ipsa parens studiosa aderat Plautilla, sagaci  
Explanans studio doctrinae arcana repertae,  
Caelica quae miro docuit sapientia libro;  
Et dum Matronam fortem describit, in uno  
Tota manet virgo, pendetque loquentis ab ore:  
Quae fortis mulier <sup>67</sup>? Quisnam per maxima mundi  
Moenia repperiet? terrarum finibus ipsis  
Praeclarum assonuit nomen, pretiosaque fama.  
Vir dominusque domi tutus confidit in una:

Plena domus nullius eget: bona copia rerum  
Procurante illa, cunctas exuberat horas,  
Qualis vecta mari pinus bona cuncta reportat.  
Exquirat niveas lanas, melioraque lina,  
Exurgens nocte e media, famulisque labores  
Partitur suetos, alimenta que sueta ministrat.  
Exemplo graviore praeit, neque poenitet inter  
Ancillas gravidos penso devolvere fusos.  
Ipsa manus aperit miseris, et rebus egenis  
Affert auxilium. Domui nil saeva nocebit  
Bruma suae, famulos duplicato vellere vestit.  
Proh! quae magna animo virtus! quae plurima in ore  
Majestas! crescent pueri, et per compita matrem  
Omnes laudabunt: fert ipse ad sidera sponsus.  
Filia, divitias multae aggressere puellae,  
Tu cunctas superas. Fallax est gratia, fallax  
Egregiae formae species: laudabitur una,  
Quae metuit dominum, manibus date munera plenis:  
Sancta meret mulier, cantu celebrate perenni.  
Talia tranquillam firman praekoniam mentem.  
Cedere sed nullis assultibus integra cernens  
Pectora tartareus deceptor deserit ausus  
Tentamenta novi, sacraque pedem extulit aede.  
Lux nova victricem exhilarat, penitusque medullas  
Lactitia oblectat cunctis ignota profanis <sup>68</sup>.

<sup>1</sup> *Pavidus Rex.* — De Xerxe Corn. Nep. vit. Th. V. Nam Themistocles verens, ne bellare perseveraret, certiore eum fecit id agi, ut pons, quem ille in Hellesponto fecerat, dissolveretur, ac reditu in Asiam excluderetur, idque ei persuasit.

<sup>2</sup> *Civilibus iris.* — Quo ignominiae Graecia venerit, e Livio poteris cognoscere, qui Prusiam regem Romam venientem cum filio Nicomede, concursu undique facto, induxit haec dicentem: Deos qui urbem Romam incoleant, senatumque et populum Romanum salutatum se venisse. Et cum venisset in curiam, idem Patav. narrat: Submisisse se, et osculo limen curiae contigisse, et Deos servatores suos senatum appellasse, aliamque orationem non tam honorificam audientibus, quam sibi deformem habuisse.

<sup>3</sup> *Periclem.* — Pericles summus Atheniensium orator, eadem aetate ac Thucydides, et Alcibiades floruit. De eo saepius meminit Cic. de Or. 136. Pericles in cujus labris veteres comici leporem habitasse dixerunt, et Orat. 29. Pericles ab Aristophane poeta fulgurare, tonare, et permiscere Graeciam dictus est.

<sup>4</sup> *Dulcius.* — Cic. Tusc. IV, 16. Patriae solum cum omnibus est carum, tum vero dulce et jucundum.

<sup>5</sup> *Cor pectore.* — Ab Aligherio similitudo ducta.

Era già l'ora, che volge il desio  
A' naviganti e intenerisce il core  
Lo di che han detto a'dolci amici addio;  
E che lo novo peregrin d'amore  
Punge se ode squilla di lontano  
Che paga il giorno pianger che si muore

<sup>6</sup> *Cyclades.* — Magna multitudo insularum in mari Aegaeo; quarum meridionales dicuntur Sporades, quippe quae dispersae sunt sine ordine; septentrionales vero Cyclades, quia quasi in circulum dispositae sunt circa Delum.

<sup>7</sup> *Tempora Romae.* — Persequenti iter in Jonio mari a meridie in septentrionem post Strophades occurrunt insulae Joniae, quarum hic meminit Poeta *Ithacam*, hodie *Val di Compare* patriam Ulyssis; et *Leucadem* quae eadem *Leucas* et *Leucate* dicitur, hodie *Santo Mauro*: monti vero, qui etiam *Leucata* vocatur, fanum Apollinis impositum. Sequitur inde ad Septentrionem promontorium *Actium*, nunc *Capo Figalo* in ipsis faucibus Ambracii sinus, ubi et Actium oppidulum, et aliud Apollinis templum. Totus ille Epiri tractus erat sacer Apollini, ibique Octavianus maximam victoriam illam de M. Antonio et Cleopatra retulit. Fusius hic immoratur poeta, siquidem et Actiacum templum majus extruxit victor, et urbem Nicopolim, ubi castra posuerat, condidit in ipsis faucibus sinus Ambracii, et ubi tentorium ipse habue-



rat, trophoeum e rostris captarum navium, et sacrarium Apollini sub dio excitavit.

<sup>9</sup> *Connexuit orbem.* — Cum multa ipsa nativitate Christi mirabilia acciderunt, tum illa in primis non contemnenda pax et concordia per universum romanum orbem firmata. Post tot externa, et civilia bella praecipue, quibus Roma ad extremam interneccionem fuerat suis ipsius armis redacta, Augustus imperator, post actiacum bellum, Jani portas clausit. Addit Dio, hist. Rom. lib. 54, quod, collata pecunia a Senatu populoque romano ad imagines faciendas, Augustus nullam sibi, sed tantum Saluti publicae, Concordiaeque et Paci posuit. Nasciturus enim erat ille quem prophetico sermone Isaias praeunciaverat, *Princeps pacis*.

<sup>10</sup> *Paxon.* — Insula est contra Nicopolim in ambracio sinu.

<sup>10</sup> *Palodi.* — *Palodus* est pagus in ora Epirotica. Totam hanc narrationem a Plutarcho mutuamur, de Oracul. defect. XIV.

<sup>11</sup> *Pan.* — *Pan*, ut cetera missa faciamus, habitus est Deus totius naturae a πᾶν quod est *totum*. Itaque Graji sic eum pinxerunt, ut nihil ex toto universo in eo videatur praetermissum.

<sup>12</sup> *Creatori.* — Paul. ad Rom. I, 23. Qui commutaverunt veritatem in mendacium: et coluerunt et servierunt creaturae potius quam Creatori, qui est benedictus in saecula.

<sup>13</sup> *Regina viarum.* — Dicitur *Appia via*, et *Appia* tantummodo, uti Horat. I, serm. V, 6. Minus est gravis Appia tardis. Via fuit saxo quadrato strata, quae Roma per portam Capenam Capuam, et inde Brundisium usque ducebat, ab Appio Claudio Caeco strata. De Brundisio habemus apud Liv. lib. XV, 11. Ceterum commoditas portus Brundisini, qui, eodem vento spirante, et dimittere naves potest et accipere, facilisque inde in Illiricum et Epirum trajectus, quodque opportunius videbatur ipsis Italiae finibus imperium terminare, belli causae putabantur.

<sup>14</sup> *Feruntur.* — Quod hora sexta factae sint tenebrae super universam terram usque ad horam nonam, testantur Evangelistae. Porro hanc solis defectionem Dionysius Areopagita videns exclamasse traditur: Aut Deus Naturae patitur, aut mundi machina dissolvitur. Sed ex ethnicis erroribus respiciens eam describit ad Polycarpum, et ad ipsum Apollopphanem philosophum inter cetera haec habet: Creatura Dei in ipsius verae lucis occubitu lucere non potuit.

<sup>15</sup> *Subdita scepro.* — Quamvis Romani Graeciam ingressi macedonica jam dominatione pessumdatam, edicto proposito ad pristinam libertatem revocassent, tamen illud Horat. Od. V, lib. III, evenit:

Nec vera virtus, cum semel excidit,

Curat reponi deterioribus.

Assentatio, libidines, inertia corruptas illas respublicas invaserant, neque domi, neque foris Graeci amplius quicquam valuerunt. Nomen ipsum satis

indicat: siquidem levis quidam *Graeculus* dicebatur per contemptum: unde Cic. I, de Or. Graeculum *otiosum* et *loquacem* vocat. Similiter *Graecor, aris* est *Graecis imitari* nempe conviviis, vel libidinihus operam dare, quod illi liberius agerent. Ita a moribus nationis tractum verbum. Hor. *assuetum graecari* usurpat pro *inerti, atque otioso*.

<sup>16</sup> *Areopagus*. — Erat Areopagus promontorium Martis juxta mare. Maiores causae nempe sanguinis, morum ac religionis in hoc supremo judicium concilio agitabantur, judicesque a loco dicti Areopagitae fama integerrimi, et virtute erant spectatissimi. Ter in mense nempe quarto Kal. tertio et pridie conveniebant, et simplici rei gestae narratione, nullis ornamentorum illecebris causam erant dicturi: ne rerum aspectu commoverentur, noctu, nullis admotis luminibus, tabellarem dabant sententiam. Antiquissimum collegium nunquam extinctum fuit, et quamvis Athenienses a Romanis fuissent subjugati, non intermissum: immo proconsules Romani Asiae perdifficiles causas eorum judicio committebant definiendas. Addit Baronius, illucescente orbi terrarum Christi lege omnium perfectissima, jam ceteras siluisse, et Areopagum cessasse: auctor est Theodoretus, quod istud non statim, sed, ut cetera alia, suo tempore evenit. Theod. de Evang. verit. lib. 9 de legib.

<sup>17</sup> *Farier ergo jubes Genitor*. — *Hermi* nomen in epistolis Pauli occurrat: sed nulla ejus vitae facta memorantur. Cuncta ergo quae hic de amoribus suis narrantur, a poeta excogitata sunt.

<sup>18</sup> *Pater Iphitus obstat*. — Paulus Athenas ingressus disputabat, teste Luca XVIII, 17. in synagoga cum Judaeis, et colentibus, et in foro et per omnes dies ad eos qui aderant. Quidam autem Epicurei et Stoici philosophi disserebant cum eo, et quidam dicebant: quid vult seminiverbis hic? Sed quid factum fuerit in Areopago post ejus orationem eloquentissimam, habes v. 32 ab eodem Luca: Cum audissent resurrectionem mortuorum, quidam quidem irridebant; quidam vero dixerunt: Audiemus te postea. Inter hujus furfuris viros praecipuum locum obtinebat Iphitus.

<sup>19</sup> *Volens renuensque jubenti*. — Paul. ad Rom. XI, 33. O altitudo divitiarum, sapientiae et scientiae Dei, quam incomprehensibilia sunt judicia ejus et investigabiles viae ejus! 34. Qui enim cognovit sensum Domini?

<sup>20</sup> *Qua modo Narcissus*. — De Narcisso quodam habemus mentionem in epistola Pauli ad Romanos. Svetonius, Dio et Tacitus testantur Narcissum, potentissimum Claudii imperatoris libertum odio Agrippinae, matris filii deterrimi, biennium ante quam Nero imperator factus esset, necatum. Sed nihil impedit, quominus ex ejus familia, et suum filium eum crediderimus, qui patre sapientior male partas divitias in Christianos usus convertit.

<sup>21</sup> *Forte Capharnaum*. — Cap. VIII, 23, Matthaeus hoc pacto rem narrat: Et ascendente eo in naviculam, secuti sunt eum discipuli ejus: et ecce metus magnus factus est in mari, ita ut navicula operiretur fluctibus; ipse vero dormiebat. Et accesserunt ad eum discipuli ejus, et suscitaverunt eum

dicentes : Domine , salva nos , perimus. Et dicit eis Jesus: Quid timidi estis modicae fidei ? Tunc surgens imperavit ventis et mari, et facta est tranquillitas magna.

<sup>22</sup> *Transcendere muros.* — Has preces ab Psal. XVIII, *Diligam te Domine*, desumpsimus. 30. Quoniam in te eripiar a tentatione, et in Deo meo transgrediar murum. 40. Et praecinxisti me virtute ad bellum, et supplantasti insurgentes in me subtus me. 29. Quoniam tu illuminas lucernam meam, Domine; Deus meus illumina tenebras meas.

<sup>23</sup> *Est locus.* — In Scripturis infernus passim vocatur Locus irae Dei magnus, stagnum ignis et praesertim *Abyssus*. Lucae VIII, 31, daemones negant Christum, ne illos in abyssum mitteret. Apoc. XX. 3: Angelus misit eum in abyssum et clausit: 9: Diabolus missus est in stagnum ignis et sulphuris, ubi et bestia et Pseudopropheta cruciabuntur die ac nocte.

<sup>24</sup> *Astaret.* — Quamvis de Angelorum creatione nullus sit dubitandi locus, celebris tamen illa quaestio est, quandonam Angeli creati fuerint, num ante res omnes adspectabiles, totumque illud opificium, quod initio Genesios traditur, an post caelum terramque conditam? Licet in hac re duae sint veterum opiniones, nos eam sequimur, quam antiquissimi patres, Graeci praesertim, et ex Latinis quamplurimi habuere, ut ante hanc rerum universitatem conditi fuerint. Verbum *adstandi* adhibuimus, haustum e Job. XII. Ego sum Raphaël Angelus, unus ex septem qui astamus ante Dominum.

<sup>25</sup> *Lucifer.* — Hoc nomen principi daemonum dat Isaias, XIV, 12: Quomodo cecidisti de caelo, Lucifer? In scripturis passim princeps Angelorum perduellum *diabolus* audit et *Satan*, quod item *adversarium* sonat, siquidem et Dei sui consiliis, et hominum saluti adversatur.

<sup>26</sup> *Praestare beatum.* — S. August. XII, de civ. 1. de Angelis dixit: Sua potestate delectati, velut bonum summum sibi esset, a superiori communi omnium beatifico bono ad propria defluerunt. Primum Angelorum peccatum juxta communem Theologorum sententiam fuit illud superbiae. Huc pertinet quod Isaias, ib. sub figura Regis Babylonis de diabolo dicit: Detracta est ad inferos superbia tua. Revera aequalitatem cum Deo appetiit, et Ezechielis XXVIII, irridetur, quod dixerit, *Deus ego sum*. Et Apost. I, ad Timoth. III: Ne in superbiam elatus in iudicium incidat diaboli.

<sup>27</sup> *Aethera conscendam.* — Apud Isaiam XIV, 13. sunt ejusdem Luciferi verba: In caelum conscendam; super astra Dei constituam solium meum, sedebo in monte testamenti, in lateribus aquilonis; ascendam super altitudinem nubium: similis ero Altissimo.

<sup>28</sup> *Certare Tonanti.* — Eadem consuetudo apud nos invaluit, ut Michäel nunquam nisi scuto armatus dipingatur, in medioque scuto carmen inscribitur: Quis ut Deus?

<sup>29</sup> *Umbrarum princeps.* — Ex Isaias loco *Luciferi* nomen principi daemonum vindicatur, non tanquam propria appellatio; sed ad comparisonem

et similitudinem, quod, phosphori instar, eximio splendore nitesceret. Sed in tenebras, splendore amisso, evasit, ita ut non Lucifer sed vera caligo dicens sit. Sic Hierony. Comm. in Isai. Vesper e Lucifero factus; et Greg. Nazianzenus Orat. de Nati. Ille ob splendorem Lucifer, qui propter superbiam caligo et effectus est, et nominatur. Hinc in sacris litteris *princeps hujus mundi, princeps tenebrarum, princeps potestatis aëris hujus*.

<sup>20</sup> *Culpa mors.* — Paul. ad Rom. V, 12. : Sicut per unum hominem peccatum in hunc mundum intravit, et per peccatum mors, et ita in omnes homines mors pertransiit in quo omnes peccaverunt. Paul. ad Rom. VI, 23: Stipendia enim peccati mors.

<sup>21</sup> *Pro meritis flammæ.* — En gehenna ignis, de qua sermo est XV Marci. Idque S. Judas affirmat in sua Epist. v. 9: Angelos vero qui non servaverunt suum principatum sed dereliquerunt suum domicilium, in judicium magni diei, vinculis aeternis sub caligine reservavit. Aeterna sunt daemorum, et aliorum reproborum supplicia: idque de fide est, et Scripturae aperte significant. Isai. XXX. Quis habitabit ex vobis cum igne devorante? cum ardoribus sempiternis? Matt. XXV, 41: Discedite a me, maledicti, in ignem aeternum, qui paratus est diabolo et angelis ejus.

<sup>22</sup> *Et nunc Ammericæ.* — Caelestes Spiritus, quos Angelos vocamus, in rerum natura esse, nemo nisi in meridiana luce caecutire velit, insiciari poterit. Veritatem adeo certam exploratamque sacrae non modo litterae, sed totius Ethnicae antiquitatis, ac fere ipsius naturae testimonium confirmat. Sed veluti inter Judaeos antiquissima secta, Alexandri Magni tempore exorta, Sadoko auctore, neque resurrectionem fore credebat, neque Angelum esse neque Spiritum (Luc. Act. Apost. XXIII, 18), sic saeculo elapso praesertim Volterius, Sadducaeis protervior alteram ex impietatis penu calumniam adversus Christianam fidem depromens, Angelorum existentiam hominum figmentum a Chaldaeis primum excogitatum, mox ad Persas perlatum, ab Hebraeis demum adscitum esse contendit. Volteriana contagies per multa ejusdem notae ingenia polluerat, illacrymante Ecclesia, priscis nebulis veritati offusis, bonisque omnibus iniqua vafrutie indignantibus. In his morabamur, et ecce foederatas Americae respublicas nescio quae insania cum Spiritibus colloquendi arripuit, interposito scitae mulieris ministerio, quae inter homines spiritusque media habebatur. Admirabile novitatis spectaculum, enavigato confestim Atlantico, Europam percudit, eaque, ut cetera omnia e transmarinis illis regionibus advecta, allatum prodigium suspexit. Itaque nullum occidentis regnum, nulla provincia, nulla urbs, quo manuum contactu aut oculorum imperio inopinum rebus circumjacentibus motum injicere nova scientia initiati non satergerint. Demum ea constitit sententia, spiritus per aëra circumvolantes et sisti vocatos, et respondere ictuum repercussione; eorumque ope lances tabulasque de loco moveri. Nunc denique et lances, et tabulas quievisse vidimus: utinam levitatis inconstantiam in veri-

tate consistere videamus ! Persuadeant sibi profecto Eterodoxae nationes , et inclament cum Tullio : Nos veri juris , germanaeque justitiae solidam , et expressam effligiem nullam tenemus : umbra et imaginibus utimur : eas ipsas utinam sequeremur ! Cic. de off. III , 17. Sed variis errorum ambagibus circumerrabunt , donec ad Petri Cathedram , quae veritatis arx est , conveniant.

<sup>23</sup> *Si mentem , et corpus.* — Daemones igne vero et proprie dicto cruciantur , isque ignis non spiritualis , et metaphoricus , sed materialis et corporeus. Omnibus idipsum luculentius adstruit S. August. lib. XXI. de Civ. Dei , cap. 10: Adhaerebunt spiritus incorporei corporeis ignibus cruciandi miris et inefabilibus modis. Quomodo autem id fiat , ut explicarent Theologi , alii aliam institere viam. Potueruntne innumeris concertationibus Metaphisici enucleare , qua ratione anima corporis motibus , atque actionibus afficitur ? Quod tamen mutuum inter se commercium exercent ; quomodo fiat , ignoratur , et cum Alligherio dicendum :

Vuolsi così colà dove si puote

Ciò che si vuole , e più non dimandare.

<sup>24</sup> *Agnovit caelum.* — Sic S. Gregorius tom. 10 in Evang. Omnia quippe elementa auctorem suum venisse testata sunt . . . Deum hunc caeli esse cognoverunt , quia protinus stellam miserunt ; mare cognovit , quia sub plantis ejus se calcabile praebuit ; terra cognovit , quia eo moriente contremuit ; sol cognovit , quia lucis suae radios abscondit ; saxa et parietes cognoverunt , quia tempore mortis ejus scissae sunt ; Infernus cognovit , quia hos quos tenebat mortuos , reddidit.

<sup>25</sup> *Tentare aggreditur.* — Ignorasse daemones pleraque gratiae mysteria , et potissimum quae ad Christi divinitatem pertinent , est exploratissimum. Augustinus lib. IX , de Civ. Dei : Qui tantum daemonibus innotuit , quantum iis terrendis innotescendum fuit , nimirum per temporalia quaedam suae virtutis effecta et occultissima signa praesentiae . . . Denique quando illa paulum supprimenda judicavit , et aliquando altius latuit , dubitavit de illo daemonum princeps , eumque tentavit , an Christus esset explorans. Hinc Leo Magnus Ser. II , de Pass. Saevienti , ait , diabolo praesentiam suae majestatis occultuit , et infirmitatem nostrae humanitatis objecit. Facit ad rem Beati Martyris Ignatii sententia , asserentis , eatenus Christum a desponsata conceptum , ut partus ejus celaretur diabolo , dum eum putat non de virgine , sed de uxore generatum.

<sup>26</sup> *Libertas.* — Diabolicarum fraudum toti hominum generi illatarum , ut a Deo conditore averteretur , plenae sunt Scripturae. Sufficeret et miserandam primorum parentum ruinam , et Jobi calamitates acerbissimas inspicere. Sed Christus Dominus , Joan. XII , 31 , *principem* hujus mundi ejectionem foras promisit ; quod eo pacto est intelligendum , non ut ei omnis nocendi facultas sit adempta , sed per gratiam Christi Salvatoris nobis arma suppeditentur , quibus adversus insidias stare valeamus. Secundum enim Apostoli doctrinam

I, Cor. X, 3 Fidei Deus, qui non patietur, vos tentari supra id quod potestis. Adde huc Hieronymi verba. Liberi arbitrii nos condidit Deus; nec ad virtutem, nec ad vitia necessitate trahimur; alioquin, ubi necessitas, nec corona est.

<sup>37</sup> *Lucifugas pestes.* — Moses in Deut. innuit Michaelem judaico populo praepositum fuisse: et ex Daniele constat, alium ex Angelis Persas moderari, alium Graecos: quos quidem bonos Angelos fuisse constans est Patrum opinio. Quamvis non esse divinae bonitatis videatur nonnullis, ut homines naturae vitio satis ad peccatum propensos unumquemque daemonis machinationibus abjiciat, tamen nequioris notae Angelos gentibus praefuisse, praesertim in gentilitia antiquitate, nisi patrum auctoritate firmatur, a poeticae veritatis arbitrio non discrepare nemo sanus ibit inficias.

<sup>38</sup> *Mens manet obsita.* — Eccles. IX. 10. Neque opus, neque ratio, neque sapientia, neque scientia erunt apud inferos. Et Ign. ad Philipp.: Sapiens est daemon ad male faciendum, bonum autem, quid sit, ignorat.

<sup>39</sup> *Obfirmata voluntas.* — Daemonum voluntas ita est in malo obstinata, ut nusquam revera ad justitiae statum sit revocanda, et nequeat malo non adherere, unde *Spiritus mali*, et *Spiritus nequam* passim in scripturis audiunt. Quo convenit insignis Fulgentii Locus III cap. lib. de fide ad Petrum: In quo igitur omnes illi praevaricatores Angeli nec mala unquam possunt voluntate carere, nec poena, sed permanente in eis injustae aversionis maledictio, permanet etiam justae retributionis aeterna damnatio.

<sup>40</sup> *Terramque perambulat omnem.* — Jobi cap. I, Satan dicit se circumse universam terram, et ab Apost. ad Eph. II. Princeps potestatis aeris hujus appellatur. A Petro habes Ep. I, 5. Sobrii estote, et vigilate, quia adversarius vester diabolus, tanquam leo rugiens circuit quaerens quem devoret.

<sup>41</sup> *Molossus* — E Patribus hausta similitudo. Sicut enim paterfamilias noctu canem laxat ad custodiendam domum, et arcendos latrones, ita Deus ex inferno carcere daemones solvit, tum ad excitandam electorum sollicitudinem, tam ad plectendam peccatorum socordiam et impietatem.

<sup>42</sup> *Aegrotum.* — Quamdiu Satan in aere isto versatur, nihil quidquam ejus poena minuitur. Vener. Bedae locus Comm. in cap. III, Ep. 5, est insignis: Suarum secum ferunt tormenta flammaram, instar febricitantis, qui etsi in lectis eburneis, etsi in locis ponatur apricis, fervorem tamen vel frigus insiti sibi languoris evitare non potest.

<sup>43</sup> *Convicia Patris.* — Gen. IX, 23. Maledictus Chanaan, servus servorum erit fratribus suis.

<sup>44</sup> *Astaroth.* — Idem est, quem Graeci, inflexo nomine, Astarten vocitarunt. Phoenicium numen praecipue fuit, et Sidone positum magnificentissimum templum a tota erat Syria celebratum. Sed et Judaea impurissimo simulacro sua sustulit altaria, Acaab et Jezabele regnantibus, et Asia Minor Hierapoli ejus sacra omnigeno superstitionis genere inquinabat.



<sup>45</sup> *Moedus Moloch.* — Et phoenicius Deus erat, sed potissimum apud Chananaeos atque Ammonitas colebatur: III, Reg. II, 5. Moloch idolum Ammon. Lev. XX, Mortem per Moysen Dominus comminatur impii simulacri adoratoribus: Si quis dederit de semine suo idolo Molochi, morte moriatur; populus terrae lapidabit eum. Sed hoc non impedit, quominus Salomon a iustitia desciscens apud Jerusalem, in Oliveto monte templum erexerit, ubi simulacrum erat, et varia conclavia noctu diuque igne succensa, quibus sacra comburenda inferebantur.

<sup>46</sup> *Delphica.* — Praecipua aethicae superstitionis oracula collecta habes. *Delphi* — urbs Phocidis hodie *Delfi*, *Castri* o *Solona* ad Parnasum montem. Templum ibi amplissimum fuit Apollini dicatum, ubi responsa dabat, gentesque ex toto orbe terrarum consulturae de suis rebus confluebant. Oracula reddebantur annulo obsignata, ea lege ut post triduum resignarentur. *Dodoneus-Dodona* urbs Epiri, in Thessaliae confinio, ubi ingens silva fuit querna, et templum Jovis: quercus ipsae faticinae credebantur. *Trophoni-Trophonias*, insignis architectus qui in Lebadaea, Boeotiae regione subterraneum sanum construxit, quod Trophonii antrum ab ipso cognominatum est, ibique aliquandiu oracula reddidit. *Taurica* — Tauri, sive Tauroscythae Chersonesum incolere, quae chersonesus taurica, hodie *Crimea*, dicta fuit. Hospites omnes Dianae immolare solebant; immanissima Sacerdos sacro praesidebat. *Cumaea* — Nemo qui Mantuani carmina voverit, ignorat *cumaeum carmen*, Ecl. et Sibyllae Cumanae glorias lib. VI, Aen. descriptas.

<sup>47</sup> *Taenara.* — Quantopere graecae poeseos figmenta in romana ingenia influxerint, licet ex Inferorum nomenclatura, si mille alia deessent argumenta, haurire. Paludosa stagna, et vulcanica spiracula tot inferorum ora illi credidere, nomenque Inferorum fecere. *Taenara* — Taenarus et Taenara promontorium Peloponnesi in Laconia, ubi specus horrendum, et profundissimus hiatus, quo descensum esse ad inferos existimarunt. *Ilor. I, od. 34.* Styx, et invisi horrida Taenari. *Styx* fons Arcadiae ex Nonacri monte manans et in fluvium evadens. Homerus prior finxit Stygiam Inferni esse paludem. Sed styx moerorem significat, idemque apud nos *stygius* sonat, ac moestus. *Acherusidos-Acherusia* palus est Epiri, unde *Acheron* fluvius, qui in sinum Ambracium decurrit. Ex crassae paludis similitudine Poetae sinxerunt flumen apud Iueros. *Amsancti* — *Amsanctus* locus in Hirpinis hodie *Val di Frigenti* ubi aquae sulphureae undique silvis angustisque clauduntur. *Avernus* — Locus Campaniae cujus aquae adeo pestiferae creditae, ut aves supervolitantes quasi deciderent, unde factum nomen. Quae nomina omnia sive paludum, sive fluminum, sive vulcanicarum exhalationum a Grajis primum, mox a Latinis pro *inferis* adhibentur. Adeo prima illa Religio de peccati poena patrum sermonibus consignata populorum mentibus inhaesit, ut e naturae sinu horrentia quaeque loca ad aeterna supplicia indicanda, mutarentur.

<sup>40</sup> *Gaudia tangunt* — Petri primatus honoris et jurisdictionis satis superque e secundi et tertii libri narratione patet.

<sup>41</sup> bis *Virtutem*. — De Neronis tempore Tac. Hist. I, 52. Ipsa vitia pro virtutibus interpretabantur. Ann. XVI, 21. Nero virtutem ipsam excindere concupivit.

<sup>42</sup> *Graecia sive oriens* — Quam Graeci *goetiam* sive *Theurgiam* vocant, innuimus, quae Daemonum invocationibus infandisque incantationibus constat, quamque Plinius XXX, 1, artem intestabilem vocat, irritam et inanem. Ipse penitioris eruditionis auctor eam in oriente prognatam autumat: Ita possessis hominum mentibus, in tantum fastigii adolevit, ut hodieque etiam in magna parte gentium praevaleat, et in oriente regum regibus imperet. Et 3. de Ostane quodam narrat: Quod ad rabiem, non ad aviditatem scientiae hujus Graecorum populos egit.

<sup>43</sup> bis *Jactura pudoris* — Idipsum Ethnici Scriptores sentiunt, et fatentur. Liv. de Lucretia: Quid enim salvi est mulieri, amissa pudicitia? Pariter Tac. IV. 3. Neque femina, amissa pudicitia, alia abnuit.

<sup>44</sup> *Plautilla*. — Sanctissima haec vidua a beato Petro sacro baptismo lustrata fuit. Memorant Boll. *Flaviam Domitillam* ejus filiam cum suis eunuchis Nereo, et Achilleo, cumque Theodora et Euphrosyna collactaneis, Auspicii educatoris, et Caesarii diaconi ministerio, in Christi fide firmatam fuisse, omnesque Tarracinensem Ecclesiam Martyrii gloria nobilitasse.

<sup>45</sup> *Mile ministerium viduae* — Paul. 1, Tim. V, viduae praekonium recitat, et exemplar describit. Jam nos de Plautilla diximus *quod erat mortua deliciis, quas perdita Roma colebat*, et ex illo ejusdem Apost. hausimus: 5. Quae autem vere vidua est, et desolata, speret in Deum, et instet obsecrationibus et orationibus nocte et die. Nam quae in deliciis est, vivens mortua est. Et 7, eam honestissimam praedicat viduam, si filios educavit, si hospitio recepit, si sanctorum pedes lavit, si tribulationem patientibus subministravit, si omne opus bonum subsecuta est.

<sup>46</sup> *Tegmineque alarum vestit*. — Matth. VI, 26. Respicite volatilia caeli, quoniam non serunt, neque metunt, neque congregant in horrea, et Pater vester caelestis pascit illa. Et X, 31: Nolite ergo timere: multis passeribus meliores estis vos.

<sup>47</sup> *Templa Minervae*. — *Pallas*, sive *Minerva* habita ab Atheniensibus fuit ejus arcis praecipue fabricatrix, quae in summa urbis parte posita Acropolis dicta fuit, qua magnificentissimum extabat deae templum. Sic Virg. Ecl. II, 62.

Pallas quas condidit arces

Ipsa colat.

<sup>48</sup> *Panathenaeis*. — *Panathenaea* Palladis festa dicebantur quae quinto quoque anno in honorem Palladis Athenis fiebant. Solemni carminum per tubicinum, et praekonem indicebantur, peplumque Deae ferebatur.



<sup>23</sup> *Cytheron*. — Tota haec Atticae ora omnium veterum Scriptorum laude celebratur. Hic subiit in mentem illud Cic. ep. 5, lib. IV ad Sulp. Ex Asia rediens cum ab Aegina Megaram versus navigarem, coepi regiones circumcirca prospicere. Post me erat Aegina; ante Megara; dextra Piraeus; sinistra Corinthus: quae oppida quodam tempore florentissima fuerunt, nunc prostrata et diruta ante oculos jacent. Legesis Propertii Lib. III, eleg. XV, ubi suum iter Athenas describit. *Hymettus* mons est prope Athenas, ubi mel optimum, apes lectissimae. *Salamin* sive *Salamina* est insula et urbs maris Aegaei, e regione Atticae, Telamonis regia. *Cytheron* mons Boeotiae sacris Bacchi celeber, quae tertio quoque anno, unde *trieterica*, idest *triennalia* dicta, fiebant, et ab Atheniensibus mulieribus frequentabantur.

<sup>26</sup> *Dissociare potens*. — Sic fere Caecil. apud Lact. Latebrosa et lucifugax natio in publico muta, in angulis garrula, templa ut busta despiciunt, deos despuunt, rident sacra, si fas est, sacerdotum honores et purpuras despiciunt ipsi seminudi. Haec dabat Christianis crimina, quae vera primae Ecclesiae gloria est.

<sup>27</sup> *Coetus vitabis amicos*. — His Caecilius in Christianos invehitur, II, 5. Non spectacula visitis, non pompis interestis, convivia publica absque vobis.

<sup>28</sup> *Cajus*. — Puteolanas has pilas, seu substructiones hodieum incolae appellant *i ponti di Caligola*. Nos opinionem loci sequimur, quamvis Sret. in Caligulae vita 19, narrat eum mare totum Bajarum navibus contabulasse. Neptuno vero sacrificasse de ponte dejectis comitibus, ex Dione accipimus.

<sup>29</sup> *Languida membra cient*. — Hinc illae Pauli querelae, Ep. ad Rom. VII, 15. Video aliam legem in membris meis repugnantem legi mentis meae, et captivantem me in lege peccati.

<sup>30</sup> *Sanasti arbitrium*. — Liberum humanae voluntatis arbitrium originali peccato infirmatum, non extinctum: ita ut primigenia justitia spoliatus, factusque diaboli captivus nihil quidquam supernaturalis boni suis ipse viribus homo possit agere; possit vero cum gratia domini nostri Jesu Christi, quae pristinam illam infirmitatem reparavit, estque omnino ad amissae justitiae recuperationem necessaria. Ita August. lib. I. ad Bonif. III, Haec voluntas, quae libera est in malis, quia delectatur malis, ideo libera in bonis non est, quia liberata non est; nec potest homo boni aliquid velle, nisi adjuvetur ab eo, qui malum non potest velle, hoc est gratia Dei per Jesum Christum dominum nostrum.

<sup>31</sup> *Defensoremque ministrat*. — Vetus est et communis etiam ethnicorum opinio cuilibet mortalium regundo, servandoque a Deo custodes fuisse destinatos. Hinc illa fluxit de Geniis doctrina ita frequens apud poetas: unde Horat. Lib. II, Ep. 2.

Scit Genius, natale comes qui temperat astrum  
Naturae deus humanae, mortalis in unum  
Quodque caput vultu mutabilis, albus et ater.

Vides profecto, ni ipsos ex rationis usu id eruisse credere velis, universam hanc doctrinam, uti cetera multa, ex sanctis Libris esse suffratos. Apertissimam et peremptoriam de Angelis, deque eorum ministerio habes confessionem. Ps. XC. Angelis suis Deus mandavit de te, ut custodiant te in omnibus viis tuis.

<sup>62</sup> *Marginē gramineo Cephisi.* — *Cephisus* Atticae fluvius, juxta Athenas ad occ., et in sinum Saronicum se exonerat prope Piraeum portum.

<sup>63</sup> *Pictaque incedere zona.* — Quae de Venere, pulchritudinis atque amorum dea, meminerint poetae, omnes profecto norunt, qui vel a limine classicos scriptores salutarunt. Voluptatum matrem, e spuma maris coortam finxerunt, unde Gracis dicta fuit Aphrodite; currum dederunt tractum columbis, et Homerus zonam sive cingulum addidit, voluptariam sedem cupidinum.


<sup>64</sup> *Atque diis auctoribus.* — Cypr. ad don. Exprimunt impudicam Venerem, adulterum Martem, Jovem illum suum non magis regno, quam vitiis principem . . . Deos suos quos venerantur, imitantur; sunt iniseris et religiosa delicta.

<sup>65</sup> *Cui vitis nixa recumbit* — Psal. CXXVII. Uxor tua sicut vitis abundans, in lateribus domus tuae. Filii tui sicut novellae olivarum, in circuitu mensae tuae.

<sup>66</sup> *Numinis instar.* — Hil. lib. IX, de Trinit. Proprium Deo, quid aliud est, quam cognitio futurorum?

<sup>67</sup> *Quae fortis mulier.* — De parab. Salomonis XXXI. Mulierem fortem quis inveniet? Procul et de ultimis sinibus pretium ejus. Confidit in ea cor viri sui, et spoliis non indigebit. Reddet ei bonum et non malum omnibus diebus vitae suae. Quaesivit lanam et linum, et operata est consilio manuum suarum. Facta est quasi navis institoris, de longe portans panem suum. Et de nocte surrexit, deditque praedam domesticis suis, et cibaria ancillis suis. Manum suam misit ad fortia, et digiti ejus apprehenderunt fusum. Manum suam aperuit inopi, et palmas suas extendit ad pauperem. Non timebit domui suae a frigidibus nivis. Omnes enim domestici ejus vestiti sunt duplicibus. Surrexerunt filii ejus et beatissimam praedicaverunt; vir ejus, et laudavit eam: Multae filiae congregaverunt divitias, tu supergressa es universas. Fal-lax gratia et vana est pulchritudo: mulier timens Deum ipsa landabitur: date ei de fructu manuum suarum, et laudent eam in portis opera ejus.

<sup>68</sup> *Ignota profanis.* — Ps. LXXXVII. Quia melior est dies una in atriis tuis super millia. Elegi abjectus esse in domo Dei mei, magis quam habitare in tabernaculis peccatorum.



# PETREIDOS

## LIBER V.

---

### ARGUMENTUM

Cum omnia hac lege creata sint, ut morte deleantur, supremam hanc rerum omnium necessitatem ne magna quidem imperia effugiunt — Deus ipse, unus immutabilis, alia evertit, alia instaurat — Illud ethnicis praesertim nationibus constitutum vitae curriculum, ut primum, contra incursationes vimque hostium, suae incolumitati prospiciant — Tum soli natalis oblectatae dulcedine in patriam mirabili caritate inflammantur, eamque gloriae plenae et fortitudinis facinoribus illustrare conantur — Itaque pulcherrima reipublicae imago efflorescit — Verum si vitalis ille spiritus, quo prima res coalescere coepit, ingravescente aetate, oblanguescit, desident primum mores, mox eunt praecipites — Cumque vita corpore et spiritu continetur, spiritu contaminato, corpus manet quantocumque moriturum — Sic Roma crevit, concordia ordinum mirabiliter in unum conspirante, ut domi tuta, foris praeclaro imperio potiretur — Eaque Respublica potentissima et gloriosissima post hominum memoriam evasit, Deusque ipse imperium propagavit, ut egregiae genti mercedem exolveret, quod *pro uno vitio, idest amore laudis, multa alia compressit* <sup>1</sup> — Verum ubi pro re communi privatae res diligere coepit, duoque in

<sup>1</sup> Aug. de Civ. Dei: in adnotationibus plura.  
*Vol. I.*

una urbe populi invicem armati pro sua quisque utilitate depugnarunt, Roma sensim dilapsa — Cumque nullus discordiis finis nisi aut interitus aut victoris dominatus, Pharsalica acie plebei triumpharunt; in Caesarem unum plebis armatae potentia collata, extincta est Respublica — Quatuor imperatores romanae majestatis internecionem absolvunt — Dumque corporis voluptatibus unice cives famulantur, anima illa romanarum rerum procreatrix paullatim evanescit — Deterrimus Nero se unum Romae romanoque imperio praetulit — Ethnicam Romam extremum spiritum agentem contemplatur, non sine lacrymis, vates, unoque solamine mirifice recreatur, quod Roma Petri jactis fundamentis, in dies clarior exurgit — Solon in parricidas nullas irrogaverat leges, quod tantum crimen in humanum genus cadere non posse arbitrabatur — Verum Roma nequior, qua in parricidas gravissima rogatio lata fuit, et imperatoria aula immanissimum spectaculum exhibet — Nero conciliatae amicitiae gratia Bajas matrem vocat — Dumque, convivio celebrato, Romam reditura pulcherrima navi Putcolos versus enavigat, navis, medio mari, dissolvitur — Agrippina e mediis fluctibus a navicularioribus sublata ad Lucrini stagnum exponitur — Dumque in sua villula a metu paullulum respirat, armata phalanx irrumpit thalamo, eamque, *uterum feri*, exclamantem confodit — Sed aulica assentatio in Agrippinam mortis causam vertit, quippe quae extremam filio calamitatem machinaretur — Itaque vicinis municipiis Romaque ipsa Bajas adveniunt legati, Principi gratulatum, quod maternas insidias vitasset — Verum suas ipsa injurias Natura ulciscitur — Et, patrato facinore, Nero scelerosis magnitudinem intellexit — Loca ipsa Bajarum caedis conscia perterrefaciunt — Ipse noctu solus Romam petit, in Palatina domo optata tranquillitate fruiturus — Male ominata domus! Quae ab Hortensio, Caesare, et Augusto, aequo cum ceteris jure in civitate viventibus, primum habitata, mox per Tiberium, Caligulam, Claudium aucta mediam Romam occupavit, crevitque Neronis ope — Ita porro factum, ut quo magis ea cresceret, eo magis romanae majestatis auctoritas diminueretur — Ea domus omni luxu magnificentia praefulgens, omnium vitiorum domicilium evasit, ut nulla fuerit terris aula funestior — Nulla aulae penetralia, quae horrendum aliquod facinus non foedaverit — Caesarea gens, facta Octaviae, Domitiae, Claudiae, clarissimarum Reipublicae gentium, accessione, non modo instaurari nequit, verum deterior evasit — Caesarum extremus et deterrimus, Nero, vivida romanae et humanae improbitatis effigies — Qui omnium malorum artifex cum Deo, natura, totoque humano genere praeliatur — Ipse, a bajano scelere, hujus aulae latibula ingressus gravioribus conscientiae stimulis excruciat — Septem illum Stygiae

pestes circumsepiunt, noxae lethiferae, teterrimae visu species, quae peragrato orbe universo, Romam obsederunt, et potissimum ad aulam imperatoriam stābulantur — Sed vix per urbem de imperatoris reditu Romam etsi subobscura manat fama, partim metu, partim assentatione commoti ad aulam volitant procures, Caesarem salutatum — Senatus frequens pro Reipublicae et principis incolumitate ad omnia Deorum templa supplicationem, et pulvinaria, et sacrum epulum decernit — Qua capta occasione, Aegyptiacas, Syriacas, Phrygias Religiones Satanas excitat, commotis sacerdotibus — Nero ipse, Senatu comitante, populoque plaudente, Capitolium ascendit, romana sacra maximarum hostiarum immolatione celebrat, inque Jovis genibus, qui omnem periculi procellam a se prohibuerit, auream coronam deponit — Mox maternam memoriam in odium atque invidiam trahere nititur, insolita clementiae jactatione revocatis in patriam viris clarissimis ab ea in exilium actis, justisque de more persolutis, si qui vitam miserrime finierint — Sed neque procerum assentationes, neque populi plausus maleferiatæ conscientiae stimulos obtundere potuerunt — In aulae solitudine abditus omnia timet, omnibus timetur — Inter aculeos, quibus, facinorum recordatione, noctu diuque compungitur, Eunae meminit — Muliercula aulicam majestatem diffugit, quod nisi multis consciis fieri nequit, quoque delituerit, hactenus ignoratur — Sed ecce Tigellinus, e liberto aulae arbiter, ut ea ferebant tempora, eum convenit — Quem sueta assentatione ejus gratiam colligentem gravissimis verbis objurgat, quod tanta potentia armatus graecae virgunculae recessus explorare nequiverit — Sed Tigellinus ejus clementiam in crimen vocat, qui Hebraeos a Claudio expulsos in urbem revocasset — Se Paulum Tarsensem, Hebraeae arrogantiae antesignanum, apud insulam Tiberinam deprehensum in vincula conjecisse — Quo nuncio Nero recreatus suam animi conditionem miserrimam et luctuosissimam aperit — A matre interfecta, angere et perterreret taedis ardentibus furiarum — Nocturna imagine matris teterrima cuncta interminantis exagitari — Horrenda insomnia certissimum periculum capitis atque imperii ostentare — Perfidiae suspiciones ubique internoscere — Demum de Plauto, de Sylla, de Burro, de Seneca, de Plebe, de Senatu conqueritur — Quibus respondet Tigellinus Matrem jure caesam, pestem solio nefarie molientem, jamque Romae fastu nimio, et insolentia intolerabili detestatam — Plautum et Syllam quamprimum morituros — Burrum e praetoriis armis amovendum, Senecam ruri vivere tranquillum — Senatum renovatum, et terrore semianimum — Plebem in una Neronis spe luxuriose vivere — Ab hostibus externis imperium Romanis legionibus conquiescere — Urbem praetorianis armis.

cohortium obsequio et germanicis copiis perterrefactam tremiscere — Unum ex oriente periculum imminere — Orientis contagem, Hebraeos ex urbe exterminandos, peregrinos usus comprimendos — Conquievit Nero; sed futurarum rerum divinatione exardescens Simonem Magum accessit — Qui a Petro Samariae, gravissimis verbis reprehensus, Syriam, Aegyptum, Graeciam peragraverat, in christianos infensissimus, novaeque doctrinae dogmata procusa per orbem disseminans — Romam ipse praestigiarum suarum miraculo commoverat, et inter instrumenta regni ab Nerone est habitus — Ansam capit Satanas christiano nomini majores invidiae faces subjiendi — Dumque, Nerone inspectante, magicis sacris operatur Simon, inopina vox insonuit *Eunem Romae inter hostes latere* — Sacrum turbatur — Nero gravissimo metu exanimatur.

*M*UTATUS veluti interdum renovatur amictus,  
Mutatur senio caelum mutataque terram  
Forma superveniet: caeli terraeque creator,  
Ipse manes unus, nullo mutabilis aevo <sup>1</sup>.

Non ignota cano: populus sua munia quisque  
Sortitur, tenditque via, quam monstrat eunti  
Ingenium, fatumque datum, caeloque vocatum  
Auxilium. Tandem, perfecto munere vitae,  
Quae prior ardebat sociali corpore flamma,  
Languescit moriens. Populus tum junior alter  
Ingrediturque viam, socio praeunte, relictam,  
Et quem trita solo signaverat orbita gyrum,  
Latior audaci gestit percurrere gressu.  
Digerit arcano caeli Rex omnia motu:  
Lex eadem cunctis: cives ea cura quietos  
Sollicitat primum jactos attollere muros,  
Propagare genus, externas pellere fraudes.  
Vix tutos statuere focos, operataque pubes  
Connubiis primam cernit consurgere prolem,  
Et foecunda suis flavescere messibus arva;  
Continuo surgens patriae ridentis imago  
Exhilarat, natale solum vis ignea cogit  
Trajicere; imperii trahit irrequieta cupido,  
Atque foris bellare, domi firmare quietem.



Tum demum ingenti scintillans gloria luce  
Affulget, laudisque ciens vaga somnia spirat  
Audaces animos et inexuperabile robur.  
Vincit amor patriae; generosae ostendere praestat  
Virtutis speciem, populis juvat addere jura,  
Parcere subjectis, et debellare superbos.  
Atque utinam his staret metis saturata libido!  
Elatos animos tandem damnosa voluptas  
Invadit, parloque juvat depascere luxu  
Curas degeneres, sensusque instare rebellis  
Caccis consiliis: tunc lapsum cuncta minantur <sup>2</sup>.  
Nam socialis amor, quo vitae volvitur orbis,  
Tergeminum peragens spatium, ratione ministra,  
Intus agit vitam, et pleno se corpore miscet.  
Ast ubi jam ternae revolula volumina formae,  
Si quando sensus contactu singula foedo  
Polluit ( ipsa sibi satis est, et sufficit uni  
Indita materiae virtus ), pars maxima rerum,  
Pars hominis melior, socians in foedera coelus  
Spiritus oblanguet senio consumptus inertis <sup>3</sup>.

Ah! tibi ego accedo illacrymans, mavortia Roma:  
Ethnica ubi virtus majoribus excita flammis  
Emicuit <sup>4</sup>? foedum vel luxum exosa rigescens  
Paupertas? ubinam majora exempla severae  
Justitiae in cives ipsos, sociosque receptos?  
Laudis amor patriaeque potens vitia omnia <sup>5</sup> vicit:  
Et Pater omnipotens, virtuti praemia solvens,  
Non illaudatam liquit torpescere gentem.  
Utque nequit summus Judex super aurea ferre  
Sidera sordenti illuvie, veterisque veneni  
Crimine devotam stirpem caelestibus iris;

Imperium dedit in reges, populosque subactos <sup>6</sup>.

Civica sed triplicem perfecit machina gyrum,

Visque animae interior senio tenuata recessit.

Heu! heu! funeslo misere circumdata coeno

Materies hebetat mentem, terrenaque membra

Aetherium semen miserando pondere tardant <sup>7</sup>.

Totius illa potens mundi Respublica crevit

In melius, sed prisca dedit concordia motum <sup>8</sup>.

Primum censebant Patres, populusque jubebat.

Summa fuit patribus rerum concessa facultas,

Majestas populo <sup>9</sup>. Consul decreta Senatus,

Jussa sequebatur populi, lectique tribuni <sup>10</sup>

Patricias contra insidias pro plebe cavebant.

Sic pactis rerum alternis communia pacis

Munia firmata, et divisa pericula belli <sup>11</sup>.

At, simul ac victa veluti dominarier urbe

Patricius coepit, romano parla cruore

Florida regna Asiae, ipsiusque aeraria Romae

Exhausere equites, et plebs pessumdata magno

Fenore, spe nulla auxilii, rerum omnium egena

Errabat triviis; periit concordia Romae.

Scinditur in geminas pollens Respublica partes,

Et populus duplex <sup>12</sup> una consurgit in urbe

Adversis animis: duplici tentoria campo

Metantur, sua quisque ducis vexilla secuti.

Hinc fera nobilitas stricto mucrone tuetur

Uni nata sibi sanctarum oracula legum,

Hinc plebs, atque italae sociato foedere gentes

Prolata antiquae Romae pomoeria poscunt,

Gentemque, auspiciumque potens, dominasque secures <sup>13</sup>.

In Comitû campo, popularia pectora, Gracchi

Nequicquam orarunt: civilia bella coorta.  
Roma vetus ruere, et retro sublapsa referri.  
Si Marii asperitas truculento messuit ense  
Patricios, sociosque italos in sceptrum remisit;  
Sylla ferox veterum defendit jura Quiritum,  
Sanguineo delens plebeiam flumine Romam <sup>14</sup>.  
Extremam horrescens vidit Pharsalia <sup>15</sup> pugnam,  
Qua Caesar plebem iratam, nudosque colonos  
Exacuit. Patrum devicta superbia cessit,  
Atque triumphatrix domita regnavit in urbe  
Plebem, Imperiumque manu victrice creavit <sup>16</sup>.  
Ipsa suo dejecta gradu Respublica, motu  
Decerrans vario, veterum neque jura tueri  
Libera, nec cives sine more, sine ordine legum  
Amplius injectis potuit compescere frenis.  
In se dum versis luctantur turpiter armis,  
Si cui prompta manus fuerit, nec inane sagacis  
Pectoris indicium, et rerum prudentia major,  
Gentibus ille praeest cunctis, et temperat iras.  
Contigit, Octavi, tibi sors: tuque omnia mutas,  
Nomina sola tenens, et dictus Caesaris haeres,  
Imperium statuis: magno regis omnia nutu,  
Divus et augustus princeps dominusque paterque.

Tum vero in terras Saturnia regna redisse  
Crediderunt gentes: sed sensim decolor aetas  
Ingruit, et partae delet vestigia pacis.  
Caesareum nomen Julique exempla secutos  
Quatuor imperii retulit malesuada cupido,  
Qui prisco ingentem labefactant cardine molem.  
Eloquar, an sileam Tiberi <sup>17</sup> execrabile nomen?  
Perfidiae insueta effigies simulataque! vocem

Impius hic Romae extremam et coëuntia delet  
Civica consilia, et ferali clade senatum  
Deminuit: quamvis stimulante libidine monstrum  
Se cohibet Capreis, adeo suspicio terret,  
Horrida squalentem pessumdant funera Romam:  
Atque loqui atque tacere nefas, gaudensque dolensque  
In crimen trahitur: stat delatoribus unis  
Commissum imperium, maculosaque panditur aula.  
Si quae restat adhuc pietas mortalibus aegris,  
Impuri Caji <sup>18</sup> sileamus facta. Cadentis  
Militiae effigies caliga produxit agresti  
Quem furere humano delectat sanguine, seque  
Adsimilem monstrare ferae: e praecipibus altis  
Demens quadrupedem superas eduxit ad aedes  
Et fasces dedit, et primo illustravit honore  
Consulis. Excepit malefirmus Claudius <sup>19</sup>, aulae  
Ludibrium obscoenae quondam, risusque jocusque.  
Claudius impuros mala per contagia mores  
Spargit, et attonitam replet terroribus urbem.  
Et nunc ( quae superant foedae argumenta ruinae?  
Quantaque servitii funesta exempla?) Neronem  
Roma tremens patitur. Pudor cheu! Roma Catonis  
Fracta metu, monstrum colit exitiale Neronem.

Quamvis innocuas contristant horrida musas  
Crimina virgineo suetas errare recessu,  
Qua pietas castis immulgens ubera labris  
Eduxit, turpesque dolos, immundaque facia  
Oderunt, crassam satagent transire paludem  
Intacto pede: mortiferum impallescere coenum  
Spectantes, pura exultabunt laetius aura.

Dum Petri Roma omniparens Ecclesia crescit,  
*Vol. I.* 36

Aurea Christiaddum soholes virtute coruscat  
Insolita, tenditque ad sidera; Roma Quirini  
Procidit in praeceps vasta convulsa ruina  
Primaque caesarea pestis bacchatur in aula.  
Heu! quo bajanae incestantur crimine ripae?  
Qui cruor exundat? Naturae oracula matrem  
Nequicquam fecere pium et venerabile nomen?  
Infirmi funus Claudî properârat acerbum  
Agrippina <sup>ao</sup> potens, vacuumque effecerat aulam  
Ocyus, ut solio natus regnaret opimo.  
Oderat ipsa omnes proceres, temerataque turba,  
Aulica nequities, reginam odere superbam:  
Oderat ipse Nero, nec detestabile quibat  
Perferre imperium dominae, fastumque protervum.  
At Poppaea <sup>ai</sup> fuit manifestae causa ruinae.  
Foemina non humilis Poppaeo ab consule sumpsit  
Materno cognomen avo, famamque triumphî  
Splendoremque domus, sed formosissima mater  
Palladii addiderat decoris mirabile lumen.  
Olli comis erat sermo, variisque politum  
Artibus ingenium, et perrara modestia vitae.  
Vidit, deperiitque Nero, nuplamque marito,  
Quem tartessiacas legatum misit ad oras,  
Abstulit, et secum foedam transduxit ad aulam.  
Extemplo mala communis contagia vitae  
Poppaeam rapiunt: primae ornamenta juventae  
Omnia servavit, sed honestas defuit una.  
Furtivae fallax veneri indulgebat adulter,  
Et dominum tanto moecha illaqueârat amore,  
Ut dejecta gradu conjux Octavia, Claudî  
Filia, nequicquam populari adjuta favore

Iret in exilium: inde redux clamore secundo  
Romulidūm rursum ejicitur, mox jussa malignis  
Cautibus emoritur, caput e' cervice revulsum  
Affertur Romam, et turpi ridetur in aula <sup>22</sup>.  
Uxore amota, taedas Poppaea jugales  
Legitimumque torum ambibat: sed vota fuere  
Irrita. Romano in solio Agrippina manebat  
Incolumis tumidaque diu ambitione laborans.  
At Poppaea gradu cunctis praecurrere, cunctis  
Editius sola cupiens dominarier aula,  
( Quidnam regnandi, venerisque insana cupido  
Liquerit intactum? ) sibi quam obstare videbat,  
Totius in matrem vertit molimina belli,  
Implacata serens odia, insanabile virus.  
Ergo maternos Princeps vitare frequentes  
Congressus <sup>23</sup>; si qua incideret, transversa tueri  
Et rapere in pejus facta omnia, fasque nefasque  
Miscere. Indignatum animum, natumque bilinguem  
Agnovit genitrix, et amoena virela petebat  
Tiburis irrigui, suspectam rarius aulam  
Invisens. Studio tamen instigare sequaci  
Aemula, corruptamque diu praevertlere mentem.  
Graecia Cecropium vidit siluisse Solonem,  
Cum variis poenas noxis imponeret acguas,  
Quod terrae nequeant partus afferre nefandos,  
Qui se sacrilega macularent caede parentum.  
Atque ulinam, venerande senex, sis verus aruspex!  
Falsum mendacemque futura redarguet aetas <sup>24</sup>,  
Vix pauca humanae servans vestigia formae.  
Ac veluti interdum gravioris imagine belli  
Bellipotens ductor simul hostlica castra sagaci

Observat studio, varias simul apparat artes,  
Praetentosque solo cervos foveasque latentes;  
Haud aliter diro conceptos corde furores  
Caesar agit, meditans dubios qua dirigat arcus  
Tulius, et tanto aspiret fortuna labori.  
Pocula mortiferis primum saturata venenis  
In mensis adhibet: fraudes Regina malignas  
Praemetuens, biberat medicamina plurima contra  
Thessalicas fraudes. Ubi nil conamina prima  
Succedunt, ferro incautam superâsset in ipsa  
Luce aulae; sed Roma fremens exterruit ausu  
Infando, dirique sequax infamia facti.  
Addit se comitem, incertoque supervenit ingens  
Hortator scelerum, quondam libertus Anices <sup>5</sup>,  
Tum latiae ductor miseno in littore classis.  
Impius accessit juveni, certoque furentem  
Consilio accendit: Princeps, fidei accipe nostrae  
Eximium pignus, quo invisae taedia matris  
Avertas. Mihi mens magnam componere navim;  
Sic tamen extremasque trabes, curvamque carinam  
Digerere, ut fluctu in medio resoluta dehiscat,  
Et rerum ignaram tumidos demergat in aestus.  
Quis vero valeat casus numerare marinos?  
Quis mare, surgentesque Euros in crimina raptet?  
Sic ubi mortales aversa refugerit auras,  
Ipse deam facies <sup>6</sup>; monimentum et pignus amoris,  
Templum constitues, mystasque atque annua sacra.  
Consilium placuit. Sed qua fas arte parentis  
Incertum firmare animum, Bajasque vocare  
Tam diffidentem suspectaque cuncta timentem?  
Dissimulat Caesar: mutatisque ilicet iris

Matrem convenit, noctemque diemque moratur  
Omnibus obsequiis. Odium implacabile vultu  
Contegit: interiore aula, magnoque senatu  
Induperatricis <sup>27</sup> primos concedit honores.  
Tandem inimicitiam, et famae mala murmura credens  
Delevisse, parat tempusque locumque nocendi.  
Quandoquidem urbanae fugiens fastidia vitae,  
Littora Bajarum laeto submota recessu  
Visere consuêrat; longum mentitus amorem,  
Persuasit matri natum comitare latenti  
Hospitio, et paulum villa secedere amoena.  
Foemineae usque adeo faciles ad gaudia <sup>28</sup> mentes!  
Obsequitur nato Genitrix, Romamque relinquit.  
Ipse Nero praeiens solemnes ordine pompas  
Apparat, utque dicarchaeis erumpere portis  
Regalem vidit fastum, notasque quadrigas,  
Ultra progressus Lucrini languida stagna,  
Obvius occurrit venienti, aque oscula dextrae  
Adjicit, illacrymansque avidis complexibus haeret.  
Tum Baulos ambo veniunt: quo nomine stabat  
Villula, caesareis jampridem conscia furtis,  
Misenum et Bajas inter submota, jugoque  
Consita in aërio, et fluctus speculata remotos.  
Hic magis atque magis crescit fiducia matris.  
Nec visu facilis, nec dicto affabilis ulli  
Caesar, praetexens simulati nomina honoris  
Luxu exquisito convivia magna parârat,  
Milliaque umbrosis rerum spectacula in hortis.  
Decipitur mulier pesti devota futurae,  
Elatoque animo sibi dulcia somnia fingit.  
Perfidiae urget opus princeps fabricator iniquus:



Et seras ducens longis sermonibus horas  
Nunc hilares lusus miscet juveniliter, et nunc  
Vertit maternas ad publica commoda curas.  
Hora propinquabat caedi condicta nefandae.  
Agrippina parat reditum, jamque ebria magna  
Laetitia falso postrema dat oscula Nato,  
Excupiens avidam quamprimum invisere Romam.  
At Nero laetatur dextram prensare, diuque  
Maternis oculis, maternoque ore pependit <sup>29</sup>,  
Seu peteret fictae pietatis imagine pravum  
Condere consilium, perituræ sive supremus  
Vultus barbariem obscoenam, quateretque ferinum  
Ingenium. Trepidans summo diffugerat axe  
Sol; at sidereo noctem splendescere peplo  
Donârant Superi, et trepidæ sub lumine Lunæ  
Per sudum fluctus interlucere marinos,  
Ne scelus horrendum intempesta obnuberet unbra.  
Navis magnifico stabat selecta paratu  
(Tantus honor matri), quæ prætergressa sonantis  
Miseni caput ad Lucrini stagna referret.  
Insurgunt nautæ remis, pelagoque secundo  
Laeti pervolitant: coetu comitantur amico  
Augustam duo vix famuli, Crepercius, et quæ  
Altrix nutrierat regalem Agenoria alumnum.  
Et nunc illa sedens pedibus cubitantis anili  
Narrabat cura pietatis millia signa.  
Jam mare contigerat medium ratis; inde Dicarchus,  
Hinc Bajæ magno complêrant littora coetu;  
Totaque prodierat populoso e vertice Cuma.  
Velivolæ interea tranquilla per æquora cymbæ  
Gestierant longa navim stipare corona.

Continuo data signa: ruit grave pondere plumbi  
Fundus navigii: magno Crepereius ictu  
Occubuit: Augusta parens et sedula nutrix  
Abietibus tectae incurvis fugere ruinam,  
Altonitaeque manent. Neque jam malesarta dehiscunt  
Robora: tum vero latus inclinatur in unum  
Totum navigium: ast operi consensio deficit:  
Contra stant alios alii; fit jactus in undas  
Lentior. Assurgit clamans Agenoria: Nautae,  
Eja agile, huc properate omnes, succurrite matri  
Principis; at contis et quae sors obtulit ultro  
Conficitur telis navalibus: aestuat unda:  
Agrippina humero accepit male cognita vulnus.  
Naufragam, et in medio jactantem brachia fluctu  
Cymbula collegit, ripa exposuitque propinqua,  
Qua domus Augustae, et lectissima villa manebat <sup>3o</sup>.

Interea Nero vicini de vertice montis  
Omnia contemplatur avens. Simul audiit ictu  
Evasisse levi, tremefactus inhorruit, ipsam  
Affore quamprimum metuens, seu foeda vocaret  
Servilia ulcisci crimen, fortesque colonos,  
Seu Romam irrueret, populum invisumque senatum  
Horlata, et certae monstrans conamina cladis.  
Quod sibi subsidium? quoniam nil cetera prosunt,  
In ferrum ruere, et scelerato absumere letho  
Seminecem jubet. Haud segnes ad jussa ministri.  
Terribili villam statione irrumpit Anices.  
Tum fractis foribus, qua se fert obvia cumque  
Servorum stipata phalanx, dextra urget iniqua:  
Donec vociferans secreta cubilia venit.  
Agrippina maris miseris defuncta periclis,

Attonitae similis, lectoque affixa jacebat.  
E tanto quondam strepitu <sup>31</sup>, plausuque sequentum  
Unica vix ancilla manet, deserta silescunt  
Omnia: vix humilis languenti lumine lychnus  
Rumpit nocturnas tetro fulgore tenebras.  
Fit fragor: incurrunt thalamo, ductorque micantem  
Intorsit dextra gladium, laevaue prehendit  
Longam caesariem. Illa videns in vulnera dextram  
Sublatam, atque uterum <sup>32</sup> monstrans: Huc dirige ferrum,  
Exclamat: plures feriere, natatque cruore  
Tota superfuso, atque inhonesto vulnere foeda.  
At natura parens ictu labefacta nefando  
Dat gemitum: gemitu concussa perhorruit omnis  
Miseni tellus, Prochytesque juga, Inarimesque  
Matres contremuere, piosque ad pectora natos  
Pressere. Immundus gaurano <sup>33</sup> vertice Daemon  
Substitit, exiluitque ferox rumore sinistro  
Bajanam excutiens oram trepidamque Dicarchum,  
Linternosque sinus: stupet ipsa exterrita Roma:  
Quid faceret patriae, meruit si talia mater?  
Faticinas sortes, Chaldaea oracula poscens  
Audierat: Nero regnabit, perimetque parentem.  
Illa autem: Moriamur, ait, partoque fruatur  
Filius imperio. Respondent cetera vati:  
Quaesitum scelere imperium scelus inquina! omne.  
At tanto Princeps temeratus crimine demum  
Horrendum agnoscit factum, execrabile: visu  
Terribilis pudibunda solo, et stupefacta revolvit  
Lumina per noctem, nec dictu affabilis ulli  
Sola petit loca: vix tandem lux crastina coelo  
Emicat, invisae heu! nimium, scelerique latronique

Effugienda, domo egreditur, nemorisque cavernis  
Delilet horrificis, caelumque refugit et auram  
Aetheream. Haud aliter primo qui sanguine frater  
Infecit terram, foveaque recondit in alta  
Extinctum fratrem, ipse Deum si fallere posset,  
Per sylvas agitur, lustrisque vagatur opacis,  
Praetrepidans justa ignotae formidine poenae.

Quo magis ipse tamen commissa piacula sentit,  
Tanto Roma magis nativi exuta pudoris  
Reliquias, scelus excusat, mendacia jungens:  
Maternas reprobatur furias, caput omne malorum.  
Primores venerunt: dolo praeit ipse senatus,  
Servitumque ruunt patres equitesque: benigno  
Alloquio recreant, gratantur murmure laelo,  
Quod salvus fuerit, manifesto munere divum,  
Fraudibus innumeris, quas femina dira pararat;  
Et Romae exemplo campanis proxima terris  
Mittunt legatos, et fuso multa cruore  
Victima sinceros populi testatur amores <sup>34</sup>.  
Ast homines vultum mutant animumque: locorum  
Una manet facies nullo mutabilis aevo.  
Dum fictis salagunt verbis solarier aegrum,  
Bajani aspectus maris et cava littora terrent  
Irrequietam animam: rerum portenta sequuntur;  
Horridae resonare tubae per inane propinquis  
Collibus auditae, et gemitus lacrymabilis imo  
Auditus tumultu tristes portendere casus <sup>35</sup>.  
Ergo funereo cernens nigrescere luctu  
Omnia, sanguineae refugit loca conscia caedis,  
Nocturnisque silens tenebris, perque avia vulgo  
Incomitatus abit, romana ad moenia tendens.

Magna Palatini subeo fastigia clivi,  
Qua Romae dominus fulgenti regnat in aula.  
O domus, o Romae casus imitata vicesque  
Mutatas domus! His crevit penetralibus ingens  
Orator, quicum crescens sapientia Tullî  
Aemula certavit. Magnae praeconia famae  
Aedes ornabant modicae, qua marmora nulla,  
Nullum ebur aut aurum: tantum suffulta columnis  
Porticus Albanis conclavia laeta coronat.  
Sedibus his crevit regnatix gloria gentis  
Augustae <sup>36</sup>, fatisque domus ducentibus omen  
Caesareum sequitur. Simul obsequiosa recepit  
Curia suggestum, mutavit nomina mensis;  
Addita divino veluti fastigia tecto <sup>37</sup>.  
Auspiciis felix patriis Augustus eadem  
Majestate stetit manes ulturus Julî,  
At non deseruit privatae sortis honores <sup>38</sup>.  
Ex oculis postquam Respublica prisca recessit,  
Imperium aequavere lares. Qua navita quondam  
Exiguo nabat Velabri stagna phaselo,  
Expatiatâ domus aequataque machina caelo.  
Ardua mens Tiberî, dominique auxere sequaces.  
Utque domus magna crescebat latius urbe,  
Cedere jus populi visum, civesque potenti  
Unius imperio visi parere minores.  
At non suffecit moles augusta Neroni;  
Crevit opus: Romam praesenti numine complet.  
Urbe jacet media velut omnipotentis olympi  
Romuleo Jove digna domus, mirantibus ingens  
Prodigium, periturae ultra conamina sortis.

At, quamvis raro praefulgent omnia luxu,

Omnes thesauros fudit natura creatrix,  
Miraque ingenium expoliit feliciter arte;  
Si mores hominum, si purae semina quaeris  
Virtutis, quae sola potest praestare beatos  
Terrigenûm coetus, pollutis effuge tectis:  
Nulla fuit nec erit terris funestior aula <sup>39</sup>.  
Antiquae gentes <sup>40</sup>, mira radiantia luce  
Nomina Silani et Domitî Claudique potentis,  
Quos vetus ingenti Româ illustravit honore,  
Et qui romanas felix Octavius arces  
Restituit, quemque e tenebris primum actia bella  
Protulerunt Agrippa gener, nova nomina Romae  
Atque novae gentes, commixto sanguine, stirpem  
Jamjam degenerem peste infecere recenti.  
Qualis ubi quondam ingenio mutata priori  
Arbor degenerat campis, ignavaque fronde  
Luxuriat sterili, dissecto caudice cultor  
Inseruit juvenem peregrina ex arbore foetum,  
Una concreto sperans inolescere libro:  
At frustra alterius ramis, cultuque frequenti  
Antiquum plantae sperat reparare vigorem:  
Infoecunda manet, corruptaque semine in ipso  
Aegrescit sylvestri anima, contactaque moeret  
Deterior, vitioque perit consumpta maligno;  
Haud secus adscita imperio firmamina Romae  
Jamjam casurae extremam traxere ruinam.  
Quodnam flagitium sedes polluta refugit?  
Hic Romae gravis illa parens, graviorque noverca  
Caesareae domui, juvenilia pectora, natos  
Sustulit Agrippae: muliebribus effera curis  
Livia caniliem Augusti turbavit honestam <sup>41</sup>.

Julia <sup>42</sup> ter nupsit major, ter pacta resolvit  
Foedera connubii: genitor miserabilis urbe  
Ejecit macieque dedit tabescere longa.  
Heul fuge crudeles auras, Germanice, ductor  
Arripotens, Romae meliori vivere saeclo  
Dignior: at foedae insidiae per cuncta sequuntur,  
Et Syria in magna tabes funesta peredit.  
Altera adulterii damnatur Julia: nudus,  
Informis Trimeri scopulus spumante coërcet  
Aequore: Calvina incesto maculata peregre  
Pellitur Italia, Cajus delicta sororum  
Eluit exilio, dum condit templa Drusillae.  
Exilioque domos, et dulcia limina muta,  
Silane, aut Romae fatum te triste manebit.  
Posthumus Agrippa ignarus jugulatur, inermis.  
En specus immanis, quo saeva morte peremptus  
Occubuit Cajus: tenebris et carcere caeco  
Junior hic periit Drusus: triclinia cernis,  
Qua mensae accubuit, pateraue Britannicus aurea  
Hausit, quae dira infecit Locusta venena.

Tali intus templo scelerum, nec majus in orbe  
Nutritus crevit Claudî deterrimus heres.  
Annaeus Seneca assuetus lustrare reposita  
Lumina doctrinae, et Burrus, cui totius aulae  
Tradita praetorîque vigil custodia, magnis  
Rexerunt curis vestigia prima Neronis.  
Quamvis interiore aula perrara potentum  
Tempus in omne fuit concordia, munere magno  
Hi mansere pares <sup>43</sup>. Romano more severa  
Militia imbuerat Burrus duraque palaestra,  
Musarum studiis Seneca eloquiique deserti.

Ambo luctari, ne lubrica principis aetas  
In pessum rueret. Magnum certamen utrique  
Contra Agrippinam, quae fastu elata superbo  
Et Natum et Romam moderari sola putabat..

Paulatim abruptit Nero detestabile matris  
Imperium: fraeni impatiens mox cuncta relaxat  
Lora cupidinibus: scelus est clarescere <sup>44</sup> magna  
Virtute aut opibus, ferrum et crudele venenum  
Praesto adsunt: crebro incestatur funere Roma.  
Dum Seneca et Burrus urbis mala gliscere cernunt,  
Subsidia imminui, nullam apparere medelam,  
Funesta incipiunt paulatim excedere ab aula,  
Tutius et credunt amotis vivere in hortis.  
Horrida romani patet induperatoris imago.  
Detestata mali species: implacabilis extra  
Contemptus hominum, atque intus veneratio demens,  
Caeca sui, humanosque ausus audacia supra,  
Atque Deum contra insanae molimina luctae.  
Quo tamen incumbit solium bene cardine nixum?  
In sabulo aedificata levi stetit ardua turris,  
Quo traheret casu immensas gravioze ruinas.

Ergo ubi Bazarum effuso saturata cruore  
Littora diffugiens regalem allabitur aedem,  
Semotus longe media se protrahit urbe,  
Et supra cives romanaeque cuncta locatus,  
Ipsam hominis formam fugiens, humanaque temnens  
Vincula terrificus magnis spatiat in aulis.  
Qui comites olli? per iniqua silentia quacnam  
Excubat insomnis foribus custodia ahenis?  
Terribiles visu species, informia monstra,  
Quae portentifero foetu concepta creavit



Incauti fraus prima patris, varioque remiscens  
Semina concubitu aggressit numeroque modoque.  
Devia jamdudum et totum errabunda per orbem  
His sedem posuere locis. Stabula alta ferarum,  
Dedecus infandum! crassa caligine septa  
Vulgares latuere oculos, portentaque foeda  
Romulidae adsimili conlecti nube tueri  
Hactenus effugiunt. Soboles sata sanguine Christi  
Largifluo, diaeque facis lustrata nitore  
Monstrosos novit partus, saniemque perhorret  
Impurumque nefas: sanctos fugere vicissim  
Monstra, nec aspectum possunt tolerare nitentem.

Informem ducit malesuada Superbia coelum,  
Quae prior aetherium maculavit lumen et auras.  
Nam quondam horrisono percussus fulminis ictu  
Ales sidereae custos pulcherrimus aulae,  
Ut primum cecidit foedum damnatus ad oreum,  
Improba progenies partu prognata nefando  
Infecit diro modo natum semine mundum.  
Foedo lacta satellitio frontem ipsa severam  
Hirsutumque supercilium fastumque tumentem  
Attollens, frustra flentes aversa tuelur  
Orantesque diu, funestoque ebria fumo  
Infra se posita adspectat mortalia, fasque  
Despectatque nefas, aut si quae ficta feruntur  
Numina, caeca suo credit famulantia regno.

Nec procul irrequieta stupet soror aemula, coeno  
Obsita avarities: exanguia membra perennis  
Depascit macies, defosso illa incubat auro  
Immoriturque luens. Media ceu Tantalus unda  
Arescit moriens, et labris roscida lympha

Mag  
Par  
Cala  
Nes  
Sep  
Prae  
Thas  
Lud  
Cia  
Cui  
Nec  
la v  
A  
Com  
Nes  
Ma  
Al c  
Hq  
Nec  
Lac  
Art  
Sig  
Co  
Ti  
Te  
O  
S  
E  
E  
I  
I

Effugit, effugiunt beneolentia poma propinquis  
Pendula ab arboribus; penitus defossa talenta  
Caelati argenti cernit, phrygioque tyranno  
Tristior inventas trepidat contingere gazas.  
Saepe animas stimulans in aperta pericula viles  
Praecipitat: quos cura patrum irrequieta locavit  
Thesauros, immensum argenti pondus et auri,  
Unde senatores, equitesque ignava sequuntur  
Otia, seu nimium indulgent popularibus auris,  
Obliqua insidiis furtim praedatur opertis,  
Nocturnisque domos perfundit caedibus, audens  
In vacuam, occiso domino, perrumpere sedem.

Ah! quo Luxuries inhonesto laeta triumpho  
Compita pervolitat, curruque astringit ovanti  
Nescio qua praeter solitum dulcedine captos,  
Illa olim rudia at formissima corda, Quirites?  
At quamvis syrio distillant tempora nardo,  
Atque interlucens gemmis auroque monile  
Pectora distinguit, pastae praesepibus altis  
Lactantes asinae beneolentia balnea praebent,  
Arte laboratae vestes, ostroque rigentes  
Sidonio tamen effocto manantia tabo  
Corpora mendaci nequeunt abscondere velo.  
Turpius haud quidquam aetas insidiosa parentum  
Terris parturiit miseris. Corrumpitur atque  
Omnia corrumpit <sup>45</sup>, contactuque omnia foedat.  
Servitia immunda obscoeno famulantia regno  
Et Ninive et Babylon et Persis subdita Grajo  
Exceptum virus funesta morte luere,  
Pergamaque occubuere fero collisa duello <sup>46</sup>.  
Hinc ubi praecipitem florentia regna ruinam

Traxere, occiduum meretrix contendit ad oram,  
Per foedas urbes contagia dira propagans.  
Graccia praesentit prima execrabile virus,  
Primaque succubuit pellaeo victima ferro.  
Et jam, victa Asia, argolicis laetata triumphis,  
Barbara romana pellex superastilit urbe.  
Illa gravem evertit populum populoque subacto,  
Induperatorum plena spatiat in aula,  
Unde manu citharam tentans, myrtoque decora  
Dira per incautum sevit contagia vulgus.  
Hinc fas atque nefas vertit, thalamosque genusque  
Polluit, atque domus vetilo incestavit amore <sup>47</sup>.  
Quin etiam formae humanae ingenique virilis  
Poenitet amentem: pessumdata more ferino  
In caccam venerem, sineret pavor, obvia abiret:  
At quis naturae posset pervertere leges?

Quae vero illa autem flammis accensa nefandis  
Ardentes oculos objecta nube recondit?  
Ora recognosco, atque habitum implacabilis Irae.  
Praecipitem gressum, furibundaque vulnera cerno,  
Vulnera, quae infelix animi primo impete jecit,  
Omnia distorquens sensu rapiensque maligno.  
Eheu! quae imperio, quae Romae saeva ruenti  
Incubuerunt mala, ut primum furialis Erynnis  
Regnandis populis sine lege, sine ordine demens  
Incidit! heu quantos injuria suscitavit ignes!  
Poena praeit, sequiturque nigrae formidinis ora,  
Fraudesque insidiaeque gradum comitantur euntis.  
Interdum indomitus furor, immedicabile vulnus  
Alta mente manet, poenaeque in imagine flagrat,  
Ulcisci impaliens, neque juris sentit habenas.

Nec porro infernas comitari turpe sorores  
Agmen respuerit, quae cura pallet inani  
Invidia alterius rebusque macrescit opimis.  
Nata humili ignotoque loco sibi cuncta reposcit  
Debita, nec quidquam patitur praecurrere majus.  
Quin etiam magna in melius procedere coepta  
Conspiciens, lectumque omni florescere honore  
Ingenium, magnaeque domus concrescere felix  
Auspicium, longi sentit tormenta doloris.  
Ipsa inimica ruit demens per compita, mentemque  
Incautam populi rumore accendit amaro,  
Si fors crescentis deformet nomina famae.  
Una regit fraus, una nocentes sufficit artes.  
Quod Deus omnipotens venis impressit in imis  
Et natura suum ingenium proprio impete pandit,  
Ut quisque auxiliis junctis concurrat in unum  
Et commune bonum, partisque fruatur amice,  
Foederis ipsa decus secat admirabile, seque  
Unice amat, tantumque sibi vix cognita vivit.

At quae Scylla vorax, et nunquam explenda Carybdis  
Exitiale gulae damnum, aequabilque ruinas  
Indecores? Centum fauces alit ipsa reclusas,  
Nec contenta novos etiam sibi poscit honores.  
Post partum imperium, sophiae post vana reperta,  
Post Asiae regna indignis spoliata rapinis,  
Ecquis erit finis? quae meta novissima vitae?  
Una gulae ratio cunctis, erit una voluptas.  
Nec modo quae frugum mater fuit itala tellus,  
Exquisita epulis solatia sufficit; orbis  
Victus Romulidûm mensis quaesita ministrat  
Munera. Vina Chios mittit, lectasque volucres

Phasis; per lybicum quaeruntur nola profundum  
Ostrea. Cuncta vorans, barathroque exhausta profundo  
Omnia consumens comedit, saturata vomitque <sup>48</sup>  
Ocyus, et lautis repetit convivia mensis.

Ultima stat segnis dejecto Ignavia vul'u.  
Nuda pedem, nudos humeris effusa capillos,  
Atque soporiferum senium, nubemque veterni  
Fronte tegit, somnoque trahit languentia membra.  
Si quid amor patriae, laudumque arrecta cupido  
Suaserit, illa alacri geminans obstantia menti  
Impedit; illa viam omnigenae demonstrat iniquam  
Virtutis, partesque suas qui fungitur, ore  
Obscoeno insultat, risuque inspergit amaro.  
Otia lenta sequi, placidae dare membra quieti,  
In medios dormire dies, nîl cuncta morari  
Cetera, magna jubet foedae sapientia Romae.

Talia per medias stabulantur monstra columnas  
Ipso in vestibulo: cumque horrida turba Neronem  
Ausu tartarco, caedisque recentis onustum  
Opprobrio cernunt subeuntem moenia, plausu  
Exiluere novo circum, rictuque protervo  
Infremuere: sui melius namque omina regni  
Infernas late spectant adolescere lauros.  
Turbatam interea praenuncia fama per urbem  
Diditur extemplo Romam rediisse Neronem:  
Hos metus, hos amens movet assentiatio ad aulam.  
Nec minus ipse jubet Praetor, auctore senatu,  
Majora aeditui properent praepandere templa,  
Circumeatque frequens populus, Divosque salutet,  
Exolvens justas romano nomine grates <sup>49</sup>.  
Nec mora: suppliciter per pulvinaria Roma

Omnia versatur: cunctis donaria templis  
Matronae affigunt votivis vestibus albae,  
Romanaeque tribus festivo gaudia vultu  
Prae se declarant: uruntur mascula thura.  
Tunc Pater umbrarum tota motavit in urbe  
Tartareas pestes, mendacia mille Deorum,  
Omniaque impuri explicuit mysteria regni.  
En Syriae <sup>50</sup> famulata Deae densissima turba  
Fertur: tardipedis gressum comitatur aselli  
Cui caput atque humeros intortis taenia vittis  
Plurima, et umbrosis vestit frons verna corymbis.  
Numinis impositam effigiem (seu regia Juno  
Seu Venus illa fuit tenerorum mater amorum,  
Incertum est) Mystae innumeri clamore secundo  
Circumdant, choreisque vacant, et carmina dicunt.  
At mox horrendum Corybantes <sup>51</sup> aere canoro  
Increpuere, Phryges patria sed nomine Galli.  
Crinibus effusis, raucarum murmure vocum  
Attonitum sistunt vulgus: stat vertice celso  
Sacrifer insultans, isque aenea tympana vincit  
Clamore horrendo exululans: mox corpora nudat  
Membraque districto secat immiserabilis ense.  
Manantem tepidum per vulnera secta cruorem  
Excipiunt comites pateris; digito ille refuso  
Assecclas humiles per frontem et tempora pingit.  
Ecce autem devota ciel patrium agmina sistrum.  
Linigera advenit candens in veste sacerdos  
Isidis <sup>52</sup>, et capite abraso: Dea condita velo  
Arcano quondam dignata invisere Tibrim  
Induit humanam effigiem: stat cetera Virgo,  
Corpore virgineo vituli caput extat opimi.

Tum vero Mystes: Per Anubidis ora verendi,  
 ( Equis latrantem non deveneretur Anubim ? )  
 Ite sub auriferam Meroën, Nilumque fluentem  
 Haurite, isiacique effundite limine templi.  
 Districtus vestris cervicibus imminet ensis.  
 Omne nefas Nilus lustralibus eluit undis.

Patriciam sed celsa vocant Capitolia Romam,  
 Qua prior aequaevis concrevit moenibus urbis  
 Romula Relligio <sup>53</sup>. Collis saturnius olim,  
 Cum veterem sedes excepit rustica regem,  
 Et mox Tarpejus, cum auro corrupta sabino  
 Virgo munitas hosti male prodidit arces,  
 Surgenti fuit augurium admirabile Romae.  
 Fama refert, multis sed fama obscurior annis,  
 Hetruscum Tolum, dederat cui Vulcia stirpem,  
 Conatum patriae solium usurpare supremum,  
 Foedifragum expendisse suo cum sanguine crimen.  
 Truncatum exposuere caput, nomenque profana  
 Fronte fuit sculptum, justum ambitionis iniquae  
 Supplicium, et cunctis instar memorabile saeculis.  
 Tullius illustri prognatus gente, capessens  
 Romanum sceptrum, cineri funebria solvit,  
 Et cum Tarquinius fundamina vasta superbus  
 Effodienda loco jussit, qua coeperat alter  
 Priscus, disrupta caput e cervice revulsum  
 Emicuit. Regem tetigit mirabile monstrum,  
 Et Tusci vates arcem et Capitolia magni  
 Imperii rerumque caput cecinere futurum.  
 Nec stetit hic species venturae nuncia sortis.  
 Dum plana ingenti consurgeret area campo,  
 Cunctaque cessissent templo delubra recenti,

Terr  
Mole  
Vale  
Et s  
Et s  
Mon  
Inge  
Estr  
Molv  
Inpi  
At t  
Hum  
J  
Ter  
Pia  
Sae  
Nun  
Nec  
Me  
Fuc  
Pa:  
Eo  
Mc  
Ju  
Et  
St  
Ir  
St  
P  
M  
I

Terminus abdixit, propria neque sede Juventas<sup>54</sup>  
Mutari passa. Acciti responsa tulerunt  
Vates, immotumque Deum portendere firmum  
Et stabile imperium, atque Deam cui laetior aetas,  
Et solidum robur, semper juvenilia regna  
Monstrare, atque mares animos, viresque vigentes.  
Ingens tum templum fatali desuper arce<sup>55</sup>  
Exstructum, magnaefque stetit venerabilis urbi  
Moles, aeterni effigies tutissima regni.  
Jupiter in medio templum cellamque tenebat:  
At binis eadem servant laquearia cellis  
Hinc Juno Regina deum, hinc Tritonia Pallas.

Jamque nitescentis sub limina solis, aventes  
Tercentum famuli simulacra insignia honestant.  
Plurimus ante Jovem virgas, durasque bipennes  
Saevus habet lictor: stat nomenclator in aures  
Numini adorantum adventus et nomina dictans.  
Nec minus et tecti duplex custodia Divae  
Mercato ornantur cultu; pars, arte magistra,  
Fucata inducit rigidis pigmenta capillis,  
Pars totam assyria properat perfundere myrrha,  
Eoaeque sinus tenues circumdare vestis.  
Mox epulum exstructum dis servatoribus: ipse  
Jupiter in lecto accumbit sellisque Minerva  
Et Juno: lectum et sellas pulcherrima vestis  
Stragula, condecorantque auro gemmisque tapeetes  
Intexti: lautoque parat convivium luxu  
Septemvir: cunctas stat victima major ad aras  
Plurima, placatura deos lustralibus extis.  
Mutati o mores<sup>56</sup>! mutataque tempora! Quondam  
Insignis rediens victo bellator ab hoste,



Ipsa et bellatrix acies sistebat ad urbem,  
Augusta expectans rigidi mandata senatus.  
Armigeræ tum templa Deæ conferta petebat  
Turba patrum, sancto expendens examine jura,  
Nec quaesita dabat meriti decora alta triumphii,  
Nî justum numerum càmpe stravisset aperto  
Victor, et imperium domito firmasset in orbe.  
Interfectori matris nunc pompa triumphii  
Indicta. Id patribus sanxit romana vocatis  
Curia ( solus abest Thræseas <sup>57</sup>, victusque recedit ),  
Et jam Roma parat solemnes ducere pompas.  
Ipse Nero victor Tyrio conspectus in ostro,  
Laetaque pacifera redimitus tempora lauro,  
Quadrijugo invehitur per maxima compita curru,  
Dum lacti applaudunt populi rumore secundo;  
Perque viam graditur Sacram, et Capitolia summa  
Conscendit, solidam gemmis auroque coronam  
Laturus. Præeunt patres, crebrique coronant  
Ad delubra deûm solemnia dona ferentem,  
Pontificesque choris variis, et ovantia gyro  
Agmina, magnificis omnes in vestibus, omnes  
Caesariem impliciti vittis ramisque decoris,  
Quatuor eximios præstanti corpore tauros  
Ante aras statuunt: tibi Caesar maxima sacra,  
Jupiter, ipse tibi mactat, totidemque juvenecas  
Cervice intacta vobis, Juno atque Minerva.  
Interea totus suavi modulamine collis  
Assonat: innumeræ gentes glomerantur in altis  
Porticibus, rapidisque vident adolescere flammis  
Viscera, votivumque sacrum rapiuntque feruntque.  
Vae Romæ! quondam felicibus hostia dextris

Procubuit benefacta Deūm, eventusque secundos  
Testatura urbis: nunc impia funera, caedes  
Nunc miseras, vice mutata, testantur agenda  
Numinibus grates illataque munera templis <sup>58</sup>.

Tum vero matri invidiam atque odia aspera movit,  
Efferat rescindens luctus decreta recentis.

Extorres alios ignota per oppida fines  
Advocat ad patrios; aliis, quos impius ensis  
Messuit, inferias miseras, nomenque sepulchri  
Obtulit, et cupiens facilis clemensque videri  
(Sic abolere sui credit perjuria facti)  
Carnifices laqueumque abolet. Quae territa Roma  
Barbariem Tiberi immanem, Caji furores  
Indomitos perpessa diu, vix fulgere vidit  
Qualia sublucent fugiente crepuscula sole,  
Et tot materna illatos feritate dolores  
Audivit, scelere Roma exhilarata pepercit:  
At laesa exuperat Natura, ultura nocentem.

Si cui fas fuerit patefacta mente tyrannum <sup>59</sup>  
Inspicere, atque imas cordis lustrare latebras,  
Non equidem dubitem, quin saevo livida morsu  
Vulnera mortiferosque ictus, luctumque metumque  
Perlegeret. Ceu corporeos diverberat artus  
Intortum verber, feritate, libidine, fraude  
Tunditur impatiens animus: sua crimina sonti  
Supplicia: ipse aulae splendor taciturnaque tecta  
Non lenire queunt: curae comitantur edaces.  
Impius ipse suam poenam et tormenta fatetur.  
Sic quondam veri non tota effoeta vetustas  
Alludens finxit Tytium <sup>60</sup> omniparentis alumnum  
Telluris rabido depasci vulture; at illi

Immortale manet pectus, foecundaque poenis  
 Viscera; nec requies fibris datur ulla renatis.  
 Improba certatim trepidum simulacra Neronem  
 Circumeunt, urgentque: velut si forte maligna  
 Nocte viatori fraus implacata latronum  
 Incubuit, tumidasque minas gladiosque ferentes  
 Horrisonis laniant flagris, foedisque cruentant  
 Vulneribus; seu forte lupum per ovilia plena  
 Grassantem irrequieta canum vis aemula sistit,  
 Depresumque agitant morsu et latratibus; omnis  
 Excutitur caula, et montana cacumina circum.  
 Tum vero lux illa animo memoranda recurrit,  
 Cum teneram vidit ludis juvenalibus Eunem;  
 Caelesti obstupuit forma, raptaque potiri  
 Excupiit frustra! Sublustri noctis in umbra  
 Territa diffugit penetrati e sede puella:  
 Nulla fugae ratio apparet, vestigia nulla:  
 Ipsi etiam attoniti casu trepidique ministri  
 Deficiunt. Animo violati injuria amoris  
 Acrior insurgit, vacuumque perambulat aulam.  
 Non secus ac laterum saevis cruciatibus aeger,  
 Si quando gravis accedit dolor, uritur aestu  
 Per thalamum infelix, atque huc versatur et illuc,  
 In partesque ruit varias, frustra ille levamen  
 Quaerit, nulla patet saevo medicina dolori;  
 Sic olli caecum, stimulante cupidine, pectus  
 Uritur: has tandem auditus geminare querelas:  
 Ventum est ad finem: somni sine munere luces  
 Sollicitasque traho noctes: loca plena timoris  
 Omnia: quid faciam? me despicit ipsa fugitque  
 Foemella infelix: miseris abstrusa latebris,

Maluit ipsa mori quam ingentem ferre Neronem.  
Me, video, tellus odit caelumque: relinquit  
Undique: me fugere exoptem: praesentius at me  
Sentio adesse mihi; vivens saevo immoror orco.  
Quid loquor, aut ubi sum? nostram quis circumit aulam?  
Hostis adest, mediaque domo et penetralibus ipsis  
Insultat. Tolane parum metuemur in urbe?  
Talia flammato secum dum corde volutat,  
Tigellinus <sup>61</sup> adest. Ex quo Respublica retro  
Sublapsa, inque manum unius venere timendi  
Imperii vires, magna dominarier aula  
Suérant ignota lecti de plebe ministri.  
Ollis jam primum concredita summa regundi  
Caesareae interiora domus, sed gratia crevit,  
Magnis criminibus quaesita potentia crevit  
Usque adeo, ut sensim graviora negotia Romae  
Ad sese traherent. Coeptis immanibus omnes  
Anteiit Tigellinus, rexitque potentis  
Imperii clavum. Miserae post funera matris  
Praecipue, primos aditus et tempora quaerit,  
Quî possit rabida turbatum mente Neronem  
Fidus consultor vacua ditione tenere.  
Ergo dum vario curarum fluctuat aestu  
Princeps, improvisus adest, reficitque dolentem:  
Romani specula imperii, solioque locatus,  
Quo nihil in terris majus surgensque cadensque  
Sol contemplatur, Deus optime maxime Romae,  
Solutus et incertus magnae penetralibus aulae  
Semper carpere? anne Tibi quid defuit? illum  
Acclinem genibus tristis, torvusque tuetur  
Caesar: mox imo ducens suspiria corde

Praetulerim quod ego cunctis, hoc defuit unum  
Pax mihi, respondit. Quis fas mihi pace potiri?  
At tibi longa fuit promissi copia semper,  
Ventosa lingua cunctis cane jurgia: verbo  
Devoveas animam famae capitique Neronis.  
Quid virtus tua magna egit? quo graja virago  
Delituit, quave esse putes? tua magna facultas  
Per totum imperium, tantisque exercita curis  
Quo tandem valuit? Mihi nulli fidere tutum.  
Contremuit verbi rumore incensus amaro  
Molitor scelorum; longa experientia rerum  
Edocuit, quanto distet discrimine caedes.  
Ut vero attonitus vires mentemque recepit:  
Conquereris merito, sed ego, sanctissime Princeps,  
Praedixi toties, ne quae jactura potenti  
Imperio fiat, romanum dedecus, omnem  
Hebraeam gentem nostra procul urbe fugandam.  
Claudius ejecit: tua cum clementia longo  
Exilio revocat, benefactum insigne rependit  
Seditione? dolis? Omnis manifesta patescit  
Proditio Hebraeorum. Thalamum servabat herilem  
Calvus; nonne gravi fidissima munere semper  
Calvi dextra fuit? Calvo concredita virgo.  
Novimus at nuper tanta novitate sacrorum  
Illectos primae noctis fugisse tenebris,  
Et Calvum frustra, frustra quaesivimus Eunen.  
At mihi ne credas tua jussa oblita; latebras  
Virginis argolicae immensis erroribus urbis  
Hactenus, invitatus fateor, cognosse nequivi:  
Tarsensis senior, confidentissimus inter  
Hebraeos meritam ipse luet cum sanguine poenam.

Constans ingenium, praepollens gratia linguae  
Terretur nulla objectae formidine mortis.  
Quam fortuna sinat privata, audentior ipsum  
Judeaeae regem Agrippam, judaeaque movit  
Agmina, et argolicas urbes, aulamque penetrans  
Cecropiam patrum non formidavit acumen.  
Credidit alloquio missus pro consule Cyprum  
Sergius, et Syria et Judaea et Graecia ad usque  
Illyrium audierunt fantem: comitantur in urbe  
Judaeus Graecusque frequens, et barbarus: ille  
Concilium celebrat multis cum millibus, omnes  
Unanimes praesto jurare in verba magistri.  
Qua rectum Tyberis disternat insula callem,  
Dum variis famulos morbis senioque gravatos  
Sollicitat, nostri metuenda militis arte  
Captus, in horrendo servatur carceris antro.  
Tum Nero confidens animi meliora ferentem  
Mitior adspexit, sed vultu supplice fatur:  
Tigelline, tui nunquam fiducia cessit:  
At non aggrediere tuum servare Neronem?  
Ah! quae nocturnam tenus hac turbare quietem  
Assuêrunt, gravius me nunc insomnia terrent.  
Prima quies aderat, cum curis fessa diurnis  
Corpora laxaham, pacata per aequora ponti  
Ingentem navim velis remisque videbar  
Dirigere: extemplo ignota virtute revulsum  
Cerno gubernaculum <sup>62</sup>. Venit ecce Octavia conjux.  
Per loca senta situ, per luce carentia regna  
Pertrahit invitum, et latebrosa in vincula claudit.  
Et mox pennipotens densis exercitus alis  
Formicae <sup>63</sup> incubuere: gravi me turbine pressum

Volvunt, et validis nequeo me exolvere nodis.  
Cetera quid memorem? Pompeja theatra satagi  
Indugredi, at statuæ quæ limina vasta coronant,  
Gressu circumeunt me primo adituque repellunt.  
Quam metui, quorsum malefaustus cesserit annus!  
Omnia prospicio manifestæ signa ruinae.  
Præterea ante oculos semper fera matris imago  
Errat, et imperium converso cardine turbat.  
Crede mihi; nigra vix caelum circumvolat umbra,  
Terribiles visu species, larvæque feroces  
Cunctantem exagitant; sed forma horrentior omni  
Agrippina parens sese fert obvia: qualis  
Heu! facies, quantum specie mutata priori!  
Caesaries inculta jacet pallæque nigrantis  
Discerptum induitur tegmen, nudalæque monstrat  
Viscera, et ardentes oculos, maculisque trementes  
Interfusa genas flammantem lampada quassans  
Persequitur natum: ipse miser penetralia in alta  
Effugio; sed pone subit crudelior umbra,  
Indignata, fremens, et verba minacia jactans.  
Dormis, increpitat furialiter; impie, dormis?  
Ecce ferum capiti exitium supereminet: ecce  
Hostis romanos victor perrumpit in agros,  
Et vastat loca cuncta tibi. Quid demoror hostes  
Externos? media impatiens conjurat in urbe  
Diruere imperium populus: tremit icta dehiscens  
Tellus sub pedibus: truculenta ab fronte corona  
Excidet, infandæ daberis fera victima morti,  
O malesane . . . Tacet super his, et nocte profunda  
Solvitur: interea vastis ululatus in aulis  
Personat, et longos gemitus inclusa remittunt.

Atria: sic misero superest pax nulla Neroni.  
Quid sibi tot portenta petunt? an credere quibo,  
Quod me romano e solio detrudere certent?  
Non ego dissimulem. Quot cerno vivere Romae,  
Tot saevos hostes cerno metuoque: salutant  
Omnia in obsequia effusi: comitantur euntem  
Per plateas strepitu laeto, et clamore secundo.  
Ast odium latet intus, ineluctabile cerno  
Serpere discidium, et flammās ardere minaces <sup>64</sup>.  
Me juvat austeram Burro didicisse magistro  
Militem: at quantum Burrus diversus ab illo est  
Bellica qui puero veterum documenta Quiritum  
Tradidit? ad magnos per me deductus honores  
Fors majora cupit, vastique affectat habenas  
Imperii. Seneca ingenuae qui Palladis arte  
Edocuit juvenem, uberibus ditissimus arvis <sup>65</sup>  
Atque auro tulae nocturna per otia villae  
Luxurians celebrat dubio convivia coetu.  
Quid memorem urbanam plebem? granaria Romae  
Absumpsi modo: donavi sextertia centum  
In capita: an plebem linguis animisque faventem  
Crediderim? semper queritur mutabile vulgus.  
Turbida foedifrago conjurat Curia motu <sup>66</sup>:  
Jamdudum admirans Gracchos tumidosque Catones  
Inclita suspirat veteris miracula Romae,  
Jura sibi poscit veterum sublata Quiritum.  
Massilia Sylla exitium, Plautusque minatur  
Ex Asia <sup>67</sup>. Ille fremit duris in rebus egenus,  
Deposuitque suam regni novitate salutem:  
Hic gravibus Sophiae studiis acrique timendus  
Ingenio, dubiae conjuratoribus urbis



Pacta ligat. Gemini se jactant sanguine junclos  
 Caesaribus, cupiuntque thronum affectare supremum.  
 Hic Nero conticuit; toto sed vertice crinis  
 Horret turbatus, stant tristia lumina flammae;  
 Pallida mox lacrymis humectat grandibus ora.  
 Tale viro ingenium, quavis formidine mollis  
 Flere instar pueri, atque preces descendere ad imas.  
 Dumque dolet, metuitque, tamen geminata recrescit  
 Saevities, animoque malo mens impia saevit <sup>68</sup>.  
 Quid faciamus, ait? quanto circumdamur hoste,  
 Tigelline, vides: Romana Palatia serva.  
 Inventus puer in trivio, cunisque notatum:  
*Exposui puerum, matrem ne occidere vellet* <sup>69</sup>.  
 Quis non extimeat? tu Romae cuncta quieta,  
 Non ego crediderim: sunt qui mea facta maligno  
 Observant oculo atque nolant: fortasse silescent,  
 Poenas namque timent, et inevitabile fulmen:  
 Atque utinam fallar! tali ne crede quieti;  
 Suppositus cineri latet ignis, fomite flammam  
 Corripiet, totamque ruent incendia Romam.  
 Ad quem sic aulae fallaci instructus in arte:  
 Tu quodcumque jube: mihi jussa facessere fas est.  
 Attamen indignus timor hic; te te aspice circum.  
 Jus omne imperii in te uno: sors prospera vertit,  
 Si qui caesarea consanguinitate propinqui  
 Securam imperii poterant turbare quietem <sup>70</sup>.  
 Quaesitos meritis titulos adsume superbis.  
 Tu vatum princeps <sup>71</sup>: augusta palatia scandunt,  
 Si quae Phoebaeus flammis ardentibus ignis  
 Educat ingenia, et sera sub nocte repostas  
 Exercent musas et carmina millia pangunt,

Fontes quae invideant Aganippidos Hippocrenes.  
Ipse oratorum princeps <sup>72</sup>: tibi mellea Pitho  
Insedit labris, victusque recederet ipse  
Arpinas, fora vel misces aulamve senatus.  
Judicium solemne tibi decrevit honorem  
Eloquii palmam, nullo simili atque secundo.  
Tu Sophiae princeps <sup>73</sup>: lautis accumbere mensis  
Saepe Sophos vidi praecepta austera Zenonis  
Proferre in medium: te stoica turba loquentem  
Obstupuit, simul ac mira dulcedine vocis  
Doctrinae nebulas tectae, ambagesque resolvīs.  
Tu pictor sculptorque potens <sup>74</sup>: quas rustica Roma  
Agris assueta incultam traducere vitam  
Illustres artes sprexit, perpessa decoros  
Artifices humili in triviis decumbere coeno,  
Squalenti ipse situ revocas, moresque venustos  
Efficis, et Romae civilia lumina praebes,  
Saltare et canere, atque fides tractare canoras,  
Atque aurigare. Ipse choros attollis ovantes  
Ad splendorem aulae, pubesque incognita agrestis  
Gaudia concepit stupuitque Neronia Roma.  
Ah! ego si qua tibi fors liberiora profabor,  
Da veniam, Caesar, neque viribus amplius aude  
Indubitare tuis. Alieno vivere suērat  
Claudius imperio. Famae generosa paternae  
Nobilitas, lectae cognata superbia formae,  
Et celsa ambitio, atque auri irrequieta cupido,  
Foemineam extulerant mentem: mox ebria summi  
Arripit imperii fastigia. Principis uxor  
Hactenus unius muliebria foverat aulae  
Consilia: Augustae titulos ingentibus aequans

Factis Agrippina virum Romamque gubernat;  
Assidet illa throno graviora negotia tractans;  
Legatos illa hospitio regesque recepat,  
Utque potens virtus etiam manifesta pateret  
Gentibus externis, Ubios <sup>75</sup>, germanica castra  
Queis genita, ingentem populum, veteresque colonos  
Transtulit, atque suo dixit de nomine gentem.  
Jamque supergrediens mortalia cuncta, sacrato  
Inclita carpento exultans Capitolia scandit.  
Quid mirum, si Roma jugum muliebre perhorrens  
Allata caede exiit? Nunc crimina cuncta  
In foedum conficta caput plebs territa novit.  
Novit Agerinum <sup>76</sup> materna fraude per hortos  
Depreſsum, et strictum gladium sub veste tegentem,  
Novit regnandi longa assuetudine captam  
Romani imperii consortia sceptrā petentem,  
Et juraturas tentasse in verba cohortes  
Foeminea: utque fides stetit inviolata vetusto  
Foedere, militibus donum plebique negasse.  
Publica fortuna et Romae felicior actas  
Foedifragam extinxit. Communi voce nefastum  
Natalem dicunt. Statuit sententia Patrum  
Quod lux insidiis foret urbi sacra reſectis.  
Curia paciferae simulacrum insigne Minervae  
Accepit, juxtaque deam veneranda locata est  
Principis effigies <sup>77</sup>. Quidnam reminiscere matrem?  
Solut et omnipotens vacua dominaris in aula:  
Heic tu patricos memoras, magnumque senatum?  
Quae vetus antiquos jactabat Curia patres,  
Jamdudum renovata tuo de numine pendet;  
Nulantes latitant turpi formidine capti.

Ex quo Romulidûm tenui pendentia filo  
Omnia cognôrunt, depressa superbia sensim,  
Omnes edidicere uni parere Neroni,  
Qui partitur opes fidis, partitur honores.  
Et Burrum metuis? praetoria deserat arma,  
Nec te suspectum vana formidine ludet.  
Finibus imperii legionum exercitus ingens <sup>75</sup>  
Sparsus abest, absitque diu, ne insidiosa propinquum  
Proditio, aut foedae vitient contagia Romae.  
Militia Italiae deerret dispersa per amplum  
Romae circuitum, aut vicina per oppida castris  
Cunctetur positis: legio praetoria nostros  
Ambulet ante oculos, et totam deterreat urbem  
Armis instructis. Satis haec custodia nobis:  
Invita pretiis animos, et praemia pone;  
Et si romanam urbani contage veneni  
Militiam metuis, veniet germanica pubes <sup>76</sup>  
Auxilio. Externis confidere tutius armis.  
Annaeum Senecam Sophiae incubuisse sinamus  
In tenebris: procul hinc nubes et inania captet.  
Plebs plura optaret? Princeps an largior alter?  
Per te jam poterit regali vivere more  
Desidie in molli: quae vectigalia nulla <sup>77</sup>  
Solvit; frumentum dant horrea publica: saepe  
Argentum donas: thermas extractaque pandis  
Balnea, frigentes uberrima flumina Romam  
Ducis aquas, surgunt ingenti mole theatra,  
Indiga qua properat nullo plebecula sumptu.  
Et mirum! plaudente choro proscenia scandis,  
Et canis, et choreas ducis <sup>78</sup>. Quid Roma Neroni  
Debeat, ostendit nuper, cum longius isses.

Quis plebi cererem dedit aut spectacula sueta?  
 Quin etiam saevo inclementis frigore caeli,  
 Cum tua vox dono divum concredita Romae  
 Rauciret <sup>79</sup>, plebes magno timefacta periclo  
 Omnibus accurrit templis divum, omnibus aris.  
 Exultantis adhuc vocem vultusque recordor,  
 Nuper ubi Bajas linquens Iutique recessus  
 Otia, romanam remeasti sospes ad oram.  
 Municipes ibant, qua proxima meta viarum,  
 Ut te spectarent propius; sed moenia Romae,  
 Compitaque innumera, et fastigia summa domorum  
 Opplêrat plebes, quae te clamore secundo  
 Praesidiumque, patremque, salutiferumque vocabat.  
 Ergo cuncta domi requiescunt tuta forisque.  
 Unum restat opus: magni capita ardua monstri,  
 Quod Judaea vomit legem indignata latinam,  
 Extinguenda igni, et valida excindenda securi.  
 Evellenda mali ratio ab radicibus imis.  
 Tum porro contentus eris. Neque dicta refuto,  
 Tigelline, tua: hisce Nero fidentior orsus.  
 Quae fera diluvies nostras irrupit in aedes,  
 Nescio: at Hebraeos ingenti fervere motu  
 Conspicio, et secum majores jungere coetus.  
 ( Qua faciant causa, ignotum ) documenta serentes  
 Insolita adsciscunt socios terraque marique.  
 Audistin? certus retulit mihi nuncius aedes  
 Graecinum noctu ingenti crebescere coetu.  
 Plautius anne potens nimium, victisque Britannis  
 Clarior imperium meditans discordia miscet  
 Murmura? Funestis ne quid deterrima turba  
 In tenebris agitet, toto nunc Marte cavendum.

Maxima sed cautum dictat prudentia morem.  
Namque sua perstant ita Relligione tenaces,  
Ut lethum malint tanta pro laude pacisci.  
Si ferro et flammis per totam ulciscimur urbem,  
Augescit numerus: imitari nobile lethum  
Audebunt omnes; erit illis gloria maior.  
Hoc ego permeluo, estque malum in medicamine pejus.  
Privatim praestat potius cognoscere cuncta.  
Victori per me mulier permissa marito  
Prisco more patrum, iudexque domesticus ipse  
Arguerit sontem, poenamque e crimine poscat.  
At me nunc graviora vocant. Mihi nulla, fatebor,  
Relligio est: nostri penitus tuque intima cordis  
Agnoscis. Primos ex quo toto orbe timorem  
Novi parturiisse Deos, et numina nostra  
Pressa jacent senio, tota de mente fugavi  
Somnia jampridem. Syriae <sup>8o</sup> dea magna roganti  
Visa diu adjutrix: neque si male cesserat olim,  
Decurrebam alio; sed falsam tempore laevo  
Deprendi, poenaeque loco græveolente merentem  
Gurgite projeci. Mihi nunc icuncula <sup>8'</sup>, raro  
Quam mihi plebejus donavit munere vates,  
Numinis instar erit cultu servata decenti.  
At me cura tamen coquit irrequieta futuri <sup>8a</sup>.  
Numina securus contempsì vana deorum;  
Sed nequeo abstrusos magices contemnere ritus,  
Queis rapiam invite naturae arcana repostae.  
Sic clavum imperii, tot jam refluentibus undis,  
Dirigere in melius potero, circumque minaces  
Insidias solio semper depellere avito.  
At Tibi prae cunctis, graviori voce minister

Inclamat, Simon prae cunctis sufficit unus.  
Eoas artes, incantamentaque cuncta,  
Thessala quae jactat regio, exitiosaque Colchis,  
Unus cognovit, neque quis praevertere possit.  
Ille reluctantem versu deducere Lunam  
Quiverit, atque ipsum tenebris abscondere Solem:  
Ille citos fluvios fraenare, obliquaque cursu  
Flumina, deque loco sylvas et saxa movere.  
Per tumulos errat tristes, manesque sepultos  
Elicit: obscuro depellit nubila caelo,  
Cum libet, atque nives medio coacervat in aestu.  
Talia jampridem ingenti sermone feruntur;  
Nec tu me falsi argueris; manifesta patebunt  
Omnia, cum Simon magica doctissimus arte  
Virginis argolicae poterit vulgare latebras.  
Vix ipse accepit sanctissima jussa, profanis  
Ignotas herbas, et lecta venena paravit,  
Ossaque lecta cado, spirantiaque exta ferarum  
Excoquit, atque diu solo meditatur in antro  
Horrendum carmen, quo Tartara nigra fatiget.  
Mox ubi nosse dabit verum, pro tempore prudens  
Consilium capies. Dixit, missusque repente,  
Incantatorem superas qui arcessat ad aedes.

Postquam judaea Simon discessit ab ora;  
( Illum namque Stator fidei morumque magister  
Conferto in populo dictis reprehendit acerbis;  
Hinc primum simoniacae data nomina labi,  
Quod pretio primus sanctos quaesivit honores. )  
Non tamen exactae cepere obliviae vitae:  
At puduit patriae: samaritaque rura relinquens,  
Quotquot Alexandria suis nova dogmata ludis

Procudit, prava sequitur ratione, novalque  
Omnia. Jampridem gaudens popularibus auris  
Judaeus graecusque simul Christique dolosus  
Assecla caelestem caeco pessumdedit ausu  
Doctrinam, Sophiae placitis componere tentans  
Christiadûm gazam, verisque obvolvere falsa.  
Hinc nova prosiluit graeco cognomine Gnosis<sup>83</sup>;  
Hinc coepit rudis errorum indigestaque moles  
Haereseon, Christi Sponsam quae crimine foedo  
Polluere, et sanctam visae discernere vestem,  
Posteraque aeternis macularunt saecula bellis.  
Inde fluit pestis foedi devota Sabelli,  
Qui Triadi sanctae tantum tria nomina, Patrem  
Et Natum aequaevum, caelesteque Flamen, et unam  
Personam dedit: hinc pariter sceleratus Arius  
Aeonas mentiſur, et his mirabile Verbum  
Inferius: scelere hoc Nestorius, et quot  
Aut hominem Verbum, aut Christum per iniqua negarunt  
Esse Deum: hinc etiam caeci venere Docetae,  
Qui Christi aërio cingunt velamine corpus.  
Quod foeda abscondit dirum novitate venenum!  
Numinibus falsis Mosén aliosque prophetas  
Miscens, seque Jovem magnum, uxoremque Minervam  
Jactans Aegypti populosas circumit urbes.  
Nec satis haec: modo qui fastu tumefactus inani  
Bellavit Christo, Christum se dicere, seque  
Siderea venisse Deum mentitur ab aula,  
Ut totum miseris pollutum sordibus orbem  
Purgaret, purumque poli deferret ad axem.  
Intulerat pestem cunctas orientis in oras;  
Successu exultans laeto, jam jamque triumphans



Concepit majora animo, Romamque petivit,  
Artibus anquirens magicis sibi quaerere famam.  
Ergo thessalicae primum simulamine fraudis  
Mirabunda dedit triviis, humilemque popellum  
Incantator inauditis terroribus implet.  
Seu vim naturae exercet, mixtisque venenis,  
Triste magisterium! populos frustratur hiantes;  
Seu cum tartarea pepigit styge foedera pacis  
Improba, quo sanctum liceat tardare triumphum,  
Et verae fidei mendacem offundere fucum;  
(Tartareus dedit ipse suum pater esse ministrum)  
Ipse brevi totam fama conterruit urbem.  
Collis aventini cavea remoratur opaca  
Saepius occultus: sedem vicinia tota  
Infestam metuit, fugiunt pueri atque puellae.

Mira Nero audierat, magnamque vocarat ad aulam  
Incantatorem. Per noctes saepe silentes  
Si quando miseram terrerent turbida mentem,  
Ipse idem visus trepidum descendere ad antrum,  
Quo Magus infernos torquebat carmine manes.  
At jam patricia ut numen venerabile Roma  
Illum habet, et merito dios festinat honores,  
Quaerebatque timens rebus responsa sinistris.  
Infelix monstrum! caeco decepla furore  
Verum Roma Deum fugit exaudire loquentem  
Et magicas per vana petit commercia sortes!  
Nec longum, agnovit trepidi mysteria regni  
Simon, privatusque brevi consultor, et inter  
Regni instrumenta <sup>84</sup> est habitus, rexilque Neronem.  
Ergo compulsus timefacti voce ministri  
Ocyus aulae spelaea obscura relinquens

Venerat. Hirsutus crinis, proluxaque barba  
Atque supercilio nebula agglomerata minaci,  
Incessusque gravis, ferrugine tristis ibera  
Vestis romanum conturbavere tyrannum.  
Ille autem pavidum primum firmare satigit:  
Romulidum Princeps, tuto requiescere somno  
Jam poteris. (Nostris ea tanta potentia sacris)  
Exorata Parens verbisque coacta tremendis  
Umbra ferox iterum stygios subsedit ad amnes.  
Et nunc qua lateat virgo, tua nosse cupido?  
Ne dubita, infernas vincam incantamine vires.  
Tum vero foedas, quas defert graeculus ollas  
Pestifero undantes labo, virusque recoctum  
Stare jubet medio, circumque locavit in orbem  
Obscoenos comites nigris in vestibus omnes.  
Mox circumspiciens: Princeps, mihi cuncta parata,  
Inquit: Agon? Nero contremuit, dixitque trementi  
Ore: Age. Tum Simon sacra incipit orgia. Turbo  
Ceum quondam per plana citus loca verberare torto  
Curvatis fertur spatiiis, libamina circum  
Execrata amens cursat, cursuque furorem  
Concipit infernum, passimque ignita sinister  
Lumina contorquet. Subito mox impete raptus  
Constitit in medio, terque exorientia solis  
Lumina conspectat trepidoque immurmurat ore,  
Terque manus ictae crepuere, sacrumque volumen  
Foederis antiqui caperata fronte recludit,  
Terque profanato legit ore, avidusque volutat  
Arcano commissa libro, verbisque repertis  
Exultans, imo vocat ex acheronte tremendos  
Exululans lemures. Motu tremit excita tellus,

Funeræe pallent lædæ. Quatit ille solutis  
Ter pedibus terram, et subito venit obvia monstri  
Tartarei species. Satanas nanciscitur ansam,  
Ipse vocatus adest. Obscoeno nigricat ore  
Larva procax, pullo seseque obvolvitur amictu  
Frendens, taenaria nubes caligine cingit.  
Attoniti perstant comites; fremit ore furenti  
Simon, et: Quo se mulier fugitiva recondit,  
Dic age, fide comes? paucis sic Umbra locuta:  
*Haud procul hinc quaeras: meus illam possidet hostis.*  
Illa fugit subito, et priscae rediere quieti  
Omnia. Ceu noctu aegrotam deterrima mentem  
Somnia sollicitant, si informis imago tremendis  
Torva tuens oculis, habituque horrenda minaci  
Spectanti incubuit, formido concutit aegrum  
Pallida, maturare fugam molitur, at ingens  
Ex insperato invasit præcordia terror,  
Genua labant, trepidos quatit aeger anhelitus artus,  
Vellet clamare, at clamor frustratur hiantem,  
Atque olli vano recidunt coepta omnia nisu;  
Impia non aliter trepidum simulacra Neronem  
Terrificant: Simon fugit illicet: ipse nefasto  
Caesar se rapuisse loco peteret, sed tota labascit  
Vis animi, obriguit sanguis, steteruntque tenaci  
Torpida membra gelu. Per pessima cuncta minister  
Circumstat trepidum, et dictis solatur amicis:  
Quæ mora? Christigenæ græcam rapuere puellam.  
Quid plura optamus? Scelus, auctoresque tenemus.

<sup>1</sup> *Mutabilis aeo.* — Ps. Cl. 27. Ipsi peribunt, tu autem permanes: et omnes sicut vestimentum veterascent. 28. Et sicut opertorium mutabis eos, et mutabuntur; tu autem idem ipse es, et anni tui non deficient. Quod non aequè de imperiis dicendum est, quae continenti motu, per varias rerum vicissitudines feruntur. *Populus sua munia.* — Cic. lib. III, de Rep. Respublica est res populi: populus autem non omnis coetus multitudinis, sed coetus juris consensu, et utilitatis communione sociatus. *Ea cura quietos* — Just. Hist. 1. de prima populi aetate: Fines imperii tueri magis, quam proferre mos erat. Intra suam cuique patriam regna fiebantur. *Atque foris bellare* — De altera aetate, et juvenili satis apte idem Hist.: Domitis proximis cum accessione virum fortior ad alios transiret, et proxima quaeque victoria instrumentum sequentis esset. Tunc profecto illud Sallust. Cat. 7. Igitur talibus viris non labor insolitus, non locus ullus asper, aut arduus erat, non armatus hostis periculosus: virtus omnia domuerat. Tunc illud evenit quod Cicero de Senect. XVI: Curio ad focum sedenti magnum auri pondus Samnites cum attulissent, repudiati ab eo sunt. Non enim aurum habere, praeclarum sibi videri dixit; sed iis qui haberent aurum, imperare. *Curas degeneres* — Verum si laudis cupido et potentiae oblanguescit, unaque voluptas dominatur, rerumque ordine immutato, praeclarius videbitur aurum habere, quam aurum habentibus imperare, omnia ad perniciem profligata atque perditā festinant.

<sup>2</sup> *Lapsū cuncta minantur.* — Senec. Ep. XXXIX. Desinet esse remedio locus, ubi quae fuerint vitia, mores sunt. Id ipsum in operis sui primordio proficitur Livius, Praef.: Per quos viros, quibusque artibus domi militiaeque et partum et auctum imperium sit; labente deinde paulatim disciplina, veluti desidentes primo mores sequatur animo; deinde ut magis magisque lapsi sint; tum ire coeperint praecipites; donec ad haec tempora, quibus nec vitia nostra, nec remedia pati possumus, perventum est.

<sup>3</sup> *Consumptus inert.* — Juris consensus, et utilitatis communio civiles coetus consociat, qua, mutuis dissentionibus, et privatis utilitatibus dissipata, etsi reipublicae maneat adhuc species, anima quidem evanuit.

<sup>4</sup> *Emicuit.* — Quod justa quadam superbia praegestiens ipsemet adnotat. Patav. ib. Hoc illud est praecipue in cognitione rerum salubre, ac frugiferum omnis te exempli documenta in illustri posita monumento intueri; inde tibi tuaeque reipublicae, quod imitare, capias; inde foedum inceptum, foedum exitum quod vites. Ceterum aut me amor suscepti negotii fallit, aut nulla unquam respublica nec major, nec sanctior, nec bonis exemplis ditior fuit. Nec in quam civitatem tam sero avaritia luxuriaque immigraverint; nec ubi tantus ac tam diu paupertati ac parcimoniae honos fuerit: adeo quanto rerum minus, tanto minus cupiditatis erat.

<sup>2</sup> *Vicit.* — Romanae amplitudinis causas eloquenti admodum tractatione prosequitur suo more Augustinus de Civit. Dei. Sublata enim fati quaestione et inanum deorum cultu, romanum imperium propagatum, et servatum attribuit *uni Dei summi potentissimae voluntati*: Cum igitur veteres Romani, laudis avidi, pecuniae liberales erant, gloriam ingentem, divitias honestas volebant, (haec Sallustii verba mutuatur August.) patriam ardentissime dilexerunt, propter hanc vivere voluerunt, pro hac emori non dubitaverunt. Ceteras cupiditates hujus unius ingenti cupiditate presserunt. Ipsam denique patriam suam, quoniam servire videbatur inglorium, dominari vero atque imperare gloriosum, prius omni studio liberam, deinde dominam esse concupierunt.

<sup>3</sup> *Populosque subactos.* — Augustini mens est: Cum diu fuissent regna orientis illustria, voluit Deus et occidentale fieri, quod tempore esset posterius, sed imperii latitudine et magnitudine illustrius, idque talibus potissimum concessit hominibus ad domanda gravia mala multarum gentium, qui causa honoris, laudis et gloriae consuluerunt patriae, salutemque ejus saluti suae praeponere non dubitaverunt, pro isto uno vitio, id est amore laudis, pecuniae cupiditatem et multa alia vitia comprimentes. Non est, quod de summi et veri Dei justitia conquerantur: perceperunt mercedem suam.

<sup>4</sup> *Tardant.* — Qui romanae magnitudinis causas protulit, idem Patav. ib. ruinae initia lamentatur: Nuper divitiae avaritiam, et abundantes voluptates desiderium pro luxum aequae libidinem pereundi perdendique omnia invexere. Audi Catonem apud Sallustium, Cat. LII. Alia fuere quae illos (maiores nostros) magnos fecerunt quae nobis nulla sunt: domi industria, foris justum imperium, animus in consulendo liber neque delicto neque libidini obnoxius. Pro his nos habemus luxuriam atque avaritiam, publice egestatem, foris opulentiam: laudamus divitias, sequimur inertiam, inter honos et malos discrimen nullum: omnia virtutis praemia ambitio possidet. Neque mirum: ubi vos separatim sibi quisque consilium capitis, ubi domi voluptatibus, hic pecuniae aut gratiae servitis; eo fit, ut impetus fiat in vacuum rempublicam.

<sup>5</sup> *Concordia.* — Sallust. X. Concordia res parvae crescunt, discordia maxumae dilabuntur. Idipsum clarissime Tullius, Cat. IV, 17. Prima causa inventa est, in quo omnes consentirent . . . quam conjunctionem si . . . perpetuam in rep. tenuerimus, confirmo vobis nullum malum civile aut domesticum ad ullam reip. partem esse venturum. Et eandem ordinem concordiam in Catilinae conspiratione eluenda notat Cic. Att. I, 17. 18. 19. Tuo ut possum congruatinam concordiam.

<sup>6</sup> *Censent.* — Liv. XXXI, 7. Ite in suffragium, bene juvantibus diis, et quae patres censuerunt, vos jubete. *Majestas.* — Majestas populi, senatus auctoritas dicebatur. Cic. Phil. 3. Ut omnes ad auctoritatem hujus ordinis, majestatemque P. R. defendendam conspirasse videantur.

<sup>7</sup> *Lectique tribuni.* — Lex Junia sacra, quam tulit L. Junius Brutus:

Ut plebi sui magistratus essent sacrosancti, quibus auxilii latio adversus consules esset, neve cui Patrum capere eum magistratum liceret.

<sup>11</sup> *Divisa pericula belli.* — Quod praecipue factum serviana classium distributione, omnisque in civitate discriminis ordinumque, quibus inter gradus dignitatis fortunaeque aliquid interlucet. Liv. I, 43. Omnia in dites a pauperibus inclinata onera: belli pacisque munia non viritim ut antea, sed pro habitu pecuniarum fierent: et vis omnis penes primores civitatis esset.

<sup>12</sup> *Duplex.* — Liv. II, 24. Duas ex una civitate discordia fecerat. Et ib. 44, aeternas opes esse Romanis, nisi inter semetipsi seditionibus saeviant: id unum venenum eam labem civitatibus opulentis repertam, . . . duas civitates ex una factas: suos cuique parti magistratus, suas leges esse. Idemque auctor IX, 46. Factiones fuere, et erunt populis magis exitio, quam bella externa, quam fames morbique. Et X, 22. Nihil firmitus ad tuendam rempublicam concordii collegio. Sed paucis rem omnem aperit Sallust. Cat. XLI. Namque coepere nobilitas dignitatem, populus libertatem in libidinem vertere: sibi quisque ducere, trahere, rapere. Ita omnia in duas partes abstracta sunt; respublica quae media fuerat, dilacerata. *Nobilitas.* — Factionum duces sic enumerat Sallust. Jug. 42.: postquam Tib., et C. Gracchus quorum majores punico atque aliis bellis multum reipublicae addiderant, vindicare plebem in libertatem et paucorum scelera patefacere coepere; nobilitas noxia atque eo perculsa, modo per socios et nomen latinum, interdum per equites romanos, quos spes societatis e plebe dimoverat, Gracchorum seditionibus obviam ierat: . . . Igitur ea victoria nobilitas ex libidine sua usa multos mortales ferro aut fuga extinxit; plusque in reliquum sibi timoris, quam potentiae addidit.

<sup>13</sup> *Dominaeque secures.* — Hinc assidua inter patres plebemque certamina: Sed plebs omnia obtinuit; jus Connubiorum cum patribus lege *canuleia*; Consulatum lege *sextia licinia*, ut consulum alter e plebe crearetur; jus Civium Rom. lege *porcia*: Ne quis magistratus civem Rom. virgis caederet, noceretque: Religionem, lege *ogulnia*: Ut quatuor pontifices, quinque augures de plebe adderentur.

<sup>14</sup> *Flumine Romam.* — Cic. Att. XI, 10. Sullaturit animus ejus: et proscripturit diu. Sic de Caesare Tullius: nomen Syllae idem est ac proscriptio. Qui bello civili cum C. Mario certavit, eoque oppresso, urbem infesto exercitu ingressus, in Campo Martio interfici jussit omnes marianarum partium fautores. Proscriptionis tabula proposita Equestris et Senatorii ordinis florem extinxit; dictator ita Rempublicam oppressit, ut teste Cic. in Verrem, nemo illo invito nec bona, nec patriam, nec vitam retinere posset.

<sup>15</sup> *Pharsalia pugnam.* — Quod C. Julius Caesar Gracchos et C. Marium secutus sit, apertissime patefacit Svet. cum c. 1. narrat: Satis constat, Syllam cum deprecantibus amicissimis et ornatissimis viris aliquandiu denegasset,

atque illi pertinaciter contenderent, expugnatum tandem proclamasse sive divinitus, sive aliqua conjectura: « vincerent ac sibi haberent; dummodo scirent, eum quem incolumem tanto opere cuperent, quandoque optimatum partibus quos secum simul defendissent, exitio futurum: nam Caesari multos Marios inesse ». Quo vero statu communis res fuerit, post aciem Pharsalicam, a Tullio accipe. Cic. Att. VIII, 4. Me de republica nunquam nisi divine cogitasse, et ea tempestate eversam, quam XIV annos ante praevideram. Et Fam. IV, 5. Ea nobis erepta quae hominibus non minus quam liberi cara sunt, patria, honestas, dignitas. Et Fam. V, 15. Quod perfugium spoliato et domesticis, et forensibus ornamentis et solatiis? At IX, 15. Sedebamus in puppi, nunc vix in sentina sumus.

<sup>10</sup> *Imperium*. — Tac. I, 1. Pompeii, Crassique potentia cito in Caesarem, Lepidi atque Antonii arma in Augustum cessere, qui cuncta discordiis civilibus fessa nomine *principis* sub *imperium* accepit. — Quomodo, quibusque de causis Respublica in Imperium fuerit immutata, coaeris ipsis scriptoribus facem praeferebantur judicabimus. — *Sine ordine legum*. Sic Tac. I, 2. Suspecto senatus populiue imperio ob certamina potentium, et avaritiam magistratum, invalido legum auxilio. *Temperat iras*. — Tac. I, 2. Augustus cunctos otii dulcedine pellexit... Tuta enim et praesentia, quam cetera et periculosa maluerunt. — *Octavi*. Gentem Octaviam Velitris praecipuam olim fuisse, multis declarat Svet., principio vitae Aug. — *Prudentia*. Sic Augusti vita apud prudentiores extollebatur. Tac. I, 9. Necessitudine reipublicae, in qua nullus tunc legibus locus, ad arma civilia actum... non aliud discordantis patriae remedium fuisse, quam ut ab uno regeretur. Et postea. Unum esse reip. corpus unius animo gerendum. — *Omnia mutas*. Tac. I, 2. Insurgere paullatim, munia senatus, magistratum, legum in se trahere, nullo adversante. Idque prudenter factum minuendae invidiae gratia, quia erat princeps Senatus Et deinde: Non regno tamen, neque dictatura, sed nomine Principis constitutam rempublicam: inde *principatus*, et apud Svetonium *principium* pro imperatoria dominatione usurpari coepit. — *Caesaris heres et Augustus*. Qua de causa utrumque nactus sit nomen, explicat Svetonius, vita Aug. 7. Postea Caesaris, et deinde cognomen Augusti assumpsit; alterum testamento maioris avunculi; alterum Munacii Planci sententia, quum quibusdam consentibus Romulum appellari oportere, quasi et ipsum conditorem urbis, praevaluisse, ut Augustus potius vocaretur, non tantum novo, sed etiam ampliore cognomine, quod loca quoque religiosa, et in quibus augurato quid consecratur, augusta dicantur, vel ab avium gestu gustuve, sicut etiam Ennius docet, scribens:

Augusto augurio postquam inclyta condita Roma est.

*Nomina sola*. Domi res tranquillae; eadem magistratum vocabula: quousquisque reliquus qui rempublicam vidisset? Igitur verso civitatis statu,



nihil usquam prisci et integri moris; omnes, exuta aequalitate, jussa principis expectare . . . pauci bona libertatis incassum disserere, plures bellum pavescere, Tac. I, 4.

<sup>11</sup> *Execrabile. — Simulataque.* Tac. IV, 72. Nullam aequae Tiberius ex virtutibus suis quam dissimulationem diligebat. Apertius ejus vafritiem narrat Tac. I, 8. Ad introspiciendas etiam procerum voluntates, inductam dubitationem: nam verba, vultus in crimen detorquens recondebat. — *Concilia.* Tac. I, 15. Tum primum a campo comitia ad patres translata sunt: nam ad eam diem, etsi potissima arbitrio principis, quaedam tamen studiis tribuum fiebant. — *Delator.* Svet. In Ner. 32. Instituit, ut lege majestatis tenerentur facta dictaque omnia, quibus modo delator non deesset. Et Tac. VI, 7. — Quod maxime exitiabile tulere illa tempora, cum primores senatus infimas etiam delationes exercerent, alii propalam, multi per occultum, neque discerneres alienos a conjunctis, amicos ab ignotis, quid repens aut vetustate obscurum, perinde in foro, in convivio, quaque de re locuti, incusabantur . . . pars ad lubricum sui, plures infecti, quasi valetudine et contactu.

<sup>12</sup> *Caius.* — Tac. Annal. VI, 20. Immanem animum subdola modestia tegens, non damnatione matris, non exilio fratrum rupta voce. Et I, 41. Infans in castris genitus, in contubernio legionum eductus quem militari vocabulo *Caligulam* appellabant, quia plerumque ad concilianda vulgi studia eo tegmine pedum utebatur — *Quadrupedem.* Svet. Calig. LV. Incitato equo . . . praeter equile marmoreum et praesepe eburneum praeterque purpurea tegumenta, ac monilia e gemmis, domum etiam et familiam et suppellectilem dedit quo lautius nomine ejus invitati reciperentur; consulatum quoque traditur destinasse.

<sup>13</sup> *Claudius.* — Svet. Cl. V. Ex contubernio sordidissimorum hominum, super veterem segnitiae notam, ebrietatis et aleae infamiam subiit. Tac. VII, 28. Subibat sine dubio metus, reputantes, liebetem Claudium, et uxori devinctum, multasque mortes jussu Messalinae patratas.

<sup>14</sup> *Agrippina.* — Veneno Claudium extinxit. Tac. XIII, 67. Infusum delectabili cibo boletorum venenum nec vim medicaminis statim intellectam, socordiane Claudii an vinolentia.

<sup>15</sup> *Poppaea.* — Ingenium et formam mulieris sic pingit Tacit. Erat in civitate Sabina Poppaea, T. Ollio patre genita, sed nomen avi materni sumpserat, illustri memoria Poppaei Sabini, consulari, et triumphali decore praefulgentis . . . Sermo comis, nec absurdum ingenium: modestiam praeferre et lascivia uti: rarus in publicum egressus, idque velata parte oris, ne satiares aspectum vel quia sic decebat. Famae nunquam pepercit, maritos et adulteros non distinguens: neque affectui suo aut alieno abnoxia; unde utilitas ostenderetur, illuc libidinem transferebat. Lib. XIII, 45.

<sup>16</sup> *Ridetur in aula.* — Tac. X, 64. Additurque atrocior saevitia, quod caput amputatum, latumque urbem Poppaea vidit.



<sup>23</sup> *Congressus.* — Tac. X, 3. Igitur Nero vitare secretos ejus congressus: abscedentem in hortos aut Tusculanum, vel Antiatem in agrum laudare, quod otium laceraret; postremo ubicumque haberetur, praegravem ratus interficere constituit hactenus consultans veneno an ferro, vel qua alia vi.

<sup>24</sup> *Redarguet actas.* — Inst. lib. IV, tit. XVIII, p. 6. lex Pompea de paricidiis: Ut insutus culleo cum cane, et gallo gallinaceo, et vipera et simia et inter eas ferales angustias comprehensus vel in vicinum mare, vel in annum projiciatur, ut omnium elementorum usu vivus carere incipiat, et ei coelum superstiti, et terra mortuo auferatur.

<sup>25</sup> *Anices.* — Tac. ib. Obtulit ingenium Anicetus libertus classi apud Misenum praefectus et pueritiae Neronis educator.

<sup>26</sup> *Ipse deam facies.* — Tac. ib. Additurum principem defunctae et templum et aras, et cetera ostentandae pietati.

<sup>27</sup> *Induperatricis.* — Liceat hoc abuti nomine, quod melius quam *Regnatricis* Agrippinae dignitatem indicat. In neroniana aula aderat res, deest in Latio nomen, uti in re nova, neque neronianis moribus ferenda.

<sup>28</sup> *Foemineae.* — Tac. X, 4. Facili foeminarum credulitate ad gaudia.

<sup>29</sup> *Ore pendit.* — Tac. ib. Arctius oculis et pectori haerens sive explenda simulatione sive periturae matris supremus adspectus, quamvis ferum animum retinebat.

<sup>30</sup> *Villa manebat.* — Tac. ib. Agrippina nando, deinde occursum lenunciorum, Lucrinum in lacum vecta, villaeque infertur. Si Taciti verba expendimus, Agrippinae sepulchrum positum sciemus, ubi nunc dicitur *Mereto del Sabato*, haud procul villa dictatoris Caesaris.

<sup>31</sup> *Strepitu.* — Tac. X, 8. Cubiculo modicum lumen inerat, et ancillarum una.

<sup>32</sup> *Uterum ferias.* — Tac. ib. In mortem Centurioni ferrum destringenti protendens uterum, *ventrem feri*, exclamavit, multisque vulneribus confecta est.

<sup>33</sup> *Gaurano vertice.* — Gaurus, et Gaurani montes hodie *Monte barbare*, apud Puteolos, ejus radices olim ad Avernum usque lacum, et ex alia parte ad Baianum protendebantur, sejungebatque Puteolanum a Baiano agrum. De ostreis Gauranis mentionem facit Juvenalis Satyr. X. Hodiedum mons ob sterilitatem Barbarus salutatur. *Faticinas sortes* — Tac. X, 9. Huic sui finem multos ante annos crediderat Agrippina, contempseratque. Nam consulenti super Nerone, responderunt Chaldaei fore ut imperaret, matremque occideret. Atque illa, *occidat*, inquit, *dum imperet*.

<sup>34</sup> *Testantur amores.* — Audi Tac. X, 10. Sed a Caesare, perfecto demum scelere, magnitudo ejus intellecta est; reliquo noctis, modo per silentium defixus, saepius pavore exurgens, et mentis inops lucem opperiebatur tantam exitium allaturam. Atque eum, auctore Burro, prima centurionum tribunorumque adulatio ad spem firmavit, prensantium manum gratulantium-

que quod discrimen improvisum et matris facinus evasisset. Amici dehinc adire templa, et coepto exemplo, proxima Campaniae municipia victimis et legationibus laetitiam testari. *Servitumque ruunt.* — Tac. At Romae ruere in servitium, consules, patres, equites; quanto quis illustrior, tanto magis falsi et festinantes, vultuque composito.

<sup>22</sup> *Vultus.* — Quia tamen non, ut hominum vultus, ita locorum facies mutantur, obversabaturque maris illius, et littorum gravis aspectus (et erant qui crederent sonitum tubae collibus circum editis, planctusque tumulto matris audiri) Neapolim concessit, literasque ad senatum misit, Tac. X, 11.

<sup>23</sup> *Augustae.* — Haec omnia de Augusto refert Svetonius LXXII. Habitatavit primo juxta romanum forum . . . postea in palatio, sed nihilominus aedibus modicis Hortensianis; et neque laxitate, neque cultu conspicuis, ut in quibus porticus breves essent Albanarum columnarum, et sine mar-more ullo, aut insigni monumento conclavia.

<sup>24</sup> *Fastigia.* — Fastigii nomine signa tecto imposita intelligebantur, quod insigne fuit templorum. Cum vero Senatus consulto Caesaris aedibus fastigium concessum fuit, divinus honor ei tribui creditus est. Itaque Florus IV, 2. Omnes unum in principem congesti honores ... suggestus in curia, fastigium in domo, mensis in caelo.

<sup>25</sup> *Privatae sortis honores.* — Svet. Oct. 73. Vix privatae elegantiae.

<sup>26</sup> *Funestior aula.* — Tac. X, 15. Inde gliscere flagitia, et infamia: nec ulla moribus olim corruptis plus libidinum circumdedit, quam illa col-luvies.

<sup>27</sup> *Antiquae gentes.* — Quatuor gentes sese invicem miscuerunt, cumque dictatore Caesare Julia, cum Augusto Octavia, cum Tiberio Claudia, cum Nerone Domitia, imperium quasi manu per quatuor familias transiit; cum Nerone Caesarum stirps, adoptionibus continuata tandem extincta fuit. — *Firmamina.* Tac. vocat Subsidia dominationi, quo pluribus munimentis insisteret, Sv. Subsidia aulae, Senec. Adminicula Augusti. Invaluerat enim quod Tacit. ipse innuit, V. Hist. Non legiones, non classes, perinde firma imperii munimenta, quam numerum liberorum.

<sup>28</sup> *Turbavit honestam.* — De domestica Augusti infelicitate paucis Svet. LXV. Sed laetum eum atque fidentem et sobole et disciplina domus fortuna destituit. Julias filiam et neptem omnibus probris contaminatas relegavit. Julias et Agrippam nepotem dicere solebat tres vomicas, aut tria carcinomata sua. — *Livia.* Tac. Gravis in Rempublicam mater, gravior domui Caesa-rum noverca.

<sup>29</sup> *Julia.* — Tac. XI, 53. Augusti filia, ob impudicitiam olim a Patre Augusto Pandataria insula, mox oppido Rheginorum, qui siculum fretum accolunt, clausa. Fuerat in matrimonio Tiberii, florentibus Caio et Lucio Caesaribus, spreveratque ut imparem, nec alia tam intima Tiberio causa, cur Rhodum abscederet; imperium adeptus extorrem, infamem et post inter-

sectum Postumum Agrippam, omnis spei egenam, inopia ac longa tahe peremit, obscuram fore necem longinquitate exilii ratus. — *Calvina*. Tac. *Calvina* soror ejus (Silani) Italia pulsa est. — *Germanice*. Tac. 11, 72. Neque multo post (in Syria) extinguitur, ingenti luctu provinciae, et circumjacentium populorum. Indoluerunt exterae nationes, regesque: tanta illi comitas in socios, mansuetudo in hostes; visuque et auditu juxta venerabilis cum magnitudinem et gravitatem summae fortunae retineret, invidiam et adrogantiam effugerat. — *Altera Julia*. Tac. IV, 71: Per idem tempus Julia mortem obiit, quam neptem Augustus convictam adulterii damnaverat, projeceratque in insulam Trimetum, haud procul Apulis littoribus; illic viginti annis exilium toleravit, Augustae ope sustentata, quae florentes privignos cum per occultum subvertisset, misericordiam erga afflictos palam ostentabat. — *Drusillae*. *Caji* soror, quam narrat Svet. *Caj*. XXIV, in modum justae uxoris propalam habuit. Eadem defuncta, justitium indixit. . . Nec unquam postea, quantiscumque de rebus, ne pro concione quidem populi, aut apud milites, nisi per numen Drusillae dejeravit. *Silane* — Svet. Cl. XXIX. Silanus abdicare se praetura, morique initio anni coactus. Die ipso Claudii et Agrippinae nuptiarum in quinq; et triginta senatores, trecentosque amplius equites animadvertit. — *Cajus* Svet. LVIII. Cum in crypta, per quam transeundum erat, pueri nobiles ex Asia ad edendas in scena operas evocati praepararentur, restitit. In eaque crypta triginta vulneribus confectus. *Drusus* — Tac. VI, 23. Drusus deinde (Germanici filius) extinguitur, cum se miserandis alimentis, mandando e cubili temento, nonum ad diem detinuisset. *Postumum*. — Tac. I, 3: Livia senem Augustum devinxerat adeo, ut nepotem unicum, Agrippam Postumum in insulam Planasiam projiceret, rudem sane bonarum artium et robore corporis stolido ferocem, nullius tamen flagitii compertum. Et I, 6: Primum facinus novi principatus fuit Posthumi Agrippae caedes, quem ignarum inermemque quamvis firmatus animo Centurio aegre confecit. — *Britannicus*. Innoxia adhuc et praevalida et libata gustu potio traditur Britannico, dein postquam fervore aspernabatur, frigida in aqua affunditur venenum, quod ita cunctos ejus artus pervasit, ut vox pariter et spiritus ejus raperetur. Tac. IX, 16. Ubi adjicit inter sacra mensae, ne tempore quidem ad complexum sorori dato, in illum supremum Claudiorum sanguinem stupro prius quam veneno pollutum. — *Locusta*. Tac. IX, 13. Parari venenum jubet (Britannico) ministro Pollione Tullio, praetoriae cohortis tribuno, cujus cura attinebatur damnata veneficii nomine Locusta, multa scelerum fama. . . Cubiculum Caesaris juxta decoquitur virus, cognitis antea venenis rapidum.

<sup>43</sup> *Hi mansere pares*. — Tac. IX, 2. Ibaturque in caedes, nisi Afranius Burrus, et Annaeus Seneca obviam essent. Hi rectores imperatoriae juventutae, et rarum in societate potentiae, concordēs, diversa arte, ex aequo pollebant. Burrus militaribus curis, et severitate morum; Seneca praeceptis

eloquentiae et comitate honesta, juvantes invicem, quo facilius lubricam principis aetatem, si virtutem aspernaretur, voluptatibus concessis retinerent. Certamen utrique unum erat contra ferociam Agrippinae.

<sup>44</sup> *Scelus est clarescere.* — Tac. IX, 47. Hactenus Nero flagitiis et sceleribus velamenta quaesivit. X, 13. Deterrimus quisque, quorum non alia regia secundior extitit. Et postea: In omnes libidines se effudit, quas male coercitas qualiscumque matris reverentia tardaverat. *Subsidia imminui.* Tac. X, 51. Sed gravescentibus in dies publicis malis, subsidia minuebantur. Et 14. Evulgatus pudor non satietatem, ut rebantur, sed incitamentum attulit. — *Cuncta relaxat.* VII, 37. De Tib. Tac., VI, in fine. Postremo in scelera simul, et dedecora erupit, postquam remoto pudore et metu, suo tantum ingenio utebatur. Animo per libidines corrupto nihil honestum inerat.

<sup>45</sup> *Corrumpi.* — Tac. Ann. X, 20. Abolitos paulatim patrios mores, funditus everti per accitam lasciviam, ut quod unquam corrumpi, et corrumpere queat, in urbe visatur, degeneretque studiis externis juvenus, gymnasia et otia et turpes amores exercendo, principe et senatu auctoribus, qui non modo licentiam vitii permiserint, sed vim adhibeant: proceres romani, specie orationum et carminum scena polluantur. Quid superesse, nisi ut corpora quoque nudent, et caestus assumant, easque pugnas pro militia et armis meditentur?

<sup>46</sup> *Collisa duello.* — Hor. Epist. II, 2.

Fabula qua Paridis propter narratur amorem  
Graecia Barbariae lento collisa duello.

Et Satyr. I, 3.

Nam fuit ante Helenam mulier teterrima belli  
Causa; sed ignotis perierunt mortibus illi,  
Quos venerem incertam rapientes more ferarum.

<sup>47</sup> *Incestavit amore.* — Hor. Od. III, 6.

Fœcunda culpae saecula nuptias  
Primum inquinavere et genus et domos:  
Hoc fonte derivata clades  
In patriam populumque fluxit.

<sup>48</sup> *Vomitque.* — Celebris est apud Romanos dicta *Commissatio*, quae fuit post legitimam altera coena ad multam noctem producta. Profecto de Vitellio narrat Svet. 13. Epulas trifariam semper, interdum quadrifariam dispertiebat, in jentacula et prandia et coenas commessionesque. Senec. ad Helv. Vomunt ut edant; edunt, ut vomant.

<sup>49</sup> *Proceres.* — Tac. X, 12. Miro tamen certamine procerum decernuntur supplicationes apud omnia pulvinaria.

<sup>50</sup> *En Syriae.* — Dea apud Syros culta, quam Sacerdotes circumferentes, quasi divino quodam perciti spiritu, multa phauatice jactabant: cujus ritus.

tus meminit Apul. 8, Asi. Au. sub finem. Hanc Deam singulari veneratione aliquandiu coluit Nero.

<sup>21</sup> *Corybantes*. — Sacerdotes erant Cybeles, qui aera, sive aereas pelves ac lebetes, aeneaque tympana pulsabant, rotabantque corpus furentium instar. Etiam Galli cognominabantur, vel ab Gallo primo Sacerdote, vel a Gallo Phrygiae flumine ut ait Ovid.

Inter, ait, viridem Cybelen, altisque Celaenas,

Amnis it, insana nomine Gallus aqua.

Qui bibit inde, furit; procul hinc discedite, quibus est

Cura bonae mentis; qui bibit inde, furit.

D. Hieronym. in c. 4. Asiae Gallos hosce Sacerdotes fuisse appellatos autumat, quod Romani homines gentis gallicae deae Cybelae mancipare et effeminare consueverint. Sed Romani ipsum nomen a Gallis et sacra acceperunt. Princeps Sacerdotum Archigallus utebatur tunica virgulis purpureis. His solis Sacerdotibus stipem colligere licebat.

<sup>22</sup> *Isidis*. — Isis Aegyptiorum Dea: Sacerdotes isiaci raso capite incedebant, quae *Pharia* turba dicebatur ab *Pharo*, oppido apud Alexandriam. Lineis etiam vestibus obtecti in aedis vestibulo assidebant, unde Mart. XII, 29.

Linigeri fugiunt calvi, sistrataque turba.

Ubi sistrati dicti a *sistro* quod erat aereum crepitaculum. Sic Lib. I, 2.

Quid tua nunc Isis mihi Delia? quid mihi prosunt

Illa tua toties aera repulsa manu?

<sup>23</sup> *Romula Relligio*. — Liv. I, 53. Hoc perpetuitatis auspicio accepto, secutum aliud magnitudinem imperii portendens prodigium est: caput humanum integra facie aperientibus fundamenta templi dicitur apparuisse. Quae visa species haud per ambages, arcem eam imperii, caputque rerum fore portendebat, idque ita cecinere vates, quique in urbe erant, quosque ad eam rem consultandam ex Etruria acciverant. Capta Suessa Pometia, Tarquinius, Liv. I, 53. concepit animo eam amplitudinem Jovis templi, quae digna deum hominumque rege, quae Romano imperio, quae ipsius etiam loci majestate esset. Hinc pro romana ipsa amplitudine *Capitolium* accipi solitum. Hor. I, Od. 31, de Cleop.

### Dum Capitolio

Regina dementes ruinas

Funus et imperio parabat.

Et III, 5. de Crassi milite:

Ancillorum et nominis, et togae

Oblitus, aeternaeque Vestae

Incolumi Jove et urbe Roma?

In Capitolio erat arx romana, ne a Gallis quidem occupata.

<sup>34</sup> *Juventas*. — Liv. I, 55. Inter principia condendi hujus operis movisse numen ad indicandum tanti imperii molem traditur Deos: nam cum omnium sacellorum exaugurationes admitterent aves, in Termini fano non addixere. Id omen auguriumque ita acceptum est, non motam Termini sedem, unumque eum deorum non evocatum sacratis sibi finibus, firma stabiliisque cuncta portendere. Hauc nanciscitur sacrorum amplitudinem Camillus, ut Romanos ab consilio Vejos transmigrandi dehortaretur, Liv. X, 54. Hic Capitolium est, ubi quondam capite humano invento, responsum est eo loco caput rerum, summamque imperii fore: hic cum augurato liberaretur Capitolium, Juventas, Terminusque maximo gaudio patrum nostrorum moveri se non passi.

<sup>35</sup> *Desuper arce*. — Sic Proculus Julius (Liv. I, 16) sollicita civitate desiderio regis (Romuli) ipsummet prima luce obviam delapsus Romanis nuntiabat: Abi, nuncia Romanis, caelestes ita velle, ut mea Roma caput orbis terrarum sit; proinde rem militarem colant, sciantque, et ita posteris tradant, nullas opes humanas Romanis resistere posse.

<sup>36</sup> *Mutati o mores*. — Val. Max., II, 8, 1. Lege cautum erat, ne quis triumpharet, nisi qui quinque millia hostium una acie cecidisset. Incredibilia sed vera. Tac. X, 13. Promptiora quam promiserat, inveniunt, obvias tribus, festo cultu senatum: conjugum ac liberorum agmina per sexum et aetatem disposita; extractos qua incederent, spectaculorum gradus, quo modo triumphi visuntur. Hinc superbus, et publici servitii victor Capitolium adiit, grates exolvit, seque in omnes libidines effudit.

<sup>37</sup> *Solus abest Thraseas*. — Tac. X, 12. Thraseas Poetus, silentio, vel brevi assensu priores adulationes transmittere solitus, exiit tum senatu: ac sibi causam periculi fecit, ceteris libertatis initium non praebuit.

<sup>38</sup> *Illataque munera templis*. — Sic Tac. X, 64. ab Octavia extincta. Dona ob haec templis decreta; quod ad eum finem memoravimus, ut quicumque casus temporum illorum nobis vel aliis auctoribus noscent, praesumptum habeant, quoties fugas, et caedes jussit princeps, toties grates Deis actas; quaeque rerum secundarum olim, tum publicae cladis insignia fuisse. — *Matris invidiam*. Tac. X, 12. Ceterum quo gravaret invidiam matris, eaque demota, auctam bonitatem suam testificaretur, foeminas illustres Juniam et Calpurniam, praefectura functos Valerium Capitonem, et Licinium sedibus patriis reddidit, ab Agrippina olim pulsos. — *Carnificem, laqueumque* Tacit. X, 48. Poetus Thrasea multo cum honore principis, acerrime increpito Antistio, non quidquid nocens reus pati mereretur, id, egregio sub principe, et nulla necessitate obstricto senatu statuendum, disseruit, carnificem et laqueum pridem abolita. — *Laesa exuperat Natura*. Svet. 34. Neque tamen conscientiam sceleris, quanquam et militum et senatus populi gratulationibus confirmaretur, aut statim, aut unquam postea ferre potuit, saepe con-



fessus, exagitari se materna specie, verberibusque furiarum, et taedis ardentibus. Quin et facto per magos sacro, evocare manes, et exorare tentavit.

<sup>59</sup> *Tyrannus*. — Sic Tac. de Tib. VI, 6: Adeo facinora atque flagitia sua ipsi quoque in supplicium verterant. Neque frustra praestantissimus sapientiae firmare solitus est, si recludantur tyrannorum mentes, posse aspicilaniatus et ictus, quando ut corpora verberibus, ita saevitia, libidine, malis consultis animus dilaceretur: quippe Tiberium non fortuna, non solitudines protegebant, quin tormenta pectoris, suasque ipse poenas fateretur. Quis vero est praestantissimus ille sapientiae praeses? nullus dubito, quin hoc elogium Socrati sit jure tributum, neque certe omnino dubitandum, si Platonis nonus liber de Rep. legitur, ubi quasi eadem verba, atque eadem tyranni effigies.

<sup>60</sup> *Titium*. — Eosmet Virgilii versus expressimus, fabulamque explicavimus.

<sup>61</sup> *Tigellinus Sophonius*. — Audi Tac. X, 51. Caesar duos praetoriis cohortibus imposuerat, Fenium Rufum ex vulgi favore, quia rem frumentariam sine quaestu tractabat, Sophonium Tigellinum, veterem impudicitiam, atque infamiam in eo secutus. Validior Tigellinus in animo principis, et intimis libidinibus assumptus.

<sup>62</sup> *Cerno gubernaculum*. — Sveton. 46. Nunquam antea somniare solitus, occisa demum matre, vidit per quietem navim sibi regenti extortum gubernaculum; trahique se ab Octavia uxore in arctissimas tenebras.

<sup>63</sup> *Formicae*. — Svet. ib. Et modo pennatarum formicarum multitudine oppleri, modo a simulacris gentium ad Pompeji theatrum dedicatarum circumiri, arcerique progressu, Asturconem quo maxime laetabatur, posteriore corporis parte in simiae speciem transfiguratum, ac tantum capite integro hinnitus edere canoros.

<sup>64</sup> *Ardere minaces*. — Quod idem indignabunda dicebat Poppaea. Tac. X, 61. Arma illa adversus principem sumpta; ducem tantum defuisse, qui motis rebus facillime reperiretur. . . Et 62. Varius sermo, et ad metum atque iram accommodatus terruit simul audientem et accendit. Et XI, 36, quamvis alia occasione ipse Nero dictitabat: Vidisse civium moestos vultus, audire secretas querimonias.

<sup>65</sup> *Arvis*. — Tac. X, 52. Haec inter varias criminationes Senecae obiciebantur: quod nempe hortorum amoenitate, et villarum magnificentia quasi principem supergrederetur. Et 57. Seneca instituta prioris potentiae commutat: prohibet coetus salutantium; vitat comitantes; rarus per urbem, quasi solitudine infensa aut sapientiae studiis domi attineretur.

<sup>66</sup> *Curia motu*. — Tac. IX, 28. Manebat nihilominus quaedam imago Reipublicae.

<sup>67</sup> *Plautus et Sulla*. — Tac. X, 57. Validior in dies Tigellinus, et malas artes quibus solis pollebat, gratiores ratus, si principem societate scelerum

obstringeret, metus ejus rimatur, compertoque Plautum et Sullam maxime timeri, Plautum in Asiam, Sullam in Galliam Narbonensem nuper amotos, nobilitatem eorum et propinquos huic Orientis, illi Germaniae exercitus commemorat.

<sup>68</sup> *Mens impia sacrit.* — Tac. IX, 25. Nero autem metuentior in posterum milites sibi, et plerosque gladiatores circumdedit, qui rixarum initia modica, et quasi privata sinerent; si a laesis validius ageretur, arma inferrent.

<sup>69</sup> *Ne occidere vellet.* — Svet. Ner. 39. Mirum, et vel praecipue notabile inter haec fuerit, nihil eum patientius, quam maledicta et convicia hominum tulisse; neque in ullo leniorem quam qui se dictis aut carminibus lacerassent, extitisse. Multa graece lat neque proscripta aut vulgata sunt.

<sup>70</sup> *Quietem.* — Haec eadem apud Tacitum Nero IX, 17. Tanto magis fovendum patribus populoque principem, qui unus superesset e familia ad summum fastigium genita.

<sup>71</sup> *Tu vatum princeps.* — Svet. Nero 10: Recitavit et carmina non modo domi, sed et in theatro, tanta universorum laetitia, ut ob recitationem supplicatio decreta sit, eaque pars carminum aureis litteris Jovi Capitolino dicata. Svet. 12. Orationis, carminisque latini coronam, de qua honestissimus quisque contenderat, ipsorum consensu concessam sibi recipit; citharam autem ab iudicibus ad se delatam adoravit, ferrique ad Augusti statuum jussit.

<sup>72</sup> *Oratorum princeps.* — Tac. X, 21. Eloquentiae primas nemo tulit, sed victorem esse Caesarem pronuntiatum. Graeci amictus, quos per eos dies plerique incesserant, tum exoleverant.

<sup>73</sup> *Tu Sophiae princeps.* — Tac. X, 16. Etiam sapientiae doctoribus tempus impertiebat post epulas, utque contraria asseverantium discordiae eruebantur.

<sup>74</sup> *Pictor sculptorque potens.* — Nero puerilibus statim annis vividum animum in alia detorsit, coelare et pingere, cantus aut regimen equorum exercere et aliquando carminibus pangendis inesse sibi elementa doctrinae ostendebat. Tac. IX, 3. — Sic antea Horat. II, ep. 2.

Venimus ad summum fortunae, pingimus, atque

Psallimus et luctamur Achivis doctius unctis.

Et, ib.

Mutavit mentem populus levis, et calet uno

Scribendi studio. Pueri, patresque secuti

Fronde comas vincti coenant, et carmina dictant.

Scribimus indocti, doctique poemata passim.

*Saltare et canere.* — Flagitantibus cunctis caelestem vocem, respondit quidem, in hortis se copiam volentibus facturum . . . utque constitit, peracto principio, Niobem se cantaturum per Clavium Rufum consularem pronuntiavit, et in horam fere decimam perseveravit. Svet. 21.



<sup>11</sup> *Ubios.*— Tac. VIII, 7. Versa ex eo civitas et cuncta foeminae obediebant, non per lasciviam, ut Messalina, rebus romanis illudenti. Adductum et quasi virile servitium; palam severitas, et saepius superbia, nihil domi impudicum nisi dominationi expediret, cupido auri immensa obtentum habebat, quasi subsidium regno pararetur. 26. Augetur et Agrippina cognomento Augustae. De colonia vero Agrippina, idem auctor 27. In oppidum Ubiorum, in quo genita erat, veteranos coloniamque deduci imperat, cui nomen inditum ex vocabulo ipsius. — *Carpento.* 42. Suum quoque fastigium Agrippina extollere altius: carpento Capitolium ingredi, qui mos sacerdotibus et sacris antiquitus concessus, venerationem augebat foeminae, quam imperatore genitam, sororem ejus qui rerum potitus sit, et conjugem et matrem fuisse, unicum ad hunc diem exemplum est. — *Plebecula.* Tac. Hist. I, 4. Plebs sordida, et circo ac theatri sueta, simul deterrimi servorum, aut qui adesis bonis per dedecus Neronis alebantur.

<sup>12</sup> *Novit Agerinum.* — Criminationes in Agrippinam effictas Tac. refert, X, 11. Repertum cum ferro percussorem Agerinum, ex intimis Agrippinae libertis, et fuisse poenas conscientia, qua solus paravisset ... Adjiciebat ... Quod consortium imperii, juraturasque in foeminae verba praetorias cohortes, idemque decus senatus et populi speravisset, ac postea quam frustra optata sint, infensa militi patribusque et plebi, dissuasisset donativum et congiarium, periculaque viris illustribus instruxisset. *Publica fortuna* — Sunt ipsamet Tac. verba, ib. Cuncta ejus dominationis flagitia in matrem transtulit, publica fortuna extinctam referens.

<sup>13</sup> *Effigies.*— Tac. X, 11. Utque Quinquatrus, quibus apertae essent insidiae, ludis annuis celebrarentur; aureum Minervae simulacrum in curia et juxta principis imago statueretur: dies natalis Agrippinae inter nefastos esset.

<sup>14</sup> *his. Legionum exercitus ingens.* — Coorto post Caesaris mortem bello, Triumviri, dominationis suae firmandae gratia plures secum praetorias cohortes habuerunt. Quarum numerum auxit Augustus, et praefectum praetorio creavit. Sic tempore imperii *Cohortes praetorias*, *praetorianos milites* et *praetorium* invenies, genus militum, robore ac genere longe ceteris praestans, quodque ad custodiam principis perpetuam semper in urbe manebat. Contra autem *romanae legiones*. Ut enim provinciae tum *imperatoriae*, tum *senatoriae*, Roma procul, tum in oriente, tum in occidente, romanis legibus parerent, ad supremam imperii amplitudinem, et quietem romani exercitus excubabant. — *Urbani.* Tac. Hist. I, 5. Miles urbanus, longo Caesarum sacramento imbutus, et ad deserendum Neronem arte magis, et impulsu quam suo ingenio traductus.

<sup>15</sup> *his. Germanica pubes.* — Tac. IX, 54. Earum gentium legatis id honoris datum, quae virtute et amicitia romana praeexcellerent, nullos mortalium armis aut fide ante Germanos esse, exclamant degrediunturque, et inter patres considunt.

<sup>77</sup> his. *Vectigalia*. — Svet. Ner. 10. Graviora vectigalia aut abolivit, aut minuit ... Divisis populo viritum quadringenis nummis, senatorum nobilissimo cuique sed a re familiari destituto, annua salaria et quibusdam quingena constituit: item praetorianis cohortibus frumentum menstruum gratuitum. Tac. IX, 50. Dubitavit Nero, an cuncta vectigalia omitti juberet, idque pulcherrimum donum generi mortalium daret. Sed eam dissolutionem imperii patribus docentibus, 51: Mansit tamen abolitio quadragesimae quinquagesimaeque et quae alia exactionibus illicitis nomina publicani invenerant. — *Donas*. Largitiones Neronianae in amicos frequentissimae. Tac. IX, 18. Domos, villas, id temporis quasi praedam divisissent: alii necessitatem adhibitam credebant a principe, sceleris sibi conscio, et veniam sperante, si largitionibus validissimum quemque obstrinxisset.

<sup>78</sup> *Et canis, et choreas ducis*. — Svet. Nero 22. Mox et ipse aurigare, atque spectari saepius voluit; positoque in hortis inter servitia et sordidam plebem rudimento, universorum se oculis in circo maxime praeibit. Svet. 10. Instituit et quinquennale Romae certamen primus omnium Romae, more graeco, triplex, musicum, gymnicum, equestre, quod appellavit Neronia. Magistros toti certamini praeposuit consulares sorte, sede praetorum, deinde in orchestram senatumque descendit. — *Quid Roma Neroni*. Svet. Nero 53. Maxime autem popularitate efferebatur, omnium aemulus, qui quoquo modo animum vulgi moverent. Tac. lib. XI, 36. Haec atque talia plebi volentia fuere, voluptatum cupidine, et rei frumentariae angustias, si abesset, metuenti.

<sup>79</sup> *Rauciret*. — Svet. 20. Ibidem (Neapoli) saepius et per complures cantavit dies, sumpto etiam ad reficiendam vocem brevi tempore. Et ib. Ipse meditari exercerique coepit, neque eorum quidquam omittere, quae generis ejus artifices, vel conservandae vocis causa, vel augendae, factitarent.

<sup>80</sup> *Syriae*. — Svet. 56. Religionum usquequaque contemptor praeter unius Deae Syriae. Hanc mox ita sprexit, ut urina contaminaret; alia superstitutione captus, in qua sola pertinacissima haesit.

<sup>81</sup> *Iconcula*. — Svet. 56. Siquidem iconculam puellarem, quum quasi remedium insidiarum a plebeo quodam et ignoto munere accepisset, detecta conjuratione pro summo numine, trinisque sacrificiis colere perseveravit, volebatque credi monitione ejus futura praenoscere.

<sup>82</sup> *Irrequieta futuri*. — Svet. 55. Erat illi aeternitatis, perpetuaeque famae cupido sed inconsulta ... Mensem Aprilem Neroneum appellavit: destinaverat et Romam Neropolim nuncupare. — *Magices*. Pl. XXX, 5. Primumque imperare diis concupivit, nec quidquam generosius voluit. Neque unquam ulli artium validius favit. Ad haec non opes ei defuere, non vires, non discentis ingenium, aliaque non patiente mundo ... Saevius sic nos replevit umbris.

<sup>83</sup> *Gnosis*. — Hoc nomen, quod graece est *cognitio*, sive *scientia*, fami-

liatissimum Platoniceis et Pythagoricis primi patres libentissime usurparunt, ut christianam doctrinam, sive philosophiam intelligerent, quae vera *γνῶσις* idest vera sapientia. Verum et ante Christum natum, et prioribus ipsis Ecclesiae saeculis, altera *gnosīs* praesertim alexandrinis scholis erupit, quae res divinas cum platoniceis philosophiae placitis componens in errores turpissimos ruit. Inter eos qui a Christi lege desciverunt, Simonem facile antesignanum dixeris.

<sup>14</sup> *Instrumenta regni.* — Taciti locutio est, qui VIII, 66. de venefica muliere ait: Diu inter instrumenta regni habita.

# PETREIDOS

## LIBER VI.

---

### ARGUMENTUM

Eune atque Hermus, per varios humanarum rerum fluctus, undarumque saevientium fragores circumlati, in Romanae Ecclesiae sinu conquiescentes, veluti in portu navigabant — Quid vero Iphitus? Infelicissimus pater, ubi diu frustra obluctatus, ad aulam imperatoriam abreptam filiam sensit, inopina caligine menti offusa, veluti exanimis corrui — Simul ac spiritum recepit, et insanabilis perniciēs ob oculos versatur, acerba et luctuosa oratione Eunes suae exitium lamentatur — Mox spectantium irrisione, in rabiem actus, Romam et Neronem, et cuncta ipsius Graeciae numina diris execrationibus detestatur — Demum e vulgo se proripiens apud Epicharin, quam primo adventu Romam noverat, diversatur — Rerum magnarum appetitione, animique mascula fortitudine Lacaena isthaec sese in potentiorum amicitiam insinuaverat — In primisque familiari consuetudine fruebatur C. Cassii — Qui, desperatis publicis rebus, a civili frequentia abhorrebat — Sed in domestica solitudine, pulcherrima tamen romanae Reip. tempora venerabatur — Et antiquiorum virtutum igniculos quotidianis sermonibus fovebat, in selecto honestissimorum virorum coetu — Qui saepe in Cassiam domum de summa Repub. commentandi causa veniebant — Huiusmodi concinculis aderat Epicharis, eaque capitali odio Neronem

prosequabatur — Quin etiam Caesarem Bajis temere agentem, per classarios de medio tollere tentaverat — Ubi igitur inustam grajo nomini ignominiam audivit, Iphitum praeterea ingenti moerore consternatum videt, novas incendio faces admovet — Ille autem Harmodii et Aristogitonis gloriam aemulatus occulto sub vestem gladio ad Palatinum pergit, Caesarem interempturus — Sed aula praetorianis militibus circumsepta, diu multumque frustra evagatur — Tandem lacrymis janitorem vicit — Qui misericordia commotus de graja quadam virgine meminit intra Juvenalia in aulam vi invecta, primaque nocte cum custode ipso elapsa — Nullum adhuc effugii indicium compertum, nisi persuasorem abitus fuisse Christianum — Quibus verbis, velut e caelo tactus, manet Iphitus, Deoque Christianorum, quem hactenus despexerat, primas preces nuncupat — Interea cuncta urbis compita inopino strepitu circumsonare — Frumentariae classis ex Aegypto venientis nuncio, e cunctis regionibus excitata plebs ad Tiberim confluit — Neque multo post Nero ipse germanicis cohortibus circummunitus accurrit — Sed pro frumento, chrysocollam ad circense ludicrum triremibus advehentibus, Nero omnium contumeliarum coeno obrutus ad Palatinum rediit — Frustra animi aegritudinem dissimulantem Tigellinus ad consuetas libidines detorquet, eumque ad villam suam invitat — Eoque consultore, Caesar liberaliori largitione plebeculam conciliat — Quae inopinis gaudiis effusa per urbem discurret, festis acclamationibus principem, patriae patrem salutans — Iphitus primum armatorum concursu exterritus, mox mutatae plebis adulationibus indignatus, in aulae vestibulo consistit, quo Neronis colossus extollitur, eumque omnibus probris onerat — Itaque a praetorianis militibus comprehensus, ad portam tiburtinam in praetoria castra deferitur — Quo in tenebris, et paedore expirasset, nisi Tigellinus, ut clementiae famam Principi aucuparetur, captivum educi, inque Graeciam sub custodia militari devehijussisset — Augustus, pace parla domi forisque, et romanam concordiam firmare satagit, et Romam totius orbis terrarum caput omni splendore et magnificentia condecorare — Neque solus huic operi incubuit, sed amicorum opulentissimos thesauros in publica commoda transtulit — Agrippa potissimum, novarum rerum auctor, magnificentissima opera aedificavit — In romana urbe, omnium nationum domicilio, *omnium Deorum* templum constituit, ut omnes populi, Deorum exemplo, romanae civitati assuescerent — Deliciarum causa et voluptatis, pone templum, hortos fecit thermarum abundantia, ambulationum varietate, arborum amoenitate et omni topiaria arte exquisitissimos — Populum romanum, quem tantopere vivens dilexerat, moriens scripsit heredem —

Sed Nero imperatorias delicias Tigellino largitur — Qui fortunae indulgentia ad lasciviam abutens, lustris atque helluationibus polluebat — Die praestituta, ganeonibus flagitiosissimis stipatus Nero voluptariam stationem adire gestiebat, sed eccum inter caesa et porrecta Poppaea iracundior — Quae, ab funere primum tristem et reconditum, mox coenatoria veste indutum offendens, quasi ad intermissas libidines redeuntem acerbissima objurgatione increpat — Suaque infelicitatem lamentatur — Sed Nero primum minis perterrefecit, deinde blanditiis delinivit, praecipue futuri partus laetitia, et abiit — Interea celeberrimas luxu, famaque epulas paraverat Tigellinus ad lacum Agrippae — Ubi mira omnia et humanam audaciam egressa — Secundis mensis, Sophonio modimperatore, ad Neronem Deum facta est libatio — Exinde munus gladiatorum super ripas editum — Demum ( invito quidem animo, Christianus vates ad hanc ethnicae impietatis corruptelam accedit ), mero cerebris incalcescentibus, per hortos effusi, per illicita omnia foedantur — Et Nero uni ex illo contaminatorum grege, cui nomen Pythagoras, in modum solemnis conjugii denupsit, Paride inhumanas nuptias concinente, exemplo Jovis olympii, cujus infamias recitat — Hos inter motus in inferiorem palatinae domus carcerem Paulus languebat, novissimum supplicium in dies opperiens — Sed inopina Dei providentia, qui prioribus illis saeculis adolescentem Ecclesiam propiori numine juvabat, ex intentiori custodia Paulus liberatur — Poppaea, Eunes elapsae causa Tarsensem captum intelligens, ex loco inculto, et tenebris horrido eductum, in patentiore aula, inter majestatis et perduellionis reos, versari permisit — Quam nactus liberiores custodiam Paulus, de Christi regno inter fontes disse-rere occoept, multosque christianae spei lucrifacit — Absente Nerone, Seneca et Burrus ad aulam conveniunt — Poppaea multa de solitudine sua, plura de imperii calamitate conqueritur — Ad extremum viris clarissimis Paulum ignota quadam misericordia commota commendat — Qui dominae jussis libentissime ambo obtemperant, et Burrum praetorio praefectum Seneca evincit, ut Judaeum hominem insigni sapientiae fama celebratissimum secum inviset — Inter eundem, de conjugatione contra Neronem colloquuntur — Stoica Philosophia, et Epicuraea, altera quae in Rep. animos severiori disciplina extulit, altera, quae voluptuosa remissione emolliit, collatis viribus contra Imperium insurgere parant.

Q  
C  
G  
C  
O  
Q  
T  
N  
E  
I  
O  
O  
C  
S  
  
U  
N  
R  
P  
S  
H  
C  
S  
I

Quis vero ille autem argivo conlectus amictu  
Circum errat minitans Romana palatia? demum,  
Ceu si immota silex, stat spe frustratus inani?  
Ora recognosco, atque tuum, Pater Iphite, novi  
Consilium. Infelix genitor! quo opprobria foeda,  
Quo rabidi effraenes praeportas pectoris iras?  
Urbano procul ab strepitu undisonisque procellis  
Nata suam reperit sancta inter moenia pacem;  
Et gener arcano deductus numine Romam  
Invenit longo medicamina prima dolori:  
Quae furvas inopina tibi vox ruperit umbras?  
Quis feret auxilium? lateri immedicabile vulnus  
Crudescit magis atque magis. Tibi nulla refulget  
Spes, quae Christiadûm ambrosiis consistit in arvis.

Iphitus, exactis ludis Juvenalibus, Eunen  
Ut sensit raptam saevi praedonis ad aulam,  
Nec patrias valuisse preces, moestosque ululatus;  
Restitit attonitus, trifidi ceu fulminis ictu,  
Procubuitque solo. Vix tandem reddita menti  
Sera quies, recolitque animo irreparabile damnum,  
Ingentem attollit gemitum, quo lecta corona  
Congemuit, patris miseri infortunia cernens.  
Sed juvenum stipata phalanx circumstelit, actum  
In medium illudunt risu et ludibria miscent:



Egregiam vero laudem et spolia ampla referto,  
Graje, domum: parto felix laetare triumpho.  
Grajus at obscoeno risu, linguaque proterva  
Accensus fremit, et verbis castigat acerbis  
Insanam turbam: Vos et de gente Quirillum,  
Vos ego Romanos dicam gentemque togatam?  
At non immerito vos execrabile pressit  
Imperium, oblitos priscum genus atque pudorem.  
O Roma infelix! domino despecta superbo  
Servis, et quereris frustra; servire mereris.  
Sic ait, et foedis se proripit aedibus. Ingens  
Instigat furor, et flamma vindicta minaci  
Praecipitat mentem, et tota bacchatur in urbe:  
Haud aliter taurus nativo eductus ab arvo,  
Quem longum excivit per iter glomerata juvenus,  
Si mediam ingreditur colluctaturus arenam,  
Et circum subitis vigilans latratibus urget  
Ira canum, ferroque immansuetumque ferumque  
Venantes stimulant; rabies furibunda minanti  
Fulgurat ex oculis agitatque ingentia caelo  
Cornua, et horrendis rumpit mugilibus auram.  
Jupiter omnipotens, si quicquam numina prosunt,  
Si mundo imperitas, nec nostras fabula mentes  
Illudis, trifido demens quid fulmine turres  
Templaque perfringis? romana palatia cernis  
Ignarus, nec jura hominum, nec jura Deorum  
Curas? Ipsa fave saltem, Tritonia Pallas,  
Quam colui semper, cui Relligione solutam  
Externa natam per mille pericula fovi,  
Progeniem defende tuam: tua cura recessit?  
Talia vociferans, nec erat medicina furori,

Multa gemit, largoque humectat flumine vultum.  
Quae quibus anteferam? imprudens per compita triste  
Ludibrium experiar? ferro miserabile vinculum  
Corporis exuero, damnum irreparabile lustrans?  
Anne urbem invisam maculataque tecta relinquens  
Deferar in patriam? tantum patientur Athenae  
Dedecus? Infelix genitor! sine matre puellam  
Eduxi his ulnis, replavit sarcina dulcis  
His humeris, virtute potens adoleverat omni  
Virgo formosa, et misero clarissima patri  
Gloria: te virtus ingens tua perdidit, Eune;  
Per me virginea funesta opprobria fronte,  
Nata, impressa geres. Effatur talia, luctusque  
Impatiens hirsuto canentes vertice crines  
Discidit, et longo replevit compita luctu:  
Utque miser vidit vacuas cecidisse querelas,  
Multa minans animo, notas contendit ad aedes  
Qua primum hospitium peregrina repperit urbe.

Dum cadit obscoenis foede laniata Philippis  
Romula libertas, reliquus qui spiritus errans  
Pingues Aemathiae civili sanguine campos  
Deseruit, Latium infelix, caelumque perosus  
Romanum foedis pollutum sordibus, uno  
Pectore constiterat. Genus alto a sanguine Cassi \*  
Quicum victa uno, tumultataque funere Roma,  
Inter fumifera antiqua caligine signa,  
Priscos heroas, monumentaque magna reservat.  
Praecipue tacita stabat veneratus in aede  
Caesaris extincor; scriptum sub imagine carmen:  
*Ductori partis*. Praeclarum exemplar avorum  
Cassius, aspiciens per turpia cuncta Neronem

Prolapsum, senior liquit graviora senatus  
Munia, delituitque domus penetralibus umbris,  
In peiora ruens saeculum indignatus iniquum.  
Concelebrat secreta virū manus inelyta, tantum  
Devenerata senem, praeclaraque facta parentum  
Audit narrantem: menti prior ignea virtus  
Incaluit: demum conjuravere Neroni  
Foedam inferre necem, et Romae renovare vetustae  
Effigiem, et priscos, liberrima jura, Quirites.  
Crescit flamma minax: dexteras in mutua jungunt  
Foedera, conveniuntque patres equitesque ducesque  
Armorum, matresque ipsae <sup>3</sup>. Praestantior una,  
Una ferebatur magis aversata Neronis  
Et vitia et mores et nomen, Epicharis. Audax  
Foemina vel supra sexum, Lacedaemone nata,  
Serva fuit quondam, sed cultu Palladis omni  
Perculerat dominos. Libertae audacia crevit,  
Ausaque nobilium lautas perrepere in aedes,  
Atque placere seni, magna qui solus in urbe  
Delectos procures ad tempora prisca trahebat.  
Non humiles ausus magnam teligere Lacaenam.  
Noverat insidias, conjurantumque morantum  
Segnitiam incusans campanam legerat oram,  
Si posset stantem miseno in littore classem <sup>4</sup>  
Occultis tentare dolis, quo saepe solebat  
Luxuriare Nero, et virides errare per hortos,  
Nullis excubiis, nulla comitante caterva.

Iphitus actaea vix primum venerat ora,  
Invisit Lacedaemoniam sociosque penates,  
Ipsaque cecropii lumen mirata senatus  
Obtulit hospitium: coepta ostentavit amico

Consilia, et socium occultas ascivit ad iras.  
Quamvis sollicitis terroribus aestuat aula,  
Intentatque minas, vesani principis acta  
Omnia pervolitant late loca; fama <sup>5</sup> silendi  
Nescia nec poenis, nullisque domabilis iris  
Urget opus, subito spargens rumore viritim  
Indignos ausus, veris conficta remiscens  
Criminibus, volvensque odii implacabilis ignem.  
Quanquam Roma jacet maculoso perdita coeno,  
Conscia naturae humanae vox omnia rumpit  
Vincula, et eloquitur, fremituque inclamat acerbo.  
Illa videns Grajum demisso incedere vultu,  
Palliolo oblectum, lucemque odisse diemque,  
Sic prior aggreditur: Sic fas et jura veretur  
Romulidum princeps: parvo discrimine cuncti  
Erramus mortemque inter vitamque timentes.  
Iphitus indignans: At detestabile monstrum  
Impune audebit matres temerare latinas,  
Quae turpes ignominias dominumque inhonestum  
Assuevere pati: sed non patientur inulti  
Dedecus hoc Graji: laudabit Graecia factum:  
Nec solum Harmodium, nec Aristogitona <sup>6</sup> relinquam,  
Quos primum impura servare tyrannide Athenas  
Aggressos nullae tenebrae, nulla occulet aetas.  
Urbe triumphata, Xerxes spirantia signa  
Secum transtulerat, sed tot volventibus annis  
Zaleucus patriae donum reddebat opimum;  
Dumque Rhodon praetergreditur festiva juvenus  
In patriam rediens, egressa urbs littore laeto  
Jamjam cecropiae praesentia numina terrae  
Excipit hospitio; tum pulvinaria sacra

Constituit, divisque calentes excitat aras.  
Grajus romana laudabor Brutus in urbe:  
Teque, ingens crimen, dextra hac sub tartara mittam,  
Quo mihi te cumque obtuleris. Extrema minantem  
Audivit mulier, furiisque accensa profatur:  
I, fatum sequere audacter; nec maxima Pallas,  
Nec Patareus oculis Deus haec spectabit iniquis.  
Si defessa malis, longoque miserrima fletu  
Roma silet, scelus hoc terris abolere nefandum  
Praestiterit, nec fama levis te ubicumque sequetur.  
Illa ait: ultrices concepit pectore flammās  
Iphitus, et ferrum rapuit, victusque dolore  
Sub vestem ascondit, gressumque obvertit ad aulam.

Quo fereris, Pater infelix? nec multa pericla,  
Quae te circumstant, cernis? Nempe una cupido  
Audaci latium praedonem sternere ferro  
Exanimem. In rapidum ipse magis descenderit orcum,  
Quam natam indecorem polluta linquere Roma.  
Unguibus ora miser foedat, rabidoque furore  
Pallia discerpit, nec consolabilis unam  
Itque reditque viam, et curarum fluctuat aestu.  
Qualis ubi dumis sylvestribus ursa lybistis  
Abreptos repelit catulos, per opaca peragrat  
Antra furens, lustratque propinquae abdita sylvae  
Exululans, si forte viarum errore vagatos  
Comperiat, notoque adsint clamore vocati;  
Haud aliter cunctos aditus, atque ostia cuncta  
Vestigat Grajus. Tandem funesta subivit  
Tecta, et confidens animo de virgine graeca  
Quaesivit. Senior funestae janitor aulae  
Nulla enarranti patri, multumque gementi:

Vestibulum nequicquam, inquit, superare laboras.  
Non exorato postes adamante rigescunt;  
Utque vides, centum romana palatia circum  
Excubiae invigilant. Lacrymis tunc Iphitus ortis:  
Dic, senior, tibi quandoquidem tua grandior aetas  
Terrigenûm varias sortes experta vicesque,  
Inspirat faciles animos mentemque benignam;  
Dic, senior, siquid nôsti de virgine graeca,  
Quam glomerata cohors mediis Juvenalibus actam  
Eripuit patri, foedamque abduxit ad aulam?  
An tibi, spero equidem, mentem clementia fleclat,  
Quam renuit dominus? Tetigerunt dicta verentem  
Verba senem, tacitusque patris declinis ad aures:  
Frustra cunctare hic, inquit. Pulcherrima virgo  
Sedibus his paucas tantum vix restitit horas.  
Vidi illam his oculis pallentem morte futura,  
Et flevi: passos gestans per colla capillos,  
Et superinducto lacera in velamine curru  
Ipsa ferebatur: curru descendere vidi  
Semianimem, manibusque trahi miserabile corpus,  
Funestosque gradus alieno ascendere gressu.  
Ut vidi, ut perii! Natarum occurrit imago,  
Quae fors, si jubeat vesani dira libido  
Caesaris ( exili sic stant pendentia filo  
Jura pudicitiae ), ad probrum rapiantur iniquum.  
At tibi sacramenta aulae quae nuncio, corde  
Condita deliteant, nec cuiquam fidere tutum,  
Et mihi morte forent vulgata arcana luenda.  
Deficientem anima, externalam mente puellam  
Intulerant aulae: ut tenuis deerrabat in ore  
Spiritus, immolam fomentaque nulla juvabant,

Traditur insomnis famuli custodia curis,  
Corpore dum priscum posset reparare vigorem.  
Credo equidem Divos, si Divis ulla relictæ est  
Justorum pietas, mentem inspirasse benignam,  
Quisquis erat famulus. Media jam nocte silebant  
Omnia, sollicitæ strepitus cessaverat aulae,  
Ipse Nero curis laxabat fessa diurnis  
Corpora; vix animi compos fuit inclÿta virgo,  
( Qua potuere via, incertum ) fugere per umbras  
Captiva et custos. Vix hæc, nec plurima novi.  
Orta dies caelo trepidas dimoverat umbras,  
Insueto audivi strepitu turbata ferocis  
Interiora aulae, trepidos pallore ministros  
Insolito casu, circumque supraque sagaces  
Inspexi famulos notis exquirere tectis  
Argumenta fugæ. Sed adhuc incognita cuncta.  
Christicolam dicunt custodem virginis, atque  
Persuasorem abitus: et quod mens augurat, opto.  
Namque pudor sic salvus erit. Jam plurima gentis  
Istius audivi, et tota cantantur in urbe  
Moribus integri, et sancto pietatis honore,  
Virgineum servare decus, lethoque timere  
Pejus flagitium. Senio confectus et annis  
Hic tacuit. Lacrymis oculos suffusus obortis  
Iphitus, et vultu seniolem adspexit amico:  
Dî tibi, si qua pios respectant numina, lætam  
Canitiem faciant, qui nuncia læta reportas,  
Et moestum desiderium, dubiasque resolvis  
Ambages animi. Trepida diffugit ab aula  
Nata? mihi satis est: annis prudentia maior  
Servabit caram per cuncta pericula natam.

Tuque mihi, qui ignotus adhuc quicumque deorum  
Diceris, et Christi donas cognomina genti,  
Si violata mihi forsan tua numina, parce:  
Exterior poenas, dextrae memorabile nomen  
Ultricis, nec jure tuam contemnere gentem  
Fas mihi, quam video cunctis adolescere in oris.  
Parce; tibi natam, tibi non indebita dona  
Devoveo, cunctos per te si evaserit hostes.

Ecce autem ingenti strepitu commota resultant  
Compita: praecipue pulla plebecula veste  
Linguit Aventini congesta mapalia, quaeque  
Substitit ad veteres arcus, madidamque Capenam,  
Abnormesque vias angustaque tecta Suburrae,  
Per mediam volitat Romam, flagrante tumultu.  
Quid plausus? Tiberim quid vult concursus ad amnem?  
Si Romae excipias bis seu ter mille beatos  
Patricios, equitesque (unos opulentia dives  
Exhilarat, unis romani jugera campi  
Urbanaeque domus, praecultaque villula laetam  
Efficiunt vitam) tunicata veste popellus  
Pauperior censu devicti innititur orbis,  
Perque domos omnes versatur sordidus; omnes  
Ambit sollicitus, noscens profesta dierum  
Tempora, quaeque albo veniunt signata lapillo.  
Natam hodie Tubero taedis despondet honestis:  
Bulla 7 hodie Rufi laribus donata pendit,  
Intereritque togae officium solemne virilis:  
Pallanti est hodie prognatus filius; aula  
Caesarea pollens ad mensam mille vocabit  
Convivas, miserae donatur sportula plebi.  
Crastina si fulget nullo solemnis honore



Festa dies, pauper fora nunc, nunc balnea quaerit,  
Atque huic atque illi mellito admurmurat ore,  
Pinguia lucratus rectae oblectamina coenae<sup>s</sup>.  
Eheu! quonam abiit plebs itala? mascula quondam  
Progenies, Romae quae martia signa secula  
Subjecit totum romanis arcibus orbem,  
Quaeque eadem duris edocta ligonibus, arva  
Cogebat quamvis avido parere colono?  
Divilis uber agri quondam Saturnia tellus  
Cessit mancipiis. Fora per venalia Thracas,  
Hispanosque, rudes animas, Afrosque perustos  
Mangones foedi coëmunt, nexosque corona  
Vendunt<sup>9</sup> patriciae culturos praedia sortis,  
Atque emptor dominus vastis partitur in agris:  
Damnataeque manus hominum vultusque nocentum  
Inscripti, vinclique pedes colere arva jubentur.  
At quonam viduata arvis, bellisque superstes  
Plebs fugiat? Roma evicti patet orbis asylum,  
Ipsaque tot populis fortunatissima nutrix  
Adsciscit cives, suffragia libera donans,  
Ludosque et scenam et cererem largitur inemplam,  
Quam Trinacris dives, mittetque Aegyptia tellus,  
Horrea plebejæ non deficientia Romae<sup>10</sup>.

Effera tempestas ponto retinebat in alto  
Assuetam phario venturam ab littore classem,  
Indiga jamque fames tota saevibat in urbe:  
Ecce autem vox laeta volat praenuncia flavum  
Ingressas Tiberim festivo remige multas  
Deproperare rates: fervescunt littora coetu  
Spectantum, auxiliumque malis finemque manentum!  
Navigat Aegypto classis: quae copia rerum!

Plaudere nunc liceat: sueto quis, Caesare salvo,  
Frumento indigeat? salve, Nero: maxime Caesar,  
Vive diu: tali resonabant compita plausu,  
Laetaque conferlas complêrunt agmina ripas.  
Nec minus ingenti circumtonat aula sonore:  
Marmoreis ingens gradibus, valvisque superbis  
Porta patet major, subitoque apparuit ingens,  
Tela inter media, ipse Nero, rapidaque quadriga  
Ocyor invectus tiberinas tendit ad undas.

Ex quo Romanae fidei diffidere Caesar  
Incoepit, sese externis circumdedit armis.  
Crediderat Nero nutantis firmamina regni,  
Quos parat horrendos atrox Germania foetus.  
Sive quod urbanos fugiens foedum aëra tractus  
Aurea simplicitas virides, nemora ardua, silvas  
Incolit; arcano potius seu numine ducta  
Degeneri Romae provincia victa pudendos  
Objectat mores, et jam praesaga ruentis  
Imperii sibi damnatas irrumpit in urbes ";  
Suspectae praelata fides germanica Romae.  
Seu peregre parat ire, urbis seu compita lustrat,  
Romulidas contra ambiguos circumdata pubes  
Invigilant, magnusque Dei comitatus aguntur,  
Horrendisque jubent populum secedere pilis.  
Dum globus ille virûm currum comitatur ovantem  
Arduus, arma tenens, caeco prostrata pavore  
Roma manet, pompamque ferocior odit inanem.

Venerat ipse Nero cursu festinus anhelos.  
Quae mora jam? Festo nautae certamine lactas  
Advertunt proras ripae, patuitque repente  
Non cererem optatam lectas vectare triremes,

Pulverem at exiguum, cumulosque nitentis arenae,  
Amphitheatralis qua fulgeret area Circi <sup>12</sup>.  
Tum populus frustra rebus illusus egenis  
In furias abiit; lapidosae grandinis imbre  
Persequitur dominum, mortique occumberet ipse,  
Nî curru rapido celsam rediisset ad aulam.  
Qua tandem, e magno se vix in tuta periclo  
Rettulit, assuetam crudescere sentit Erinny  
Visceribus, caecaque iterum caligine mentem  
Consilus, hac comites affatur voce sequentes:  
At servum pecus, at vilis plebecula nescit  
Quid liceat mihi. Quam vellem caput afforet unum <sup>13</sup>,  
Unius et caderet truncatum vulneris ictu  
Exitiale caput! Tum qualis sole calenti  
Tigris versicolor febrili incanduit aestu,  
Strata solo, aspectu segnis decumbit inersque;  
Vae venatori! si imprudens moverit illam,  
Mendaci credens somno falsaeque quieti;  
Conticuit Nero; sed praecordia ad intima ludit  
Ultio, disruptis sperans erumpere fraenis.  
At Tigellinus, qui dextro tempore mentem  
Caesaream premere, et laxas dare nôrat habenas,  
Seria praevertit ludo: Ter maxime Caesar,  
Artibus anne latet, quibus ingens bellua cedat?  
Panem et circenses <sup>14</sup> adamat mutabile vulgus,  
Praeterea nihil. Hoc uno compescere fas est.  
At tu consuetis medicalam frugibus offam  
Objice: latralus subito cohibebit iniquos  
Improba, demissaque quieta indormiet aure.  
Quid non praeterea exuperat fortuna Neronis?  
Quo tibi divinae deerit vigilantia mentis?

At nunc majus opus posco. Te villula nostra,  
Villula quae memorat magni benefacta Neronis  
In Tigellinum, et seros memorabit in annos,  
Anxia jamdudum expectat. Tibi festa paravit  
Gaudia: si praesens dignare invisere, Caesar,  
Virginis argolicae jam hinc obliviscere: nec Dis  
Invideas caelum superis. Nero reddidit illi:  
Adveniam, placida sperem requiescere pace.  
At graviora mihi primum peragenda supersunt,  
Ut querulae possim latratum extinguere plebis.  
Desidiosa, levis, cunctisque abrepta figuris  
Sensilibus, vario hac illac revolubilis aestu  
It ratio, variantque vices timor, ira, cupido  
Incredibilium, et foedae mala gaudia mentis.  
Angusto ceu saepe freto sub lumine Lunae,  
Undivagum mare littoreas nunc condere ripas  
Fluctibus objectis, et nunc nudare reductis  
Cernitur. Humani quae jam jam sanguinis ardens,  
Immansueta sitis venis serpebat in imis,  
Desedit, suetaeque trahunt ad turpia curae.  
Ergo ventosae venans suffragia plebis  
Limina Saturni, portasque recludit ahenas,  
Usibus extremis servata aeraria fundens.  
Omnia mutantur. Totam cursare per urbem  
Immensum adspiceres populum: ruit aedibus omnis  
Unda salutantum, et festo clamore furentum:  
Quale ubi turmatim per saturnalia amicum  
Mancipium domino, turpis miscetur honesto:  
Fit strepitus triviis, dum copia suppetit ingens,  
Assimulans veteris felicia saecula regis<sup>15</sup>.  
Luxuriosa ruit vacuae per compita Romae

Plebs circumfusa: ingenti convivia luxu  
Apparat ipse Nero: caveis depromit ab imis  
Pinguia fumoso spumantia dolia baccho:  
Ferre jubet centum praestanti corpore tauros  
Pinguibus e stabulis, totidem maclatque bidentes:  
E nemore umbrifero damae capreaeque fugaces  
Raptantur: praestat flammis adolere paratis  
Viscera, sordentique urbem involvere fumo.  
Festivis quacumque epulis discumbitur: istud  
Romano donum populo: jus esto beatae  
Laelitiae nescire modum, choreisque vacare  
Perpetuis, semperque boni meminisse Neronis.

Iphitus ut septum vidit fulgentibus armis  
Induperatorem, strepitu conferritus haesit;  
Saepius et medios voluit moriturus in hostes  
Irruere. Ignotae sed quaenam praemia morti?  
Et nunc conventum ingentem turbamque sonantem  
Per plateas spectans, atque in contraria versam,  
Mutata obstupuit tanto convicia plausu.  
Qua patulum ante fores aequata dat area campum,  
Sese praeccelsa sustollit mole colossus <sup>16</sup>,  
Quem pario e lapide extruxit Zenodorus, et aulae  
Praeposuit geniumque loci, numenque Neronem.  
Turbidus ut Grajus lustrans vacua atria vidit  
Proceram effigiem, furibunda excanduit ira,  
Et ceu vulnificos posset sentire dolores  
Saxea forma, stetit demens, validosque furores  
Evomit, inclamans graviore voce tyrannum,  
Humanique facem generis, Romaeque ruinam.  
Quî circumstantes latuisse opprobria quibant  
Excubias? Miles, quoniam est oblata facultas,

Ingenti clamore ruit, manicisque furentem  
Occupat. Immotus nisu stetit ille, rotansque  
Ensem fulmineum multo loca sanguine vastat.  
Confestim densata phalanx super irruit unum  
Frendentem, et captum vinclis constringit alienis.  
Ceu saepe incurrens Lybica venantibus ora  
Squamosus draco, quem solido venabula ferro  
Turbavere solo; domito stat corpore captus  
Ille, sed assurgens fulva cervice trisulco  
Sibilat ore, vomitque ferox lethale venenum;  
Talis correptus manicis, vinclisque furebat  
Iphitus, et nudos laniabat dentibus artus.  
Jamque catervatim vilis plebecula vinctum  
Arma inter media et morbo illuvieque peresum  
Conspiciens truculenta jocos ludibria miscet;  
Ocyor armatus miles circumstetit; aulae  
Majestate procul, qua stat custodia sontum  
Arcior, ejectum castra ad praetoria <sup>17</sup> raptant.  
Tiburtinam inter, dictamque e Vimine portam,  
Hanc molem immanem, et surgentibus oppida tectis  
Sejanus statuit quondam. Ambitiosius augens  
Vim praefecturae, dispersas ante cohortes  
Per varia hospitia, atque vagas collegit in unum,  
Ut simul imperia acciperent, numerusque potensque  
Robur militibus junctis fiducia, Romae  
Formido foret ambiguae. Dejectus in umbris  
Argivus jacuit, subitoque it rumor ad aulam.  
At quod supplicium nexo, crimenque fatenti?  
Carcere numne mori occultum inferiore tenebras  
Paedoremque inter jubeant? num robore clausus  
Funereo subterpositis procumbat in antris?

An populo exemplum misero, de rupe sinistra  
Tarpeji in praeceps jaciant? Clementia vicit,  
Et quae foedatum vulpes astuta regebat  
Principis ingenium, tremefactas clade recenti  
Permetuens alio pessumdare funere mentes,  
Confestim Argivum ruptis extrudere vinclis  
Captivum jubet, et tirreno credere ponto,  
Sub custode fero, ut patriam remearet ad oram.  
Quo vultu, miserande Parens, quo pectore cernis  
Romanum hetrusco misceri marmore Tybrim?  
Ah! quoties aciem in vastos prolendere fluctus  
Te video, et magnae excedentia culmina Romae  
Aspicere extremum, et surdos implere querelis  
Clarisonis fluctus, atque Eunen voce vocare!  
Ingrato deerrare mari vi cogeris una,  
Quo, nata comitante (heu! mensis volvitur alter)  
Dulcia laetantis testatus gaudia mentis  
Demirabaris famae monumenta latinae.  
Nunc miserae funesta ferens incendia luctus,  
Haec eadem relegis spatia incommitatus et amens!  
Solutus abis: ingrata vehit tua corpora pinus;  
Cor remanet Romae: Romam, vix fallere saevos  
Custodes liceat, Romam, qua nata moratur,  
Visere tecum agitas: haec spes solatur euntem.

Pace foris parata, Augustus, rerumque potitus,  
Bellorum ingentes satagens reparare ruinas,  
Non modo magnifica extruxit monumenta per urbem  
Ipse, sed exemplo fidos commovit amicos,  
Vertere privatos in publica commoda census.  
Romae ornamentum circos, fora, templa, theatra  
Extruerent: Romam cunctis caput urbibus esse,

Et dignam imperio forma cultuque futuram.  
Præcipue Agrippa <sup>18</sup>, æliaci dux ille trophaei,  
Pacatorque maris, Pompeia classe fugata,  
Quem generum augustam tulit Induperator ad aulam,  
Consilio asciscens comitem, rebusque novandis,  
Magna opera aedificat nullum interitura per aevum.  
Ut Romae latos, confracta repagula, fines  
Exuperant populi, et portam ingrediuntur apertam,  
Omnia tum pariter mutato numina caelo <sup>19</sup>,  
Ut quæque extuderant gentes, diversa locorum  
Ingenio, adveniunt ad flavas Tybridis undas.  
Prospiciens porro victas consuescere gentes  
Unius imperio, exemplo præeunte Deorum,  
Ipse sagax rerum, propriis ne finibus illuc  
Atque huc errarent, media collegit in urbe  
Numina, quo firma populos statione tenerent.  
Ingens magnificum templum, totique sacratum  
Concilio divûm consurgit mole rotunda:  
Roma Diis, populisque eadem patet hospita sedes.  
Quid raras memorem effigies, spirantia signa,  
Æere renidentes, aut lævi e marmore, mira  
Magnorum decora artificum, totumque per orbem  
Exquisita? Tholo suspenderat arma Quirinus,  
Claras exuvias, regi direpta latino,  
Jupiter unde habuit titulos nomenque Feretri <sup>20</sup>.  
Orbis devictus victori munera cedit;  
Nec modo bissemi, magna omnipotentis olympi  
Regia, caelicolæ victis rapiuntur Achivis;  
Externis veniunt terris nova numina: cernis  
Ægypti spolia, et Nili septemplex Isin,  
Linigeramque Deæ turbam, turpemque Scrapin



Marmoreis circum cellis considerare, mixtos  
Grajis numinibus, latia et tellure creatis <sup>11</sup>.  
Haud aliud templum romana potentia vidit  
Pulchrius. Ingenuum et simplex, quod Graecia sola  
Comperit, et mira expressit feliciter arte,  
Luce nitet propria, cunctis mirabile saeculis  
Artis opus, dignum quod miro accensus amore  
Suspiceret Michaël mortali veste coruscans  
Angelus <sup>12</sup>. Ipse Petri effingens memorabile templum,  
Elicuit veras solerti imitamine formas,  
Imposuitque operi magnae testudinis instar.

Horlus erat, templum pone, et laetissima tempe.  
Victor secessu suerat deponere amoeno  
Tactia bellorum, et placidae indulgere quieti.  
Fama est, vicinis dum arenti sidere campis  
Cursaret miles dubius, lassusque viarum  
Fonte sitim irriguo peteret restinguere frustra;  
Ecce autem virgo, pulcherrima virgo, reducta  
Emicuit valle, et montani tramite clivi  
Largiflui fontis scatebram monstravit: ibi undam  
Accurrit potare salubrem exercitus omnis.  
Virgine monstratam (veteris stat gratia facti)  
Nomine virgineo <sup>13</sup> lympham longaeva vetustas  
Nuncupat. Inductis excepta canalibus unda  
Deproperat Romam, magnoque extenta residunt  
Stagna lacu, Agrippae decus et cognomen adepta.  
Hic omnis, cultu assiduo, bona copia ruris  
Ridebat, cultisque locis inculta virore  
Herbida perpetuo solers industria alebat.  
Hic nemus horrendum, hic virgulta sonantia silvis,  
Secretaeque specus, hic rivis roscida prata

Mobilibus. Lucent vario de marmore thermae;  
Ast aqua lene fluens nunc mollia balnea saltu  
Efficit umbroso, interdum refluitque fluitque  
Ambiguo cursu: laeto sata margine coelebs  
Alticomos platanus sustollit ad aethera ramos,  
Myrtusque, idaliaeque rosae, et violaria vernant.  
Qui populum vivus magno dilexit amore,  
Dilexit moriens, testamentoque Quiritem  
Heredem scripsit, stagnumque et balnea, et hortos  
Luxurians civis medio celebrabat in aestu:  
Fallebatque diem. Sed non ea cura Neroni,  
Publica commoditas. Ceu mentem insania mutat,  
Diruit, urget, agit privata et publica passim.  
Crimina virtuti ponens vibransque cruentam  
Hastam divitiis urbem deturbat avitis <sup>14</sup>.  
Secretas nemorum valles et amoena vireta,  
Conscia deliciis loca, Tigellinus habebat,  
Atque novi addiderat magna oblectamina luxus.  
Ergo fatigatum et curis mordacibus aegrum  
Inspectans Dominum ( miser heu ! nunc turbidus amens  
Commemorat medio exulantem funere matrem,  
Nunc graeca impatiens quaerit de virgine, semper  
Conjuratam aciem densis consurgere ab umbris  
Contra se metuit ) versam in contraria mentem  
Distrahit, illecebrisque novis praevertere quaerit;  
Nec renuit Caesar libertum invisere, turpe  
Impositum pondus latiis cervicibus, atque  
Patricio aequantem rerum fastigia censu.  
Jamque aderat praedicta dies, cum linqueret aulam  
Induperator ovans, laetosque veniret ad hortos.  
Conveniunt, tanto quotquot dignatur honore

Egressum stipare deum per compita Romae,  
 Divinisque frui quas demirabitur aetas  
 Postera deliciis. Primusque *Senecio* suetus <sup>15</sup>  
 Quaerere noctivagas furtiva per orgia. moechas  
 Milvium apud pontem: mutata veste, pudendus  
 Cursabat Nero, jamque ausi tentare per umbras  
 Matronale decus, secti redire flagellis.  
 Tum mimus *Paris* ingenti cantare theatro  
 Aulica adulteria assuetus, *Vatinius* ausus  
 Sutor luce aulae ignotam mutare tabernam:  
 Se lateri agglomerant inhonesto corpore turpis  
*Quintanus*, foedusque *Otho*, quem ludere lusus  
 Fortuna insolitos gaudens, ad culmina summa  
 Efferet imperii: foedam transduxit ad aulam  
 Nunc rerum liberta potens, quae grata Neroni  
 Obtulerat juvenem maculosa ad cuncta paratum.  
 Deinde *Sporus* sequitur, sociusque *Petronius*, atque  
*Pythagoras*, grex immundus, cui romula quondam  
 Lingua nequit sceleri proprium procudere nomen.  
 Nec minus ingenti penetralia murmure fervent,  
 Perque immensam aulam famulos cursare videres  
 Intentos operi. Pars e praeseptibus altis,  
 Quos patria Epiros, fortisque Laconia misit,  
 Sepositos educit equos, pectitque comantes  
 Sublimes per colla jubas. Fraena aurea mordent,  
 Aurea pectoribus demissa monilia pendent,  
 Barbaricae ludunt phalerae exultantibus armis,  
 Purpura ubi mixtim contexto incenditur auro.  
 Arrecta cervice micant: gravis ungula laevi  
 Argenti squama <sup>16</sup> soleaque inclusa nitescit.  
 Quadrijuges alii properant educere currus,

Carla  
 El sp  
 Turri  
 loru  
 Isl a  
 Festi  
 Prae  
 Sepo  
 Orca  
 Maje  
 Phon  
 Ante  
 Aure  
 Qua  
 Caes  
 Fort  
 Indi  
 Ded  
 Syn  
 Aur  
 Hos  
 Il y  
 Alq  
 Ceu  
 Del  
 Tu  
 Al  
 U  
 Pr  
 Ex  
 La

Certatimque auro poliunt, signisque rigentes,  
Et speciem capsi <sup>27</sup> illustrem, extantemque rotundam  
Turriculam, unde feros spirantes naribus ignem  
Arduus auriga effusis moderatur habenis.  
Ast aula interior majori concita motu  
Festinat. Qua Zeta ornat seposita cubiculum <sup>28</sup>,  
Praetrepidant pueri: quis tanto assurgit honori  
Sepositas vestes ostroque auroque superbas  
Ornatumque parare Deo, qui fulgeat omni  
Majestate throni, et florentis vere juventae  
Phoebum castaliis dictantem carmina nymphis  
Anteeat victor? Syrios hic fundit odores,  
Auraque suaveolens maculoso e corpore pellit <sup>29</sup>,  
Quam fera luxuries exhalat opaca mephitim:  
Caesariem hic legit effusam per candida colla  
Formatamque gradu varios componit in orbes.  
Indumenta togae, crassum, intolerabile pondus  
Dedecorant laeves humeros; pro tempore mollem  
Synthesin induitur laetus conviva, fugitque  
Auralam lecta tunicam praecingere zona.  
Hos inter motus, Syrio perfusus olivo  
It Nero praecipiens alacri nova gaudia mente;  
Atque triumphali redimitus tempore lauro,  
Ceum quondam Admeti regali apparuit aula  
Delius, emicuit: jam cuncta Deum ultro salutat  
Turba cupidineos passim comitata triumphos.  
At Poppaea gravi jamdudum saucia cura,  
Ut primum variae contage libidinis actum  
Praesentit decerrare virum, furibunda recenti  
Excoquitur flamma, atque moras innectit eundi.  
Laeta sibi extincta speraverat omnia matre;

Heu! heu! bajani postquam rubuere recessus  
Sanguine, majores videt increbescere nimbos.  
More ferae Nero nunc tacitis confunditur umbris  
Pervagus hortorum, nunc interiore cubiculo  
Foemineos fugit affatus, ceu forte patrati  
Poeniteat, causamque illam fontemque malorum  
Noverit. Interea (quid fallere quibat amantem?)  
Conspectat famulos insueto fervere motu,  
Atque parari abitus. Maculosi vita marili  
Triste per augurium ducit; num corda quiêrint  
Primo fracta metu, atque iterum malesuada libido  
Audeat immundos revocare in pristina mores?  
Heu quid agat? Saevae horrificant muliebria curae  
Pectora: nec flammis aderit violentia major  
Undisonisque Euris, quam laesae pellicis irae.  
Praesenti lymphata malo, fraudesque futuras  
Poppaea horrescens quali spe perdita fertur?  
Aut misera in lacrymas (ea stat medicina dolori)  
Solvitur, aut furiis laxas immittit habenas,  
Et justas laeso poenas deposcit amore  
Ultrix, ingratumque vocal. Sic perfidus, cheu!  
Desertam sola miseram me linoquit in aula?  
Tum vero impatiens, subito velut icta furore,  
Irrumpit thalamo, formaque habituque cinaedum <sup>30</sup>  
Offendit gressum tectis efferre parantem.  
Vidit, et extemplo totos expalluit artus,  
Cessavitque furor, saxoquo simillima torpet,  
Et via vix tandem voci laxata dolore est:  
Me patiere domi dudum squalere? per urbem  
Incomitatus abis sine me: solamque relictam,  
Ne quid contingat, varia formidine terres?

At non haec miserae quondam promissa dedisti.  
Tunc Princeps: Vigili semper custode puellus <sup>31</sup>  
Indigeam? nuper materno obnoxius ore  
Pendebam servus, nec libertate meoque  
Gaudere arbitrio poteram. Quae tanta facultas  
Est permissa tibi, mulier? mea desere jura:  
Qua dominus Nero, non ullus dominabitur aula.  
Respicit ancipites animos, vocesque malignas  
Audiit infelix, justoque accensa furore:  
At mihi nulla dies nullo non foeta dolore  
Defluxit, donec conjux Octavia, donec  
Agrippina ferox regales terruit aedes.  
Ipse tuis oculis pharii tibicinis artem <sup>32</sup>  
Praelatam tibi vidisti: totiesque furentem,  
Insanam matrem, puero quae assuea Neroni  
Imperitare, nequit domino parere Neroni,  
Opplesse augustas armato milite villas.  
At mecum luctus, et mecum gaudia nôras  
Partiri. Heu! quantis me objecit sponte periclis  
Iste mihi male natus amor! quibus obsita spinis  
Ista fuit via, qua possem te sola tenere,  
Sola frui! Pro te cunctos tolerare coacta  
Contemptus hominum, et miserae ludibria plebis.  
Anne iterum statuas, felicia pignora amoris  
Eruat ipsa <sup>33</sup>? iterum occultas irrumpere in aedes  
Conetur? scandetque tuum praelata cubile  
Altera? Jam video taedae insultare jugali  
Libertam: nequit mater tolerare superbam  
Acten <sup>34</sup>: ferre queo conjux? Muliercula nobis  
Cuncta domi trepidare jubet: mihi numne ferenda  
Plura foris commissa, mihi quae rumor iniquus

Attulerit, quaeque insomnis mea cura diuque  
Et noctu comitans, vivo depicta colore  
Exhibeat? Mihi supplicium est, mihi crimen amâsse  
Natum Agrippina: id video. Nec plura profatur.  
His haeret Nero, nec certas scit reddere voces.  
Illa autem gemebunda imo suspiria corde  
Educens: At quî immemori te pectore linquam,  
O Nero? Curarum crescentibus aestuat undis  
Mens tua: sed medio versantem turbine lethi  
Poppaea eripiet. Nescis, temerarie, nescis,  
Quo calefacta fremunt funesto haec corda tumultu.  
Unum depereo te, unum. Te meque perosa  
Saeva Parens, tumulo tandem composta quievit.  
Contentos licet esse: tuo lateri ipsa sededo  
Conjux. Anne decus formae tibi displicet? anne  
Nostrae gentis honos, et avis atavisque relucens  
Fama triumphalis? Pueris an laeta creandis <sup>35</sup>  
Altera quaeratur? Si quidquam forte latebit,  
Quod te mutatum videam, me redde repulsi  
Conjugio Othonis: malelactum limen et auras  
Effugiam procul, ibo novi trans moenia mundi,  
Fortunamque meam nec consolabile fatum  
Conquerar. Haec inter, lacrymis implebat amaris  
Insidiosa genas roseas, trepidique Neronis  
Vultu mutato flagrantia lumina fixit,  
Pendebatque anceps: sed jam jam mollior ille  
Solatur flentem, mellitoque addidit ore:  
Ecquid opus lacrymis? Alvo felicia gestas  
Pignora, quae patria impatiens munimina nostri  
Imperii expectat. Quae Romae insueta videbis  
Gaudia, quique Anti fiet concursus ad oram!

Julia gens magna celebravit laude Bovillas <sup>36</sup>;  
Ast Antî natale solum majora manebunt.  
Ecce uterum superis commendat Curia divis:  
Votaque communes ierunt concepta per aras.  
En Capitolini supera Jovis arce locata  
Aurea Fortunae effigies, atque omnibus aris  
Solemnes sonuere preces: Veneri Genitrici  
Erectum templum, inque Dei nascentis honorem  
Publica promissa aetiaca certamina palmae.  
Ordo senatorum festam adventabit ad urbem,  
Impatiens missum de caelo cernere pignus,  
Prae seque effuso declarans gaudia luxu  
Plebs festas ducet choreas, regalia quaerens  
Tecta domus, studioque fremens plausuque secundo.  
Depone has lacrymas. Dixit, comitesque morantes  
Ante fores Dominum exceperere, viamque capessunt.

Nobilium comitante choro, divina politur  
Gaudia, floriferos Caesar semotus in hortos,  
Omnia mira adamat saeculum, monstrosaue cuncta <sup>37</sup>.  
Seu densata vides plausu proscenia longo  
Obstreperere, et cunctas spectacula mota per horas,  
Queis populus stupet ignarus praegrandibus orsis,  
Publica sive opera audere, admirabile quidvis  
Auditu visuque aderit: molimine vasto  
Undique naturae juvat imperitare minori.  
Quae Domino placuisse queant, cuncta arte parata  
Regifica, et magnam superant miracula famam <sup>38</sup>.  
Namque lacu in medio, compactis navibus una,  
Ingenti constructa vides triclinia luxu:  
Motibus alternis naves motantur, et ecce  
Ex aliis alia exiliunt convivia mensis.



Auricomae geminae scintillant lumine ripae.  
Aurataeque trabes, aurataeque transtra relucent,  
Interexto ebore; ipse micat puer oblitus auro  
Plurimus, et variis circum famulatibus errat.

Quandoquidem humano prognata scientia nisu  
Id tandem reperit, quod maior et una voluptas <sup>39</sup>  
Lautis considereat mensis, totamque per urbem  
Luxuriosa scholae crescunt inventa beatae,  
Qualia divini superent documenta Platonis;  
Romuleo coena dona Jovi, quae festa parata  
Munera? Crediderim vanae mendacia fama,  
Nî romana Pater morbo illuvieque peresa  
Viscera nudasset. Salve, venerabilis auctor <sup>40</sup>,  
Qui pius extremo moribundae tempore Romae  
Testis ades, suaque excipiens suspiria, jamjam  
Deficiente anima, per scripta volumina, sacras.  
Praeclarum illud opus, cunctis mirabile saeculis,  
Quod patriae benefidus amor, sociaeque salutis  
Composuit, bene compositum prope Tybridis undas  
Bellipotens auxit magnarum audacia rerum,  
Ut nihil aetherea lustraret lampade Titan  
Clarius imperiis aut majestatis honore,  
Ipse vides sensim laxis procumbere vinclis;  
Quatuor effractum Romae praedonibus ipse  
Spectans parrhasia pingis felicius arte.  
Interdum gemis, interdum perversa ruentis  
Semina naturae damnas: tibi suppetit una  
Religio patriae; et caelo convicia demens  
Evomis. Ah! quaenam me justior ira fatigat  
Assuetum Christi sancta secernere luce  
Virtutem et vilium? Languenti demoror ulva

Tartarei coeni invitus: teque auspice, pergam;  
Ipse tuas iras patriae superante ruina,  
Ipse dabis gemitus, casuri praescius augur  
Imperii, desolatae o vox ultima Romae.

Quidquid ubique fuit toto pretiosius orbe  
Quaesitum impenso romanas venit in aedes <sup>41</sup>,  
Solertesque parant genialia fercula curae.  
Ardua Pannoniae nemora e convallibus imis  
Sylvestres misere feras; ast asia stagna  
Cantantes cygnos per mollia prata Caystri,  
Phasiacasque refert volucres viridissima Colchis.

O felix aetas, quae tol miracula dio  
Extudit ingenio! Mutato more ferina  
Induitur piscis speciem, viduatque rura  
Lusciniis. Laetas rumpit Philomela loquelas,  
Ut latium exhilaret lautissima lingua palatum.  
Ecce caput coenae pueri subiere quaterni,  
Artis opus rarae: dumosis horrida lustris  
Gallia glandilegi nutrit corpora porci,  
Quem numero ingenti lepores, capreaeque fugaces  
Exornant: praedam venator utramque nivosis  
Saltibus aemoniae cursu deprêndit anhelò.

Plurimus hic fidicen suavi modulamine pulchram  
Concelebrat pompae effigiem ( cognomine dicunt  
Aesopum ) in medioque locant. Saltare videres  
Chironomum interea, et summis dictata magistris  
Omnia complentem: gestuque manuque patescit  
Dexteritas. Primo lancem vix vulnere fartam  
Innumeris avibus scindit, turdique volantes  
Erumpunt, rapidisque movent purum aëra pennis.  
Quid si perpetuis veniunt fastidia mensis?

Exacuet torpens pulmentum dulce palatum,  
Et stomachum segnem excutiet. Quid nobile garum <sup>42</sup>  
Commemorem? Centum excerpta intestina natantum  
Sal macerat, funditque novum per membra vigorem.  
Ecce autem properant lectissima vina rubenti  
Permiscere rosa, Syrioque inspergere nardo.  
At non hic quaeras Samios, victoque Sagunto  
Exstructos calices: nimium vulgaria vitrum  
Crystallique color: lances, et pocula cernis  
Omnia mirifice argento caelata, vel auri  
Inductis crustis, variisque ornata smaragdis <sup>43</sup>,  
Murrina seu mavis semoto oriente petita.  
Tum vero in medio magnum cratera locarunt.  
Nil mirabilius quidquam longaeva velustas  
Vidit: praegrandem gemmam, qua marlius heros  
Corbulo devictam Armeniam spoliaverat, atque  
Romano obtulerat domino mirabile donum.  
Prodigus et stultus Caesar donârat iniquo  
Tot scelerum comiti: gaza pretiosius omni  
Munus convivae extollunt et vina coronant.  
Atque ubi lactifico cernunt spumescere baccho,  
Et trahere innumeros adverso sole colores,  
Insueto veluti tactus Sophonius oestro  
Surgit, et hoc superas effudit carmen ad auras:  
Jupiter omnipotens, caelum contentus habeto.  
Caesar habet terrae imperium Nero <sup>44</sup>. Jupiter ipse,  
Si conjurati titania monstra gigantes  
Montibus audebunt humeris superaddere montes,  
Romanaeque aulae solium affectare supremum,  
Ipse manu jaculans non exuperabile fulmen  
In praeceps rapias, semustaque corpora passim

Poley

Nos i

Prac:

Hanc

Conv

Alph

Grae

Quis

Quac

Quis

Rom

Al n

Belle

Fabr

Lato

Et e

An

De:

Se

Se

A

S

Phlegraeis jaceant signum memorabile campis.  
Nos uni tibi libamus, Nero maxime: Romae  
Praesidiumque Deumque salutiferumque vocamus.  
Hanc Tigellini vocem excepere secundo  
Convivae strepitu, sequiturque Senecio cantus:  
Alphoei ludos sileas, ludosque Molorchii <sup>45</sup>,  
Graecia, nec Sophoclis magnos mirare cothurnos.  
Quis valeat melius magnis circensibus actas  
Quadrupedum cursu indociles fraenare quadrigas?  
Quis regale trahit per pulpita syrma, vel auctor  
Romula majori accendit proscenia plausu <sup>46</sup>?  
At non Quintanus sine cantu segnis abivit:  
Bellerophontaei prope dulcia murmura fontis  
Fabula jactavit vatem, vatumque parentem  
Latoniae natum citharam pulsare decoram,  
Et cantum et citharam aonias docuisse sorores.  
An dicam Phoebum Perrhoei culmina Pindi  
Deseruisse? Nero, salve, vel Apolline major <sup>47</sup>,  
Seu fidibus mulces subsellia densa canoris,  
Seu voce ambrosia, o nulli exaudita priorum  
Aurea vox! Romae cedat parnassia rupes.

O felix Nero, quidnam terris amplius optas?  
Suaviloqua arrectas symphonia commovet aures,  
Ardentes oculos argenti splendor et auri  
Pascit luxurians, sapor ingens molle palatum  
Excitat, ambrosias movet omnis copia nares,  
Molliter in lecto recubas, quem stragula vestis  
Chaldaeaque ornant vecti Babylone tapetes.  
Quid tibi defuerit? Merito potes esse beatus.

Ecce autem sese vicinis altera ripis  
Spectacula objiciunt, rapiuntque inopina tuentes.

Mascula dum virtus duris exercita castris  
Fulgentes acies externum eduxit in hostem,  
Romani stabat Capitoli immobile saxum.  
Roma triumphales stupuit per compita currus,  
Et domitos reges justo certamine vidit  
Per sacrum collem magnos celebrare triumphos  
Victoris, populo circum, et plaudente senatu.  
Post ubi convexo labefactum pondere nulat  
Imperium, mutata ruit mavortia virtus,  
Horrida diffuso gaudens in sanguine caedes  
Virtutis tenuit nomen; fuit una voluptas  
Ardentes oculos fuso saturare cruore.  
Usque adeo humani generis communis origo <sup>48</sup>  
Romulidas latuit! dum nodis vinctus ahenis  
Mars frustra fremit, intercluso limine Jani,  
Laetaque pax sanctae ramum praetendit olivae,  
Urbibus in mediis deseivit improba caedes <sup>49</sup>.  
Amphitheatrales candenti e marmore moles  
Surgunt, qua fulva secum luctentur arena,  
Corpore praegrandes si quos Germania foetus  
Mittit, Hyperborca aut glacies, Thanaisque nivalis.  
Atque ubi perfectae vires atque arte magistra  
Edocti ( pingui hos etiam nutrire sagina  
Edidicere ) vocat ludo exitialis arena;  
Thraces compositi Gallis, Samnitibus acres  
Hispani exiliunt. Felix praelata juvenus,  
Quam Romae dominus tanta ad spectacula poscit!  
Illa gregi socio invidiam plerumque creabit,  
Si modo largifluus patefacto e vulnere sanguis  
Coenas respergit dubias, et caecuba rore  
Tingit purpureo, et labiis caelestibus haeret <sup>50</sup>.

Ser  
Anle  
Expl  
Saba  
Tom  
Agn  
Arm  
Cret  
El p  
Gau  
Al i  
Dep  
Qui  
El c  
El g  
Ret  
Co  
Si  
U  
P  
I

Sex paria incedunt variis sua quaeque sub armis:  
Antevolans aciem ductor per cuncta paratam  
Explicuit. Te turba, Nero, moritura salutat <sup>51</sup>,  
Submissoque genu, praesens ceu numen, adorat.  
Tum vero adspiceres magnae praeludia pugnae.  
Agmen partitum circense perambulat aequor,  
Arma manu quassans lusoria: personal aether  
Crebro tinnitu; simulant, atque arte magistra  
El pugnare pares et respondere, tuentes  
Gaudent certatim vario suspendere gestu.  
At tuba terribilem sonitum dedit: ilicet omnes  
Deposuerunt hebetes gladios, bellatur acutis <sup>52</sup>.  
Quisque gradu manet, occurrentem examinat hostem,  
Et quo quemque modo feriat. Volat ecce Secutor  
Et gladio et parma et cristata casside fulgens.  
Retia fert alter dextra, saevumque tridentem,  
Consertis satagens squamis prensare fugacem.  
Si voti fieret compos, stat fuscina praesto,  
Ut capite implicito trasverberet ilia ferro.  
Parte alia cum Thrace ruit Mirmillo: nitentem  
Ille manu sicam gestat, parmamque tremendam.  
Tradidit huic vestes et morem Gallia: scuto  
Armatus gladioque ibat, galeaeque comantis  
Summum apicem picti exornabat piscis imago.  
Mox rete instructus media progressus arena  
Mirmillona <sup>53</sup> petit, cantuque in praelia poscit.  
Non te, Galle, peto: piscem peto: siste parumper:  
Quid me, Galle, fugis? spatiosa per aequora campi  
Illic praecit, ille subit: fugientem hic pone fatigat.  
Interea ferro pugnatum, et marle cadentum  
Omnia plena: fragor crepitantibus intonat armis,

Sparsaque per medias resplendent fragmina mensas.

Nox intempesta Romam occullaverat umbra.  
At dum, stellarum tremulo sub lumine, stagni  
Aequora tuta silent, interlucentque comanti  
Vertice odoriferae lauri, platanique virentes,  
Convivae exiliunt: multo licet uda lyaeo  
Tempora contextae verno de flore coronae  
Velarint, subitus capiti furor incidit icto,  
Miscentesque jocos luco erravere silenti  
Effraenes, quocumque trahit vitiosa libido.  
Qua curvos dedit anfractus accommoda furtis  
Villula, muscosi composita crepidine saxi  
Lustra patent obscoena. Rubens dum luna nitorem  
Virgineum obnubit refugitque indigna tueri,  
Omne nefas movet abjecto lymphata pudore  
Horrida turba: praeit cunctis, cunctosque proterva  
Laelitia exultans superat Nero <sup>54</sup>: turpia nulla  
Deserit. Abnuerim chartas temerare pudicas  
Sordibus impuris, quando exorientia caelo  
Lumina virgineum nostris suasere pudorem  
Carminibus sanctaeque juvat reverentia famae.  
Magnis nulla malis porro medicina fuisset,  
(Tantum primigenae poterant contagia culpae!)  
Nî Petrus allatum caelo mortalibus aegris  
Monstrasset verum, et toto vulgasset in orbe.  
Quis credat? Nero conjugii nova foedera quaerit:  
Pythagoram <sup>55</sup> (tali impubes stat nomine quidam  
E grege foedato corruptior) omine magno  
Accipit uxorem. Assistunt solemnibus horis  
Patres expleti dapibus, vinoque sepulti.  
Ipse autem in medio dextra sustentat odorem

Lampada, flammeolumque gerit: prope faustus aruspex.  
Et dos, conjugiiue thorus, et stragula vestis.  
Excitat interea sponso symphonia suavis,  
Atque inconcessos homini tenus hac hymenaeos  
Histrio lascivae Paris acceptissimus aulae  
Concinit, et Romam insueta ad spectacula pellit.  
Ille diu Veneris magnos cantavit amores  
Martisque; ut lucem referens crinitus Apollo  
Cuncta observârat secretae conscia flammae  
Consilia: ipse dolos cernit lascivaque furla  
Tardipes ignipotens, et inobservabile rete  
Intexit, quo terra, omnis quo risit olympus.  
Ipse Nero et comites vati risere canenti.  
Qui totam cernens cantu exultare coronam,  
Impulit aonias graviori pollice chordas,  
Raptavitque furens cunctos in crimina divos.  
Huc ades, o Hymenae, novis assiste triumphis.  
Virginibus circum tyriis comitata solebat  
Littore Sidonio versari ab Agenore nata.  
Quid non cogit amor? Rector divûmque hominumque  
Exarsit: quoniam via nulla patebat amori,  
Induitur faciem tauri mugitque juvencos  
Inter lascivos viridemque perambulat ulvam.  
Formosum Phoenissa bovem stupefacta tuctur,  
Accessitque jocans: dextra nunc pectora mulcet,  
Cornua nunc sertis redimit; procumbit in herbam  
Adsimulans vitulus, blanditurque ore puellae.  
Insilit illa humero imprudens: mora nulla: juvencus  
Leniter exurgens sicco de littore cessit,  
Et subito medias saltu se jecit in undas,  
Dictata arva petens. Nequicquam exterrita flebat



Sidonis; ingenti resonant stridore marini  
Nequicquam scopuli; gradientibus alta patescunt  
Acquora; cum tandem excepit minoia tellus <sup>56</sup>,  
Sensim deposita fallacis imagine tauri,  
Attonitae Nymphae patuit Deus, ipse deorum  
Rector, et exiluit parto securus amore.  
Huc ades, o Hymenaeae, novis assiste triumphis.  
Non ego Tyndaridam linquo, quae credula falsam  
In gremio tulatur avem; se Jupiter ipse  
Verterat in cycnum: stupefacta Laconia vidit  
Divino geminos pueros erumpere ab ovo <sup>57</sup>.  
Nec te quam Acrisius prudens, formosa puella,  
Horrida praemetuens fati portenta futuri  
Aerata turre inclusit: stant ferrea portae  
Limina nequiequam: ardenti Saturnius igne  
Percitus aurifero descendit ab aethere nimbo;  
Invito parit ipsa patre, et danaeius heros  
Gorgonis anguicomae victor Jove natus ab auro <sup>58</sup>.  
Huc ades, o Hymenaeae: novis assiste triumphis.  
Regalis puer iliaca florebat in aula  
Insignis facie, et praeclarae flore juventae.  
Ex quo de caelo junonia cesserat Hebe <sup>59</sup>,  
Quae prius ornabat mensam, dapibusque Deorum  
Una ministrabat, caelo formosior una  
Diva juventutis praeses, atque Herculis uxor,  
Fulminis aetherei custos, et magna potentum  
Alituum Regina ruit, puerumque recurvis  
Unguibus arripiens superam transducit ad aulam.  
Juno indignatur juvenis caelestis honores.  
Huc ades, o Hymenaeae, novis assiste triumphis.  
Seque videns, taedasque Jovem infamare jugales,

Quid faceret Juno ? ultrices Saturnia jure  
Concepit furias: aderat tritonia Pallas  
Dedecus indignata patris, Rex aequoris alti  
Ardescens aderat; manibus per mutua nexis  
Pene lacertifero superent certamine numen,  
Nî centumgeminus Briarevs <sup>6o</sup> avertat iniquum  
Crimen, et extemplo solvat retinacula nexo.  
Jupiter evicit: Rex Jupiter omnibus aequè.  
Huc ades, o Hymenae, novis assiste triumphis.  
Juno Jovis soror et conjux. Cortynia tellus  
Uno eodemque tulit partu, fraterque sororem  
Connubio duxit, legesque exolvit iniquas.  
Ecquidnam quereris toties, Saturnia Juno,  
Foedera connubii ardentem violasse maritum?  
Jupiter armatam genuit sine matre Minervam <sup>6i</sup>:  
Ipsa etiam Martem gignis sine Patre cruentum,  
Flore super tacto: vobis aequalia jura,  
Et terris caeloque trahit sua quemque voluptas.  
Inclyte Rex superum, te nos imitabimur unum.  
Das prior exemplum memorabile; sancte Deorûm  
Te sequimur, vitae relegendem arcana beatae.  
Cetera quid memorem cantu ? velate, tenebrae,  
Flagitium infandum, caecisque abscondite in umbris.

Qua patet in longum venerabilis aula superbis  
Porticibus, latere amotus stetit angulus, horrens  
Cancellis circum, et solidi munimine muri.  
Aulae carcer erat: per sublerranea lustra  
Ingentes strepitus et murmura saeva minarum  
Audis assidue; spissas caliginis umbras  
Angusta hac illac perrumpit rara fenestra,  
Quam pariter duplici ferro lorica tuetur.

Vitam infelicem ferrato in carcere plorant,  
Siqui ( seu fictum, seu verum crimen ) iniqua  
Ambitione acti imperium turbasse feruntur.  
Vix primum fuerat turma deprênsus agresti,  
Haec data Tarsensi sedes, qua fluminis unda  
Limosi, et duri jam mucida fragmina panis  
Sustentant miserum. Dura est praesentia rerum,  
Et pejora timet cunctas gravioraque in horas.  
At Deus omnipotens propiori numine sanctos  
Custodit: crebro tentans per acula potentem  
Virtutem, ut manuum poscunt opera alta suarum,  
Lustratas animas caelestibus adparat oris.  
Praecipue tamen ingentis molimine saeculi,  
Quo primum emicuit caccis Ecclesia terris.  
Ceu studiosa parens circum incunabula nati  
Anxia versatur, dulcique inspectat amore  
Purpurei vultus charites, roseumque labellum;  
Haud secus Omnipotens sobolem crescentis ovilis  
Omni virtutum cernit splendescere flore,  
Et secum exultat. Persaepe immurmurat Eurus  
Turbidus ante fores, sed celsis nixa columnis  
Fulcra domus turbare nequit, furiaeque recumbunt,  
Atque minae, tutaeque redit lux aurea pacis.

Et Paulo, unde minus sperat, via prima salutis  
Panditur. Heroem nôrat Poppaea, priore  
Judicio, plena cum causam oravit in aula.  
Ingens eloquium et maiestas inclyta vultus  
Matronam tetigere: neque illam causa latebat  
Exitii; laetoque animo conspexerat aula  
Effugisse Eunen, seque in loca tuta recepsse.  
Nocturna horrescens meditantem furta maritum,

Ut Tigellini primum crimenque dolosque  
Audiit, et Paulum tenebris et carcere caeco  
Captivum novit, fauces demisit in altas  
Fidum servorum, superasque eduxit ad aedes,  
Qua data liberior captis custodia. Amicos,  
Siqui conveniunt, propius licet ore tueri,  
Inque vicem notas audire et reddere voces.  
Ille autem, ut limen trepidae irremeabile portae  
Expes deseruit, campoque potitur aperto,  
Non sua sed Christi quaerens diffundere regna <sup>62</sup>,  
Sanctis incubuit curis; dum vincula palmas  
Impediunt, ferri stridor tractaeque catenae  
Horribili excutiunt circum loca cuncta tumultu,  
Urget opus suetum; ferrata per atria capti  
Agglomerant sese lateri: stipata caterva  
Edidicit Christum, pendetque loquentis ab ore.  
Tum vero patuere Dei praecepta. *Beati* <sup>63</sup>  
*Qui lugent.* Glacie ceu lylia tacta rigenti  
Demisere caput, primo si luxit in ortu  
Delius et radii tepefecit luce benigni,  
Virgineam caelo frontem relevare videntur  
Altius; haud aliter diae solamine vocis  
Afflictos moerore gravi spes sublevat, ingens  
Mansuescit dolor, et per dulcia balsama languet.  
Carcer fit templum, quo noxia turba peractam  
Despiciens vitam sanctis se devovet aris.

Vivere liberius dum fas, absente Nerone,  
Illos forte dies latebrosa silentia liquit  
Annaeus, Burrumque volens visebat amicum,  
Qui moerens quamvis, saeva degebat in aula.  
Magnanimi proceres Dominam infelicibus horis

Conveniunt, casumque gemunt et tempora rerum,  
Aulamque atque urbem. Verba inter singula lugens  
Poppaea infausto se dixit sidere natam  
Saepius: et vidui aerumnam squaloris acerbam  
Atque ignominiam flevit: mox rorida tersit  
Lumina, praesentesque pio sic ore rogavit:  
Si quicquam, procures, vestra pietate meremur,  
Hoc pietatis opus nostris concedite votis.  
Ecce iterum Paulus latebroso clauditur antro.  
Ipsa virum vidi, et fateor, me maxima virtus  
Perculit insontis. Misero succurrere suadet  
Nescio quae pietas: utinam succurrere cunctis  
Haud ignara mali possem! Roma omnia novit,  
Respondit Seneca: atque utinam tibi tanta potestas,  
Ut par aequaret cordis dictata benigni!  
Infelix solium! tunc magno saucia luctu  
Poppaea exclamat: vacuum vix unus et alter  
Improbis acceperem, bonos <sup>64</sup> per iniqua potenti  
Dejecere gradu cunctos: se sequere vicissim  
Sustentant scelere immani, illaqueantque Neronem  
Fraudibus innumeris. Urbana opprobria cerno  
Omnia, sed taceo. Fanti mihi certa pericla,  
Et nulla utilitas. Adeo fallacibus ambit  
Insidiis Tigellinus, quaecumque timere  
Ipsa ego debuerim. Nostra procul estis ab aula,  
Vos, Burre, et Seneca: tuto vos vivere rure  
Hinc doleo, incertis desunt tutamina rebus;  
Hinc laudo: nam vestra diu suspecta Neroni  
Est virtus. Sinite ahi! vestra infortunia, nostri  
Totius imperii dicam infortunia: vestrum  
Defit consilium, maiorque potentia foedi

Artificis scelerum crevit, ruimusque ruina  
Maiori semper. Bene parta silentia vobis  
Invideo, proceres. Terrentur imagine dira  
Attoniti comites, et quamvis horrida verba  
Ardentes feriere animas, immola tenentes  
Lumina, flammato obnixa sub pectore curam  
Pressere: audacter servata silentia rumpit  
Burrus, et affatur Dominam: Tua dicta sequemur  
Ocyus, aeratas capto laxare catenas  
Quando ita vis, jubeo, et dictis solemur amicis  
Ipsi praesentes. Tantum, Poppaea, caveto,  
Ne tibi, ne nobis noceat clementia: plura  
Quam nobis, mulier, tibi nota et forte tinenda.  
Talibus auditis, penetrabilia dira relinquunt.  
Tarsensem Annaeus nōrat, stupuitque potentem  
Persaepe eloquio, magnoque illectus amore est.  
Ut vero captum agnovit vinclisque ligatum,  
Compellare virum miro flagrabat amore.  
Nec Burrus comitem officio abnegat. Ergo recedunt  
Romani proceres, variumque in mutua jungunt  
Sermonem. In primis Burrus laniatus amara  
Tristitie, tales rupit de pectore questus:  
Audistin? sceleri scelus additur: ecce vocatur  
Innocuus Nero: criminibus caput omnibus una  
Turba jacet comitum. Comites quis deligit, omni  
Nequitie infectos foeda ad praetoria ducens?  
Ipse Nero: auctores factis subduntur iniquis  
Hic atque ille. Comes Burro sic farier inquit  
Annaeus: Miseram caeco linquamus amore  
Insanire: viro ipsa suo muliebriter haeret,  
Praemetuitque suis ne quicquam abducat ab ulnis.

Mollia non animo Burrus fert dicta quieto:  
An nobis, Annaee, ipsis dare verba putemus?  
Nondum ter senos natus compleverat annos,  
Et charta oblata suadebam immane fatentem  
Crimen quamprimum merita compescere morte;  
Isque stylum invitus rapiens, multumque moratus,  
Quam vellem nescire manu subscribere, dixit <sup>65</sup>.  
O vocem egregiam, terras quam fama per omnes  
Detulit imperii! Quid mirum, si excita Roma  
Afflictis ausit melius confidere rebus?  
Ast Domitii patris obstabant praesagia laeva,  
Qui, nato puero, gratantes inter amicos  
Ex ipso atque Agrippina potuisse negavit  
Quicquam aliud Romae nisi detestabile nasci <sup>66</sup>.  
Heu! quae saltator, quae tonsor semina prava  
Indiderant, fructus maturo tempore reddunt.  
Caesareae stirpis feritas agit improba: Caji  
Ille vetus daemon, Tiberique insana lacescit  
Saevities. Qualis gaetulis nata cavernis  
Tigris, ubi humano sitientia proluit ora  
Sanguine, tum demum generi vis insita sese  
Explicat, exultatque sitim saturare ferinam.  
En delatores ( dirum modo cesserat agmen )  
Exilio redeunt, plena versantur in urbe,  
In conspectu hominum. Stat pro ratione voluntas <sup>67</sup>  
Caesaris, inque malis gaudet vitiata libido.  
Quis rabiem ferat? hic ferro se interficit: illum  
Occupat infamis lictor, venamque relaxat  
Lancea: lethifero huic languescit vita veneno.  
En mitis Tiberi effigies: quo junior, atque  
Cultior, antiquo monstrum crudelius illo,

Prodigus atque voluptatum sectator, et amens  
Vates, cantator, citharoedus, et histrio. Talis  
Obscoena Claudî juvenis concrevit in aula,  
Maternas inter sordes, aulaeque tot inter  
Turpis adulteria. Hic fata infelicia jactas  
Poppaeae? an Romam felicem principe dicam?

At non antiquae species pulcherrima Romae  
Excidit ex animo: Annaeus sic farier orsus:  
Nec spes destituet: celebrata volumina vivunt,  
Queis princeps orbis populus describitur, atque  
Extimulat seros patria virtute nepotes.

Vanuit ex oculis Respublica prisca: manetque  
Gloria non peritura diu, exoriturque cupido  
Mirari Romam, celebrataque tempora rerum <sup>68</sup>.

Talia miscentes ibant, seseque vicissim  
Consolabantur surgentis imagine Romae.

Quae spes magna viris? quae rebus causa novandis?

Tempestate illa septenis montibus ingens  
Constiterat nubes, glomerataque turbine nigro  
Jamdudum, conturbatam deerrabat ad aulam.  
Romula nec ratio speculandi accommoda nisu  
Ipsamet ingenito <sup>69</sup> perquirere acumine novit  
Naturam rerum: Grajorum obscura reperla  
Seriis occultoque fores irrumpere clausas  
Tentavere, rudesque animas, et rebus agendis  
Natas una pati, atque audere ingentia facta  
Porticus <sup>70</sup> erudiit. Quaerens, ratione ministra,  
Quae vitae humanae species, extremaque meta,  
Ipsa fibris impressum imis divinitus omne  
Extudit officium; vitae normam ipsa regundae,  
Romani unde illa exiit sapientia juris,



Scribens privatos in publica commoda traxit,  
Et demum unius vitae mortalis amorem  
Praelata monstrans patria, virtutis honestae  
Semina certatim effigie collegit in una.  
Parte alia quamvis musaeo sparsa lepore  
Pocula, Lucretius <sup>71</sup> malefausta venena parabat.  
Namque animae has monstrans leges concessaque fata,  
Ut privata dolore omni, privata periculis  
Hoc mortale aevum summa cum pace fruatur,  
Romulidae, res turbare vix publica coepit,  
Civiles omnes fluctus, scopulosque tumentes  
Effugere optarunt, seque in pacata referre  
Otia. Sic nocuit patriae, et superante ruina  
Defuit auxilium: et quando refluantibus undis  
Bellorum alternisque iris Respublica cessit,  
Pessima praeclarum ingenium doctrina Quiritum  
Extinxit penitus, seque in secreta remorant,  
Maluerantque frui segnes, tutique silebant.  
Stoica tum demum ratio, subitoque calescens  
Suppositis flammis romanus spiritus; aulae  
Tum variae sordes, nulloque coercita freno  
Flagitia; inde vetus Zenoni innixa severo  
Roma, Epicureis hinc luxuriata ministris,  
Tentabat vulnus macie moritura supremum.

<sup>1</sup> *Servire mereris.* — Quod de Roma verissime affirmari potest: cum Neroniana tyrannis in omne nefas erupit, viri boni clarique exilio affecti, delatores praemio allecti, ipsi servi in dominorum capita subornati: quae omnia uno velut ictu Rempublicam exhausere. Quod de Domitiano ille ait, jam de Neroniana dominatione erat fatendum. Tac. Agri. 3. Dedimus profecto grande patientiae documentum, et sicut vetus aetas vidit, quid ultimum in libertate esset, ita nos quid in servitute, adempto per inquisitiones et loquendi audiendique commercio. Eo certe tempore, idem Tac. Hist. IV, 2: Civitas pavida et servitio parata. Eoque magis, quod eodem teste, Hist. I, 5. Ita quatuordecim annis a Nerone assuefactos, ut haud minus vitia principum amarent, quam olim virtutes verebantur.

<sup>2</sup> *Cassii.* — Hic est C. Cassius, Syriae quondam praeses, qui teste Tac. ceteros praemiuebat peritia legum, et in administratione provinciae revocabat priscum morem. De eo idem Tac. XII, 7. Objectavit Cassio, quod inter imagines majorum etiam C. Cassii effigiem coluisset ita inscriptam: *Duci partium.* Quippe semina belli civilis, et defectionem a domo Caesarum quaesitam. Ac ne memoria tantum infensi nominis ad discordias uteretur, adsumpsisse L. Silanum juvenem genere nobilem, animo praeruptum, quem novis rebus ostendebat.

<sup>3</sup> *Matresque ipsae.* — Tac. XI, 48. Inenit consulum Silius Nerva, et Atticus Vestinus, coepta simul et aucta conjuratione, in quam certatim nomina dederant, senatores, eques, miles, feminae etiam, cum odio Neronis, tum favore in C. Pisonem.

<sup>4</sup> *Classem.* — De Epicharide Tac. ib. 51. Cunctantibus, prolatantibusque spem ac metum, Epicharis quaedam, incertum quonam modo sciscitata accendere, et arguere conjuratos: ac postremo lentitudinis eorum pertaesca, et in Campania agens, primores classiariorum Misenensium labefacere, et conscientia illigare connixa est tali initio.

<sup>5</sup> *Fama.* — Tac. IV, 11. Atrocior semper fama erga dominantium exitus. Et Hist. III, 54. Prohibiti per civitatem sermones eoque plures: ac si liceret, vera narraturi, quia vetabantur, atrociora vulgaverant.

<sup>6</sup> *Aristogitona.* — Prae oculis ab Valerio Max. narrata habuimus, lib. II, in fine: Harmodii, et Aristogitonis qui Atheuas tyrannide liberare conati sunt, effigies aeneas Xerxes ea urbe devicta in regnum suum transtulit: longo deinde interjecto tempore, Zaleucus in pristinam sedem deportandas curavit. Rhodii quoque eas urbi suae appulsas, cum in hospitium publice invitassent, sacris etiam pulvinaribus collocaverunt. Nihil hac memoria felicius, quae tantum venerationis in tam parvulo aere possedit.

<sup>7</sup> *Bulla.* — Pueri *practextam* gerebant, usque ad annum XV, et *bullam auream* (lentis aut disci instar in cordis figuram). Ubi ejusmodi pue-

riila ornamenta deposuerat juvenis, tum primum in forum. mox in Capitolium ab amicis deducebatur, sumpta virili toga, quae etiam dicta *libera*. Tunc Bulla laribus donabatur. Pers. V.

Cum primum pavido custos mihi purpura cessit,  
Bullaque succinctis Laribus donata pependit.

Et magna illa celebritas *officium togae virilis* dicebatur. Plin. I, Epist. 9. Si quem interrogas: hodie quid egisti? respondeat: *Officio togae virilis interfui*.

\* *Recta coena*. — His qui salutatum assectatumque optimates ibant, cibi identidem in ipso domus limine impertiebantur: quos *sportulae* nomine appellari placuit in sportulis exhiberi solitos. Sed saepenumero et elegantioribus *coena recta*, idest justa et legitima dabatur: quod Mart. VIII, 49.

Promissa est nobis sportula, recta data est.

\* *Vendunt*. — *Emptio sub corona* captivos spectavit, qui coronati vendi solebant. Sed et *mangones* erant, scilicet hominum venditores, qui suco falsum colorem inducebant mancipiis, ut ea carius venderent. Quod vero noxiorum servorum vultui notas inurere candenti ferro solemne fuerit, satis indicat, quod ignominiae causa *inscripti* appellari consueverint; et Plin. XVIII, 2. de arvis loquens, quae contra veterum consuetudinem in servorum curam tradita fuerunt: Nunc eadem illa vineti pedes, damnatae manus, inscripti vultus exercent. — *Asciscit cives*. Prae ceteris Claudianus.

Haec est in gremium victos quae sola recepit  
Humanumque genus communi nomine fovit,  
Matris non dominae ritu, civesque vocavit  
Quos domuit, nexuque pio longinqua revinxit.

<sup>20</sup> *Romae*. — Praefectus annonae, qui a Reip. tempore ortum duxit, Imperatorum aevo magistratus ordinarius fuit, ejusque praecipua cura fuit *Frumentatio*, in eo posita, ut frumentum populo gratuito praeberetur. Ex illius auctoritate, singulis mensibus tesserae frumentariae viritim distribuebantur, quique eas habuerant, aliquo e publicis horreis adito, illas exhibebant, inscriptumque frumenti numerum a mensoribus accipiebant. Ad trecenta et novem horrea P. Victor recenset. Ad hanc populi Romani frumentationem Augustus, Tac. II, 59: Vetitis, nisi permissu, ingredi Senatoribus, aut equitibus romanis illustribus, seposuit Aegyptum, ne fame urgeret Italiam quisquis eam provinciam, claustraque terrae et maris, quamvis levi praesidio adversum ingentes exercitus insedisset. Hinc Vespasianus Hist. III, 8. Adjiciebat imperio consilium, quando Aegyptus, claustra annonae, vectigalia opulentissimarum provinciarum obtinerentur, posse Vitellii exercitum egestate stipendii frumentique ad deditionem subijci.

<sup>21</sup> *Irrumpit in urbes*. — Hinc illa Germanicae vitae laus apud Tac. de mor. Germ. 19: Nemo illic vitia ridet: nec corrumpere et corrumpi saeculum vocatur. Hinc XI, 53. Volitabantque per domos, per fora, rura quoque et

proxima municipiorum, peditesque permixti Germanis, quibus fidebat princeps, quasi externis.

<sup>12</sup> *Circi.* — Plin. XXXIII, 27. Visumque jam est Neronis principis spectaculis arenam Circi chrysocola sterni, quum ipse concolori panno aurigaturus esset. Svet. Nero 45. Forte accidit, ut in publica fame Alexandrina navis nunciaretur, pulverem luctatoribus aulicis advexisse. Quare omnium in se odio incitato nihil contumeliarum defuit, quia subiret.

<sup>13</sup> *Afforet unum.* — Svet. Calig. 30. Utinam populus Romanus unam cervicem haberet. Et Ner. 37: Elatus inflatusque tantis velut successibus negavit quemquam principum scisse, quid sibi liceret. Multasque nec dubias significaciones saepe jecit, ne reliquis quidem se passurum senatoribus, eumque ordinem sublaturum quandoque e republica, ac provincias et exercitus equiti romano et libertis permissurum.

<sup>14</sup> *Panem, et circenses.* — Juv. sat. 10, v. 80.

Duas res anxius optat (Pop. R.)

Panem et Circenses.

Tac. Hist. III, 54. Annonae curam sustinet princeps; haec missa funditus rempublicam trahet.

<sup>15</sup> *Regis.* — Romani ad aurei saeculi memoriam, quo Saturnus regnavit, quotannis XIV Kal. Jan. Saturnalia celebrabant, quibus erat servis rerum omnium data licentia et par cum Domino potestas.

<sup>16</sup> *Colossus.* — Plin. XXXIV, 18. Is (Zenodorus) postquam satis ibi artem approbaverat, Romam adscitus est a Nerone, ubi destinatum illius principis simulacrum colossus fecit, CX pedum longitudine, qui dicatus Soli venerationi est, damnatis sceleribus illius principis. Mirabamur in officina non modo ex argilla similitudinem insignem, verum et ex parvis admodum surculis quod primum operis instar fuit. — *Humanique facem generis.* Plin. VII, 6. de Agrippa locutus, infelicem vocat terris stirpe omni, sed per utrasque Agrippinas maxime, quae Cajum et Domitium Neronem principes genuere, *totidem facies generis humani.* Et hostem humani generis vocat VII, 6: Neronem quoque paulo ante principem, et toto principatu suo hostem generis humani.

<sup>17</sup> *Praetoria.* — De Sejano lib. IV, Tac. 11: Vim praefecturae modicam antea intendit, dispersas per urbem cohortes una in castra conducendo, ut simul imperia acciperent, numeroque et robore et visu inter se fiducia ipsis, in ceteros metus crederetur. Id testatur et Svet. Tib. 37. Romae castra constituit, quibus praetorianas cohortes vagae ante id tempus, et per hospitia dispersae continerentur. Quae castra inter portas Viminalem et Tiburtinam fuerunt. Vide Onophrium de urbe Romae.

<sup>18</sup> *Agrippa.* — Svet. de Augusto, Oct. 29. Publica opera plurima extruxit: ... Sed et ceteros principes viros saepe hortatus est, ut pro facultate quisque monumentis vel novis vel relictis et excultis urbem adornarent. . . M.

vero Agrippa complura et egregia. De Augusto Svet. Oct. 29. Urbem neque pro maiestate imperii ornatam, et inundationibus, incendisque obnoxiam, excoluit adeo, ut iure sit gloriatus, marmoream se relinquere, quam lateritiam accepisset.

<sup>19</sup> *Caelo*. — Prud. contra Symm. II, 338.

Spoliis sibi met nova numina fecit.

Et Minuc. Feli. in Oct. Sic dum universarum gentium sacra suscipiunt, regna etiam meruerunt.

<sup>20</sup> *Feretrî*. — Prop. IV, 8.

Nunc spolia in templo tria condita: causa Feretrî,

Omne quod certo dux ferit ense ducem;

Seu quia victa suis humeris haec arma ferebant:

Hinc Feretrî dicta est ara superba Jovis.

<sup>21</sup> *Latia tellure creatis*. — Indigetes vocabantur sive quia ex hominibus relati in Deos forent, sive quod inter Deos dicati consecratique essent, sive ab *indigetando*, quod ejusmodi ex humano genere ortos Deos aequae ac alios *indigetare* ( idest invocare ) fas esset: Virg. Georg. I, 498.

Dii patrii, Indigetes, et Romule Vestaque mater.

<sup>22</sup> *Angelus*. — Ariosto.

Michel più che mortale Angiol divino.

<sup>23</sup> *Virgineo*. — De aqua Virgine deque hujus nominis origine Front. de aquaeductibus, X, haec habet de Agrippa tertium consule: Virginem quoque in agro Lucullano collectam Romam perduxit. Virgo appellata est, quod quarentibus aquam militibus, puella virguncula venas quasdam monstravit, quas secuti qui foderant, ingentem aquae modum invenerunt. *Edicula* fonti apposita hanc originem pictam ostendit. Et Plin. XXXI, 23; Agrippae attribuit aquam Marciam restitutam. Et de eodem: Et virginem adduxit ab octavi lapidis diverticulo duobus millibus pass. Praenestina via.

<sup>24</sup> *Avtis*. — Svet. Nero, 30. Menecratem citharoedum, et Spiculum Mirmillonem triumphalium virorum patrimoniis aedibusque donavit.

<sup>25</sup> *Senecio*. — Quinam hi fuerint, Tac. IX, 12. paucis describit, de lapsu Nerone in amorem libertae cui vocabulum Acte fuit, simul adsumptis in conscientiam Othone, et Claudio Senecione adolescentulis decoris, quorum Otho familia consulari, Senecio, liberto Caesaris patre genitus, ignara matre, dein frustra obnitente, penitus irrepperat per luxum et ambigua secreta. De eodem IX, 46. Dejicitur familiaritate sueta, post congressu et comitatu Otho: et ad extremum, ne in urbe aemulatus ageret, provinciae Lusitanae praeficitur, ubi usque ad civilia arma, non ex priore infamia, sed integre sancteque egit, procax otii et potestatis temperator. — *Milvius*. Tac. IX, 47. Pons Milvius eo tempore celebris nocturnis illecebris erat, ventitabatque illuc Nero, quo solutius extra urbem lasciviret. — Et Svet. Nero 26. — Post crepusculum statim arrepto pileo, vel galero popinas inibat, cir-

cumque vicos vagabatur ludibundus, nec sine pernicie tamen. Siquidem redeuntibus a coena verberare, ac repugantes vulnerare, cloacisque demergere assuebat, tabernas etiam effringere, et expilare. — *Paris*. Histrio libertus, ut a Tac. vocatur IX, 20. et 22. Validiore apud libidines principis Paride. — *Vatinius*. XI, 34. *Vatinius* inter foedissima ejus aulae ostenta fuit, sutrinae tabernae alumnus, corpore detorto facietisque scurrilibus primo in contumelias assumptus, deinde optimi cujusque criminatio- ne eo usque valuit, ut gratia, pecunia, vi nocendi, etiam malos prae- mineret. — *Quintanus*. Apud Tac. est Quintianus, qui detecta conjuratione et promissa impunitate corruptus: de eo et Senecione Tac. XI, 57. *Quin- tianus* Glicium Gallum, Senecio Annium Pollionem amicorum praecipuos nominavere. — *Sporus*. Svet. Ner. 28. Nunc Sporum Augustarum orna- mentis exultum, lecticaque vectum et circa conventus, mercatusque Grae- ciae, ac mox Romae circa Sigillaria comitatus est. De *Petronio* et *Pythago- ra* alibi.

“ *Argento*. — Svet. Ner. 30. Soleis mularum argenteis, canusinatis mu- lionibus, armillata et phalerata cum Mazacum turba et cursorum. — Et Plin. XXXIX, 49. At nos carrucas ex argento caelare invenimus, nostraque aetate Poppaea conjux Neronis principis delicatioribus jumentis suis soleas ex auro quoque induere.

“ *Et speciem capsii*. — Currus triumphales non unquam Romanis alii fuerunt quam quadrigae. At in his quadrigis fuit singulari forma capsus, tanquam turricula rotunda et circumclusa. In eo imperator stans regebat equos.

“ *Zeta*. — Idem est ac *diaeta*, quae ea fuit domorum pars, majoribus cubiculis annexa, ut veluti seorsim posita atque itu redituque libera remo- tum aliquem daret receptum, qualia nos Itali *gabinetto, alcovo, ritiro*. Plin. II, ep. 17. *diaeta* perquam eleganter recedit; quae specularibus et velis ob- ductis reductisque modo adjicitur cubiculo, modo aufertur.

“ *Maculoso e corpore pellit*. — Svet. Ner. 71. Corpore fuit maculoso et foetido, sufflavo capillo; vultu pulchro magis, quam venusto, oculis caesiis et hebetioribus, cervice obesa, ventre projecto, gracillimis cruribus. — *Syn- thesin*. Svet. Ner. 51. — Ac plerumque synthesium indutus, ligato circum collum sudario, prodierit in publicum sine cinctu et discalceatus.

“ *Cinaedum*. — Svet. Ner. 51. Circa cultum habitumque adeo puden- dus, ut comam semper in gradus formatam, peregrinatione Achaica, etiam pone verticem summiserit.

“ *Puellus*. — Ipsamet Poppaeae verba. Tac. XI, 50. Aliquando per facetias incusare principem, et pupillum vocare, qui jussis alienis obao- xius, non modo imperii sed libertatis etiam indigeret. Caeterum haec ne- roniana vivendi ratio corruptissimis quibusque imperatoribus celebrata fuit. Pro omnibus illud Tac. Hist. II, 71. de Vitellio: Quantoque magis propin-

quabat, tanto corruptius iter, immixtis histrionibus et spadonum gregibus, et cetera neronianae aulae ingenio. Namque et Neronem ipsum Vitellius admiratione celebrabat, sectari cantantem solitus, non necessitate, qua honestissimus quisque, sed luxu, et saginae mancipatus emptusque.

<sup>22</sup> *Tibicinis artem* — Eucerus, Octaviae libertus Tac. X, 60. Destinaturque reus cognomento Eucerus, natione Alexandrinus, canere tibiis doctus, de quo Poppaea, 61. An, quia veram progeniem penatibus Caesarum datura sit, malle populum Romanum tibicinis aegyptii sobolem imperatorio fastigio induci?

<sup>23</sup> *Eruet.* — Revocata paullisper conjuge Octavia, ingens Romae laetitia popularis. Tac. X, 61. Exin laeti Capitolium scandunt, deosque tandem venerantur. Effigies Poppaeae prouunt: Octaviae imagines gestant humeris, spargunt floribus, foroque ac templis statuunt.

<sup>24</sup> *Acten.* — Tac. X, 12. Delapso Nerone in amorem libertae, cui vocabulum *Acte* fuit. . . Sed Agrippinam libertam aemulam, nurum ancillam aliaque eundem in modum muliebriter fremere.

<sup>25</sup> *Laeta creandis.* — Tac. XII, 1. Cur enim differri nuptias suas? formam scilicet displicere et triumphales avos? an foecunditatem et verum animum? . . . Quod si nurum Agrippina nonnisi filio infestam ferre posset, redatur ipsa Othonis conjugio: ituram quoquo terrarum, ubi audiret potius contumelias imperatoris, quam viseret, periculis ejus immixta.

<sup>26</sup> *Bovillas.* — Tac. XI, 23. Locus puerperio colonia Antium fuit, ubi ipse generatus erat. Jam senatus utrum Poppaeae commendaverat diis, vota quoque publice suscepserat. Quae multiplicata exolutaque. Et additae supplicationes, templumque Fecunditati, et certamen ad exemplar atticae religionis decretum; utque Fortunarum effigies aureae solio Capitolini Jovis locarentur: ludicrum cirkense, ut Juliae genti apud Bovillas, ita Claudiae Domitiaeque ederetur.

<sup>27</sup> *Monstrosaue cuncta.* — Satis est illud Taciti XI, 42. Magistris. et machinatoribus Severo et Celere, quibus ingenium et audacia erat, etiam quae natura denegavisset, per artem tentare, et viribus principis illudere. Verum paulo post de Nerone ipso subjicit: Nero tamen ut erat incredibilium cupitor, effodere proxima Averno juga connixus est, manentque vestigia irritae spei. Hor. II, ep. 1. suo ab usque tempore dramaticam poësin a suo ingenio excidisse notat, nec in scena aliud nisi spectacula desiderari.

Media inter carmina poscunt

Aut ursum aut pugiles. His nam plebecula gaudet.

Verum equiti quoque jam migravit ab aure voluptas

Omnis ad incertas aures et gaudia vana.

Quatuor aut plures aulae premuntur in horas.

<sup>28</sup> *Famam.* — Haec omnia uti Tacitus descripsit, referimus. Tac. XI, 37. Igitur in stagno Agrippae fabricatus est ratem cui superpositum convi-



vium aliarum tractu navium moveretur: naves auro et ebore distinctae, remigesque exoleti. Volucres et feras diversis e terris et animalia maris Oceano abusque petiverat. Et postquam tenebrae incedebant, quantum juxta nemoris, et circumjecta tecta, consonare cantu, et luminibus clarescere.

<sup>13</sup> *Una voluptas.* — Lege sis Hor. II, Sat. 4. Ubi a Catio quodam Epicureo Philosopho accipit lepida quaedam praecepta de ferculis, et re culinaria

qualia vincant

Pythagoram, Anytique reum doctumque Platona.

<sup>40</sup> *Venerabilis auctor.* — Tacitus politicae historiae facile pater. Qui opus illud mirabile Romanae Reipublicae ad interitum ruere contemplatur, et identidem consistit, ut virtuti, si quae praeteritorum temporum recodationem refert, singulare solvat elogium. Utque a Neronianis temporibus non discedamus praecipue XII, 16. At nunc patientia servilis, tantumque sanguinem domi perditum fatigant animum, et moestitia restringunt. Neque aliam defensionem ab iis quibus ista noscentur, exegerim, quam ne oderim tam segniter pereuntes. Ira illa numinum in res Romanas fuit, quam non ut in cladibus exercituum, aut captivitate urbium, semel editam transire liceat. Detur hoc illustrium virorum posteritati, ut quando exequiis a promiscua sepultura separantur, ita in traditione supremorum accipiant, habeantque propriam memoriam. Quanta vero indignatione ad Thraseae mortem accedit? lb. 20. Trucidatis tot insignibus viris ad postremum Nero virtutem ipsam excindere concupivit, interfecto Thrasea Poeto, et Barea Sorano. Quae verba, quantaque caritate patriae referta inducit Thraseam loquentem in ipso mortis limine? 33. Specta, juvenis, et omen quidem dii prohibeant; ceterum in eo tempore natus es, quibus firmare animum expediat constantibus exemplis. Verum, si hujus publicae virtutis documenta missa faciamus, Tacitique opiniones de diis, deque mundi gubernatione inspicimus, cum, ut ceteros ejusdem aetatis doctissimos viros assidua dubitatione fluctuantem videmus. Sufficiant VI, 22. Sed mihi haec et talia audienti in incerto judicium est, satone res mortalium et necessitate immutabili, an sorte volvantur, quippe multis insitam opinionem reperies non initia nostri, non finem, non denique homines diis curae: ideo creberrima et tristia in bonos, laeta apud deteriores esse. Nonne eadem cogitabat Tiberius? qui Svet. teste in Tib. 69: Circa religionem negligentior, quippe addictus mathematicae, persuasionisque plenus cuncta fato agi. De animae immortalitate etiam Tacitus dubitabat: in quam opinionem nos inducit illa Judaeorum admiratio: Hist. V, 5. Animas aeternas putant; hinc generandi amor, et moriendi contemptus. Quamvis naturali quodam impetu anima ipsa sua jura vindicare videtur in fine Agri. ubi quamvis dubitanter idem Hist. 46. Si quis piorum manibus locus; si, ut sapientibus placet, non cum corpore extinguuntur magnae animae; placide quiescas.



<sup>41</sup> *Venit in aedes.* — Juv. XI, 14.

Gustus elementa per omnia quaerunt.

Sallust. Cat. 13. Vescendi causa terra marique exquirere. Juv. VI, 291.

Saevior armis

Luxuria incubuit, victumque ulciscitur orbem.

<sup>42</sup> *Nobile garum.* — Garum liquamen ex intestinis piscium sale maceratum. Mart. 13.

Nobile nunc sitio luxuriosa garum.

<sup>43</sup> *Smaragdis.* — Materia ex qua confici consueverant pocula, multiplex fuit: non raro conflata e ligno, saepe e creta; e quorum fictilium genere fuere *Samia* et *Saguntina*, altera e Samo, e Sagunto altera — Frequentia fuere *vitrea* et *crystallina*, et etiam *aurea* vel caelata, vel emblematis, crustisque ornata, et gemmis distincta. Unde illa Plinii acclamatio, Praef. 33. Turba gemmarum potamus, et smaragdis teximus calices. Interdum tota pocula ex una gemma. Quale illud Verris, de quo Tull. IV, in Verr. 27. Ex his vero gemmeis erant perillustria *murrina* e murra magni pretii lapide confecta. Eaque ab Oriente mitti solita testatur Plin. XXXVII, 2.

<sup>44</sup> *Terrae imperium Nero.* — De Augusto Horatius, I, 11.

Gentis humanae pater atque custos,

Orte Saturno, tibi cura magni

Caesaris fati data: tu secundo

Caesare regnes.

At idem Lucanus, Phars. I, canebat de Nerone:

Te, quum statione relicta

Astra petes serus, praelati regia caeli

Excipiet, gaudente polo, seu sceptrum tenere,

Seu te flammigeros Phoebi conscendere currus,

Telluremque nihil mutato sole timentem

Igne vago lustrare juvat.

*Deum.* — Tac. XII, cap. ult. Tamquam humanum fastigium egresso. Et XII, 31. Nulla mihi Caesaris mentio, nisi inter numina.

<sup>45</sup> *Molorchi.* — E Virg. haustum Georg. III, 19.

Cuncta mihi Alpheum linquens ludosque Molorchi

Cursibus et crudo decernet Graecia cestu.

Ubi per Alpheum, Elidis in Peloponneso fluvium prope Olympiam urbem certamina intelligit *Olympia*: per lucos *Molorchi* certamina *Nemaea*. Molorchus fuit in agro Cleonaeo hospes Herculis, in cujus gratiam Hercules leonem Nemaeeum sive Cleonaeum interfecit. — *Quadrigas.* Tac. X, 14. Vetus illi cura erat, curriculo quadrigarum insistere, nec minus foedum studium, cithara ludicrum in modum canere, cum coenaret.

<sup>46</sup> *Proscenia plausu.* — Svet. Ner. 21. Tragoedias quoque cantavit personatus: heroum deorumque, item heroidum ac dearum personis effectis ad

similitudinem oris sui, et foeminae prout quamque diligeret. Inter cetera cantavit Canacem parturientem, Oresten matricidam, Oedipodem excaecatam, Herculum Insanum.

<sup>41</sup> *Vel Apolline major.* — Svet. Ner. 53. Destinaverat etiam, quia Apollinem cantu, solem aurigando aequiparare existimaretur, imitari et Hercules facta: praeparatumque leonem ajunt, quem vel clava, vel brachiorum nexibus, in amphitheatri arena, spectante populo, nudus elideret.

<sup>42</sup> *Communis origo.* — Horrorem injiciunt verba Juvenalis VI, 219.

Pone crucem servo: meruit quo crimine servus  
Supplicium? quis testis adest? quis detulit? Audi:  
Nulla unquam de morte hominis cunctatio longa est.  
O demens? ita servus homo! nil fecerit; esto!  
Sic volo, sic jubeo: stat pro ratione voluntas.

<sup>43</sup> *Improba caedes.* — Manilius IV, 225.

Nunc caput in mortem vendunt, et sanus arenae  
Atque hostem sibi quisque parat, dum bella quiescunt.

<sup>44</sup> *Labiis caelestibus haeret.* — Sil. XI.

Quin etiam exhilarare vivis convivia caede  
Mos olim, et miscere epulis spectacula dira  
Certantum ferro, saepe et super ipsa cadentum  
Pocula, respersis non parco sanguine mensis.

<sup>45</sup> *Salutat.* — Svet. Tib. Claud. 21. Proclamantibus naumachariis: ave Imperator, morituri te salutant, respondit: avete et vos.

<sup>46</sup> *Bellatur acutis.* — Commissi gladiatores brachia et arma ad quamdam speciem jactando proludebant: quod solemnī vocabulo *ventilare arma* et *praeludere* dicebatur. Haec *lusoria*: *decretoria* quibus ad tubae signum adsumptis manus inter se conserebant. Arma *lusoria* erant *rudes* et *hebetes gladii*: arma vero *pugnatoria* vel *decretoria gladii* erant *acuti*.

<sup>47</sup> *Mirmillona.* — Mirmillones ante *Galli*, dicti a *μормυρος*, mormyris, piscis genus in Ponto, de quo Plin. XXXII, 11. Quia in eorum galeis hujus piscis effigies inerat. Genus mirmillonicum armaturae Gallicum est.

<sup>48</sup> *Exultans Nero.* — Tac. XI, 37. Ipse per licita atque illicita foedatus, nihil flagitii reliquerat, quo corruptior ageret.

<sup>49</sup> *Pythagoras.* — XI, 37. Uni ex illo contaminatorum grege, cui nomen Pythagorae fuit, in modum solemnium conjugiorum denupsisset.

<sup>50</sup> *Minoia tellus.* — Hic de Europa agitur, filia Agenoris, Phoenicum regis, quam Jupiter in vitulum transformatus abduxit in Creten, qua genuit Minoem et Rhadamantum.

<sup>51</sup> *Erumpere ab ovo.* — Hor. II, 1, Sat.

Castor gaudet equis, ovo prognatus eodem  
Pugnis.

Commenti sunt Poëtae Ledam ab Jove sub oloris specie concepisse ovum ex quo Castor et Pollux nati sunt.

<sup>88</sup> *Jove natus ab auro.* — Hor. III, 11.

Inclusam Danäen turris ahenæa

Robustaeque fores, et vigilum canum

Tristes excubiae munierant satis

Nocturnis ab adulteris;

Si non Acrisium virginis abditæ

Custodem pavidum Jupiter et Venus

Risissent: fore nam tutum iter et patens

Converso in pretium Deo.

Ex his nuptiis natus Perseus, Gorgonum intersector.

<sup>89</sup> *Hebe.* — Latine *Juventas*, apud Graecos est Juventutis Dea, filia Jovis et Junonis quæ pocula diis ministrabat, ne Dii senescerent. Ea ab officio amota, ejus loco subrogatus est Ganymedes, trojani regis filius.

<sup>90</sup> *Briareus.* — Homerus narrat, I, Iliad. cum Juno, Pallas, Neptunus aliique dii contra Jovem conjurassent, Briareum gigantem in caelum ascendisse, ut Jovi suppetias ferret: ejus autem adventu territos Deos ab incepto destitisse.

<sup>91</sup> *Minervam.* — Eadem ac Pallas, dea ingeniorum et disciplinarum praeses. Poëtae fabulantur natam esse ex cerebro Jovis armatam; Jovi autem febricitanti Vulcanum securi cerebrum percussisse, unde exiit Minerva. Si Cic. de nat. Deor. I, vis audire: Hoc commento significare volunt, litterarum disciplinas humani ingenii non esse inventum, sed e Jovis cerebro. *Marte* — Mars Deus belli praeses, qui, ut Ovidius fabulatur, solius Junonis fuit filius. Quæ videns Jovem procreasse Minervam, Floræ monitu in Campis Oleniis florem tetigit: quo tactu ipsa concepit et peperit Martem. *Exemplum memorabile.* En ipsum Ethnicorum de suis diis judicium. Propert. III, 9.

Namquid ego Heroas, quid raptem in crimina Divos?

Jupiter infamat seque suamque Domum.

<sup>92</sup> *Diffundere regna.* — Apost. Phil. II, 21. Omnes enim quæ sua sunt, quaerunt, non quæ Jesu Christi. Et I, 18 clarius. Quid enim? dum omni modo sive per occasionem, sive per veritatem Christus annuncietur, et in hoc ego gaudeo, sed et gaudebo.

<sup>93</sup> *Beati.* — Matth. V, 6. Beati qui lugent, quoniam ipsi consolabuntur.

<sup>94</sup> *Bonos.* — Id Tac. Hist. I, 87. Criminando, quod facillimum factum est, pravus et callidus bonos et modestos anteibat.

<sup>95</sup> *Nescire.* — Svet. Ner. 10. Cum de supplicio cujusdam capite damnati, ut ex more subscriberet, admoneretur: Quam vellem, inquit, nescire literas!

<sup>96</sup> *Detestabile nasci.* — Svet. 6. De genitura ejus statim multa et for-

midolosa multis conjectantibus, presagio fuit etiam Domitii patris vox, inter gratulationes amicorum negantis quidquam ex se, et Agrippina, nisi detestabile et malo publico nasci potuisse. — *Saltator*. Trimulus patrem amisit . . . et matre relegata. pene inops, atque egens, apud amitam Lepidam nutritus est, sub duobus paedagogis, saltatore, atque tonsore.

<sup>67</sup> *Voluntas*. — Sic Juv. Sat. 6.

Sic volo, sic jubeo: stat pro ratione voluntas.

<sup>68</sup> *Tempora rerum*. — Tac. Agr. 11. Neque in ipsos modo auctores, sed in libros eorum saevitum, delegato triumviris ministerio, ut monumenta clarissimorum ingeniorum in comitio et foro urerentur.

<sup>69</sup> *Ipsamet ingenito*. — Id a Lucretio haurire licet, qui in latiali lingua ne nomina quidem reperiebat, quibus graecanicas speculationes significaret. I, 137.

Nec me animi fallit, Grajorum obscura reperta

Difficile illustrare latinis versibus esse;

Multa novis verbis praesertim cum sit agendum

Propter egestatem linguae et rerum novitatem.

Ceterum si alia deficerent testimonia, satis illud esset Taciti, Vit. Agr. 3. Memoria teneo solitum ipsum narrare, se in prima juvenia studium philosophiae acrius, ultra quam concessum Romano ac Senatori hausisse, nō prudentia matris incensum et flagrantem animum coërcuisset.

<sup>70</sup> *Porticus*. — Stoici, genus philosophorum, a Zenone Itico originem habuere, ita dicti a *Soa*, *porticus*, quod Zeno Athenis Philosophiam docuit in illa porticu, quae poecile vocabatur, a Polignoto gratuito depicta. Quamvis innumeris erroribus implicaretur, haec philosophia nihil bonum existimabat, nisi honestum; felicitatem in sola virtute constituebat: in quo sit virtus, nihil ad beate vivendum deesse: solum sapientem esse divitem, formosum, regem. Uti Hor. Sat. 1, 3.

Si dives qui sapiens est,

Et sutor bonus, et solus formosus, et est Rex.

Hanc philosophiam professi sunt praecclarissimi quique Romani, et fatendum est, quod e porticu prosiluit illa Heroum gloriosissima phalanx, quae a Scipionibus coepit, in Cassio desiit. Id ipsum lamentatur ille Thraseae inimicus Capito Cossutianus praeter animum ad flagitia praeceps. Tac. XII, 22. Aut transeamus ad illa instituta, si potiora sunt, aut nova cupientibus auferatur dux et auctor. Ista secta Tuberones, et Favonios, veteri quoque reipublicae ingrata nomina genuit. Ut imperium evertant, libertatem praeferunt; si praeverterint, libertatem ipsam aggrediuntur. Frustra Cassinum amovisti, si gliscere, et vigere Brutorum aemulos passurus es.

<sup>71</sup> *Lucretius*. — Ciceronis aetatem non multo antecessit, primusque inter poetas latinos res philosophicas tractavit, sex libris de rerum natura, ubi philosophiam Epicuri Romae per familiarem reddidit. Qui quidem, ut ait Cic.

de nat. deor., posuit summum bonum non in voluptate mobili, quae sensibus percipitur, ut Aristippus, sed in voluptate stabili, quae in animo potissimum sita est, nullo dolore, nec praesente, nec imminente. Sed ad voluptates corporis discipuli eam sectam traxerunt: unde *Epicureus* est voluptatibus deditus. Neque aliam certe philosophiam, musaco lepore venenum conspersum, suis civibus propinavit Lucretius. Potissimum inter civilia bella Romani in hac philosophia conquieverunt, eaque facilius sese propagavit sub Imperio, in illa omnium bonarum artium corruptela.

101 146 4805

**PRESIDENZA DEL CONSIGLIO GENERALE DI PUBBLICA  
ISTRUZIONE**

**Rip.º**

**Car.º**

**N.º 14**

**Oggetto**

*Napoli 25 luglio 1858.*

Vista la domanda del tipografo Gennaro Agrelli con che ha chiesto porre a stampa l'opera intitolata *Petreidos libri XXIV* dell' Abate Mirabelli;

Visto il parere del R. R. sig. D. Raffaele di Gennaro;

Si permette che la suddetta opera si stampi ; però non si pubblichi senza un secondo permesso che non si darà se prima lo stesso Regio Revisore non avrà attestato di aver riconosciuto nel confronto esser l'impressione uniforme all' originale approvato.

Il Consultore di Stato Presidente provv.

**CAPOMAZZA**

Il Segretario Generale

*Giuseppe Pietrocola*

---

**COMMISSIONE ARCIVESCOVILE**

per la

**REVISIONE DE' LIBRI**

*Nihil obstat*

**Antonius Cercia**

**Censor Theologus**

**Imprimatur**

**Pro Dep.º**

**Leopoldus Ruggiero**



## ERRATA

Pag. IV. v. 21 e diuturna  
 ivi v. 29 Calaccis  
 147 v. 31 copulabimur  
 154 v. 10 Lucius  
 169 v. 7 poeniteat  
 ivi v. 13 Dionysium  
 ivi v. 26 Et animus  
 233 v. 5 Copulata,  
 253 v. 14 Incredibilium  
 366 v. 10 Romuleo cocna  
*Vol. I.*

## CORRIGE

e diuturna  
 Galloecis  
 sociabimur  
 Leucius  
 poeniteat  
 Virum illustrem  
 Est animus  
 Sociata  
 Spesque incredibiles et foedae gaudia men-  
 tis  
 Romuleo quae dona  
 51



A01 1466805







